



BIBLIOTECA NAZ.
Vittorio Emanuele III

XVI

B

3

NAPOLI



C. 17-13.

XVI

B

3

•

•

•

•

•

•

•

•

—

1924

XVI. ~~2-16~~

13

3-7

INSTITUTIONES B.
JURIS
ECCLESIASTICI,
MAXIME PRIVATI,
ORDINE DECRETALUM.

AUCTORE
JAC. ANT. ZALLINGER
AD TURRIM,
S. S. THEOLOGICÆ AC JURIS UTRIVSQUE
DOCTORE,
ET IN LYCEO CATHOLICO AUGUSTANO
AD S. SALVATOREM S.S. CANONUM
PROFESSORE PUBLICO
ORDINARIO.

LIBER I. DECRETALIUM.

CUM APPROBATIONE RRMI ORDINARIATUS.

AUGUSTÆ VINDELICORUM,
SUMPTIBUS MATTHÆI RIEGER P. M. FILIORUM.

M D C C X C I I. - 3



Si vis Patronum quærere,
Si vis potentem Vindicem,
Quid jam moraris? invoca
Apostolorum Principem.

*Ex Responorio SS. D. N. Pii P. VI. in honorem B.
Petri Apostolorum Principis.*



BEATISSIMO
PETRO,
GLORIOSISSIMO
APOSTOLORUM PRINCIPI,
FIDELISSIMO CÆLI CLAVIGERO,
DOMINICI GREGIS PASTORI VIGILANTISSIMO,
OPTIMO FIDELIUM PATRI,
DOCTORI SAPIENTISSIMO,
ECCLESIAE MILITANTIS GUBERNATORI POTENTISSIMO,
FIDEI CAPITI,
RELIGIONIS FUNDAMENTO,
DOMINI NOSTRI,
AC
SERVATORIS JESU CHRISTI
VICARIO PERPETUO.

Ecclésiastici Juris Institutiones, pro usu explicandorum Canonum conscriptas a me, coram Apostolica Sede Tua, in qua nunc etiam vivis ac praesides, & quaerentibus fidei veritatem praestas, meque una supplex prosterno, Beatissime Petre! Neminem enim, vel caelestium civium, qui salutaris doctrinae, ac gubernationis Tuae ope Tecum triumphant in caelis, vel eorum, qui hic militant in terris, propius ea res, veriusque attingit. Quemadmodum vero de instituto divinitus pastoralis officio, quo nunquam non fungeris, perpetuaeque regendae Ecclesiae cura, & amplissima potestate, tanquam incomparabili caeli dono, infinitas divinae Majestati gratias habeo; ita de sempiterna salute mea anxius, tanquam ovis a Summo Pastore, auxilium flagito, ac temporum perturbatione contritus ab immota Petra firmitatem & robur posco. Fac igitur singularibus apud Deum meritis, precibusque Tuis, ut assimiler viro sapienti, qui aedificavit domum suam supra Petram; & descendit pluvia, & venerunt flumina; flaverunt venti, & irruerunt in domum illam; & non cecidit; fundata enim erat supra Petram.

AD-



ADPROBATIO.

Institutiones juris Ecclesiastici maxime privati ordine Dècretallum auctore P. R. & Clarissimo D. Jacobo de Zallinger SS. Theol. & Juris utriusque Doctore, & Augustæ ad S. Salvatorem Canonum Professore, eoquod nihil contineant contra Fidei catholicæ, bonorumve Morum Principia, & solidam tum discentibus, tum universim legentibus exhibeant catholicæ Ecclesiæ canonicam doctrinam, typo dignissimas Censeo. Augustæ Vindel. die 26. Octob. Anno 1791.

Imprimatur.

*Datum ex Reverendissimo Vicariatu,
Aug. Vind. die 26. Octob. 1791.*

TH. JOS. DE HAIDEN,
J.U.D. Eminentissimi ac Serenissimi D.D. Archiepisc. & Electoris Trevirensis, Episcopi August. &c. &c. Consil. Intimus, Provicar. & Vice- Official. & Can. Eccl. Colleg. ad S. Gert.

JOS. ANTON STEINER,
SS. Theol. Doctor, Eminentissimi ac Ser. Elect. & Archiepisc. Trev. Episc. Aug. Consil. Eccles. major Pœnit. Consistorii Assess. Visitat. generalis, ad insign. Colleg. S. Mauritii Canonicus, & librorum Censör.



SERIES TITULORUM.

PROLEGOMENA.

De Jure naturali, & Ecclesiastico Publico conjungendo cum institutionibus Juris Decretalium. - - *Pag. 1*

TITULI LIBRI I. DECRETALIIUM.

I. De Summa Trinitate, & Fide catholica.	60
II. De Constitutionibus.	79
III. De Rescriptis.	143
IV. De Consuetudine.	157
V. De Postulatione Prælatorum.	169
VI. De Electione, & Electi potestate.	194
VII. De Translatione Episcopi.	235
VIII. De Auctoritate, & Usu Pallii.	242
IX. De Renuntiatione.	251
X. De supplenda negligentia Prælatorum.	256
XI. De Temporibus Ordinationum, & qualitate Ordinandorum.	264
XII. De	

TITULI LIBRI I. DECRETALIUM.

XII. De Scrutinio in Ordine faciendo.	Pag. 292
XIII. De Ordinatis ab Episcopo, qui renuntiavit Episcopatu.	296
XIV. De Ætate, & qualitate, & Ordine Præficiendorum.	301
XV. De sacra Unctione.	312
XVI. De Sacramentis non iterandis.	314
XVII. De Filiis Presbyterorum ordinandis, vel non.	315
XVIII. De Servis non ordinandis, & eorum Manumissione.	320
XIX. De Obligatis ad Ratiocinia ordinandis, vel non.	324
XX. De Corpore vitiatis ordinandis, vel non.	325
XXI. De Bigamis non ordinandis.	328
XXII. De Clericis peregrinis.	330
XXIII. De Officio Archidiaconi.	332
XXIV. De Officio Archipresbyteri.	ibid.
XXV. De Officio Primicerii.	ibid.
XXVI. De Officio Sacristæ.	ibid.
XXVII. De Officio Custodis.	ibid.
XXVIII. De Officio Vicarii.	ibid.
XXIX.	



PROLEGOMENA

DE JURE NATURALI, ET ECCLESIASTICO
PUBLICO CONJUNGENDO CUM INSTITU-
TIONIBUS JURIS DECRETALIIUM.

CAPUT I.

DE SEGREGATIONE DISCIPLINARUM.

ARGUMENTUM.

I. Cur in exponendo Ecclesiastico jure ordo teneatur Decretalium, ac titulorum. §. 1. II. Ab institutionibus juris Ecclesiastici an & quatenus segregandæ sint aliæ disciplinæ, ejusdem veluti affines. §. 2. III. Præsertim disciplina juris naturalis. §. 4.

De instituto hujus scriptionis non uno ex capite rationem a me reddendam esse eruditiss. Lectoribus, video; quod cum adgredior sine cunctatione ulla, eam mihi ab æquitate eorundem veniam concessum iri confido, ut, quid sentiam ipse de recta canonicarum institutionum via atque ordine, aperte edisseram, cum præsertim, ex quo a percipiendis gravioribus disciplinis discessi, omnem prope in iis publice tradendis ætatem triverim, atque in hac ipsa sacrorum canonum palæstra difficillimis temporibus tertium jam lustrum proxime exegerim, in id uni-
ce perpetuoque intentus, ut cupida sacrarum legum
Zallinger L. I. Decretal. A juven-

juventus quam optimis doctrinis, viaque & ratione aptissima imbueretur. Equidem neminem contemno doctorem, scriptoremve in hoc genere, qui quidem divinæ Religionis instituta, ejusque velut spiritum, & sacrosanctæ Ecclesiæ auctoritatem, sacrosque canones habere se cordi & præ oculis ostendit, idque agit docendo, scribendove, ut ædificet, non ut profanet, ut æterni tribunal Judicis, non judicia hominum timeat perversorum, ut denique summo Deo, ejusque Ecclesiæ servire, non autem ecclesiasticæ potestatis hostibus præstare obsequium elaboraret. Hoc animo si canonum interpretes sint, eos maximi a me fieri, atque ab iis multa me didicisse profiteor; sed hanc veniam petimusque, damusque vicissim, ut aliena non vituperantes, nostra sequamur, teneamusque. De præsentī igitur instituto meo, si quis interroget;

I. Cur ordo teneatur Decretalium, ac titularum, uti extant in corpore juris sacri; quod aliter sit a plerisque hodie scriptoribus:

§. 1. Respondeo, I. quia in scholis aliqua canonum collectio tanquam interpretationis & institutionis materies, & in judiciis tanquam decisionum norma proposita esse debet. Atqui Gregorius P. IX, a quo auctoritatem habet collectio, quæ extat in corpore juris, sic ait: *Volentes igitur, ut hac tantum compilatione universi utantur in judiciis, & in scholis, districtius prohibemus, ne quis præsumat aliam facere absque auctoritate Sedis Apostolicæ speciali (a).*

II. Quia eadem exhibetur reverentia juri Justiniano, etsi in subsidium tantum juris patrii sit adoptatum, ut tum Institutiones, tum Pandectæ eo prælegantur ordine, quo in corpore ejusdem extant.

III. Quia

III. Quia hac forma atque hoc ordine jus canonicum dudum receptum fuit, vigetque etiam nunc in Germania, in summis adeo tribunalibus imperii (b).

IV. Quia, si hoc ordine exponitur jus sacrum, multo maxima ejus pars refertur ad jura status Ecclesiastici *privata*, quæ præ ceteris nosse debent, qui ad sacros ordines & pastorem curam adspirant. Ea jura a recentissimis apud nos scriptoribus leviter attingi hodie solent; cum per omnes fere tractationes suas de juribus magistratuum politicorum & controversiis publicis declament, eaque re ad destruendum omne jus sacrum multo plus, quam ædificandum, conservandumve operæ conferant.

V. Quia ex scriptoribus hodie natis apud nos alius alium, atque alium tenet ordinem in gravissimis pertractandis rebus; id quod mihi visum est, privatorum arbitrio minime relinqui debere; cum eam ob causam sciri haud possit, quæ sit propria cujusque argumenti veluti sedes: quo loco idem in antiquis Decretalium commentationibus sit investigandum: quid denique commodi ex recentibus libris præ antiquis, comparatione facta, studiosi ejus juris exspectare queant.

(a) In præfatione, seu epistola data a. 1230.

(b) *Ordinat. Judicii imperialis aulici. Tit. VII. §. 24.*

II. *A jure Decretalium, inquiunt, differunt doctrinæ Ethicæ: differt disciplina naturalis juris, & Ecclesiastici publici: differt theologia moralis, ac multo etiam magis dogmatica; jussu igitur segregantur istiusmodi institutiones.*

§. 2. Respondebo primo generatim. Varietas institutionum, & multitudo Doctorum eodem tempore

pore opplentium aures teneras vehementer officit progressibus discentium, haud secus, ac vaga lectio; id experientia docet, ipsaque ratio. Qui enim his disciplinis præsunt, definiunt omnes, dividunt, asserunt, confirmant, disputant, idem scilicet, aut propemodum idem: at non iisdem verbis, non iisdem sententiis, non eadem methodo, non eodem systematis ordine; quæ res multo plus impedimenti affert discentibus, quam commodi: quia rem & veritatem ipsam a verborum cortice ægre extricare valent; cumque meditandi labore assuefacti haud sint, & ideas a vocibus distinguere haud didicerint, novis vocabulis novas subesse voces, veritatesque sibi persuadent, quibus memoriam onerant multo magis, quam intellectum exornant.

§. 3. Non equidem inficior, discrepare ratione quadam disciplinas inter se, quæ supra enumeratæ sunt; nam eadem virtus, idemque virtutis actus aliter atque aliter considerari potest: nunc quidem honesti, pulcri & decori specie, qua ad Ethicam pertinet: nunc iusti & iustitiæ forma, qua naturali, civili, sacro Juri subjacet: alias utilitatis ratione publicæ, privatæque, qua ad Politicam reducitur publicam, privatamve: referri idem potest ad forum internum & externum, ad suam cujusque perfectionem, ad socialitatem, ad religionem. Similiter differendum est, contraria tamen ratione, de delictis & vitiis. At si de singulis hisce actuum, virtutum, vitiis, rationibus & formis aliæ atque aliæ veluti artes, & eodem prope tempore perdiscendæ constituentur, evitari hand poterit, quæ commemorata, notionum cogitationumque confusio. Accedit, quod accessionibus illis recentium disciplinarum, quæ nostra ætate factæ sunt in publicis scholis, temporis quid-

quidquam vel laboris dari, impendique haud possit, quin tantundem de institutionibus gravioribus, magisque necessariis detrahatur, de Theologia nempe dogmatica & morali, & de jurisprudentia ecclesiastica. Quam ob rem vehementer mirari soleo, augeri non paucis locis varietatem, copiamque artium perdiscendarum, & studiorum tamen tempora atque curricula contrahi; quæ res non potest non utique reipublicæ & sacrae & profanae ingentia asserere detrimenta.

III. De disciplina naturalis juris non dubitant, quin ab institutionibus juris civilis & ecclesiastici segreganda sit.

§. 4. Antequam respondeam, in eo figenda est mentis acies, ut, quid nomine naturalis juris veniat, comprehendatur, nempe systema veritatum, præceptorumque, quæ vi rationis innotescunt, sive quæ ex ipsa rerum, maximeque hominis natura profluunt. Quid ergo? nostrane demum ætate, aut patrum nostrorum memoria rationis vis donata est humano generi, legumque naturalium lux nunc demum post tot mundi ætates a Prometheo quodam deducta in terras fuit? Ita scilicet nova est & recens adinventata disciplina naturalis juris, quemadmodum astronomiæ physiciæ scientia a Newtono, præeunte Keplero, inventa est, quam re & nomine ignorarunt veteres? Nihil igitur veteres Philosophi, Poetæ, Oratores, nihil Jurisconsulti, canonum Doctores, Theologi, Ecclesiæ Patres, nihil ipsi Auctores divinitus inspirati, Prophetæ & Apostoli, quid homini, cum homo sit, aut in societate familiæ vel civitatis degat, adcommodatæ ad naturam faciendum, fugiendumve sit, aut viderunt ipsi, aut prolocuti sunt, aut

monumentis suis ad posterorum memoriam commendarunt? Quis ita expertus est rationis, ut de rationis jure usque adeo ineptiat? Nempe disciplina naturalis juris, quanta quanta est, collectitia est, seu antiquarum veritatum, præceptorumque nova complexio, novusque rerum antea cognitarum ordo. Quæ per varias disciplinas vagabantur, veterumque scriptis cujusvis generis erant dispersa, ea ex cumulo veritatum præceptorumque naturalium, positivorum, divinorum & humanorum, sacrorum & civilium, excerpta, ordine quodam distributa, novæque disciplinæ nomine insignita fuerunt. Inventis addere cum facile sit, adjecti postea sunt novi ornatus, novi etiam errores non pauci, nec leues, tanto peiores etiam, quo majorem rationis, commodique inde proventuri speciem præ se ferebant. Quodsi Gratianus principio operis sui non sine causa affirmavit, jus naturale esse illud, quod in lege & Evangelio continetur; sequitur profecto, ut, cum antea actis temporibus viri extiterint maximo numero, divini juris utriusque Testamenti peritissimi, & sacrorum Codicum copiosissimi interpretes, iidem naturalis juris ignari haud fuerint; ut adeo, si quis in eorum commentariis, aut theologiæ moralis scriptoribus diligenter versatus sit, ac dein ad legendas institutiones hujus novæ disciplinæ accedat, magistrum se in arte aut cognoscat, aut cito evasurum speret, in qua nunquam discipulus fuerat.

IV. Quorsum igitur, inquiunt, ista a me commemorantur, cum ipse institutiones descripserim universi juris naturalis libris quatuor?

§. 5. Respondeo. Habeat sane juvenus, legum cupida civilium aut sacrarum, in manibus suis
systema

systema quoddam naturalis jurisprudentiæ, idque diligenter volvat, ac sæpe; audiat etiam Doctorem de primis ejusdem principiis, de partibus, universaque descriptione differentem; id quod magnam partem in Prolegomenis facere adhuc soliti sunt, qui de jure tum profano, tum sacro tractarunt, scripseruntque. Commodum illud erit, *primo*, ut naturam hominis, quem ob varios status, nexus, ac fines *animal multiplex* appellarunt veteres, distincte cognoscere discat; *secundo*, ut universam jurisprudentiam eiusque varias tractationes apto ac simplici ordine positas habeat ante oculos, eoque referre, velut ad proprias sedes, singularia institutionum & doctrinarum argumenta possit; *tertio* ut rationes legum morales, quæ fere in natura hominis, tanquam radice, hærent, perscrutari assuescat; nam *scire leges non hoc est, verba earum tenere, sed vim ac potestatem* (c). *Quarto* ut perniciosos errores, qui obtentu naturalis juris sparguntur in orbem, contraria rationis vi, argumentisque ex natura haustis & detegere & confutare conetur. Sed id quidem ipso decursu institutionum canonicarum velut pro re nata fieri & potest & debet. Sane & Justinianus *jus privatum* tripartitum esse, id est, tribus velut ex fontibus in rempublicam defluxisse docet, nempe natura, gentium institutis, & inventis cujusque civitatis (d); nec tamen ob eam causam segregare institutiones civilis iuris a naturali gentiumque necessarium duxit

(c) L. 17. D. de Legibus.

(d) §. 4. J. de Justitia & jure. Ibi: Collectum est enim ex naturalibus præceptis, aut gentium, aut civilibus.

§. 6. Exposui rationes, ob quas non modicam utilitatem percepturi videbantur studiosi juris sacri,

si institutiones juris naturæ universi haberent in manibus, quas ipsi diligenter persequerentur, &, monente Doctore canonum, in subsidium canonice doctrinæ adhiberent. At vero errant opinione quidem mea, qui in ea, quam tantis hodie laudibus in cælum ferunt, juris naturalis disciplina novum veritatum velut thesaurum, hominibus scilicet ante ignotum, se inventuros sibi persuadent; errant ii quoque, qui ad contemptum veterum Theologorum ac Jurisconsultorum ius illud naturale prædicant; non enim illi cognitione naturalium legum, sed eo, quo nunc junguntur, ordine ac systemate caruerunt; id modo commoda sua habet; quia mutato belli genere ratio quoque defensionis commutanda fuit. Denique dubium non est, quin omnium gravissime errent, qui, neglecta institutione christiana præceptisque Ecclesiæ, solis humanæ rationis dictatis vitam suam moresque conformare animum inducunt. De his dicendum: *Lux venit in mundum; & dilexerunt homines magis tenebras quam lucem* (e).

(e) Joann. III. 19.

CAPUT II.

DE PRIMIS ET GENERALIBUS NOTIONIBUS JURIS NATURÆ.

ARGUMENTUM.

- I. Investigatio juris nat. ejusque partium. §. 7. II. Discrimen internum actionum, & existentia juris nat. §. 10. III. Diversitas naturalium jurium & obligationum. §. 22. IV. Principium generale & proprietates juris nat. §. 28. V. Actio humana — imputabilitas — in conscientia. §. 31. VI. Actuum valor, aut nullitas. §. 34.

§. 7. Solent fere scriptores utriusque juris, quemadmodum supra animadverti, de naturali jurisprudentia, ejusque primis notionibus & principiis ante differere, quam ad tractandum ipsum jus sacrum aut civile adgrediantur; idque, si nulla sit ejusdem institutio singularis, tanto magis necessarium est hoc ævo, quo plura de illo nunc scribuntur, dicuntur, jactitantur. In ipso autem limine naturalis jurisprudentiæ duo vulgo peccantur; primo naturæ hominis, ex qua deducendum est naturæ jus, descriptio fit falsa, certe manca, & imperfecta (a). Secundo totum id, quod homo in observandis naturæ legibus spectare debet, referunt ad caducam hanc vitam, ejusque commoda vel incommoda; putant enim, eo acutius se de naturali jure philosophari, quo magis illud a Religione, indeque pendente futuro statu remonent, ac sejungunt.

(a) Pufendorfius P. III. C. VI. §. 9. reprehendit Hobbesium, quod universo mortalium generi impeerit malitiam, hominemque generatim plenum suspicionibus, invidia, ambitione, cupiditate finxerit. At idem Pufendorfius a principio socialitatis orditur jus; quasi illud non æque directo ad colendum summum Deum, suamque uniuscujusque felicitatem procurandam pertineret. Alii hominem suæ utilitati unice intentum faciunt.

§. 8. Nihil igitur principio, institutionum cujusvis juris, majoris momenti est, quam ut natura hominis vere, perfecteque seu ex toto consideretur, expliceturque;

I. Secundum corpus & mortalem hanc vitam, dein animum, ejusque vim & proprietates, res quoque externas, quas homo sibi velut adhærentes habet.

II. Ab ipsa jam natura adstringitur aliis hominibus, sed nemini propius, quam ipse sibi; omnium arctissime pendet a Deo, conditore, gubernatore, sine suo ultimo, rerumque omnium.

III. Uti homo in hoc mundo esse non potest, quin sit loco quodam; ita neque sine *statu* est, naturali, vel adventitio; ex quo *persona* dicitur in jure, id est, certis obligationibus, & facultatibus moralibus affectus; nam *persona* res est juris, substantia res naturæ.

IV. In natura hominis, in naturali ejusdem cum aliis nexu, in statibus insunt fines; in finibus constituendus est ordo: distinguendi gradus: expendenda proportio & accommodatio mediorum; quemadmodum C. I. Juris naturæ privati enucleate exposui.

§. 9. His veluti partibus naturæ humanæ, quas Philosophi notas partiales appellant, respondet diversitas bonorum animi, corporis, fortunæ; diversitas jurium & obligationum relate ad corpus, animum, res externas; diversitas officiorum erga Deum, se ipsum, alios tum in statu absoluto, tum hypothetico; diversitas causarum, quas impulsivas dicunt, seu motivorum, ob quæ homo agit; diversitas etiam injuriarum, delictorum, calamitatum, & pœnarum, quas homo in corpore, animo, in externis rebus, aut statu suo patitur; sed omnium maxime eisdem naturæ partibus respondet divisio naturalis jurisprudentiæ in partes quatuor: præmissis enim generalibus notionibus & principiis tractatur I. *jus naturæ privatum*, exponendo officia hominis, cum homo sit, erga Deum, se ipsum, alios homines, jura item in res externas hominum gratia conditas, & jura contractuum.

tractuum : II *jus naturæ sociale*, quando homo vivit in quadam societate, tum generatim, tum in societate conjugali, parentali, herili : III *jus naturæ publicum*, seu jus naturale civitatis, in qua homo degit : IV *jus naturale gentium*, seu civitatum inter se, tanquam personarum moralium in statu naturali libertatis & æqualitatis viventium.

§. 10. Ex natura hominis plene exposita deducitur discrimen internum actionum moralium, quarum aliæ præceptæ, aliæ vetitæ, aliæ nec vetitæ, nec præceptæ, seu velut in se indifferentes sunt : in his tamen aliæ aliis meliores, & perfectiores, veluti naturæ suasiones & consilia, censentur. Vocatur id discrimen actionum *internum*; quia ab ipsa natura constitutum est, & rationis vi ex ea deducitur, non autem ex hominum pactis, non vanis præjudiciis, non legibus imperantium, non privato utilitatis studio, non denique ex arbitrariis, sed, in hypothesi conditarum rerum, ex necessariis Dei legibus pendet. Id discrimen pertinet ad singulas partium quatuor, in quas universum naturæ jus distribuimus (a).

(a) *Exempla sint* 1. *de jure naturæ privato*: *Pacisci vel non pacisci cum alio, per se adiaphorum est; at pacti conventi fidem liberare, & jus suum unicuique tribuere, præceptum; alios lædere, vetitum.* 2. *De jure sociali*: *Inire societatem conjugalem cum hac, illave persona, per se indifferens; at tori fidem violare, natura vetitum; eundem servare immaculatum, præceptum; sic liberos susceptos alere, honesteque educare præceptum; abjicere & destituere, vetitum. Servos instar pecudum mactare, natura prohibetum.* 3. *De jure naturæ publico*: *Opprimere subditos, justitiam vendere, abstrahere subditos a Dei cultu, imperanti natura vetitum est.* 4. *De jure gentium*: *Invadere alienum imperium, advenas dæmoniis immolare, naufragos prohibere hospitio litoris, natura vetitum est; casu fœderis existente alteri genti succurrere, præceptum.*

§. 11. Admisso discrimine interno actionum, eo ipso admittitur naturæ jus; quo vocabulo denotantur *obligationes* naturales, per quas præceptum quidquam, aut vetitum intelligitur; tum jura stricte accepta, seu *facultates morales*; a natura concessæ, agendi quidpiam aut omittendi; denique & *consilia* seu suasiones ad majorem cujusquam perfectionem propositæ ab ipsa natura: sed hæc in tractatione disciplinæ comprehenduntur nomine *facultatum moralium*; quod enim suadet natura, eo ipso concedit, Restant igitur hæc facultates morales & obligationes; utræque uno *jurium* vocabulo solent denotari.

§. 12. Existentia naturalis juris hoc significatu accepti demonstratur

I. Velut a priori ex perfectione & sanctitate Dei, ad cujus imaginem creatus est homo, qui solus ex omnibus animantibus de conditore suo, ac præstituto fine eundem colendi, atque imitandi, eoque modo sectandi beatitatem cogitat: ex sapientia, potentia, & bonitate, seu ex providentia Dei, quæ res omnes a se creatas ad suos fines suaviter ac fortiter dirigit, & hominem, quem creavit, necessario per leges adcommode ad naturam ejus regit: denique ex justitia Dei, qua probis beatitatem, improbis supplicia præparare, decernere debuit.

II. Velut a posteriore ex ipso sensu & consensu humani generis, qui naturæ vox est, ut, si quis neget, non argumentis convincendus, sed vexatione ad confessionem adigendus sit. De eo sensu & consensu humani generis testis omni exceptione major est Paulus: *Gentes, quæ legem non habent (mosaicam) naturaliter ea, quæ legis sunt, faciunt: ejusmodi legem non habentes ipsi sibi sunt lex: qui ostendunt*

dunt opus legis scriptum in cordibus suis: testimonium reddente illis conscientia ipsorum, & inter se invicem cogitationibus accusantibus, aut etiam defendentibus in die, cum judicabit Deus occulta hominum (b). *Inexcusabilis es, o homo omnis, qui judicas. In quo enim judicas alium, te ipsum condemnas. — Qui alium doces, te ipsum non doces; qui prædicas non furandum, furaris; qui dicis, non mæchandum, mæcharis (c).*

(b) Rom. II. 14.

(c) Ibid. 1. & 21.

§. 13. Pauci inventi sunt inde a condito humano genere, qui jus naturæ abnegarent aperte; sed non ita pauci, qui id verbis relinquerent, re tollerent. Utcunque sit, minime ferenda est illa thesis, quam proferre in lucem quidam sunt ausi: *Extant naturales leges, sed eædem intelligi atque explicari possunt sine ulla de Deo mentione*, ac proin etiam sine mentione de statu beato vel misero hominis post hanc vitam, qui a Deo judice dirimi ac definiri debet. His respondendum est:

I. Primum & maximum mandatum seu præceptum iuris naturalis est de adorando, & amando summo Deo, colendaque Religione; anne etiam hoc præceptum sine ulla de Deo, ac futuro statu mentione explicabunt?

II. Præcipua vis cujusvis obligationis naturalis sita est in immutabili voluntate Dei, & beatitate vel miseria post hanc vitam hominibus præparata. Hæc una est vera causa, reipsa existens de necessitate illa, qua ad observandum naturæ jus adstringimur; quod ostendit sensus ac consensus humani generis, conscientiæ vox & remorsus, de quo § præc.

præc. Dein hæc etiam una est causa *sufficiens*, qua homines in officio contineantur; quia commoda & incommoda præsentis vitæ facile contemni possunt, sæpe etiam debent; quia non raro incidunt tempora, ut ita cogitare vir sapiens possit, debeatque: Neceffe non est ditari in hoc mundo: necesse non est, hominibus placere, probarique: necesse non est, tueri incolumitatem corporis, ac ne vivere quidem necesse est; at necesse est, evitare offensam omnipotentis Dei, & jacturam sempiternæ beatitatis, atque ita necesse est, ut nihil magis. Sola igitur Dei voluntas vim & efficacitatem veram, sufficientemque naturali obligationi tribuit; quia sola præferenda est omnibus aliis rationibus & momentis contrariis.

§. 14. Grotius in Prolegomenis de jure belli ac pacis ait: Manet honestum, ac naturæ jus, *etiam si daretur, quod sine summo scelere dari nequit, non esse Deum, aut non curari ab eo negotia humand.* Similiter Cicero ex doctrina philosophiæ Stoicæ: *Satis, inquit, nobis (si modo in philosophia aliquid proficimus) persuasum esse debet, si omnes Deos hominesque celare possimus, nihil tamen avaræ, nihil injuste, nihil libidinosæ, nihil incontinenter esse faciendum (d).* Ita, inquiunt, commiserari egenos, depositum restituere, fidem pactorum servare, per se honestum est, etsi nihil præmii a Deo sperari posset.

(d) L. III. de officiis. c. 8. & 9.

§. 15. Respondeo: Notum est ex Dialecticis, hypothesin impossibilem: *non esse Deum, aut non curari ab eo negotia humana*; sumi posse duplici modo, in sensu reali & objectivo, aut in sensu pure formali, & præcisivo; de priore sensu, qui dicitur

citur primæ intentionis, dicendum: Ex impossibili sequitur quodlibet, & una Chymæra generat alteram, perinde, ac si dicerem: Si homo reipsa est lapis, non cogitat, & cogitat. Si vera est hypothesis: *Deus non est, ac proinde nihil est post hanc vitam*; ergo mala est virtus, & inimica naturæ, stultumque judicari necesse est, qui eam sequitur; quoniam se ipse lædit; ut ait Lactantius (e): imo, uti argumentatur D. Paulus, qui beatitudinis futuræ spe præsentia bona repudiavit, *si in hac vita tantum laborantes sumus, miserabiliores sumus omnibus hominibus; & si (secundum hominem) ad bestias pugnavi Ephefi, quid mihi prodest? — Manducemus & bibamus; cras enim moriemur* (f). Est hæc vox impiorum, qui tanquam veram & realem statuunt hypothesis: *Ex nihilo nati sumus; & post hoc erimus, tanquam non fuerimus*. Quid ergo inferunt? virtus per se honesta est? justitia tamen colenda est? pravæ cupiditates nihilo minus refrænandæ? Haud sane; sed in hunc modum concludunt: *Venite ergo, & fruamur bonis, quæ sunt; — vino pretioso, & unguentis nos impleamus; — coronemus nos rosis; — nullum sit pratum, quod non pertranseat luxuria nostra. — Opprimamus pauperem justum, & non parcamus viduæ; — sit autem fortitudo nostra lex justitiæ. — Circumveniamus justum* (g). Ex sensu ergo reali hypothesis impossibilis nihil concluditur.

(e) *Divin. Institut. l. VII. c. 9.*

(f) *1. Cor. XV. 32.*

(g) *Sap. II.*

§. 16. Superest alter sensus præcisivus & abstractivus, quem secundæ intentionis dicunt; id est: Etsi nihil cogitem de Deo, aut futuro statu, tamen virtus honesta est, & per se movet; neque vero, inquirunt, homines de Deo semper cogitant, aut de præ-

præmio futuræ vitæ, quando honeste agunt, turpitudinem vitant, miseris opitulantur. Respondeo: Virtus honesta est; at sine Dei lege nulla eam colendi vera necessitas intelligitur: per se movet; sed per se non satis obligat & adstringit hominem, ut ipsam sequatur: movet, sed motum extinguit contraria mentis affectio, si lex supremi Dei virtuti vim non tribuat. Vides periclitantem de vita & cum aquis luctantem, cui manum dare, & succurrere potes; at est inimicus tuus, quem dudum sublatum optaras. Movet honestas; sed obstitit æmulatio, invidia, odium; neminem habes inspectorem, nisi Deum. Quid cogit, odio refragari & æmulationi; ac sequi honestatem (h)?

(h) Carneades Atheniensis contra justitiam & jus naturale differens Romæ, teste Lactantio divin. Inst. l. V. c. 17. & 18. sic agebat: „Quid ergo justus faciet, si forte naufragium fecerit, & aliquis imbecillior viribus tabulam ceperit? Nonne illum tabula deturbabit, ut ipse conscendat, eaque nixus evadat; maxime cum sit nullus medio mari testis? Si sapiens est, faciet; ipsi enim pereundum est, nisi fecerit. Si autem mori maluerit, quam manus inferre alteri, jam justus ille, sed stultus est, qui vitæ suæ non parcat, dum parcat alienæ. Item, si acie suorum fusa, hostes insequi cœperint, & justus ille, natus fuerit aliquem saucium equo insidentem, eum parcat, ut ipse occidatur, an dejiciet ex equo, ut ipse possit hostem effugere? Quodsi fecerit, sapiens, sed idem malus; si non fecerit, justus, sed idem stultus sit, necesse est.“ Recte addit Lactantius: Sed videlicet, qui sacramentum hominis ignorant, ideoque ad hanc vitam temporalem referunt omnia, quanta sit vis justitiæ, scire non possunt. Conf. J. N. pr. §. XI. & quæ adnotavi ad §. XXII.

§. 17. Mirum est, quanta sophismata excogitarint homines profani, qui se philosophos nuncupant,

pant, ut metum Numinis, religionemque a naturali jure exterminarent, honestatem, nescio quam, jactantes, qua virum bonum duci oporteat; quasi honestius quidquam, mentique creatæ magis consentaneum afferri posset, quam vereri supremum Deum, atque ob id obsequi divinis legibus. Sed nempe videntur hi cum Epicureis conqueri de nobis, qui aliter philosophamur: *Imposuistis in cervicibus nostris sempiternum Dominum, quem dies & noctes timeremus* (i).

(i) Cicero l. I. de natura Deorum.

§. 18. Ajunt: Honestas non pendet a lege Dei; quia in natura rationem habet; naturæ autem rerum sunt æternæ, necessariae & immutabiles. Veteres Scholastici respondent distinguendo: Honestas fundamentalis non pendet a lege Dei; c. honestas formalis n. Id hoc sensu videtur accipiendum: si propositionem sumas *mere theoreticam*; e. g. *Conveniens, & accommodatum est naturæ hominis, alterum non lædere, turpitudinem fugere, calamitosos juvare*; ea est æternæ veritatis, nec pendet a lege Dei; uti nec ista propositio: *Conveniens & accommodatum est naturæ hominis, ut a Deo, qui ipsam de nihilo condidit, per leges regatur, atque ad præstitutos fines ducatur*; quoad veritatem a lege aut voluntate Dei pendet. Sed inde non concluditur: *Ergo homo per leges Dei regitur, atque ad præstitutos fines ducitur sine lege & voluntate Dei.* Posita natura, eo ipso ponuntur leges Dei: ponuntur facultates morales a Deo concessæ.

§. 19. At homo, inquiunt, etsi regulas honestatis sequatur, sæpissime non cogitat de lege Dei: ergo actio hominis ob id solum honesta non est, quia

legi Dei conformis est. Resp. Si homo quidpiam agit, quod rationi & conscientiae repugnat, eo ipso supremi Dei legem se violare, quantum satis est, agnoscit; id testatur conscientiae vox, & remorsus: igitur si id, quod agit, rationi & conscientiae non repugnare sentit; satis etiam agnoscit, se agere secundum facultatem a Deo concessam. Si consuetudine peccandi debilitetur conscientiae vis, & omnis prope modum cogitatio de Deo animo effluat, dicendum cum Tertulliano: *Hæc est summa delicti nolentium recognoscere, quem ignorare non possunt* (k).

(k) In *Apologetico adversus gentes* c. 17. *Ad ea, quæ hic dicta sunt, pertinet propositio de peccato philosophico, damnata ab Alexandro VIII. die 24. Augusti 1690.*

§. 20. Dicunt etiam: Status alterius vitæ ex sola revelatione innotescit, ceu promissio beatitudinis supernaturalis, aut minæ supplicii æterni: ergo pro fundamento obligationum naturalium haberi non potest. Resp. n. a. Homo *vi naturæ* destinatur post caducam hanc vitam ad statum vitæ alterius multo beatioris, si recte vixerit; aut ad supplicia delictis vitæ anteaetæ respondentia. Id manifesto colligitur tum ex perfectione summi Dei, tum ex sensu, & consensu universi generis hominum, omnium temporum ac locorum. Si Deus infirmitati humanæ mentis per revelationem succurrit, qua statum alterius vitæ distinctius prænuntiavit, & extra omnem prorsus dubitationem posuit, concludi non potest: Ergo status alterius vitæ, ejusque præmia & supplicia ad naturam hominis ejusque finem naturalem non pertinent; quia revelatio non sustulit naturam, & naturalem hominis finem. Si denique Deus hominem singulari gratia extulit ad statum supernaturalem, & beatitati naturali surrogavit supernaturalem;

lem; de hoc statu, tanquam adventitio, in jure naturæ differendum est: secus omnis status vitæ alterius excluderetur (quod per naturam & finem ultimum hominis fieri non potest), & natura hominis omnino manca & imperfecta, ac nobilissima parte sua quodammodo mutilata proponeretur (1).

(1) *Ex his intelligitur, quod homo vi naturæ ad Deum, tanquam finem ultimum per actus suos tendere debeat refrenatis pravis cupiditatibus, & illecebris præsentis vitæ. Hinc ab eodem Alexandro P. VIII. jussu simul confixa fuit hæc thesis: „Bonitas objectiva consistit in convenientia objecti cum natura rationali: formalis vero in conformitate actus cum regula morum. Ad hoc sufficit, ut actus moralis tendat in finem ultimum interpretative. Hunc homo non tenetur amare, neque in principio, neque in decursu vitæ suæ moralis.“ In verbis hæc ultimis latet falsitas & pestilentia thesæos. In statu hominis elevato actus fidei, spei & caritatis pertinent ad obligationes naturæ hypotheticas. Vide Propositionem 1. damnatam ab Alexandro VII. prop. 5. 6. 7. 16. 17. 23. damnatas ab Innocentio XI.*

§. 21. Addunt denique: Obligatio naturalis multo rectius explicatur per connexionem motivorum cum actionibus liberis: ergo in evolvenda notatione obligationis ad ejus causam, nempe voluntatem supremi Legislatoris, recurri non debet. Resp. d. a. rectius explicatur per connexionem motivorum, nempe talium, quæ necessitatem servandi legem obligationi propriam vere constituunt, & sufficientia sunt vincendis motivis contrariis, c. a. rectius explicatur per alia motiva a commodis vel incommodis præsentis vitæ petita, n. a. & c. Sciendum, scriptores hodiernos jurisprudentiæ naturalis obligationem constituere in connexionem motivorum cum actionibus liberis: per motiva autem intelligere con-

secutiones bonas aut malas, per se, & vi naturæ connexas cum actionibus: e. g. quod temperantia ad sanitatem conducat, opes conservet & augeat: quod obedientia, quam liberi debent parentibus, sit necessaria ad ipsorum educationem, ut suo tempore ipsi sibi de subsidiis vitæ possint prospicere: quod observationem naturalium legum comitetur tranquillitas animi, violationem sequatur perturbatio, & morsus conscientiæ. Dico: id, quod de conscientiæ tranquillitate aut perturbatione differunt, manifeste referendum est ad Deum remuneratorem boni, ultorem mali (§. 12); alia autem motiva, quæ memorant, faciunt ea quidem ad commendationem virtutis, ac sceleris reprehensionem; sed veram ac sufficientem obligationis vim non continent, uti satis perspicuum est consideranti. Denique consensu omnium veterum Doctorum lex proprie talis sine idea legislatoris intelligi non potest. Contemnunt quidem doctores hodie nati antiquos; sed anne ob id etiam confutant, aut melius quidquam proferunt, præsertim in re, de qua omnes semper, diligenterque commentati sunt?

§. 22. Eruto in hunc modum ex natura naturali jure, & confirmata naturalium obligationum vi, diversitas jurium uno velut obtutu spectanda est, denotando voce *jurium*, non modo facultates morales, sed consilia quoque, & obligationes (§. 11.). Sunt igitur I. relate ad actiones positivas aut negativas jura *affirmativa*, aut *negativa*. Illa poscunt tempus, locum, opportunitatem, vires, ac ne quid obstat; fere etiam per leges positivas, aut suo cujusque arbitrio determinari debet, quod a natura determinatum non est. Negativa autem dicuntur obligare *semper pro semper*.

§. 23.

§. 23. Spectata origine sunt alia jura *connata*, quæ cum ipsa hominis, rerumque natura ponuntur; alia jura *acquisita*, & obligationes *contractæ* statu adventitio, facto proprio, lege divina vel humana. Ad connata pertinet jus æqualitatis & independentiæ, vi cujus cuilibet permittendum, ut suis in actionibus suum sequatur judicium, neque rationem aliis reddere cogatur, quoad aliorum jura & libertem non lædit. *Ipse autem neque imperare sibi, neque prohibere se quisquam potest* (m), neque reddere sua unius voluntate ad agendum jure inhabilem. Præterea ad jura connata pertinet jus conservandi sui, statusque sui; qua voce intelligitur etiam jus perficiendi; jus item paciscendi, res externas hominum causa conditas occupandi, id est, apprehendendi, ad usum aptandi, aservandi, proprias efficiendi: jus securitatis, defensionis, præcautionis, jus necessitatis, in quo jus belli, & indemnitatis inest. Jura acquisita sæpe ad hypothetica referuntur, de quibus mox dicendum.

(m) L. 51. D. de receptis.

§. 24. Ex statu absoluto societatis hominum nuncupantur jura *absoluta*, ex statu societatis hypothetico jura *hypothetica*; ceu in statu familiæ, civitatis, Religionis supernaturalis revelatæ, & Ecclesiæ a Deo institutæ. Eodem referunt jura, quæ non competunt, nisi ex hypothesi certorum adjunctorum, aut facti alieni vel proprii.

§. 25. Considerata efficacitate exequendi, alia sunt jura *perfecta*, alia *imperfecta*; quæ divisio permagni momenti est. Perfecta extorqueri possunt adhibita vi aut actione, pro conservando & vindicando eo, quod cujusque *res suum* efficit; suntque

realia, vel in re, seu in dominio, hereditate, servitute, pignore; aut *personalia*, sive jura ad rem, nempe in iis, quæ nobis debentur promisso, contractu. Jura imperfecta, etsi naturali obligationi caritatis subjaceant, tamen vi extorqueri non possunt; qualia sunt jura & officia humanitatis tum *vulgaris*, seu innoxie utilitatis affirmativa & negativa, tum *eminentis*, seu noxie utilitatis, id est, beneficentiae & officiositatis. Ex hoc jurium discrimine facile explicantur ea, quæ a Veteribus de justitia commutativa disputata sunt fuse: indidem petenda est distincta notio injuriæ ac damni.

§. 26. Relate ad forum conscientiae, seu Dei, aut solam impunitatem coram hominibus, aliud est *jus internum*, aliud *externum*, sive ut S. Augustinus ait, *jus poli*, & *jus fori* (n).

(n) *Can. ult. XVII. q. 4.*

§. 27. Denique alia sunt jura, quæ abdicari, cum aliis communicari, aut transmitti possunt: alia non item, quæ dicuntur personalissima.

§. 28. Exposita jurium diversitate, in generale inquiritur principium, quod notiones contineat directrices pro juribus naturæ specialibus definiendis. Stirps omnis juris, inquit Tullius, natura est, quod de naturæ jure in dubium vocari non potest, modo ea plene perfecteque accipiatur, & multiplici maxime ratione, qua ad summum Deum, conditorem rerum, & gubernatorem, finemque ultimum, hominibus vi naturæ præstitutum, refertur. Auctores quidem in constituendo hoc principio magnopere inter se videntur dissentire. Causas dissensionis retuli principio C. IV. Inst. J. N. Turbulenta est, & plane terri-

terrifica Hobbessii Hypothesis de naturali jure se conservandi modis quibuscunque, indeque proveniente jure omnium in omnia, & in omnes, ac de naturali, qui consequitur, statu belli omnium in omnes. Hanc hypothesin, in qua jus naturæ nullum est, verbis repudiant omnes; re & concludendi forma retinent scriptores non pauci, quando de jure majestatico naturali, præsertim adversus personas, res & causas divinæ Religionis agunt. Utile cum honesto confundunt; qui est error gravissimus, dudum a Tullio profligatus in officiorum libris. Sed hi, quod privatis licere negant, impetranti dant obtentu publicæ utilitatis, quam suo ipsi arbitrio, odioque in divinam Religionem metiuntur, ac sæpe necessitatem vocant, omnes necessitatis gradus plane miscentes. Non est hoc profecto, abdicata libertatis parte, in civitate quærere securitatem, pacemque, sed jus & bellum principis in omnes, & in omnia invehere; quo ipso civitates intereant, necesse est. In numero principiorum naturalis juris, celebris pariter est socialitas Pufendorfianna, speciosa illa quidem, sed non æque plena perfectaque; cum neque summam naturalium officiorum, neque justum ordinem contineat.

§. 29. Ex principio naturalis juris, ipsaque notione proprietates ejusdem manant, ut nempe censeatur jus universale & commune omnium hominum, æternum, necessarium, immutabile; quales rerum essentia a philosophis dicuntur: dein ratione promulgatum, in præcipuis, maximeque necessariis capitibus perspicuum, uniforme, & quodammodo norma positivarum legum, denique sanctum, id est, perfectissima sanctione munitum, spe scilicet maximæ beatitudinis, ac metu summæ miseriæ. Ut im-

mutabilitas naturalis juris recte perspiciatur; 1. discrimen fieri oportet inter jus affirmativum & negativum; 2. inter ea, quæ a supremo Dei Dominio arbitrioque, aut alia pendent perfectione necessaria: 3. cogitandum, jus naturæ non vage & separatim a variis adjunctis hominem obligare, sed certas actionum, temporumque complexiones respicere, quæ in generali legum præscripto fere intelligi, non exprimi solent (o).

(o) *Exempla occurrunt, cum de naturali obligatione voti, & juramenti promissorii, ejusque irratione aut dispensatione, aut cum de jure necessitatis in res aut vitam aliorum agitur.*

§. 30. Actio humana ad legem, tanquam normam, refertur; ac si extet lex præcipiens aut vetans, actio ei conformis, ex se bona, difformis autem ex se mala dicitur; si nulla extet istiusmodi lex, in genere indifferens. Sic in disciplinis de actione humana, tanquam earum *objecto*, differimus, actionemque ex *objecto* bonam aut malam dicimus, quando neque speciales operantium fines aut causas impulsivas, neque singulares circumstantias attingimus, quæ infinitæ sunt, & singulæ casum mutant. Moralitas tamen perfecta actionum tum ex *objecto* sive actione in se spectata, tum ex animo seu intentione agentis, denique & adjunctis seu circumstantiis pendet; ac pro regula est tritum illud: Bonum ex integra causa: malum ex quocunque defectu; ut jam spectato animo seu intentione agentis & adjunctis nulla concipi possit actio *in specie*, sive, ut Theologi loquuntur, *in individuo* indifferens.

§. 31. Ad generales notiones pertinet *imputabilitas* actionum. Primo fit *imputatio facti*, qua quis

quis declaratur auctor, seu causa actionis; dein juris, qua consecutaria actionis alicui assignantur, laus, culpa, poena, solutio, praestatio damni. Imputatur quidpiam, quatenus cognitum fuit, & voluntarium liberumque. Cognitioni obest error, & ignorantia, quæ est juris aut facti, antecedens aut subsequens, vincibilis aut invincibilis. Voluntarium non uno modo dicitur: est enim purum, & mixtum, expressum, tacitum seu interpretativum, negative voluntarium, directe, aut indirecte seu in causa. Voluntario obest coactio, non item metus, de quo frequens in jure fit mentio: unde recte distinguitur in hoc genere, ut alius dicatur antecedens, vel comitans, alius gravis seu probabilis, vel levis, extrinsecus vel intrinsecus, juste vel injuste incussus.

§. 32. Fere contingit, ut actus ab uno gestus, seu datus executioni, imputari possit, debeatque pluribus, seu mandanti, opem vel receptum danti: quo spectat imputatio actuum alienorum, qui tamen ratione quadam proprii fiunt ejus, cui imputantur. Egi de his C. VII. Inst. J. N. In imputatione autem tum quæ uni fit, tum quæ pluribus, insunt gradus; & ipsa actionum moralitas quantitatem habet, cui imputatio juris conformanda est; unde in jure non modo dolus, sed multiplex culpa consideratur, lata; levis, levissima. De specifica & numerica actionum, virtutum ac peccatorum differentia in theologia morum tractatur.

§. 33. Prima & accuratissima facti imputatio fit in foro conscientiae, ac Dei, quam imputatio etiam juris consequitur: unde, ut Paulus ait, illæ cogitationum accusationes ac defensiones existunt, quæ conscientiam consequentem efficiunt. De antecede

dente legem naturæ promulgavit idem Paulus : *Omne, quod non est ex fide, peccatum est (p)*. Ac, qui ex fide non agit, ædificare ad gehennam dicitur in jure nostro. Jure igitur naturæ præceptum est, ut actionem præcedat firmum judicium ac persuasio de honestate actionis, sive ut Theologi loquuntur, dictamen moraliter certum. Quomodo id formetur pro casu, quo certa honestatis & licentiæ actionum veritas explorata non est, theologi disputant. Pro foro externo in rebus incertis & dubiis, de quibus sententia ferenda est, variæ extant regulæ, pro ipsa rerum incertarum varietate locis variis dispersæ, ceu titulo de regulis juris, de præsumtionibus, aliisque ; quæ generales non sunt, eo ipso, quod ex definitione juris fiat regula, non jus ipsum ex regula definiatur (q). Sed cum proposita re incerta, dubiave de capiendò consilio, ferendaque sententia agitur, peccari in utramque partem solet, uti fit fere in rebus aliis ; cum virtus in medio consistat. Alii levi ac temeraria rationis specie feruntur, quo volunt ; alii nunquam invenire possunt, ubi consistent, & ab inquisitionibus atque dubitationibus conquiescant. In jure nostro tres assignantur gradus ; nam aut *pro certo* constat de re : aut habetur *credulitas levis*, & *temeraria*, aut *credulitas probabilis* & *discreta*. Conscientia antecedens *perplexa* dicitur, si, utrumvis quis eligat, peccare se putat (r).

(p) Rom. 14. 23.

(q) *Lib. 1. D. de R. J. ibi: Non ex regula jus sumatur: sed ex jure, quod est, regula fiat. In hunc modum ex dispositione juris suppetunt regulæ de dubio facti, regulæ de judiciis, ut reo potius faveatur, quam actori: de causa possessionis: de contractibus: ut contra eum, qui legem dicere potuit apertius, interpretatio fiat; regulæ de irregularitate ex homicidio in dubio facti; ut eligatur, quod tutius est: de irregularitate in dubio juris,*

juris, ut non censeatur incurri, si expressa non sit in jure. Aliæ regulæ de pœnis & in causa criminali: aliæ in causa favorabili libertatis ac dotis: aliæ, si agitur de matrimonio contrahendo, aliæ, si de dissolvendo. Qui unam ex his pro arbitrio arripiunt, & generalem faciunt, videant, obsecro, quam longe recedant a mente legum, quarum verba identidem in ore habent. Leges scire non hoc est, verba earum tenere, sed vim ac potestatem, l. 17. D. de LL.

- (r) *C. inquisitionis. 44. de sent. excom. de credulitate levi, & conscientia scrupulosa. Confer c. 18. de Simonia; ac l. 8. D. de conditionibus institut. l. 21. c. de fide instrument. De perplexa c. 13. de censibus. can. 7. XXII. q. 3. & can. 1 & 2 dist. 13.*

§. 34. Est denique alia humanorum actuum affectio, qua iidem validi censentur, aut nulli, uti nempe effectum suum, seu jus quoddam aut obligationem reipsa producant, aut non producant. De hoc genere valde crebra & anceps incidit disputatio, quæ fere ad generales juris naturæ regulas devolvitur (r). Generatim actus sine sua forma nullus est; & in his, quæ ab hominum pendent dispositione, voluntas spectatur, jus seu facultas moralis agendi, denique materia apta, quæ in actum cadat.

- (s) *Sæpe dubitatur de valore actuum non modo ordinis, sed etiam jurisdictionis pro foro utroque: de iis quoque, quæ errore, quæ vi metusve causa gesta sunt: de vario promissionum & contractuum genere, seu de pactis simoniacis, meretriciis; de professione religiosa, aliis votis aut juramentis promissoriis; de electionibus, renuntiationibus, rescriptis, censuris, absolutionibus, dispensationibus; aliisque dispositionibus publicis & privatis, inter vivos & mortis causa. In dubio leges judicari jubent, ut actus potius valeat, quam pereat, l. 12. D. de rebus dubiis; quam regnam omnium interpretationum non nulli appellant. De valore actuum, de quibus tam frequens incurrit disceptatio, non segniter tractavi C. X. Jur. Nat. priv.*

CAPUT III.

DE NATURALIBUS ERGA DEUM OFFICIIS, HOMINIS ITEM ERGA HOMINEM, AC NATURALI JURE IN RES EXTERNAS, SEU DE JURE DOMINIORUM, ET CONTRACTUUM.

ARGUMENTUM.

I. Quæ in Jure Nat. exponuntur de officiis hominis, locum suum in Jure habent Ecclesiastico. §. 35. II. Quod ostenditur de officiis erga Deum. §. 36. III. Erga proximum. §. 39. IV. De officiis circa res externas. §. 49.

§. 35. Enumeratis superiore capite primis notionibus, principiisque naturalis juris, quæ variis disciplinæ canonicæ vagantur locis, difficile non est ostendere, quem in ea proprium locum ac veluti sedem habeant, quæ in jurisprudentia naturali de officiis erga Deum, ac de officiis hominis in hominem, & de jure in res externas, id est, dominiorum & contractuum jure tractantur; ob quam causam utriusque disciplinæ institutiones, naturalis scilicet, & ecclesiastici, haud ægre conjungi possint, temporisque & studiorum compendio debeant.

§. 36. Naturalia erga Deum officia exponuntur in hunc modum, ut primo rationis ope ac theologiæ naturalis evolvantur ideæ creatoris, gubernatoris, ac finis ultimi seu beatitudinis, quæ nulla est extra cognitionem & amorem Dei in statu etiam naturali. Dein explicatis hisce ideis & notionibus connexis, a theoreticis veritatibus ipsa rationis vi atque impulsu mentis descenditur ad practica officia tum intellectus, tum voluntatis, interna & externa, affirmativa & negativa, quæ generatim ponuntur ob oculos, confirmata etiam naturali obligatione cultus
externi.

externi. Postmodum ex proposita complexione istiusmodi officiorum per sese colligitur distincta notio religionis, cujus officia affirmativa, etsi vi naturæ parum determinata sint, tamen non possunt ad res & personas divino cultui & ministerio speciatim dicatas aut consecratas non extendi; quod ipso jure aut consuetudine gentium palam fit.

§. 37. In jure sacro cognitio perfectionum summi Dei magnopere perfecta atque aucta ponitur divina revelatione, statuque adventitio finis supernaturalis, quo per gratiam sanctificantem efficimur divinæ confortes naturæ, & accipimus spiritum adoptionis filiorum Dei, in quo clamamus, Abba, Pater (a). Unde fit, ut omne genus naturalium officiorum erga Deum non modo illustretur, mireque perficiatur, sed eminente quadam ratione contineatur in disciplina juris sacri, Religionis vero notio perfectior, tanquam fundamentum universi juris Ecclesiastici, mox L. I. Tit. I. *De Summa Trinitate & fide catholica* proponatur, quemadmodum in Isaïoge C. II. exposui. Specialia dein Religionis exercitia tum intellectus in tuenda fide, tum voluntatis actuumque externorum, quæ in virtutibus theologicis, in Sacrificio, Sacramentis, piis ritibus & cæremoniis, in divinis officiis sita sunt, itemque ea, quæ ad personas, ac res divino cultui dicatas pertinent, suos habent singula titulos, sedesque proprias, ut naturali divino jure minime egcamus.

- (a) *Rom. VIII. 15. Qui ad cultum externum Deo exhibendum a natura hominem adstringi negant, ipsum naturæ jus sæde depravant, mutilantque. Quid? si homines impii idem asserant verbis, re ostendant in adventitio Religionis statu tot externis mysteriis, ac cæremoniis exornato? Ajunt, Religionis jedem intus*

*in animo esse. Hoc si de se intelligant, nemini prae-
dicti facient fidem; monuit enim nos divinus Magi-
ster: Ex fructibus eorum cognoscetis eos. Ac, docente
Apostolo Domini, quivis probus sic ad illos inquiet:
Ostende mihi fidem tuam sine operibus (quod nunquam
poteris tu); Et ostendam tibi fidem meam ex operibus.
Jac. II. 18. Sed isti homines fere impietatem suam
novo cumulant delicto, ut sanctissimos quosque ritus,
religionisque actus superstitionis accusent, Et in nu-
mero pravorum usum ponant.*

§. 38. Quemadmodum ex hypothese status ad-
ventitii civilis varia dimanant naturæ jura; sic fit
idem in adventito Religionis statu: ut proin sa-
cricilia, simoniæ, hæreses ac schismata, aliaque
istius generis delicta, de quibus libro Decretalium
quinto agitur, non minus repugnent naturali juri,
ac crimina perduellionis, seditionis, læsæ majestæ-
tis in statu civili; & sicut, propositis indiciis divinæ
revelationis, naturalis gravissimaque existit obligatio
veræ fidei religionisque diligentissime inquirendæ,
& seligendæ, & profitendæ: ita nulla est, aut con-
cipi potest in hoc statu autonomia; de qua re apte
differitur ad titulum de hæreticis, quando justitiæ
pœnarum, quæ contra eosdem constitutæ sunt, con-
tra improborum criminationes tuenda est.

§. 39. Ab officiis religionis ad exponenda ho-
minis erga hominem officia valde expedita progres-
sio fit; quia mens humana, quæ metu ac reveren-
tia Numinis cohibere didicit perturbationes, & re-
frenare cupiditates, atque id actionibus suis spectare,
quid cælesti omnium Parenti gratum sit maxime, &
qua eum ratione imitari possit, cito cognoscet ra-
tionis vi, quid homo homini debeat, neque in hoc
genere officiorum facile claudicabit. Certe Doctor
gentium cum Philipenses suos, Religione imbutos
jam,

jam, ad omnem naturæ honestatem formare vellet, minime illos ad Philosophorum institutiones amandavit, neque longum docendi laborem sibi sumsit, sed monere satis habuit in hunc modum: *De cetero, fratres, quæcunque sunt vera, quæcunque iusta, quæcunque sancta, quæcunque amabilia, quæcunque bonæ famæ, siqua virtus, siqua laus disciplinæ, hæc cogitate (b).*

- (b) *Phil. IV. 8. Hæc commemoravi ob eam causam, quod in ea constanter opinione sum, doctores quosdam, qui, prætermissa veræ fidei defensione, religionisque institutione, temporum pravitate, morumque labi doctrinis suis ethicis & philosophicis mederi se posse opinantur, laborem suscipere inanem, seseque, ni fallor, ipsis demoniis videndos præbere. Acute Lactantius L. V. c. 15. Instit. de Philosophis justitiæ patronis scripsit: „Erat facillimum, justitiæ radices non habentem labefactare; quia tum nulla in terris fuit, ut, quid esset, aut qualis, a Philosophis cerneretur.“ Confer dicta in Isagoge c. II. in fin.*

§. 40. Fundamentum igitur, & radix officiorum hominis erga hominem in Religione, id est, amore ac timore summæ Divinitatis situm est, ad cujus imaginem & similitudinem conditus est homo. Ex hac radice primum veluti germen provenit naturalis cujusque in se, aliosque amor, sed qui ratione regi debet, neque cum prava illa levitate confundi, qua peccatis indulgetur, cæcisque vitæ erroribus, & levitati & pertinaciæ humanæ licentia datur & impunitas.

§. 41. Naturalis hic amor, si ratione regitur, commune est principium practicum officiorum cujusque erga se ipsum, & alios; quia communem habet radicem, nempe naturam ad Dei imaginem con-

conditam. Segregantur vulgo ea officia; sed conjungenda in Institutionibus censui, quæ male distracta videbantur; cum præsertim divinus Magister docuerit nos, ut ex nobis disceremus ipsi, quid præstare aliis debeamus, & ex aliis, quos reprehendimus, a quibus abstinendum sit nobis (c).

(c) *Conf. Inst. Jur. Nat. priv. C. XII. §. LXXVIII.*

§. 42. Deprehenso communi principio practico, veluti fonte officiorum, derivatur *primo* diversitas eorundem: alia ad corpus, & conservationem præsentis vitæ, alia ad existimationem & famam, alia denique ad mutuam communicationem, & significationem mentis in humana societate referuntur. De iis, quæ ad res externas spectant, separatim videbatur agendum postea.

§. 43. In hoc officiorum numero ordo constituendus est; quia alia aliis nobiliora sunt, & graviora; denique de singulis veluti mensura capienda est, ac videndum, quatenus rationis præscripto pertingant, ut nempe aut veræ obligationi ac necessitatibus subjacere, aut instar consilii esse, vel concessa quoquo modo intelligantur. Ob quam causam cit. C. XII. observavi, in officiis erga hominem inesse numerum, pondus & mensuram.

§. 44. Enucleate, exæteque pro conscientie foro hæc officia exponuntur in theologia morum. Jus sacrum effectus maxime externos, & delicta iisdem officiis opposita, cum ad forum Ecclesie de personis potissimum ecclesiasticis deducuntur, expendit. Ac

I. De perfectione animi, cultuque mentis multa requirit ab iis, qui in clerum adoptandi, vel ad
sacra

sacra officia promovendi sunt; uti patet, cum agitur de irregularitatibus; de vita & honestate clericorum; ne clerici vel monachi secularibus negotiis se immisceant (d).

- (d) *Mens humana tum exercitio virtutum, tum veritatis cognitione, & doctrinis atque artibus excolitur. Ex adventitio autem hominis statu definiendum est, quibus maxime veritatibus cognoscendis, & perdiscendis disciplinis opera addicenda sit. Solent agricolæ et in solo fertili semina spargere, ex quibus ad rem domesticam & æconomicam fructus maxime conducibiles proventuros sperant. Culturæ animi nihil tam obest, quam ingluvies, ebriositas, & impuditiæ genus omne; quæ non eo tantum ex capite repugnant naturali juri, quia vitam, viresque corporis pessumdant; verum quia naturæ celsitati ac dignitati humanæ mentis ad Dei imaginem conditæ gravissime adversantur. Sane in verberibus alapisque viro honesto inflictis, præter brevem pulsationis dolorem aliud contumeliæ injuriæque genus inest, quod considerari a judice maxime debet; sic idem de ingluvie, ebrietate, & luxuria cogitandum.*

§. 45. Extra ordinem officia hominis erga hominem aliquando definiuntur ex incidente necessitate, quæ spiritalis dicitur aut corporalis, uti aut sempiterna hominis salus, aut præsens vita, integritas membrorum, fortunæ periclitantur. Utraque gradus habet; ut censeatur necessitas extrema, gravis, aut communis: unde duplex oritur quæstio, prima *facti*, quæ & quanta, penes quem, & quam præsens atque urgens sit necessitas; altera *juris*, quid, posita ea necessitate, obligationis aut facultatis competat vel iis, qui laboranti succurrere valent, vel qui ipsi laborant necessitate. Ut ea jura definiantur, opus est, ut tria examinentur, facultas succurrendi, modus, & necessitatis gradus. Quamvis

autem hic favor sit extremæ necessitatis, ut res etiam aliena contrectari valeat; communio tamen bonorum per eam non reducitur, quemadmodum in commentariis Decretalium titulo de furtis aut raptoribus exponi solet.

§. 46. Aliud est necessitatis genus, quo conservatio vitæ nostræ, incolumitatis, libertatis, pudicitiae, fortunarum cum conservatione vitæ aliorum aliquando colliditur, idque vel tristi casu & citra hominum culpam, vel ex injusta aliorum aggressionem; ex qua justitia cruentæ defensionis pendet, pro iis nempe conservandis bonis; quod non idem ad defensionem existimationis & famæ porrigendum est. Appositum hæc exponendi locum præbent tituli de homicidio, & de pugnantibus in duello.

§. 47. Jus hominum in res externas ipsorum gratia conditas derivari potest a primo fonte, seu primævo statu, qui est communio rerum negativa. Hæc autem per occupationem tolli potuit non invita natura, & jure sublata est. Inde manat notio Domini; cujus consecutaria sunt jus percipiendi omnia emolumenta ex re sua: jus possessionis: & jus alienandi. Modus acquirendi Dominium alius est primitivus, alius derivativus: uterque principalis vel accessorius. A modo acquirendi differt titulus, seu ratio, ex qua intelligitur justitia acquisitionis. Vim acquirendi Dominium a natura habet occupatio & accessio saltem naturalis, qui sunt modi primitivi: dein tanquam modi derivativi divisio rerum positive communium, cessio quoad res incorporales, & traditio corporalium fundata maxime in contractibus. At vim a natura non habet præscriptio, nec quævis successio ex testamento vel ab
inte-

intestato (e). Reliquiæ communionis primævæ ex-
tant in rebus inexhausti usus, in iis, quæ occu-
pari non possunt, aut occupatæ non sunt, vel ite-
rum abjectæ, non tamen in rebus deperditis, nec
jacentibus. Fundamentum Dominii, quod inter-
misticum vocant, petendum est ex justa hominum
ignorantia, & bona fide. Possessionis enim malæ
fidei ipsum repugnat jus naturæ, quemadmodum
aliis delictis, quibus aliorum circa res externas jura
læduntur. Jus quidem extremæ necessitatis in res
aliorum dominio subiectas censeretur tanquam
jus ex primæva Communione residuum, idque cer-
tis temporibus perfectum est: at jus innoxie utilita-
tis in rebus alienis est imperfectum (f).

(e) *Hæ doctrinæ juris naturalis pertinent ad titulos de causa
possessionis & proprietatis, de præscriptionibus, de variis
contractibus, de acquisitione ex testamento vel ab inte-
stato. Quidam interpretes eas etiam attingunt ad titu-
lum de clerico venatore.*

(f) *De delictis juri dominii & possessionis oppositis agitur
ad titulum de restitutione spoliatorum, de furtis, de rap-
toribus & incendiariis, de usuris, de damno dato. De
naturali obligatione restituendi res alienas aut resarciendi
damnum datum, de qua egi toto Capite XVI. Institut.
Jur. Nat. Priv. singularis titulus in jure non extat: no-
tiones tamen generales exponuntur titulo de solutionibus
& de damno dato, itemque cum agitur de contractibus, &
acquisitione hereditaria.*



CAPUT IV.

DE JURE NATURÆ SOCIALI GENERATIM, AC DE
SOCIETATIBUS MINORIBUS, PRÆCIPUE CONJUGUM,
PARENTUM, DOMINORUM, ET
FAMILIÆ.

ARGUMENTUM.

- I. In Jure Eccles. de variis agitur societatum generibus §. 48. II. Hinc ex Jure Nat. usum habet distincta societatis notio, multiplex divisio, resultans personarum status, & modus per suffragia definiendi negotia. §. 49. III. In Jure Nat. & Ecclesiastico agitur de minoribus societatibus. §. 53.*

§. 48. Ipsa Christi Ecclesia societas est divinitus instituta, eaque catholica, seu universalis, in qua unio & connexio membrorum perfectissima, non modo externa per imperium sacrum, sed interna quoque pro foro Dei quoad communionem bonorum, operumque spiritualium obtinet. In hac societate per orbem diffusa aliæ insunt minores societates, ceu inter Episcopos unius nationis, provinciæ, clerum unius diœceseos. Collegia canonicorum ecclesiarum cathedralium & collegiatarum, seminaria clericorum, Universitates studiorum, piæ confraternitates, ordines regulares utriusque sexus, jure sociali, tum naturali, tum positivo reguntur. Accedit, quod in jurisprudentia ecclesiastica multi extent canones, ad societatem conjugum, parentum ac liberorum, dominorum ac servorum pertinentes, & frequens hoc maxime ævo mentio fiat de societate civili, de qua proximo capite erit agendum. E contrario sacri Canones gravissime resistunt illicitis conventiculis hæreticorum, schismaticorum & occultis coitionibus liberorum murariorum, conspiracyonibus &

& conjurationibus clericorum adversus Prælatos, synodis reprobis, quas aliquando *prædatorias* appellant, & *latrocinia*, non modo ob acta earundem, sed ob ipsum agendi modum, & personarum, quæ eo convenerant, conditionem. Ex his satis jam intelligitur, quomodo generalia principia juris socialis naturalis jus ecclesiasticum quasi pervadant, ac proin hæc pars jurisprudentiæ naturalis cum institutionibus ecclesiasticis conjungi possit, debeatque, præsertim postquam variæ loquendi formulæ notionesque connexæ ex jure naturæ sociali ad jus sacrum transferri cæptæ sunt.

§. 49. Quando societas dicitur conjunctio plurium ad obtinendum communem finem permanentem, vox, *conjunctio*, tum actum denotat, quo plures consociantur, tum vinculum inde resultans & statum perdurantem. Pro distincta autem cujusvis societatis cognitione expendi debent

I. Personæ, ex quibus ea componitur:

II. Origo & modus consociationis, utrum pacto vel ex lege proveniat:

III. Finis, societati & sociis propositus:

IV. Rationes ac viæ assequendi propositum finem; seu *negotia socialia*.

V. Forma societatis; æqualis sit, an inæqualis; si inæqualis & cum imperio, utrum hoc penes omnes sit, plures, an unum; dein utrum imperium sit plenum, vel minus plenum; absolutum, an limitatum; quo casu *limites patitii* spectandi sunt.

VI. A forma & imperio societatis differt ejus *politia* seu interna constitutio & ordo actionum & agentium, quo determinatur, quid, quo modo agat quisque socius, aut non agat.

VII. Salus societatis sita est in progressu non impedito per actiones sociales obtinendi propositum finem; atque id, quod per istiusmodi actiones tanquam finis obtinetur, *bonum commune* societatis nuncupatur.

§. 50. Ex his multiplex societatum denominatio petitur. Nam ex fine proposito societas dicitur *sacra, profana, literaria* &c. Ex personis & origine alia est societas *absoluta*, in qua omnes homines in terra degentes ipsa natura constituit: alia *hypothetica* ex lege aut pacto proveniens: illa *legalis*; hæc *pactitia* nuncupatur: iterum alia *particularis* uti pactitia, alia *universalis* ceu ecclesia Catholica. A forma nuncupatur *æqualis*, quæ si particularis est, appellatur *Collegium*; cujus Directorium non tollit æqualitatem: alia *inæqualis*. In omni hoc genere personæ societatem componentes efficiunt unam personam moralem, estque societas *simplex* aut *composita*, uti personæ eam componentes aut singulares ac physicæ sunt, aut morales; ex quibus componuntur *corpora*, seu *universitates*.

§. 51. Status naturalis hominum per adventitium societatis statum magis magisque determinatur, novaque affert jura, aut novas, arctioresque jurium rationes (a). Qui societatem init, ad explenda jura, quæ intrinsecus eidem inhærescunt, aut legitime connexa cum ea sunt, obligationem suscepisse censetur: cum ipse status nihil sit, nisi jurium, id est, facultatum & obligationum complexio. Fieri etiam potest, ut status statum pervadat & unus homo statuum ratione multiplex persona sit (§. 8. n. III.)

(a) *Diversæ quæstiones sunt, quid homo homini debeat: quid conjugæ conjugii: parentes liberis. Si hominem occidere, nefas; multo magis parentem, aut prolem.*

§. 52.

§. 52. Sociorum conventus, qui sunt ob negotia societatis, sunt *veri*, aut *repræsentativi*; *stati* vel *extraordinarii*. Vota autem, seu suffragia, per quæ negotia definiuntur, varii itidem generis sunt; ac primo *virilia*, vel *curiata*; dein *unanimitia*, aut *diversa*, eaque *paria*, vel *imparia*, *minora* vel *majora absolute* vel *respective*; præterea nominantur vota *saniora*, *decisiva*, *consultiva*. Modus terminandi negotia per parem suffragiorum numerum, dicitur *calculus Minervæ*, in specie quando par est numerus judicum absolventium & condemnantium; tunc enim sententia *absolutoria* prævalet (b). Si ergo per suffragia decidendum est, in quæstionibus *an*, absque majoritate suffragiorum frequenter obtinet calculus *minervæ*; ut res priore statu relinquatur: nam in pari causa melior est conditio prohibentis (c). In quæstionibus *quomodo*, necessaria regulariter est eorum pluralitas. In certis tamen negotiis nec ista sufficit. Exempla dari possunt tum ex sacris canonibus, tum ex constitutionibus imperii Germanici, tum ex natura talis negotii, in quod cadit regula juris: *Quod omnes tangit, debet ab omnibus approbari* (d).

(b) Origo ex fabulis est. Orestes Clytemnestram matrem furiosus occidit. In iudicium vocatus, cui Minerva, id est, æquitas præsidebat, cum majores essent lapilli atrii, seu condemnatorii, & Minerva addendo album suffragia æquasset, Orestes evasit.

(c) l. 24. D. Communi dividendo.

(d) c. 29. de R. J. in 6. Exempla juris canonici vide c. 40. de Electione, quando postulatio cum ea concurrat. c. 43. §. 1. eod. in 6. de electione Abbatisse vel Priorisse. De Imperio germanico extat exemplum in Inst. R. O. Art. V. §. 52.

§. 53. A generalibus *societatum* notionibus jurisprudentia naturalis progreditur ad minores societates, naturæ maxime conformes, nempe conjugum inter se, dein parentum & liberorum; his commodi causa & velut jure quodam, aut consuetudine gentium adjuncta fuit societas Dominorum ac servorum. Ex triplici hoc genere existit societas perfecta familiæ.

§. 54. Naturalia jura societatis conjugalís per leges divinas revelatione cognitæ, ecclesiasticas item, & civiles magnopere confirmata, illustrata, atque ad majorem honestatem, perfectionemque adducta sunt; agiturque de matrimonio recte ineundo, ejusque legitimo usu toto libro IV. Decretalium; cui ex libro III. adjungendi sunt tituli, tertius *de clericis conjugatis*, secundus & tricesimus *de conversione conjugatorum*; & quadragesimus septimus *de purificatione post partum*. Ex libro V. titulus sextus decimus *de adulteriis & stupro*.

§. 55. De parentibus & liberis multa naturæ præcepta extant in sacro Codice utriusque Testamenti, multa per canonum collectiones dispersa sunt. Ex Decretalibus singillatim eo referendi sunt tituli *de baptismo & cognitione spirituali*: *de testamentis & successionibus ab intestato*; *qui sint filii legitimi*; *de infantibus & languidis expositis*: *de his, qui filios occiderunt*. Declaratur item, patriam potestatem ad beneficiales, aliasque causas spirituales non extendi,

§. 56. Cum natura omnes liberi nascantur, de servitute & Dominorum jure in jurisprudentia naturali differi non potest, nisi ex hypothese adventitii status servilis ac herilis, pro qua legitimi modi,

qui-

quibus oritur servitus, & quibus cessat, examinari solent. Habuit antiquis temporibus Ecclesia quoque servos, iisque manumissis jus patronatus in ipsos, ipsorumque liberos retinuit. Ex decretalibus huc pertinent tituli *de servis non ordinandis*, & *eorum manumissione*; *de conjugio servorum*; *de natis ex libero ventre*. Quibus locis differendi de societate servorum ac Dominorum, quantum necesse est, copia & facultas suppeditat. Extincta inter Christianos servitute, res tota usum vix habet, nisi forte in infidelibus bello captis. Nam homines proprios, etsi duræ conditionis sint in nonnullis regnis, multoque etiam minus domesticos famulos & ancillas jure antiquo servorum metiri non possumus.

§. 57. Ex societate conjugali enascitur parentalitas: utriusque commodo adhibetur societas herilis aut nostris temporibus famulatus, qui locatione conductione nititur. Ex triplici hoc genere componitur *status familiæ* perfectæ. Interest accurate expendere naturalem gravissimamque obligationem patrum - matrumque familias, qua invigilare domesticorum saluti non modo temporali, sed spirituali quoque tenentur, omnemque suam interponere auctoritatem, ut, amotis pravis exemplis & peccandi occasionibus, domus universa Religionem sancte colat, & Ecclesiæ leges observet; quin ob eam causam patres - aut matres familias de ipsis Ecclesiæ legibus jus habeant judicandi, disponendique. Eo respexit haud dubie D. Paulus, quando in hanc sententiam scripsit: *Siquis autem suorum & maxime domesticorum curam non habet, fidem negavit, & est infideli deterior (e)*. Si isthuc patrum - matrumque familias officium appellare velis *jus circa sacra*, non refragabor, modo

servata ratione quadam similiter de jure Imperantis circa sacra cogitare ac differere velis.

- (e) *I. Timothi. V. 8. Ceterum familiae ac domus nomine aliquando designatur series personarum a communi quodam stipite descendantium, certaque jura participantium; quod explicari solet, cum agitur de successione in principatibus, in feudis, in fidei commissis, ab intestato, ac de consanguinitate, ejusque gradibus.*

CAPUT V.

DE JURE NATURÆ PUBLICO.

ARGUMENTUM.

- I. Hujus Juris, quod instar novæ disciplinæ jactitatur, perutilis hoc ævo est cognitio. §. 58. II. Hinc expendi potest origo civitatum. §. 60. — Majestas, & forma imperii ac status civilis, & respondens subjectio. §. 61. Jura majestatica in specie. §. 64.*

§. 58. *Jus Naturæ Publicum, vel majestaticum naturale* dicitur, quod, posito civili statu, inter imperantem ac subditos obtinet, & rationis vi cognoscitur. De qua parte jurisprudentiæ naturalis scriptores hodierni mox in limine præfatur, & asseverant, eam scientiæ rationem mathematicarum facultatum more, id est, demonstrationes veritatum, æque perspicuas ac firmas continere. Sed fidem nempe facient iis, qui μαθημάτων tam imperiti, quam ipsimet, sunt. Rationis quidem lux non hoc primum ævo illuxit humano generi, & quid eā pro adventitio civili statu præscriberet, ita exploratum omnibus videbatur, ut admonitione quidem, aut pœnali sanctione, nulla autem singulari disciplina opus esset, quā sapere cogerentur juvenes & senes, profani & sacri, docti atque indocti. Pro concessis,
pro-

probatisque sumebantur ea, quæ de imperantium, ac subditorum juribus ratione innotescunt; neque aliud juris publici nomine denotabant Majores nostri, quam historicam regnorum & provinciarum cognitionem de legibus maxime fundamentalibus, ut vocant, seu pactis conventis inter Principem & subditos, ac de pacificationibus, & fœderibus, cum Principe vicino quodam, aut natione externa initis; quæ omnia, uti scitu necessaria, ita bona fide, ac sine fraude observanda credebantur.

§. 59. Posteaquam autem notiones, doctrinæque generales de juribus imperantium ac subditorum uno jam loco congestæ, atque in artem & disciplinam singularem redactæ sunt, earum studiosa informatio his maxime de causis suadenda est, *primo* ut naturalia præcepta in hoc genere discantium oculis animisque exhibeantur distincto faciliq; ordine, id quod memoriæ levandæ, & doctrinarum tenendæ consequentiæ perquam conducibile est. *Secundo* ut perspectis intimis hujus disciplinæ principiis errores novatorum, errorumque causæ certius deprehendi & fidentius impugnari, rejicique possint. Quæ maxime causa ad pertractandum jus naturæ publicum me impulerat.

§. 60. Primum est in jurisprudentia naturali publica, ut origo civitatum investigetur, earumque *notio* ponatur ob oculos. *Origo*, inquiunt, alia est *historica*, alia *philosophica*, id est, ni fallor, alia vera, alia commentitia. Societas conjugum, parentum item & liberorum tanquam seminarium humani conservandi generis haud dubie a natura constituta est, quin opus sit, ut ea, aucto jam hominum numero, & incitato nuptiarum æstu, singulis præcepta censeatur. A familiari societate ad
anar-

anarchicam homines transiisse fingunt, qua patres-familias communis utilitatis aut securitatis causa pacto quodam consociantur; demum ventum est ad societatem civilem communi imperio copulatam; quæ, cum perquam composita sit, distincte cognoscitur pervestigata ejus materia, forma, causa effectrice & fine, quem in securitate maxime situm volunt. Atque hæc jam societas in suo genere perfectissima est, pactitia, inæqualis & rectoria, perpetua, & comparate ad alias civitates una persona moralis, gaudens juribus connatis internis & externis.

§. 61. Societatis civilis, tanquam corporis politici, velut anima censetur imperium civile, seu complexio jurium ad gubernandam civitatem pertinentium, quæ *Majestas* dicitur. Ea jura sunt *immanentia*, & *transcuntia*. Illa ad jus inspiciendi, ferendi leges, & exequendi referuntur. Persona physica vel moralis, cui imperium inest, ejus subjectum dicitur; a cujus determinatione *forma* status civilis pendet, quæ simplex est, aut mixta. Ratione partium aut jurium Majestatis imperium vocatur *plenum*, aut *minus plenum*: ratione exercitii eorundem jurium censetur *absolutum*, vel *limitatum*. Manente eodem imperio & imperii subjecto, varius esse potest modus id exercendi, in quo *regimen* consistit (a). Quævis civitatis forma, uti fit in humanis rebus, sua commoda habet, & incommoda.

(a) *His notionibus, iisque fixis ac determinatis carere non debet, qui de forma Ecclesiastici status disputare recte velit.*

§. 62. Ex modo acquirendi imperium civile civitas *electiva* dicitur, aut *successiva* non una specie; est enim successio *patrimonialis*, aut contra non *patri-*

patrimonialis; atque hæc ipsa *familiaris* secundum lineam, aut gradum, aut non *familiaris*. Quovis casu de origine Majestatis quærent, utrumne & quatenus a Deo sit, nempe ut auctore naturæ, & quodammodo intra sphaeram naturalium rerum. Sine dubio distingui debet singularis Dei revelatio, quæ e. g. in veteri Testamento quosdam Reges constituit, ab occultis Providentiæ viis & multiplici causarum temporumque concurfu, qui idem a divina pendet Providentia, quæ in humanis rebus omnia disponit suaviter & fortiter. Hac spectata divinæ Providentiæ operatione *omnis potestas* a Deo est, non modo *suprema*, sed etiam *subalterna*: quæ tamen proxime & immediate a Deo profecta non censetur (b). Quemadmodum legitimi sunt modi acquirendi imperium civile; ita quæritur, utrumne sint & qui modi illud amittendi, manente, aut una intereunte civitate.

(b) *Rom. XIII. Quæ in jure sacro de origine potestatis spiritualis pro foro maxime externo, ac de canonicis eam acquirendi modis exponuntur, aut analogia quadam imperii civilis, aut potius a contraria & discrepante ratione illustrari possunt.*

§. 63. *Imperio civili respondet subjectio, quemadmodum omni potestati & juri correlativa dicitur obligatio. Pro legitimo, validoque usu potestatis vel imperii spectari præterea debet materia vel causa, in qua id exercetur, aut exerceri potest; omnis enim humana potestas ex origine sua, & natura ac fine ad certas actionum aut negotiorum causas, tanquam propriam suam materiam adstricta est, & coarctata. Potestas naturalis ad negotia naturalia pertinet, & imperium civile ad negotia civilia: potestas spiritualis & supernaturalis ad causas spirituales &*

& supernaturales. Hæc *relativa subjeſtio* & *perſonæ* & *cauſæ*, quæ imperio reſpondet, in quavis eiſdem imperii parte e. g. in jure inſpiciendi, ferendi leges, & exequendi primo ac diligentiffime ſpectari debet, quemadmodum de juriſdictione ac foro competente ſtatuitur, illud habita ratione tum *perſonæ*, quæ in jus vocatur, tum *cauſæ* conſtituendum eſſe.

§. 64. A generali ſtatus, imperii, & ſubjeſtionis civilis notione in iuriſprudentia naturali deſcenditur ad particulares articulos, in quibus majeſtatica jura ſeſe exerunt; ac

I. Securitati publicæ externæ providetur jure armorum, ac belli, jure legationum, fœderum, pacificationum; quæque alia ſunt jura majeſtatica *tranſeuntia*, quæ fere in diſciplina juris naturalis gentium examinantur :

II. Securitati internæ tum publicæ tum privatæ conſulitur jure gladii & vi armata, legibus item politiæ, per quam pericula vitæ, fortunarum, honoris, honeſtatis arcentur & propulſantur a civibus; e contrario opportuna commoda comparandi victum, veſtitum, habitationem, exercendi artes, opificia, agriculturam, commercia &c. ſuppeditantur.

III. Quia ſine ſumtibus publicoque ærario ſalus & tranquillitas civitatis obtineri & conſervari nequit, de jure tributorum, collectarum, veſtigalium, fiſci, bonorumque publicorum agitur.

IV. Imperans civilis eget conſiliariis, miniſtris & multiplici præfeſtorum atque adminiſtratorum genere; quod expendi ſolet in hac diſciplina una cum jure conferendi honores, titulos, dignitates.

V. Nul-

V. Nullum est securitatis, ac tranquillitatis conciliandæ, & retinendæ, & recuperandæ præsentius remedium, magisque necessarium, quam administratio justitiæ. Hinc generales notiones, & naturalia principia potestatis judiciariæ, tum civilis tum criminalis, accurate in hac parte jurisprudentiæ naturalis exponi debent.

VI. Articuli potestatis civilis hætenus enumerati, quæ veluti partes quædam sunt Majestatis, per leges subditis promulgatas maxime explicantur. Unde dubium non est, quin generales notiones, ac regulæ de potestate legislativa, ipsisque legibus in Jure Publico naturali suam veluti propriam sedem habeant, indeque ad alias disciplinas derivari possint, debeantque (c).

(c) *Quas jurisprudentia naturalis publica de hisce partibus imperii civilis notiones regulasque complectitur, eæ generales fere sunt, & quodammodo metaphysicæ. Unde perspicuum est, eas ad partes imperii Ecclesiastici explicandas adhiberi omnino debere, proindeque in disciplinam Juris Ecclesiastici quasi influere, & cum ea concurrere, conjungique.*

§. 65. Enumeravi amplissimam materiam, in quam, veluti campum longe lateque patentem, excurrant Majestatis jura boni communis, publicique curandi causa. Quid ergo; inquires, cum de Religione verbum fecerim nullum, nihil juris a me Principibus politicis in causa Religionis & Ecclesiæ tribuitur? Non id dico, cum paulo ante patribusfamilias Religionem, atque Ecclesiæ leges maxime cordi esse oportere docuerim (§. 57.). Habeant sane Principes in causis divinis atque ecclesiasticis jus defensionis & protectionis: habeant jus imitationis in constituendis legibus sacris, præeunte Ecclesia: habeant

beant jus gladii adversus impios hæresum, schismatum, sacrilegiorum auctores & sectatores. *Non enim sine causa gladium portat Imperans civilis; Dei enim Minister est: Vindex in iram ei, qui male agit (d).* Atque ego quidem de juribus Principum circa negotia Religionis non segniter egi toto Capite VI. Institutionum Juris Naturæ Publici, tum vero in Jure Ecclesiastico Publico locis pluribus, & in Isagoge Cap. XI. Hoc autem loco ea proposui politicæ potestatis objecta, in quibus illa jure suo, arbitrioque utitur, ut iis vel leviter consideratis fallacia & pravitas eorum scriptorum incurreret in oculos, qui Principem, nisi in causis Religionis atque Ecclesiæ exerere auctoritatem possit, omnemque hierarchiam suæ ditioni habeat subiectam, nihil prope habere fingunt, quod agat in civitate, aut cur præsit. Ita optimum quemque Principem more scelesti Amani loquentem inducunt: *Cum hæc omnia habeam, nihil me habere puto, quamdiu videro Machabæum Judæum sedentem ante fores regias (e).*

(d) Rom. XIII. 4.

(e) Esther. V. 13.

CAPUT VI.

DE JURE NATURALI GENTIUM.

ARGUMENTUM.

- I. *Expenditur notio gentis, & in quam hominum multitudinem cadat.* §. 66. II. *Jura specialia gentium enumerantur.* §. 68. III. *Aliter jus gentium definit Justinianus.* §. 69. IV. *Jus gentium consuetudinarium, & civitas gentium maxima.* §. 72.

§. 66. Plures civitates, sive societates, quarum singulæ civili, eoque summo gaudent imperio, inter

ter se comparatæ instar totidem personarum moralium sunt, quarum altera ab altera independens, suisque juribus connatis, internis & externis, a natura instructa est. Complexio istorum jurium appellatur *jus gentium naturale*, estque pars juris naturæ socialis personarum moralium, in societate absoluta humani generis viventium.

§. 67. Prima est quæstio, an in multitudinem aut societatem hominum notio gentis & civitatis cadat. Ea decisa, jura æqualitatis, libertatis, conservationis, aliaque istiusmodi §§. 23. 24. 25. enumerata, in personis moralibus multo magis perspicua sunt, quam in personis singularibus aut physicis, haud secus, ac vires mutuæ corporum in globis totalibus systematis solaris distinctius cernuntur, quam in minoribus materiæ particulis. Re autem vera jus naturale gentium a jure naturæ privato non tam regulis differt, quam subjecto, atque etiam objecto. Sunt enim negotia quædam gentium propria, non item singulorum.

§. 68. Jura gentium, uti privatorum, in statu libertatis viventium, alia sunt perfecta; alia imperfecta noxiæ vel innoxie utilitatis: activa vel passiva; maxime spectantur jura Domini, proprietatis, & territorii: alia jura ex pactis & fœderibus resultant; eminent jura belli, victoriæ, pactorum bellicorum, ac pacificationum, denique & jura legationum (a).

(a) De his omnibus frequens in jure sacro fit mentio: certe multiplex ea pertrahendi se offert opportunitas, quando agitur de jure perfecto justitiæ, vel imperfecto caritatis: de modo acquirendi dominium per universitatem: de jure territorii, extra quod jus dicenti impune non paretur: de præscriptione, utrumne ex natura
Zallinger P. I. Decretal. D vim

vim habeat, an creatura juris civilis sit: de fœderibus cum gente infideli initis, quando & quatenus iusta sint: de commerciis cum hostibus Christiani nominis: de trenga & pace: de homicidio iusto in bello: de modo gerendi bellum ad tit. de Sagittariis. de bonis naufragorum: de officio legati &c.

§. 69. Recensui summa capita juris gentium naturalis, quod nempe in natura hominum, gentiumque relatione rationem sufficientem habet, & in specialem disciplinam a Grotio, aliisque post ipsum scriptoribus redactum fuit. In legibus Romanis a Justiniano collectis jus gentium miscetur cum eo, quod generatim jus naturæ dicimus, sive, ut Justinianus inquit, quod naturalis ratio inter omnes homines constituit, id apud omnes populos peræque custoditur, vocaturque jus gentium, quasi quo jure omnes gentes utantur. Contra vero jus naturale est, quod natura omnia animalia docuit. Nam jus istud non humani generis proprium est, sed omnium animalium, quæ in cælo, quæ in terra, quæ in mari nascuntur. Hinc descendit maris atque semine conjunctio, quam nos matrimonium appellamus. Hinc liberorum procreatio, hinc educatio: videmus enim cetera quoque animalia istius juris peritia censerī (b).

(b) Princip. & §. 1. J. de jure naturali gentium & civili. Etsi sint adus quidam hominum & bestiarum communes, tamen hi ipsi quoque ab homine ratione regi debent; ac proin juris legumque notio in hominem cadit, non item in bestias.

§. 70. Exempla juris gentium a Justiniano recensentur hæc: Erga Deum Religio: ut parentibus & patriæ pareamus: ut vim atque injuriam propulsemus: — manumissiones quoque juris gentium sunt. — Ex hoc jure gentium introducta bella: discretæ gentes:

tes: regna condita: dominia distincta: agris termini positi, ædificia collocata: commercium, emptiones, venditiones, locationes, conductiones, obligationes institutæ (c).

(c) *L. 2. 3. 4. 5. D. de Justitia & jure.*

§. 71. Romani ergo non ea tantum jura, quæ inter plures gentes aut civitates, tanquam personas morales, a natura constituta sunt, ad jus gentium retulerunt, sed quidquid omnino ad jus naturæ privatum, sociale, publicum, aut gentium jus pertinet. Interpretes dein juris Romani duplex gentium jus distinxerunt, primævum & secundarium; *primævum*, quod non excogitatum, aut inventum usu exigente, sed nobiscum natum est, cœu Deum colere, parentes revereri, neminem lædere: hæc enim inter homines semper observanda erant. *Secundarium*, quod, *usu exigente & humanis necessitatibus*, homines constituerunt; quo pertinent *bella, captivitates, servitutes, omnes pene contractus, ut emtio & venditio, locatio & conductio societas, depositum, mutuum, & alii innumerabiles (d).* Hinc contractus, aliave negotia dicuntur *juris gentium*, quatenus non apud Romanos tantum, sed alias etiam nationes in usu sunt. Hæc ipsa tamen, quæ sunt juris gentium *secundarii*, jure & facultate a natura concessa ab hominibus & populis acta & constituta sunt, atque stricte ad disciplinam naturalis juris pertinent (e).

(d) §. 2. *J. de Jure Nat. gent. & civ.*

(e) *Conf. libr. Isagog. §. 197. Ubi de distinctione inter jus gentium primarium & secundarium memorabilem addidi animadversionem.*

§. 72. Scriptores temporum præteritorum, præter jus gentium naturale & necessarium, assignarunt aliud

aliud voluntarium ac positivum, itemque aliud pactitium. Utrumque hoc genus recentiores auctores fere rejiciunt. Nam voluntarium illud ex longo usu & observantia inter gentes proficisci deberet, unde ab aliis *consuetudinarium* appellatur. At enim quam obligandi vim habet consuetudo, nisi ex voluntate tacita vel expressa imperantis? Porro gentes liberæ nulli communi imperanti vel imperio subjacent. Id tamen videtur effici per consuetudinem posse, ut actio quædam inter gentes, aut actionis omissio haberi possit pro signo contemptus, aut læsi honoris: sæpe tamen istiusmodi actiones vim meri *decori* habent: alia, quæ consuetudini gentium adscribuntur, juris naturalis vere propria sunt. Pacta obligant gentes, inter quas intercesserunt; non item alias: proindeque ad jus universale gentium haud magis pertinent, quam pacta, quæ inter privatos cives conventa sunt, ad jus referri civile possunt.

§. 73. Fuere, qui sibi ideam effinxerunt *civitatis gentium maximæ*, cujus membra, ac velut cives censeri debeant gentes singulæ. Sed naturalis gentium libertas omnem istiusmodi unionem & commune imperium respuit. Societas quidem universalis gentium ex ipsa natura fluit, eaque absoluta est, & necessaria, cujus juribus perfectis satisfit per actiones negativas vi Principii: *Neminem lædere*. Neque ista gentium absoluta societas cum Democratia analogiam habet. Nam in statu democratico speciale pactum subjectionis singulos patresfamilias communi imperio corporis politici adstringit, tenetque adstrictos. Deest autem istiusmodi pactum gentium singularum relate ad universitatem gentium, in statu naturali libertatis degentium; secus non pollerent singulæ suprema potestate civili; quia universitati sub-

subiectæ essent: uti civis, etsi civi subiectus non sit, cum tamen communi subiaceat imperio, in statu naturali haud vivit.

CAPUT VII.

DE JURE ECCLESIASTICO PUBLICO CONJUNGENDO
CUM INSTITUTIONIBUS JURIS DECRETALIIUM.

ARGUMENTUM.

I. Exposita notione quæritur, an separatim tractandum sit; conjungi certe cum Jure Decretalium haud ægre potest. §. 74. II. Descriptio ejus, rerumque ordo proponitur. §. 77.

§. 74. *Jus Ecclesiasticum Publicum* complectitur jura, id est, facultates & obligationes eorum, qui ex institutione Christi cum potestate publica & rectoria præsunt in Ecclesia sancta Dei, nempe Episcoporum, atque in primis summi Romani Pontificis. *Publica* dicitur istorum potestas, quia non pro foro tantum interno ad dimittenda peccata, & fideles verbo Dei, & Sacramentis pascendos pertinet, verum etiam ad eosdem gubernandos per leges, coactionem, pœnas, administrationem justitiæ in foro Ecclesiastico, & stabilitum ordinem Præpositorum, ac subditorum. Est autem *jus Ecclesiasticum publicum* aliud *commune ac universale*, quod per se ad totam pertinet Ecclesiam catholicam: aliud *publicum particulare*, in moribus specialibus & concordatis, maxime inter nationes & Sedem Apostolicam initis consistens; id fere historicum est totum, atque ad rectam interpretationem prælucente notitia juris publici communis eget, ut nempe definiri possit, utrumne & quatenus juri generali per speciale derogatum

gatum, aut jus commune correctum sit; quod odiosum censetur in omnium disciplina jurium.

§. 75. In corpore juris Decretalium & in commentariis veterum jus isthuc Ecclesiasticum publicum separatim non exhibetur, sed pro ratione titulorum quaquaversus dispersum est. Cel. Zechius in hunc modum sentit: *Cum auditorum nostrorum inter sit, utriusque hujus juris, publici & privati notitiam simul, unaque opera haurire; hinc sicuti in ipso corpore juris materiæ istæ inter se permixtæ sunt; ita urgens causa hucusque non adparuit, ut in publicis scholis ab invicem separentur* (a). Sed prævaluit hoc ævo apud plerosque non tam cupiditas, quam æstus novandi omnia; & quia non pauci extitere, qui obtentu emendandæ methodi rem ipsam in pejus mutarunt, sacrumque jus corruerunt locis plurimis; idcirco necessitatem mihi ante annos decem impositam credidi, ut publicam jurisprudentiæ canonicæ partem a privato jure, in quo prælegendo versabar maxime, segregatam ederem, ut hac etiam parte nihil deesset iis, qui ingenio atque otio abundarent, cum juri sacro dant operam, iisque supplementis integrare institutiones juris privati ipse possem.

(a) *In Præcognitis juris canonici. Tit. IV. §. 47.*

§. 76. Si argumentum expenditur Juris Ecclesiastici, totum id propemodum dogmaticum est, ac Theologiæ proprium; at si tractandi rationem, quam mihi quidem ineundam duxi, paulo attentius consideres, haud ægre intelliges, illud non attingi in disciplina canonum, quatenus materia est dogmaticæ fidei, sed qua parte fundamentum hierarchicæ potestatis, rectæque gubernationis Ecclesiasticæ continet.

finet. Fides quidem commune est bonum, ejusque velut fundamento ac radice non magis Theologi, & Clerus, quam laici omnes, totusque Jurisconsultorum ordo egent; convelli jus sacrum haud poterit, quamdiu firma stat, vigetque in animis divina fides: at eo labante aut subruto fundamento, in asserendis, confirmandisque sacris juribus vix quidquam efficies, ac ne vix quidem; innumerabiles enim excogitatae sunt viae rationesque auctoritatis divinatorum Codicum depravandae, & sacrae eludendae Traditionis.

§. 77. De conjungendo cum institutionibus juris Decretalium ipso jure Ecclesiastico publico non magnopere laborandum est; praecipua enim istius capita titulum in Decretalibus habent, ac velut sedem propriam, aut obtinere facile possunt. Quapropter illud tantum relinquitur, ut opportunas quasdam de jure illo publico animadversiones hic praemittam. Ac primo quidem Publicistae omnes in genere quocunque descriptionem profuerunt communitatis illius perfectae, cujus publicum jus exposituri sunt, ejusque internam constitutionem, quantum fieri principio potest, ponunt ob oculos. Potestas enim publica, de qua deinceps acturi sunt, internae constitutioni respondet.

In Decretalibus titulus primus inscribitur *de summa Trinitate & fide catholica*; unde de Ecclesia etiam catholica, ejusque proprietatibus divinitus inditis agendum est, cum ipsum symbolum Lateranense ibi propositum complectatur dogma *de una fidelium universali Ecclesia, extra quam nullus omnino salvatur*.

§. 78. Posita ob oculos Ecclesia, agitur de potestate ecclesiastica, eaque publica & rectoria. In

verbo Dei scripto ea proponitur generalibus atque amplissimis verbis; reipsa autem est complexio plurimum sacrorum jurium, ad Ecclesiæ gubernationem pertinentium, & continet jus prædicandi fidem & doctrinam Christi, & controversias de illis ortas decidendi infallibili auctoritate: jus credentes baptizandi, eoque ritu subjiciendi Ecclesiæ; alia dein Sacramenta iis administrandi, præscribendi, cultum divinum, sacrosque ritus, adsciscendi & ordinandi ministros & dispensatores mysteriorum Dei, eosque specialiter informandi ac regendi ad omnem vitæ honestatem: lites inter ipsos exortas decidendi, delinquentes coercendi ac puniendi &c. Hæc igitur potestas primo generatim velut in fonte ac radice proponitur, ex qua plurimi tanquam rivuli aut rami proveniunt, de quibus singillatim, ac suis locis explicate agitur. Ipsi adversarii ejus potestatis, identidem ad generalia Scripturæ verba velut ab hypothesis ad thesin disputando revolvuntur.

§. 79. Duo sunt, quæ de potestate ecclesiastica disceptari debent: *primo*, ut ostendatur, eam ex institutione divina, ab omni naturali, civili & politica potestate penitus distinctam esse, & segregatam, eaque disputatio non uno loco generatim confici potest, sed ad singulas prope sacri imperii propositas partes recrudescent. *Secundo* eandem inter eos, quibus ex Christi institutione aut Ecclesiæ dispositione competit, apte ordinateque esse distributam, ut caveri maxime debeat, ne alii aliorum jura usurpent, suæque potestatis limites transgrediantur.

§. 80. Dominus noster J. Ch., tanquam auctor gratiæ, de potestate acturus, quam in Ecclesiam collaturus erat, ex omni discipulorum numero elegit
duo-

duodecim, quos Apostolos nominavit, atque ex his duodecim *unum*, quem singulari consilio Petrum, seu Petram nuncupari voluit, atque ita a summo principatu, velut a fundamento, exorsus est, quod apertissime in Petro ejusque Successoribus situm voluit; sic enim de prima institutione atque origine potestatis ecclesiasticæ agendum est, ut transmissio ejusdem potestatis in Successores ex verbis & mente Christi una explicetur. De illo principatu seu primatu Petri in S. Codice agitur Matth. XVI. a v. 13. Luc. XXII. v. 31. 32. Joan. XXI. 14. seq.

§. 81. Constituto Petri primatu, expenditur, quid potestatis a Christo collatum sit in Apostolos, a quorum numero nunquam aberat Petrus; nihil enim Apostolis datum, quod non & Petro: at Petro concessa est peculiaris potestas, quæ Apostolorum non erat communis. Ad universos Apostolos pertinent verba Christi Joann. XX. v. 19. Matth. XVIII. 18. Matth. ult. Marc. ult. item quæ Paulus habet Ephes. II. 20. & Joannes Apoc. XXI. 14. Ut transmissio potestatis in successores seu episcopos recte intelligatur, consensu omnium, atque etiam ipsorum Protestantium distingui oportet jura Apostolorum extraordinaria, & ordinaria: in juribus extraordinariis successio nulla est.

§. 82. Facta comparatione potestatis *Soli* Petro datæ, & potestatis in universos collatæ Apostolos, stabilitur Petri & Successorum primatus non qualiscunque ordinis, honoris aut directionis, sed veræ potestatis & jurisdictionis, ejusque universalis, supremæ, ordinariæ, & conjunctæ cum potestate cogendi subiectos ad consentiendum in fide & communione cum Sede Petri, tanquam fidei & communionis centro.

§. 83. Ex divina ordinatione, præter Petrum & Apostolos, atque utròrumque successores, Romanum nempe Pontificem, & Episcopos reliquos, instituti sunt Ministri inferioris ordinis. Pro faciliore item regimine universalis Ecclesiæ inter ipsos dein Episcopos auctoritate ecclesiastica constituti sunt quidam gradus, designatis diœcesibus, provinciis, amplioribus etiam districtibus: unde diœcesani Episcopi, Metropolitæ, Primates, & Patriarchæ dicti sunt; synodi item diœcesanæ, provinciales, nationales, generales seu plenariæ & œcumenicæ.

§. 84. Propositis hisce factarum personarum & ministrorum Dei gradibus, enascitur idea *Hierarchiæ*: in ea distinguitur potestas ordinis & jurisdictionis, suis utraque gradibus ordinatim distributa: jurisdictio alia est fori interni, alia externi, seu publica & rectoria, in Episcopatu maxime ejusque gradibus consistens. Fit comparatio eorum graduum, eaque duplici ratione, ut Episcopi seu Hierarchæ tum seorsim spectentur, tum collecti in synodos: maxime autem duplex hæc comparandi ratio refertur ad primatum Successorum Petri.

§. 85. Ut dein *forma* status atque imperii ecclesiastici definiri possit, ex dictis *subjectum* potestatis publicæ & rectoriæ in Ecclesia deduci debet, illudque expendi, utrumne & quales limites potestatis Episcopis, tum seorsim spectatis, tum in synodos congregatis, atque ipsi Episcoporum Capiti, Successori Petri, positi a Deo sint, vel ecclesiastica auctoritate poni potuerint. Atque hæc de subjecto potestatis, ac de forma ecclesiastici status quæstio juris publici maxime propria est.

§. 86. Constituto potestatis subjecto, ac definita status forma, in disciplina juris publici fit progressio
ad

ad pertractandas eas causas, seu exponenda objecta, quæ publicæ potestati maxime subjacent. Istiusmodi causæ in jure publico ecclesiastico aliæ sunt juris divini, aliæ juris humani. Illæ appellantur *causæ fidei*, hæ vero *disciplinæ*. Ad causas fidei referuntur quæstiones de naturali honestate actionum & morum: causæ item communionis & oppositi schismatis. Disciplina ad quatuor capita vulgo reducitur. Est enim disciplina liturgica seu interna, ad quam referuntur actus religionis, virtutum, ceremoniæ, festa; pœnitentiæ item, jejunia, cultus & veneratio Sanctorum, reliquiarum, sacræ imagines, benedictiones, aliaque istius generis: reliqua disciplinæ, ejusque externæ, capita sunt creatio & ordinatio ministrorum, promotio ad officia, & universa politia cleri: dein regimen ecclesiasticum seu modus exercendi potestatem legislatariam, inspectariam, judicariam: ultimum disciplinæ caput in administrandis, riteque dispensandis temporalibus Ecclesiæ bonis situm est.

§. 87. Etsi autem potestas Ecclesiastica penitus diversa sit & distincta a naturali & politica potestate; tamen dubium non est, quin Principi politico ex naturali obligatione religionis pro statu hypothetico Ecclesiæ divinitus institutæ jus defensionis ac patrocinii circa negotia Religionis & Ecclesiæ causas competat. Quapropter ut rectæ exponantur causæ ecclesiasticæ publicæ, disquiri singillatim debet, quid juris summo Pontifici, quid Episcopis vario gradu positis, seorsim aut in synodis, quid denique defensionis & patrocinii titulo Principi politico in iis tractandis & expediendis causis tribui debeat. Atque hæc de jure publico ecclesiastico generatim præmittenda duxi.



LIBER I.

TITULUS I.

DE SUMMA TRINITATE ET FIDE CATHOLICA.

ARGUMENTUM.

- I. Fidei, quæ Fundamentum est, symbola. §. 88. II. Definitio & proprietates Ecclesiæ. §. 91. III. Symbolum. SS. Conc. Trid. Addita pro Græcis §. 96. IV. Quis teneatur profiteri ex Symbolo Trid. §. 98.*

§. 88. **F**undamentum omnis veræ justitiæ divina fides est, a qua disciplinæ Canonici exordium rectissime duci, in Isagoge præmonui (a). Neque verò in animum induco, ut doctores scriptoresque catholicos, qui jus sacrum, tot seculorum atque ecclesiarum usu stabilitum, modis omnibus lacerant, ea, qua oportet, fidei firmitate atque integritate pollere judicem. Auctorem hujus sententiæ habeo S. Leonem IV. ad Episcopos Britannia ita scribentem : *Luculentius & magna voce pronuntiare non timeo, quia, qui illa, quæ diximus, sanctorum Patrum statuta, quæ apud nos Canones prætitulantur, sive episcopus, sive clericus, sive laicus, non indifferenter receperit, ipse se convincit, nec catholicam & apostolicam fidem, nec sancta vera Christi Evangelia quatuor utiliter & efficaciter, & ad effectum suum retinere, vel credere (b).*

(a) C. II. §. 15.

(b) *Apud Gratianum Can. I. dist. 20. in Concil. edit. Mansi T. XIV. Col. 884.*

§. 89. Veritas quæcunque, a Deo revelata, dicitur *veritas divinæ fidei*: si, ut talis, publico Ecclesiæ sensu aut iudicio proposita est, nominatur *dogma*: dogma quoddam præcipuum, omnibus scitu necessarium, est *articulus fidei*: dogmatum & articulorum breves summulæ aut collectiones nuncupantur *fidei symbola*, tanquam publica signa, per quæ orthodoxi ab infidelibus & sectariis distinguuntur.

§. 90. In Ecclesia Catholica sex numerantur fidei symbola, quorum nullum alteri adversatur; alterum tamen altero distinctius exhibet Catholica dogmata; quod propter exortas hæreses fieri debuit.

I. Symbolum *Apostolorum*, quod in omnium mente & ore versatur.

II. *Concilii Nicæni*, quo magis declaratur Divinitas Jesu Christi contra Arianos.

III. *Concilii Constantinopolitani primi*, quod in Missis decantatur, apertiusque definit Divinitatem Spiritus sancti contra Macedonianos.

IV. *Sancti Athanasii*, ut vulgo nuncupatur, vel alterius Doctoris catholici, horis canonicis ad Primam insertum. Id non tam per modum professionis fidei, quam doctrinæ & instructionis compositum est: quia tamen *integram fidei veritatem ejus doctrina breviter continet, auctoritate Summi Pontificis est recepta, ut quasi regula fidei habeatur* (c).

V. *Concilii Lateranensis IV.* sub Innocentio III., quo clarius explicatur mysterium SS. Trinitatis, atque id in capite libri primi Decretalium positum est.

VI. Con-

VI. *Concilii Tridentini*, cujus formula eadem est cum symbolo Constantinopolitano, nisi quod declarationes habeat adjunctas contra errores posteriorum temporum, & sectarum.

(c) *S. Thomas 2. 2. q. 1. a. 10. ad 3. Idem S. Doctor binas decretales hujus tituli eruditissime explicat opusc. 23 & 24.*

§. 91. Si fides, tanquam anima credentium, spectatur, congregatio fidelium firmiter credens, & simpliciter confitens pro corpore animato haberi debet, quod est *Ecclesia*, sive cœtus hominum unius professione fidei, & eorundem Sacramentorum communione colligatus sub regimine legitimorum pastorum, atque in primis Summi in terris Christi Vicarii, Romani Pontificis: estque hæc Christi Ecclesia ex divina institutione necessario *Una, Sancta, Catholica & Apostolica*: quas Theologi *notas* appellant, quibus ea a sectis distinguitur; in jure autem Ecclesiastico publico pro *legibus fundamentalibus* ipsius status & imperii Ecclesiastici habere debemus: quia certæ sunt & indubitatæ, ab omnibus agnitæ, utpotè in symbolo fidei contentæ; & quia rationem ac finem imperii sacri, seu potestatis ecclesiasticæ comprehendunt. Nam eo tendit hæc potestas tota, ut Ecclesia sit, maneatque una, sancta, catholica & apostolica; atque ex vi ejusdem potestatis, cui singularis assistentia divini Spiritus a Christo adpromissa est, ea sit indefectibilis active, ut aiunt, & passive, etsi inde a primo ortu suo nostris æque ac præteritis temporibus tum aperto furore, tum occultis machinationibus dæmonum, & pravorum hominum gravissime impugnata sit, & in dies impugnetur (d).

(d) *De hoc bello, quod ardet inter regnum Christi & Sætanæ, altum silent hodierni scriptores, omnia scilicet mentientes*

tientes ingenio suo, & ecclesiam, nescio quam, fingentes pro naturali statu, opinionationes dein suas, aut somnia transferentes ad statum præsentem. Unde SS. & æcumenica Tridentina Synodus, antequam ad extirpandas hæreses, & mores reformandos aggredieretur, iustissime omnes hortata est his verbis Sess. III: „Agnosce (SS. Synodus) „cum Apostolo, non esse sibi collutationem adversus carnem & sanguinem, sed adversus spirituales nequitias in „cælestibus, cum eodem omnes & singulos in primis hortatur, ut confortentur in Domino, & in potentia virtutis „ejus, in omnibus sumentes scutum fidei, in quo possint „omnia tela nequissimi ignea extinguere, atque galeam „spei salutis accipiant cum gladio Spiritus, quod est verbum Dei.“

§. 92. Notio Ecclesiæ in ipso limine jurisprudentiæ depravatur a multis ob occultos errores, quos fovent, aut ex imperitia certe quidem. Ajunt enim, definitiones vocum esse arbitrarias. Resp. Definitiones vocum, quæ rem existentem, & divinitus institutam exprimunt, neutiquam ab humano pendent arbitrio. Quando Christiani omnes universi orbis ex symbolo fidei dicunt: *Credo unam, sanctam, catholicam & apostolicam Ecclesiam*, non certe Ecclesiam cogitant, quæ esse, aut fingi potest; aut quæ nulla sit modo, sed fuerit tantum primis quatuor, aut quinque seculis: sed eam denotant Ecclesiam, quam Christus acquisivit Sanguine suo: quam totam ædificavit supra petram: quam regnum suum, hæreditatem suam, ovile suum appellavit: quæque in sacro Codice dicitur domus Dei vivi, columna & firmamentum veritatis, civitas supra montem posita, corpus Christi, cujus corporis ipse est caput, acies castrorum ordinata, sponsa Christi. Hæc omnia in unam & individuum, reipsa existentem, divinitus institutam & conservatam cadunt Ecclesiam. Sic ergo describi debet hæc Ecclesia, ut sponsa Christi a mere-

meretricibus, domus Dei a speluncis latronum, Ecclesia Christi a synagogis Satanæ, congregatio orthodoxorum a conventiculis sectariorum internoscatur (e).

(e) *De conventiculis hæreticorum juxta indignantur imperatores orthodoxi l. Ariani. 5. c. de hæret. quod ea audacter ecclesias nuncupare conentur. Justinianus Nov. 109. „pr. ait: Licet nomen Christianorum sibi imponerent; at „tamen a Christianorum se fide & communione separant, Dei judicio semet ipsos subdi agnoscentes. Conf. „Apoc. II. 9 & 13. & III. 9.“*

§. 93. Aliqui expressam supra notionem Ecclesiæ tanquam novam reprehendunt. Resp. Nova dici potest verbis & complexione notarum, quæ tamen minime novæ sunt, sed semper agnitæ fuerunt. Ac debuit nova fieri complexio contra Sectarios, qui, uti animadversum est paulo ante, conventicula sua audacter ecclesias nuncupare conantur: re autem ipsa nequaquam nova est; quia ea, quæ exprimit, semper requisita fuerunt, ut aliquis veræ Ecclesiæ membrum censeretur.

§. 94. Auctor quidam moleste fert, Ecclesiam Christi nuncupari sæpenumero Romano - Catholicam, putatque omnino has notas inter se pugnare, quia vox *Romana* aliquid *singulare*, *Catholica* contra quidpiam *universale* exprimit. Resp. Auctor ille aperte favet factioni Jansenisticæ in Hollandia, ubi veri Catholici, ut a Jansenistis distinguantur, passim *Romano - Catholici* nominantur; hinc mirum non est, quod ægre id ferat. Imperite autem pugnam verborum objicit; non enim Ecclesia dicitur catholica seu *universalis*, tanquam genus, quod plures species, aut tanquam species, quod plura con-

continet individua; sed quæ una & unica atque individua est sponsa Christi, eadem est catholica seu universalis, quippe *quæ semper, quæ ubique, quæ apud omnes, quæ tempore, loco, multitudine, antiquitate, universitate & consensu, novitati, parti, & paucorum errantium* (quales fuerunt Donatistæ in Africa, & Jansenistæ sunt in Hollandia) *diffensioni præfertur* (f). Una ergo, & singularis est Ecclesia, etsi sit universalis: una est arbor, etsi rami quaquaversus diffundantur: unus est fons, etsi rivuli dimanent in omnes partes: unus sol, etsi radii dispergantur in orbem. *Romana* nuncupatur; quia tota supra Petram seu Petrum, & Successores a Christo ædificata fuit; et quia, ut Claudius Fleurius in Catechismo hist. l. 2. p. 2. lect. 9. ait, veræ Ecclesiæ nota est conjunctio cum sancta Sede Romana.

(f) *Gothofred. ad l. 1. lit. F. C. de Sum. Trinit.*

§. 95. Alius ante paucos annos emerfit juris sacri profanus scriptor, qui Ecclesiæ notas seu prærogativas enumeraturus, *una est*, inquit, *Ecclesia, Catholica, & perpetua*. Resp. Ferendum non est, ut sacrosanctæ Ecclesiæ detrahatur nota *Sanctitatis*; & *Apostolicæ originis* prærogativa vel auferatur, vel ambigua voce *perpetua* obscuretur. Notæ singulæ & universæ non modo veram Ecclesiam aperte distinguunt a falsis sectis, sed manifesta continent argumenta, probationesque decisionum juris sacri; facultas autem probationum coangustanda non est, quemadmodum docet lex Romana (g). *Perpetuitas*, quæ in futurum spectat, præsentem rei veritatem non demonstrat, eamque omnes Sectarii, vel qui invisibilem fingunt ecclesiam, impudenter polliceri & jactare possunt.

(g) *Ostendi C. I. Juris Eccl. publ. eas, quas Theologi veræ Ecclesiæ notas appellant, in jurisprudentia Ecclesiastica pro legibus fundamentalibus, primisque atque ultimis rationibus sacri imperii, ejusque decisionum haberi oportere. Hujus assumpti systematis adeo me non pœnitet, ut omni potius modo excolendum putem, hoc præsertim ævo, quo maxima labe, quam patitur jus sacrum, labenti ac deficienti fidei religionique adscribenda est. Multa ejus systematis commoda, perspicuosque usus inde ab editis institutionibus meis cogitando detexi, quos suis commemorare locis haud prætermittam. Illud nunc quæro: Omnia adversariorum molimina, quibus impetunt jus sacrum, omnia calumniarum, conviciorum & fallaciarum conclusionum genera, qualia sunt tandem, aut quo spectant, nisi ut unitatem catholicam scindant, sanctitati Ecclesiæ detrahant, Catholicæ diffusioni obstant, apostolicam originem doctrinæ ac sacerdotii abscindere, aut obstruere conentur? Consideranti tempora nostra totum id tam perspicuum erit, ut nihil magis: velim autem, ut inde quivis concludat, recteque intelligat, quid sit tueri Christi Ecclesiam, ejusque jura & prærogativas defendere.*

§. 96. De professione fidei, quæ ex mente SS. Concilii Tridentini, atque ex formula a Pio P. IV. præscripta fieri debet, agendum nunc est. Ut autem ejus legis justissima ratio, maximusque usus hoc ævo perspiciatur, præcipua ejus symboli capita ad verbum exscribere, atque ob oculos ponere haud piget. Sic igitur habet:

I. „Ego N. firma fide credo & profiteor omnia „& singula, quæ continentur in symbolo fidei, quo „Sancta Romana Ecclesia utitur, videlicet: Credo in „unum Deum Patrem &c. *Sequitur totum symbolum „constantinopolitanum, uti in sacrificio Missæ recitari, aut decantari solet. Dein contra errores novos „fit sequens professio.*

II. „Apo-

II. „Apostolicas & Ecclesiasticas traditiones, reliquasque ejusdem Ecclesiæ observationes, & constitutiones firmissime admitto, & amplector.

III. „Item sacram scripturam juxta eum sensum, quem tenuit, & tenet sancta Mater Ecclesia, cujus est judicare de vero sensu & interpretatione sacrarum scripturarum, admitto; nec eam unquam, nisi juxta unanimem consensum Patrum, accipiam, & interpretabor.

IV. „Profiteor quoque, septem esse vere & proprie Sacramenta novæ legis, a Jesu Christo, Domino nostro instituta, atque ad salutem humani generis, licet non omnia singulis, necessaria; scilicet Baptismum, Confirmationem, Eucharistiam, Pœnitentiam, extremam Unctionem, Ordinem & Matrimonium; illaque gratiam conferre; & ex his Baptismum, Confirmationem & Ordinem sine sacrilegio reiterari non posse.

V. „Receptos quoque & approbatos Ecclesiæ Catholicæ ritus, in supradictorum omnium Sacramentorum solemni administratione recipio, & admitto:

VI. „Omnia & singula, quæ de justificatione in sacrosancta Tridentina Synodo definita & declarata fuerunt, amplector & recipio.

VII. „Profiteor pariter, in Missa offerri Deo verum, proprium & propitiatorium Sacrificium pro vivis & defunctis; atque in sanctissimo Eucharistiæ Sacramento esse vere, realiter, & substantially corpus & sanguinem, una cum anima & divinitate Domini nostri Jesu Christi, fierique conversionem totius substantiæ panis in corpus, & totius substantiæ

„vini in sanguinem; quam conversionem catholica
„Ecclesia transubstantiationem appellat. Fateor
„quoque sub altera tantum specie, totum atque in-
„tegrum Christum, verumque sacramentum sumi.

VIII. „Constanter teneo, purgatorium esse, ani-
„masque ibi detentas fidelium suffragiis juvari.

IX. „Similiter & Sanctos una cum Christo re-
„gnantes, venerandos, atque invocandos esse, eos-
„que orationes Deo pro nobis offerre, atque eo-
„rum reliquias esse venerandas. Firmissime assero,
„imagines Christi ac Deiparæ semper Virginis, nec
„non aliorum Sanctorum, habendas & retinendas
„esse, atque eis debitum honorem ac venerationem
„impertiendam.

X. „Indulgentiarum etiam potestatem a Chri-
„sto in Ecclesia relictam fuisse, illarumque usum
„Christiano populo maxime salutarem esse, affirmo.

XI. „Sanctam, Catholicam & Apostolicam Ro-
„manam Ecclesiam, omnium Ecclesiarum Matrem &
„Magistram agnosco; Romanoque Pontifici, Beati
„Petri, Apostolorum Principis, Successori, ac Jesu
„Christi Vicario veram obedientiam spondeo, ac
„juro.

XII. „Cetera item omnia, a sacris canonibus, &
„œcumenicis conciliis, ac præcipue a Sacrosancta Tri-
„dentina Synodo tradita, definita & declarata indu-
„bitanter recipio, atque profiteor; simulque contra-
„ria omnia atque hæreses quascunque ab Ecclesia
„damnatas, rejectas & anathematizatas, ego pariter
„damno, rejicio & anathematizo.

XIII. „Hanc veram catholicam fidem, extra
„quam nemo salvus esse potest, quam in præsentī
„sponte

„sponte profiteor, & veraciter teneo, eandem integram & inviolatam, usque ad extremum vitæ „spiritum constantissime (Deo adjuvante) retinere „& confiteri, atque a meis subditis, vel illis, quorum cura ad me in munere meo spectabit, teneri, „doceri & prædicari, quantum in me erit, curaturum. „Sic me Deus adjuvet, & hæc sancta Dei Evangelia.“
Si a pluribus facienda est hæc confessio, & unus formulam prælegit, quivis reliquorum tactis Evangeliiis ita subjungit: „Ego N. idem spondeo, voveo, ac juro. „Sic me Deus adjuvet, & hæc sancta Dei Evangelia“ (h).

(h) *Secundum hanc fidei ac professionis regulam divinus Judex examissim judicabit doctrinas nostras scripto ac verbo traditas, sensa quoque animi, & opera; cavendumque est hac maxime ætate doctoribus, ne in die revelationis, & justi judicii Dei inveniantur perjuri coram Deo, angelis & hominibus.*

§. 97. Huic formulæ quatuor articulos addidit Gregorius P. XIII. pro Græcis, a quibus (ut Tournelius inquit de Trinitate Quæst. VI. Art. 3.) *nulla publica fidei confessione impugnata fuisse, quæ in Synodo Florentina statuta, & definita fuerant: error est igitur aliquorum personalis, non Ecclesiæ totius græcæ.* Articuli autem, post Symbolum constantinopolitanum additi, sunt hujus tenoris:

I. „Credo etiam, suscipio atque profiteor ea „omnia, quæ sacra œcumenica Synodus Florentina „super unione occidentalis & orientalis Ecclesiæ, definit „& declaravit, videlicet, quod Spiritus Sanctus „a Patre & Filio æternaliter est; & essentiam suam, „suamque esse subsistens habet ex Patre simul & Filio, & ex utroque æternaliter, tanquam ab uno „principio, & unica spiratione procedit. Cum id,
E 3 quod

„quod sancti Doctores & Patres dicunt, ex Patre
 „per Filium procedere Spiritum Sanctum, ad hanc
 „intelligentiam tendat, ut per hoc significetur, Fi-
 „lium quoque esse, secundum Græcos quidem cau-
 „sam, secundum Latinos vero principium substan-
 „tiæ Spiritus Sancti, sicut & Patrem: cumque om-
 „nia, quæ Patris sunt, ipse Pater unigenito Filio
 „suo gignendo dederit, præter esse Patrem; hoc
 „ipsum, quod Spiritus Sanctus procedit ex Filio,
 „ipse Filias a Patre æternaliter habet, a quo æter-
 „naliter etiam genitus est. Illamque verborum il-
 „lorum, *Filioque* explicationem, veritatis declaran-
 „dæ gratia, & imminente tunc necessitate, licite ac
 „rationabiliter Symbolo fuisse appositam.

II. „Item in azymo five fermentato pane triti-
 „ceo Corpus Christi veraciter confici; Sacerdotesque
 „in altero ipsum Domini Corpus conficere debere,
 „unumquemque scilicet juxta suæ Ecclesiæ, five occi-
 „dentalis five orientalis, consuetudinem.

III. „Item si vere pœnitentes in Dei charitate
 „decesserint, antequam dignis pœnitentiæ fructibus
 „de commissis satisfecerint & omissis; eorum ani-
 „mas pœnis purgatorii post mortem purgari, &
 „ut a pœnis hujusmodi releventur, prodesse eis
 „fidelium vivorum suffragia, Missarum scilicet sacri-
 „ficia, orationes, & eleemosynas, & alia pietatis
 „officia, quæ a fidelibus pro aliis fidelibus fieri con-
 „sueverunt secundum Ecclesiæ instituta. Illorumque
 „animas, qui post baptismum susceptum nullam om-
 „nino peccati maculam incurrerunt, illas etiam,
 „quæ post contractam peccati maculam, vel in suis
 „corporibus, vel eisdem exutæ corporibus, prout
 „superius dictum est, sunt purgatæ, in cælum mox
 „recipi, & intueri clare ipsum Deum trinum &
 „unum,

„unum, sicuti est; meritorum tamen diversitate
 „aliud alio perfectius. Illorum autem animas,
 „qui in actuali mortali peccato, vel solo originali
 „decedunt, mox in infernum descendere, pœnis ta-
 „men disparibus puniendas.

IV. „Item sanctam Apostolicam Sedem, &
 „Romanum Pontificem in universum orbem tenere
 „primatum, & ipsum Pontificem Romanum Succes-
 „sores Beati Petri Principis Apostolorum & verum
 „Christi Vicarium, totiusque Ecclesiæ caput, & om-
 „nium Christianorum Patrem ac Doctorem existere,
 „& ipsi in Beato Petro pascendi, regendi & guber-
 „nandi universalem Ecclesiam a Domino nostro Jesu
 „Christo plenam potestatem traditam esse, quemad-
 „modum etiam in actis œcumenicorum conciliorum
 „& in sacris canonibus continetur.“ *His præmissis
 in hunc modum continuatur professio fidei.* „Insuper
 „profiteor ac recipio alia omnia, quæ ex decretis
 „sacræ œcumenicæ generalis Synodi Tridentinæ,
 „Sacrosancta Romana & Apostolica Ecclesia, etiam
 „ultra contenta in supradiçto fidei symbolo, profi-
 „tenda ac recipienda proposuit, atque præscripsit,
 „ut sequitur.“ *Sequitur autem totus tenor formulæ
 Tridentinus, uti §. præc. a. n. II. expressus est, to-
 tidem verbis, nisi quod in fine n. XII. verbum adda-
 tur: „Ego pariter damno, rejicio, anathematizo,
 „& abjuro“ (i).*

(i) *Similis declaratio contra errorem quorundam Græco-
 rum de processione Spiritus Sancti facta jam fuerat in
 Concilio œcumenico Lugdunensi II. anni 1274, cui B.
 Gregorius X. præfuit. Ea declaratio valde elegans
 continetur c. unico h. t. in 6.*

§. 98. Professionem fidei ex præscripta formu-
 la edere, eamque confirmare juramento tenentur
 hi, qui sequuntur:

I. *Promoti ad Episcopatum*, in prima Synodo provinciali (k), quod hodie præstant post electionem in manibus Nuntii Apostolici vel alterius Episcopi. Professio autem hæc scripto exarata Romam mittitur, inserta instrumento de facta inquisitione super qualitatibus Electi.

(k) *Trident. Sess. XXV. c. 2. de ref. ibi: Idemque in posterum quicumque in Patriarchas, Primates, Archiepiscopos, Episcoposque promovendi, in prima Synodo provinciali; in qua ipsi interfuerint, omnino observent. Quodsi quis ex prædictis omnibus, quod absit, renuerit, Episcopi comprovinciales statim Summum Romanum Pontificem admonere sub pœna divinæ indignationis teneantur, interimque ab ejusdem communionē abstineant.*

§. 99. II. *Provisi de canonicatu, vel dignitate in Ecclesia cathedrali, aut provisi de beneficio curato: illi quidem coram Episcopo & Capitulo; hi autem coram Episcopo vel Vicario; utrique sub sanctione pœnali, de qua §. 103. seq. differam (l).*

(l) *Ita decretum in Trident. Sess. XXIV. c. 12. de ref. Canonici Ecclesiæ collegiatae, & beneficiati simplices hoc jure communi non afficiuntur. Bened. XIV. Inst. 60. n. 1. Eidem tamen subjici possunt consuetudine, aut Diœcesium statutis; quemadmodum id in decretis Synodal. Diœces. Augustanæ præscribitur. P. I. C. 3. n. II.*

§. 100. III. *Prælati locorum regularium ex const. Pii IV. Injunctum.* Addit V. C. Zechius, id non in omnibus religionibus usu receptum esse (m). Cujus omissionis rationem non video; cum quivis non arripere tantum, sed captare, deberet occasionem publice profitendi fidem catholicam, atque immotam
ad-

adhæſionem ad Eccleſiam Romanam, tanquam centrum unitatis.

(m) *In Præcognitis Jur. Can. Tit. VI. §. 66.*

§. 101. *IV. Doctores & Magistri publici cujus-
cunque diſciplinæ* (n).

(n) *Trident. Seſſ. XXV. c. 2. de ref. & Pius IV. in conſt. 88. In Sacroſancta. Ubi §. 2. rationem reddit his verbis: „Occurrere cupientes, ne ſimplicia nonnullorum „adoleſcentum res novas audiendi cupidorum in- „genia in naufragos blandientium hæreſum ſcopu- „los imprudenter impingant.“ Hæc eadem ratio, quantum valeat, urgeatque ætate noſtra, nemo non videt.*

§. 102. *V. Promovendi in Academiis ad gra-
dus literarios vel ad licentiam docendi* (o). In noſtris quidem partibus id Cancellariis Academiarum incambit, ut licentiam ſumendi gradus literarios non aliis dent, niſi quorum fidem & religionem probaverunt (p).

(o) *Pius IV. in conſt. In Sacroſancta. a. 1564. Hanc conſtitutionem in Germania omnino receptam eſſe, tum perpetua annorum plusquam ducentorum obſervantia probat, tum etiam decreta diœceſum confirmant. Ad- dit vero Pontifex ibid. §. 6. „Quaſcunque receptio- „nes, promotiones, electiones & admiſſiones abſque „proceſſu, certaſque de religione & fide catholica noti- „tia, ac diſta fidei profeſſione ſic, ut præfertur, præ- „cedente, pro tempore factas, nullas, invalidas, nul- „liusque roboris vel momenti eſſe, neque cuiquam in ju- „dicio vel extra ſuffragari poſſe; & §. 7. Sicque per „quoſcunque judices & commiſſarios, quavis auctori- „tate fulgentes, ſublata eis, & eorum cuilibet quavis „aliter judicandi & interpretandi facultate & auctori- „tate, judicari & definiri debere; ac quidquid ſecus a „quoquam quavis auctoritate ſcienter vel ignoranter „atten-*

„attentari contigerit, irritum & inane decernimus.“
 Quid ergo? Siquis in universitate quadam catholica sine dicta fidei professione promoveatur, poteritne jure exigere, ut locis aliis catholicis pro vere promoti habeatur? Certe beneficium, officium aut dignitatem Ecclesiasticam, quæ forte gradum doctoratus, vel licentiatum ex theologia vel jure canonico requirunt, jussu acquirere, & bona fide capere aut retinere haud poterit.

(p) Memorabilia exempla recensui in J. E. P. C. IX. p. 797.

§. 103. De sanctione pœnali, quam memoravi §. 99, sic decidendum est: *Provisi de canonicatu vel dignitate in Ecclesia cathedrali, aut etiam de beneficio curato, si intra primum bimestre a die pacificæ possessionis culpabiliter omittant professionem fidei, a Tridentino præscriptam, tenentur in conscientia ad restitutionem fructuum post bimestre perceptorum ante omnem sententiam judicis.* Probatur Decisio I. SS. Concilium Trident. sic statuit: *Alioquin prædicti omnes provisi, ut supra, fructus non faciant suos, nec illis possessio suffragetur (q).* At si fructus suos non faciunt, eos restituere, tanquam rem alienam, sine dubio tenentur; neque vero ut restitutio fiat rei alienæ, expectari debet sententia judicis.

(q) Sess. XXIV. C. 12. de ref. ubi verba illa: *Nec possessio suffragetur; sic intelligenda sunt, quod omisso professionis hunc tantum habeat effectum, ne dominium fructuum beneficialium acquiratur; eo non obstante retinetur beneficium, ejusque possessio: retinentur item alia jura, ceu vox in capitulo, distributiones item quotidianæ, ut quidem non dubito; quia pœnalia restringenda sunt. Ceterum nemo quærat, quorsum fructus illos, quos suos non facit omittens professionem, restituere debeat? Habet enim omne id, quod ex beneficio provenit, atque in sustentationem beneficiati non impenditur, hunc destinatum finem, certamque legem, ut in fabricam Ecclesiæ, vel pauperes erogetur. Fructus tamen*

tamen Canoniorum hoc casu ad ipsum cumulum capitularum referendos esse, vel in communi massa potius permanere, docet Garzias apud Bened. XIV. Inst. 60. n. 14.

§. 104. Probatur Decisio II. Similem pœnam iisdem conceptam verbis, in alia tamen causa, constituerat Concilium Lateranense V. sub Leone X. Sess. 9. „Statuimus & ordinamus, ut quilibet habens beneficium cum vel sine cura, si post sex menses ab obtento beneficio divinum officium non dixerit, legitimo impedimento cessante, *beneficiorum suorum fructus suos non faciat* pro rata omissionis recitationis officii, & temporis; sed eos, tanquam injuste perceptos, in fabricas hujusmodi beneficiorum vel pauperum eleemosynas erogare teneatur.“ Hanc legem Pius V. in const. *Ex proximo Lateranensi* confirmavit, explicans, quæ sit illa *rata fructuum* restitutioni obnoxia. Cum autem postea non nulli scriptores asserere nihilominus auderent, ad incurrendam illam pœnam opus esse sententia declaratoria iudicis, Alexander VII. a. 1665 inter alias theses reprobas hanc n. 20. damnavit: *Restitutio a S. Pio V. imposita beneficiatis non recitantibus, non debetur in conscientia ante sententiam declaratoriam iudicis.* Quo modo id ad nostram pertineat decisionem, quivis non cæcus videt.

§. 105. Qui decisioni nostræ adversantur, sic ajunt: Decretum Concilii, quo omittens professionem fructibus privatur, est pœna: Ergo requirit sententiam iudicis Arg. c. 19. de Hæret. in 6, ubi lex pœnalis, qua confiscatio bonorum in hæreticos non toleratos *ipso jure* decernitur, sic explicatur, ut ejus pœnæ executio, vel bonorum occupatio fieri non debeat, *antequam per Episcopum loci, vel aliam personam*

sonam Ecclesiasticam, quæ super hoc habeat potestatem, sententia super eodem crimine fuerit promulgata. Resp. Inhærendum est proprietati verborum, eorumque triplex distingui potest expressio, quando pœna in privatione fructuum constituitur. 1. *Reus privetur fructibus.* Hæc pœna requirit sententiam condemnatoriam iudicis, quæ a die, quo lata est, vim habet. 2. *Ipso jure sit privatus fructibus.* Hæc pœna, si fortior non additur expressio, poscit sententiam *declaratoriam* criminis, quæ ad diem delicti commissi retrahitur. Atque ad hunc casum pertinet cit. c. 19. de Hær. in 6. 3. *Fructus non faciat suos.* Hæc autem pœna nullam omnino sententiam expectare sinit; quia ad restitutionem rerum alienarum, quam ipsum per se clarum jus naturæ exigit, expectari non debet sententia iudicis. Istiusmodi pœna ab auctoribus vocatur *mere negativa*, quia impedit, ne dominium fructuum acquiratur: aut *conventionalis*, quasi lex non concederet fructus, nisi hac conventionem, aut conditionem, si intra bimestre fiat præscripta fidei professio. Deficiente igitur conditione, fructus omnino non acquiruntur. Exempla istiusmodi pœnæ habentur tum præsentem hoc casu, tum in casu §. 104. & in Concilio Trid. Sess. XXIII. c. 1. de ref., ubi decernitur, „eum, qui præscripto tempore personæ in sua Ecclesia non residet, pro rata temporis absentiae *fructus suos non facere*, nec tuta conscientia, *alia etiam declaratione non secuta*, illos sibi detinere posse: sed teneri, aut ipso cessante, per Superiorem Ecclesiasticum illos fabricæ ecclesiarum, aut pauperibus loci erogare: prohibita quacunque conventionem, vel compositionem, quæ pro fructibus male perceptis appellatur; — non obstantibus quibuscunque privilegiis &c.“ Etsi autem in præsentem casu de ommissa professione fidei De-

„cre-

cretum Concilii non addat illa verba: *Alia etiam declaratione non secuta*; tamen id vim decreti non tollit; quia vis præcipua est in illis verbis: *Fructus suos non facere*; reliqua omnia ex illis sequuntur, & majoris declarationis gratia addi possunt, sed non debent; de quibus dici potest: uti superflua non nocent; ita neque necessaria sunt.

§. 106. Dicunt: Si professio fidei est instar conditionis, ad acquirendos fructus necessariæ, ea deficiente conditione nunquam acquiri poterunt fructus, & nulla omnino excusabit causa. Resp. Etsi ea pœna, de qua agimus, sit conventionalis, vel, ut alii vocant, conditionalis; tamen non cessat esse pœna, quæ omnino culpam requirit.

§. 107. De causis excusantibus nota

I. Legitimum impedimentum sine dubio excusat, ceu morbus.

II. Ignorantia, imprudentia, oblivio in re legibus præscripta, quæ est clari juris, non admittitur.

III. Nec excusat absentia a loco, in quo facienda est professio; tum quia peti potest, ut Episcopus aut Vicarius alium deleget, e. g. Decanum, coram quo fiat professio; tum quia in his partibus usu receptum est, ut fieri per procuratorem, speciali ad id mandato instructum, possit; si is, coram quo fieri per se debet, consentiat (r).

IV. *Forma* arbitraria non est, sed fieri omnino debet *coram eo*, qui a Concilio ad eam suscipiendam professionem denominatus est; nempe a provisis de canonicatu aut dignitate in Ecclesia Cathedrali fieri debet *coram Episcopo aut ejus Vicario*, & *coram capitulo*: a provisis autem de beneficio curato *coram Episcopo, aut ejus Vicario*; secus professio censetur
non

non facta ad effectum, ut quis fructus faciat suos; quia actus sine forma, quam a lege habet, est nullus.

(r) *Zech. in Præcogn. Juris Can. Tit. VI. §. 67. adde Can. 4. dist. 100. Contrariæ declarationes Cardinalium citatæ a Bened. XIV. Instit. 60. n. 3. non videntur comprehensivæ; quia sunt contra regulam juris 68. in 6. Potest quis per alium, quod potest facere per se ipsum.*

§. 108. De hac fidei professione Summo Pontifici feliciter regnanti an. 1786. hæc fuerunt ab Hispanis proposita dubia:

I. An, si quis de novo acquirit canonicatum vel dignitatem in Ecclesia Cathedrali, & quidem in ea ipsa, in qua ante habuerat, renovanda sit professio fidei ex præscripto Concilii Tridentini?

II. Utrum hæc professio facienda sit coram Episcopo & ipsius Vicario Generali, & Sede vacante, coram Vicario capitulari, & Capitulo? An, si consuetudo viget, fatis sit eam facere coram solo Capitulo, præsertim in iis diœcesibus, in quibus Episcopi, præter Vicarium generalem, alium habent Vicarium ex gremio Capituli eum in finem, ut in causis, Episcopum & Capitulum concernentibus, Capitulum convocet, eique intersit?

III. An, supposita bona fide, ad S. Sedem recurri debeat pro impetranda absolutione a fructuum jam perceptorum restitutione, si quis ob dictam consuetudinem professionem fecisset coram solo Capitulo? S. Congregatio, ad quam Summus Pontifex, Pius VI. id negotium remisit, prima Aprilis an. 1786. respondit: *Ad Primum affirmative: ad Secundum affirmative, quoad primam partem: negative quoad secundam: ad tertium affirmative.* Quam declarationem probavit Summus Pontifex 8. Aprilis. 1786 (r).

(s) *Giornale Ecclesiastico. N. 50. e 51.*



TITULUS II.

DE CONSTITUTIONIBUS.

ARGUMENTUM.

I. Notio legis §. 109. II. Leges sacras fert R. Pontifex in causis fidei §. 112. Et disciplinæ §. 121. item Episcopi, Et Synodi intra limites §. 130. III. Materia legis. An actus interni? §. 137. IV. Subiectum passivum legis §. 145. An Legislator §. 158. V. Promulgatio legis §. 164. VI. Effectus legis in genere, Et specie §. 171. VII. Quid manente lege excuset. §. 182. VIII. Cessatio legis §. 186. IX. Interpretatio §. 192.

§. 109. Constitutio generatim pro lege hic sumitur, quæ est *ordinatio rationis ad bonum commune ab eo, qui curam communitatis habet, promulgata (a)*. Notæ, in hac definitione contentæ, instar axiomaticum sumuntur ab iis, qui methodum mathematicam affectant, suntque hæ: 1. Lex est *ordinatio*, seu dispositio aut actus voluntatis, quo permittitur, conceditur, suadetur, præcipitur, irritatur, aut punitur quidpiam. His enim modis fit *ordinatio*. 2. Est *ordinatio rationis*, seu dispositio rationi conformis, id est, subiecta potestati ejus, qui disponit, & consentanea fini, seu bono communi. 3. Ab eo, qui curam habet communitatis, tanquam principio aut *subiecto activo* fertur: 4. et ipsi quidem communitati, tanquam *subiecto passivo*. 5. Necessè est, ut *promulgetur* communitati; in qua promulgatione, velut *forma legis*, sita est. 6. His omnibus, tanquam *effectus legis*, respondet obligatio aut jus eorum, qui ferenti legem in hac causa vel materia subiecti sunt; nam conjunctim seu copulative sumi debent hæc tria: potestas seu jus disponentis: subiectio eorum, pro qui-

quibus fit dispositio: & materia seu causa, in qua fit.

(a) *Recepta est hæc notio ex S. Thoma 1. 2. q. 90. a. 4. vocabulorum autem definitiones, longo usu receptæ, instar nummorum valent; ac si opus est, explicari, non facile rejici debent.*

§. 110. Speciali ratione *constitutiones* vocantur, quæ a summo Principe emanant, æque in jure Romano opponuntur juri veteri civili, & auctorum sententiis. Eodem jure Quiritum aliæ sunt *leges*, alia *plebiscita*, *senatusconsulta*, *edicta* vel *constitutiones Principum*, *responsa prudentum* (b). In jure etiam sacro nominantur regulæ Patrum, Decreta & Decretales Epistolæ RR. Pontificum, canones Conciliorum, statuta Episcoporum. In his inest generalis ratio legis vel constitutionis supra exposita: non item in aliis actibus analogis, ceu in Rescriptis, præceptis, mandatis, pactis. Jurisconsulti est, non vim modo istiusmodi actuum nosse, sed verborum quoque proprietatem sectari.

(b) *Gratianus P. I. dist. 2.*

§. 111. *De principio aut subjecto activo legum ecclesiasticarum* primo agendum est; nam jus ferendi leges politicas & civiles ex varia statuum politico-rum forma pendet. Potestas autem ferendi leges in Ecclesia talis intelligitur, quæ conjuncta est cum vi coactiva, & cui respondet obligatio obtemperandi, ut censeatur ligatus in cælis, seu in foro Dei & conscientiæ, qui legibus, & pænis ligatur in terris. Dein ea potestas pertinet ad causas tum fidei, tum disciplinæ; sic tamen, ut causæ fidei censeantur *maiores* seu reservatæ Papæ aut Consilio generali, vel
con-

consensui Episcoporum orbis extra Concilium. Denique cum potestate & jure ferendi leges per se conjuncta est potestas leges authentice interpretandi — in legibus dispensandi — dandi privilegia etiam contra leges — leges mutandi seu abrogandi, iis derogandi aut subrogandi — confirmandi actus subditorum tum generatim concedendo vim præscriptioni, consuetudini etiam contra leges, ultimis voluntatibus, dando actiones judiciales; tum speciatim causa cognita.

§. 112. Leges universales in Ecclesia condit Papa, tanquam Vicarius Christi & Caput Ecclesiæ habens primatum veræ auctoritatis, potestatis & jurisdictionis. Id poscit ratio fundamenti, quod doctrinæ & legum vi adhærens sibi tenet ædificium Ecclesiæ: id indicat potestas clavium in regno cælorum, & jus solvendi ac ligandi: id exigit munus pascendi gregem Christi, id est, oves singulas & universas: idem denique efficit Officium Petri & Successorum, confirmandi Fratres in fide, in omni nempe religionis causa. Apertissimis Scripturæ verbis adstipulatur traditio, cujus testes sunt authenticæ epistolæ Pontificum, collectiones canonum, quæ *Constituta Sedis Apostolicæ* exhibent, & tomi seu potius bibliothecæ Bullarum & constitutionum Pontificiarum.

§. 113. Verba Scripturæ, & traditionis exempla de Pontificia potestate ferendi leges, æque pertinent ad causas fidei, quam disciplinæ; nec ulla omnino fit distinctio. Seorsim tamen de utroque genere hodie disputatur. In causis fidei Successor Petri edit declarationes, definitiones ac decisiones controversiarum; de quibus ex lib. Isagog. §. 95. recolendum est principio, quid requiratur, ut Pontificia constitutio pro definitione fidei haberi possit,

Zallinger L. I. Decretal.

F

debeat-

debeatque; dein tanquam indubitata statuenda assertio, quæ sequitur.

§. 114. *Pontificiæ declarationes in causis divini juris, seu definitiones fidei & morum omni reverentia, atque interno etiam assensu mentis accipiendæ sunt, haud secus, ac si ipsius Petri voce essent prolatae; cui haud dubie interna mentis assensio, tanquam divinam legem promulganti, præstari debuit, debetque etiam nunc. Prob. ex Scriptura ac traditione eodem plane modo, quo primatus RR. Pontificum stabilitur. Nam consensu omnium is primatus ad conservandam unitatem fidei & communionis institutus a Christo fuit, eamque vim habet, ut ad unitatem vi præceptiva obligare ac cogere fideles possit; atque ita in eodem primatu consistit principium illud ædificium, quo Ecclesia perpetuo manet una, sancta, catholica & apostolica (c).*

(c) *Adcurate de hac assertione tractant Theologi: quia tamen hodierni scriptores juris sacri Febronianos errores, ab ipso auctore solemniter retractatos, ac deceptrices maxime ideas de ratione iudicis & examinis judicialis imperitis lectoribus obtrudunt, eorum fraudes sane detegendæ sunt.*

§. 115. Febronius S. Petrum in Apostolorum collegio repræsentat, tanquam præsidem in senatu, qui senatorum sententias rogat, non cogit: uno suo arbitrio nihil decedit. - - Nulla causa majoris momenti sine ejus participatione desinebatur. - - Ipse in conventibus proponebat materiam, de qua deliberandum erat: ipse cum id opportunum esset, levabat vocem suam, & omnium loco ac nomine loquebatur. Habes hic ideam primatus, sed non catholici, id est, non veræ auctoritatis, potestatis & jurisdictionis. Hæc enim omnia prærogativam meri ordinis, honoris ac directorii non excedunt.

§. 116.

§. 116. Subjicit autem Febronius hæc verba: *Verum inter hujusmodi directorii fines jura primatus non subsistunt; exigat amplius aliquid conservatio unitatis in Ecclesia, non semper in Conciliis congregata.* His verbis tacite sumit, potestatem Petri & successorum duntaxat in subsidium fuisse datam, ac pro casu, quo Ecclesia in generalibus Conciliis congregata non est, quæ est fallissima hypothesis; a verbis Christi, ac traditione longe abhorrens.

§. 117. Quid ergo ex mente Febronianorum pro conservanda unitate, si Ecclesia in Conciliis congregata non est, primatus Papæ efficere potest? Ajunt: *Papa præcipuas in judicando habet partes.* Quæ sint autem præcipuæ hæ partes, non explicant; aperte tamen docent, definitiones fidei, extra generale Concilium a solo Pontifice editas, non constituere ultimum judicium, nec esse omnino irrefragabiles seu infallibiles; eis tamen a singulis privatim Ecclesiis reverentiam præstari debere, & obsequium, provisorie saltem ad non dogmatizandum contrarium, quamdiu Ecclesia non reclamât. Si provisoria tantum sunt judicia Apostolicæ Sedis in causis divini juris, eis plus non debetur, nisi silentium obsequiosum, & obedientia mere externa, quæ solam contradictionem externam vetet. Observavi in Isag. §. 97., hanc doctrinam esse novam, & sacræ antiquitati ignotam fuisse. Semper enim Ecclesia & Ecclesiæ filii non provisoria tantum, sed peremptoria habuerunt Apostolicæ Sedis circa fidem judicia.

§. 118. Qui hanc provisorii Decreti novitatem invexerunt, ad finiendam penitus atque ultimato fidei controversiam requirere solent, ut definitionibus Summorum Pontificum accedat Episcoporum Eccle-

fiæ etiam dispersæ vel expressus vel tacitus saltem consensus. At hoc quidem modo iudicium cuiusvis Episcopi, consensu aliorum Episcoporum confirmatum, parem habebit vim, ac iudicium Romani Pontificis. Quæ sunt ergo *præcipuæ* istius in iudicando partes? Dein docente Scriptura & traditione Petrus ejusque Successor confirmare Fratres debet, non confirmari a fratribus: ipse, tanquam petra & Fundamentum, sustentare Ecclesiam debet, non sustentari & fulciri ab Ecclesia: ipse pascere fideles debet salutaris doctrinæ pabulo, non ab iis pasci. Febronius ultra novam hanc doctrinam progressus est, atque ad *ultimatum & conclusum*, ut ait, seu ad infallibile iudicium in materia fidei postulavit expressam & consentientem generalis Concilii sententiam, qua sola fidei definitiones peremptorias evadere comminiscitur. Sane in hac hypothesi Christus male prospexisset unitati Ecclesiæ; quia generalia Concilia rarissima sunt, eorumque convocatio multis de causis difficillima, ac pene impossibilis est hoc præsertim ævo. Sed Febronius hoc quoque fulcrum conservandæ unitatis in Ecclesia paulo post sustulit; ait enim, Concilium generale non absolute esse infallibile, sed *conditione, si nempe Patres legitime convocati, in eo ita se gesserint, ut dici debeant repræsentasse totam Ecclesiam; quod an ita de facto sit, declarat agnitio, seu receptio Ecclesiæ* (d).

(d) De hoc fraudis genere vide dicta in Isag. pag. 124.
§. CIX. (CXIX)

§. 119. Dicunt Febroniani: Si Pontificiæ definitioni omnes assentiri debent, Episcopi dici non possunt *judices* in causa fidei; quia non habent libertatem, seu jus dissentiendi. Resp. n. ill. ac supp. quod ratio iudicis ac iudicii necessario possit jus & liber-

libertatem dissentiendi etiam pro casu, quo veritas Catholica, & doctrinæ ad judicandum propositæ consensio cum veritate Catholica vel dissensio jam certo cognita & explorata est. Hæresis Lutheri, ut recte Febronius in Commentario suæ retractationis Posit. IX. docet, jam ante Concilium Tridentinum, præeunte Leone X. Pont. Max., irrevocabiliter damnata fuit; ac proin nemo Catholicorum dissentiendi jus ac libertatem habuit; num propterea Patres Tridentini, qui eosdem iterum condemnarunt errores, non fuerunt Fidei judices? Si Episcopus definitionem Concilii œcumenici, cui ipse non interfuit, auctoritate sua probat, & suscipit; ane judicem non agit? Post Concilium Chalcedonense, jubente Leone imperatore, episcopi sexcenti supra mille acta ejusdem ad examen revocarunt, ac de illis judicium tulerunt; ane aut jus dissentiendi habuerunt, aut judicium rationem, & auctoritatem non habuerunt? Deceptrix est hæc judicii idea, quasi necessario obscuritatem causæ, ac dubitationem, hæitationemque judicis posceret. Vis & potestas judicis non in hæsitando sita est, sed in voto decisivo, seu auctoritate ita ferendi sententiam, ut sibi subjectos ad parandum obligare possit, & cogere; id quod fieri ab eo non potest, qui voto mere consultivo gaudet. Dixi, jus dissentiendi non requiri pro casu, quo Catholica veritas, & doctrinæ ad judicandum propositæ consensio cum veritate Catholica vel dissensio jam certo cognita & explorata est. Atqui id contingit omnino, quando Pontificia definitio præcedit judicium Episcoporum in Concilio. Nam traditionem omnium Ecclesiarum inquirere pro cognoscenda Catholica veritate nimis longum est, & fere impossibile: quamobrem, ut S. Irenæus docuit, satis est, Romanæ cognoscere traditionem Ecclesiæ, ad quam pro-

pter potentio-rem principalitatem, *necessa est, omnem convenire ecclesiam, hoc est, eos, qui sunt undique fideles; in qua semper ab his, qui sunt undique, conservata est ea, quæ ab Apostolis est, traditio (e).*

(e) De celeberrimo Irenæi loco, & nunquam satis repetendo confer J. E. P. C. IV. §. 343. & in Isagoge notam §. 41.

§. 120. Adversarii Apostolici primatus audacter asserunt, Pontificias definitiones in causa Fidei sæpe novo examini fuisse subjectas ab Episcopis, & Conciliis generalibus; ergo eadem definitiones ob solam RR. Pontificum auctoritatem non statim recipiendæ sunt. R. Assertum istuc, quod in questione facti versatur, aperte falsum ostenderunt viri eruditissimi (f): duplex nempe genus examinis cum Episcopis Galliæ distingui debet; unum est *juridicum* sive *examen auctoritatis*, quo utitur is, qui judicandi auctoritate præditus in definitionem vel sententiam jam latam dubius inquit, utrum juri, Scripturæ & traditioni consentanea sit, an dissentanea; alterum est *examen confirmationis*, aut simplicis adhesionis, instructionis, vel prudentiæ, quo aliquis editam definitionem recte expendere, argumentis ex Scriptura vel traditione petitis confirmare, oppositos errores detegere, & confutare, ipsamque definitionem suo assensu, suæque auctoritate comprobare satagit. Atque hoc posterius examinis genus, non prius illud Episcopi & Concilia post editas RR. Pontificum definitiones adhibuerunt; quomodo enim *obligatio & necessitas* consentiendi in fide cum Sede Petri stare posset cum *jure & libertate* dissentendi a Sede Petri? Jansenistæ & Quesnellistæ Episcopis Galliæ objectarant, externos Episcopos, qui Papam haberent infallibilem, in acceptanda Clementina *Unigenitus*

nitus constitutione, non examinasse, non judicasse, sed obedivisse tantum. Responderunt Episcopi Gallicæ: *In hac obedientia semper adesse judicium prudentiæ, quod, licet in tribunali prolatum non sit (id est, solemniter), suum tamen robur, suamque auctoritatem habet. - - Certum esse juxta omnium seculorum traditionem, consensum Episcoporum Primæ Sedis judicio, simul esse actum obedientiæ erga Sanctam Sedem, & actum auctoritatis & judicii sub principali ejusdem Sedis auctoritate.* Præclare admodum clarissimus Fenelonius in epistola seu instructione pastoralis diei 20. Aprilis an. 1705. explicavit, quæ ratione assensus Episcoporum, Pontificiis definitionibus adhibitus & adhibendus, judicii naturam induat, exemplisque subscriptionum, quæ generalis Concilii Decretis pariter subjiciuntur, confirmavit: *Judicare post judicium Pontificis, est suum judicium cum Pontificio conjungere.* Huc ratione Episcopi olim subscripserunt ipsorum Conciliorum generalium decretis. Eorum submissio erat judicium, & eorum judicium erat submissio. Subscribentes sese submittebant simul, & confirmabant decisionem synodi. Id constat ex actis, & ex his, aliisque similibus subscriptionum formulis: „Judicans subscripsi; recognoscens consensi. — Obtemperans sententiæ sanctissimorum & beatissimorum „Episcoporum . . . consentiens & ego subscripsi, cognoscens discussionem Sanctorum Patrum, & cum se „qui debeam eorum judicium, subscripsi.

(f) Ex instituto id tractatur ab Antisebronio T. IV. l. IV. c. III & in Antisebr. Vind. T. II. diff. IV. c. VI. A Balleriniio de vi ac ratione Primatus c. XIII, §. XIII. Ceterum dicta hoc loco ad eum duntaxat casum pertinent, quo judicium Concilii vel Episcoporum præcessit Pontificia definitio proprie talis. Aliis casibus Episcopi libere utuntur potestate judicaria, sic tamen, ut Concilia in causis majoribus

ribus, præsertim fidei confirmari debeant a Summo Pontifice. Præterea Episcopi non modo in controversiis fidei veri judices de doctrina sunt, verum etiam judices personarum, errores veteres renovantium; Et Apostolica Sedes adeo non impedit Episcopale hoc jus, ut potius desideret.

§. 121. Dictum est hætenus de causis divini juris. Sequitur disciplina. Romanus Pontifex jure divino potestatem habet ferendi leges universales ad disciplinam Ecclesiæ pertinentes, nempe ad cultum Deo præstandum, & sacros ritus, ad ordinationem & politiam cleri, ad ordinem regiminis Ecclesiastici, rectamque administrationem rerum Ecclesiæ temporalium. Probatio petitur ex Primatu Pontificio divinitus instituto, qui non solius honoris & directionis, sed veræ auctoritatis, potestatis & jurisdictionis vim & naturam habet. Traditionem manifestant Concilia œcumenica, cum de illo primatu agunt, sententiæ, sacri Canones, Canonum collationes, ipsumque corpus juris sacri. Testimonia de sensu sacræ antiquitatis recensui quædam in Isag. §. 89. & seq.

§. 122. Hostes Pontificiæ auctoritatis eum primatum verbis agnoscunt, quia Catholico nomine gloriari volunt, ut scilicet gravius noceant Ecclesiæ; at re tollunt. Indicandæ sunt praviæ interpretationes, ac fraudes, quibus legislatoriam RR. Pontificum potestatem subvertere, atque eludere conantur. Febronius ait: Communiter agnoscitur, quod, quamquam penes summum Pontificem solum legislatoria potestas respectu universalis Ecclesiæ non resideat, nihilominus in magna congregandorum generalium conciliorum difficultate condere possit leges generales, easque toti Ecclesiæ proponere observandas, non ante tamen vim habituras, quam communi consensu fuerint receptæ

receptæ. Resp. falsum est, & Scripturæ, traditioni ac praxi repugnat *primo*, quod Pontifex jure ordinario, & per se ferre non possit leges universales; ut patet ex dictis. Falsum est *secundo*, quod leges ferre possit tantum *in subsidium* jure quasi extraordinario, nempe ex defectu præsentis Concilii generalis, & ob difficultatem illud congregandi; quia Primatus a Christo per se institutus est, tanquam officium ordinarium & perpetuum, non in subsidium Conciliorum. S. Petrus per se, & independentem ab auctoritate vel consensu Apostolorum constitutus a Christo fuit Fundamentum totius Ecclesiæ; ipse per se a Christo accepit claves regni cælorum, & potestatem solvendi & ligandi; per se a Christo jussus est confirmare fratres, totumque gregem accepit pascendum.

§. 123. Ea, quæ a Febronianis Pontifici tribuitur, potestas, leges universales Ecclesiæ *proponendi*, quæ vim non habeant, nisi *communi consensu fuerint receptæ*, est potestas *meri Directorii*, & tollit primatum veræ auctoritatis, & jurisdictionis; nam leges *proponere*, quæ vim habeant ab aliorum consensu, quivis potest, qui primum in Senatu, in Collegio vel Universitate locum tenet, etsi potestate & jurisdictione præditus non sit. Dein si *communis consensus*, quem Febroniani poscunt, etiam ad clerum inferioris ordinis & laicos extenditur, tollitur hierarchia ecclesiastica, & reducitur damnata Richerii doctrina, aut forte pejus aliquid: si ad Episcopos restringitur, subvertitur primatus jurisdictionis, cui ipsi etiam Episcopi subsunt.

§. 124. At, inquires, sunt Doctores probi & Catholici non pauci, qui leges Pontificias, si promulgatæ speciatim in provinciis, & receptæ non sint,

vim & obligationem habere negant. Resp. Negant hoc ex præsumpto *defectu voluntatis* Pontificiæ, non item, ut Febroniani docent, ex *defectu potestatis*; quasi Romanus Pontifex vi primatus obligare fideles non possit, nisi ipsi velint, aut ipsorum Episcopi consentiant. Hoc igitur de Pontificiis legibus, quæ ad disciplinam spectant, nec aliarum antea vigentium meræ declarationes seu authenticæ interpretationes sint, statui potest: *Si istiusmodi lex Pontificia speciatim in diœcesi non promulgetur, præsumi potest, Pontificem nolle obligare diœcesanos, vel ipsum potius Ordinarium de difficultate legis hoc loco promulgandæ aut observandæ cum Sede Apostolica egisse aut agere, ut propterea ejus obligatio interea suspensa maneat.*

§. 225. Dices: Hæc præsumtio nulla ratione nititur, & reipsa idem præstat, ac si cum Febronianis dicatur, leges Pontificias sine consensu Ecclesiæ vim nullam habere. Resp. negando utrumque; ac dico *primo*: Præsumtio est fundata in jure, quod Pontifex certis casibus Diœcesanos, quibus lex speciatim non promulgatur, ea obligari *nolit*; quia fieri potest, ut ob singularia locorum, temporum & personarum adjuncta, vel ob speciales locorum consuetudines, pravæ aut non pravæ, lex Pontificia in destructionem magis, quam ædificationem vergeret, majorumque malorum ac perturbationum causa existeret; ac tum ipsum Summum Pontificem non instare promulgationi vel observationi legis, docet jus sacrum. De prava consuetudine, quæ loco quodam invaluit, ait S. Gregorius M. nec a tali consuetudine averti possunt; *Et ideo cum venia suo ingenio relinquendi sunt, ne forte pejores existant, si a tali consuetudine prohibeantur; ut enim ait Salomon:*
Qui

Qui multum emungit, elicit sanguinem. Can. 6. dist. 4. De consuetudine speciali locorum & personarum; quæ mala non est, statuitur. C. 1. h. t. in 6. fieri posse, ut Romanus Pontifex, *qui jura omnia in sermone pectoris sui censetur habere*, ignoret (cum tales consuetudines sint facti, & in facto consistant): unde per novam constitutionem ei non censetur derogare; nisi expresse id exprimat. Similiter Alexander III. C. 5. de Rescriptis ad Archiepiscopum Ravennatensem ita scribit; *Qualitatem negotii, pro quo tibi scribitur, diligenter considerans aut mandatum nostrum reverenter adimpleas, aut per literas tuas, quare adimplexe non possis, rationalem causam præendas, quia patienter sustinebimus, si non ficeris, quod prava nobis fuerat insinuatione suggestum* (g). Dico secundo. Hæc sententia longissime distat a Febronianis erroribus; nam pertinet tantum ad leges disciplinæ, easque non mere declarativas, atque ad hypothesin specialium circumstantiarum & difficultatum; nec tollit, sed suspendit obligationem legis; quamdiu nimirum Summus Pontifex ea de re edoctus non insistit pro potestate sua promulgationi & observationi legis. At Febroniani idem extendunt ad omnes leges, ipsamque Pontificiam auctoritatem impugnant.

(g) Similia extant C. 6. de præbendis; & C. 10. de foro competente. Idem apertissime docet Benedictus XIV. de Syn. Diocesana, L. IX. C. 2. & 3. Eadem est Gallorum doctrina. Vid. Cabassut. Theor. & Prax. Juris Can. L. I. C. IV. n. 5. Ratio est, quia Episcopus Diocesanus, quantumvis auctoritati Sedis Apostolicæ maxime deditus, non pro mero executore Pontificiarum legem habendus est; cum ipsi etiam cura dioceseos regendæ, etsi cum hierarchica subordinatione, demandata sit.

§. 126. Negat præterea Febronius, Pontificem novas leges ferre posse, sed istiusmodi tantum, quæ ad conservandos antiquos canones, & tollendos abusus iisdem repugnantes pertinent. Resp. Nullo penitus jure, & nulla ratione Pontificia potestas adstringitur ad solos conservandos antiquos canones; non enim minor est Summorum Pontificum hæc ætate, quam præcedente, potestas. Atqui Pontifices priorum temporum multas pro necessitate vel utilitate Ecclesiæ novas tulerunt leges. Fieri potest, ac fit sane, ut nova prorumpant vitia, nova pericula, novæ fraudes, quibus per leges novas occurrendum est; uti conventiculis murariorum legibus nostra memoria promulgatis obsisti debuit.

§. 127. Scriptores novi, qui ad deprimendam Apostolicæ Sedis auctoritatem omni studio conspirant, sæpe argumentantur in hunc modum: Primatus Romani Pontificis ob conservandam unitatem in fide potissimum & communione a Christo institutus fuit; quæ est Patrum, omniumque auctorum communis sententia: ergo omne id, quod necessarium non est ad finem unitatis conservandæ, ad jura Primatus non pertinet. Hoc argumento Pontificiam auctoritatem in disciplina ordinanda, ferendisque de ea legibus vehementer concidunt; quia, inquit, salva unitate, disciplina varia esse potest pro varia temporum & locorum ratione. Eodem argumento omnem prope viam exercendæ in diocæsibus Pontificiæ auctoritatis præcludunt; quamdiu enim, ajunt, diocesanus Episcopus officio suo non deest, Papa non habet, quod disponat in Diocæsibus; quia primatus ad unitatem conservandam solum pertinet. Siquis autem Episcopus desit officio suo, Papa defectum supplere potest jure vigilantiz &

& conservationis antiquorum canonum. Hoc igitur nixi sophismate, ipsique decepti pariter, ac decipientes alios imperitos, leviterque doctos Pontificias reservationes e. g. peccatorum, beneficiorum, causarum majorum plurium, stabilitatem item Apostolicorum Nuntiorum in provinciis degentium aliaque istiusmodi, tanquam primævæ institutioni primatus repugnantia, certe haud consentanea, impudenter criminantur (h).

(h) *Tota hæc errorum labes ex lacunis Febronii hausta est; qui ita scripserat C. 2. §. 4. operis sui: „Cum genuinum fundamentum ejusdem primatus in bono unitatis, Ecclesiæ supra §. 2. invenerimus; hinc pro principio statuamus: Omnia illa & sola esse primogenia & essentialia jura primatus, sine quibus unitas non potest servari.“ Nota: Omnia & sola.*

§. 128. Respondendum nunc est accurate, & conclusiunculæ fallacia detegenda. Primatus R. Pontificis ad conservandam unitatem a Christo institutus fuit, hoc est, ea plenitudo Pontificiæ potestatis, de qua ex Scriptura & traditione certo constat, per rationem intelligitur, hunc habere effectum, & finem, ut unitas Ecclesiæ conservetur, concedo; ex præsumpto fine unitatis quoquo modo conservandæ primum ratione investigari, & seclusa Scriptura ac traditione decidi debet, quæ & quanta sit Pontificia potestas, nego. Adversarii perperam & præpostere agunt omnia in hac causa. Nam ex Scriptura ac traditione certe constat, in ratione atque idea fundamenti totius Ecclesiæ, in potestate omnia ligandi & solvendi, in collatione clavium regni cælorum, in iure confirmandi fratres, in officio pascendi agnos & oves, totum scilicet Christi gregem, contineri plenitudinem Pontificiæ potestatis.

testatis, five potestatem *plenam*, ut inquit Concilium Florentinum, & supra omnes alias Ecclesias *ordinariæ* potestatis principatum, quemadmodum Concilium Lateranense ait. Hæc primo constant apertissimis Scripturæ verbis, certissimisque testimoniis perpetuæ traditionis. Ex his dein præmissis Sancti Patres & Doctores vi rationis concludunt, per illam, de qua constat, Pontificiæ potestatis plenitudinem necessario effici debere, ut Ecclesiæ unitas firmetur & conservetur. Contra adversarii primo statuunt unitatis finem, nec attendunt, qua via & ratione, aut qua potestate unitatis finem obtineri voluerit Christus, sed ex fine quoquo modo, quem ipsi pro arbitrio definiunt, obtinendo, de potestate Pontificia disputant, atque ita ineptiunt, ut argumentari videantur hac forma: Plenitudo Pontificiæ potestatis data est pro unitate conservanda: unitas conservari potest sine illa plenitudine: ergo data non est plenitudo potestatis.

§. 129. Dicunt: Ad Romanum Pontificem, tanquam primum Pastorem, pertinet, supplere defectus inferiorum Præfulum, non vero ipsorum perturbare, & imminuere jurisdictionem; ergo ejus potestas ultra necessitatem conservandi unitatem, & antiquos canones, extendi non debet. Resp. dist. ad Romanum Pontificem pertinet, supplere defectus inferiorum, nempe supplere *ex officio*, & *plenitudine potestatis*, quæ alias præterea regiminis partes continet, *concedo*; supplere duntaxat *ex dispositione canonum*, & intra angustos fines, intra quos concessu canonum Metropolita supplet defectus suffraganeorum; *nego*. Pessime abutuntur adversarii exemplo Metropolitanorum, qui ex præscripto canonum, seu in casibus per canones definitis jus & faculta-

cultatem obtinent, quidpiam disponendi in Diœcesibus, & de subditis suffraganeorum, in quos ceteroquin ordinariam & immediatam potestatem non habent. Potestas Romanorum Pontificum non humano canonum jure nititur, sed ex divina institutione cum ea *fontali plenitudine* dimanat, quam a Christo accepit; ita Gerson loquitur, qui adversariis suspectus esse non potest. Videant, absce-ro, utrum ea, quæ ex Scripturis ac traditione de Pontificia potestate tanto numero & splendore præsto sunt argumenta ac testimonia, plus non indicent, quam facultatem supplendi extra ordinem defectus inferiorum Præfulum? Sumant ea testimonia atque argumenta præ manibus, & conferant cum hypothesi sua, quam in fraudem Divini Primatus & Apostolicæ Sedis jurium ex libris adversariorum ejusdem Sedis incauti adoptarunt; ac si forte in mentem ipsis veniat, Romanos Pontifices, qui multo ampliorem potestatem sibi asseruerunt, ipsoque exercuerunt opere, quam quæ ad supplendos tantum aliorum defectus spectabat, hos, inquam, Pontifices in causa propria sic loquutos esse, & sic actitasse; cogitent, quæso, adversarios Pontificiæ auctoritatis pariter in causa propria suæ hæresis, & schismatis loqui, scribere, calumniari, nec immunem a præjudicatis male opinionibus, atque inveterato in Apostolicam Sedem odio doctrinam in libris suis adferre posse (i). Ceterum siquid negotii agant Romani Pontifices in provinciis & diœcesibus Episcoporum orbis, id nequaquam fieri diminuendæ Episcopalis auctoritatis causa, sed studio communis boni Ecclesiæ, atque utilitatis animarum tum per se præsumendum est, tanquam de supremo Capite Ecclesiæ, tum locis suis singillatim demonstrabitur, quando de reservationibus, causis majoribus erit agendum.

(i) Ad

- (i) *Ad id, quod dicunt, RR. Pontifices in causa propria loquutos, respondi in Isagoge. C. VI. §. 94.*

§. 130. Dixi hætenus de Romano Pontifice, tanquam principio activo legum in causis fidei & disciplinæ. Consensu omnium ea potestas tribuenda est Conciliis generalibus, quatenus a Summo Pontifice confirmata sunt (k). Episcopi, & Synodi, cœcumenica inferiores, condunt leges secundum limites suæ jurisdictionis, duplici nempe spectata subjectione, & *personarum*, quæ iisdem subiectæ sunt, & *causarum*, de quibus disponendi jus habent. Sequitur, ut leges non ferant in causis majoribus Papæ reservatis, nec contrarias juri communi, cui ipsi Episcopi, eorumque Synodi subjacent. c. 9. de M. & O. ibi: *Dummodo in ipsa Synodo non ducas aliquid statuendum, quod canonicis obviet institutis.*

- (k) *Prærogativa Episcopi Constantinopolitani, a Patribus Chalcedonensibus contra veterem disciplinam decreta, vim & robur diu non habuit; quia id a Sede Apostolica approbatum & confirmatum non fuit; frustra apud S. Leonem M. intercedente ipso Imperatore.*

§. 131. Nova quorundam doctrina est, atque ad perturbandum ordinem hierarchicum, & disciplinam Ecclesiæ convellendam excogitata, qua Episcopos leges, juri communi contrarias, ferre posse asserunt. Sic enim objiciunt

I. Principes Imperii leges politicas, juri communi contrarias, ferre possunt. Ergo. Resp. Quid Principes Imperii in politicis causis possint, id ex constitutione, & natura Imperii Romano-Germanici pendet: quid possint Episcopi Papa inferiores, eorumque Synodi particulares, colligendum est ex constitutione Ecclesiæ & Hierarchiæ divinitus institutæ,

tutæ, vi cujus ne dispensare quidem possunt jure ordinario & extra concessos casus in generalibus legibus Ecclesiæ, ut infra probabimus.

§. 132. II. Utilitas & necessitas diœcesium exigit aliquando alias leges, aut veteri juri contrarias: ergo. Resp. Rarus admodum is casus est, nec a quovis Prælato inferiore decidendus. Dein quemadmodum ad incolumitatem corporis aut membrorum necesse non est, ut quodvis membrum quaslibet functiones utiles aut necessarias obire possit, modo in toto corpore sit membrum aliquod e. g. caput, vel oculi, a quo obeantur; sic existimandum est de Corpore Christi, quod est Ecclesia. Si qua utilitatis vel necessitatis causa emergat in provinciis, ob quam leges mutandæ videantur, ad Summum Ecclesiæ Caput recurri oportet.

§. 133. III. Nicolaus P. I. Can. 1. dist. 19. de Decretalibus epistolis ait, eas debere ab omnibus prorsus, in quibusvis opportunitatibus, *discretione vel dispensatione magistra*, reverenter assumi: ergo in observandis Ecclesiæ legibus discretio & dispensatio locum habet. Resp. Non ea profecto mens fuit Nicolai I., ac si docuisset, Prælatos inferiores discernere ac suo arbitrio decidere debere, quæ leges observandæ sint; secus non dixisset, eas *ab omnibus prorsus, in quibusvis opportunitatibus* reverenter assumendas esse. Sed cum varia Decretalium epistolarum genera sint, & aliæ speciales, aliæ generales habeantur, aliæ præcipiant, aut vetent, aliæ consulant duntaxat, aut quidpiam extra ordinem indulgeant, hinc discretione & prudentia opus in Decretalibus Pontificum epistolis in vim generalis legis assumendis (1).

(1) In hunc sensum cit. canonem recte explicat Joannes de Turre cremata in Decret. Gratiani.

Zöllinger L. I. Decretal.

G

§. 134.

§. 134. Præter Papam, Episcopos, eorumque Synodos, quibus potestas publica & rectoria in Ecclesia jure divino competit, quædam personæ ecclesiasticæ, physicæ & morales, ex dispositione canonum *potestate quasi episcopali* gaudent, quibus proin jus ferendi leges vi ejus potestatis tribuendum est, intra eosdem tamen, aut arctiores etiam limites, ac dictum est paulo ante. Istiusmodi personæ sunt Cardinales in titulis suarum ecclesiarum, Legati Sedis Apostolicæ, Capitula Cathedralia Sede vacante, Abbates, aliique Prælati jurisdictionem quasi Episcopalem obtinentes, Ordines Religiosi sive per caput suum, sive per membra in Capitulo aut Congregatione suo capiti unita c. 7. de Statu Monachorum.

§. 135. *Statuta* sensu stricto vocantur, quæ ex speciali concessione, aut privilegio legislatoris, non autem jure legislatorio proprio conduntur, atque hoc modo differunt a legibus. Sed usus loquendi valde inconstans est; nam & *statuta canonum* appellantur, & *statuta provincialia*, seu leges a Statibus Imperii in suis provinciis latæ. Proprie autem id nomen pertinet ad statuta municipalia, localia, academica, capitularia; de quo ultimo genere ex hoc titulo notandum:

I. Statutum Capituli vel Collegii, quod vergit in aliquorum commodum, & aliorum damnum, æquale jus habentium, censetur injustum, & irritum. c. 6. h. t.

II. Non valet statutum, quod in diminutionem divini cultus cedit; e. g. ut minor sit canonicorum numerus, & majores singulorum redditus. c. 12. h. t.

III. Statutum etiam a Superiore confirmatum sine ejus consensu revocari potest tum, quando directe

recte & principaliter cedit in favorem eorum, qui ei renunciant, aut si per ejus revocationem reditur ad observandum jus commune. c. 8. h. t. Quia quævis res facile redit ad naturam suam, & consensus Superioris pro observando jure communi intervenire præsumitur.

IV. Statutis Capitularibus aliquando certus instituitur canonicorum numerus; idque statutum firmatur juramento canonicorum, & confirmari etiam solet Apostolica auctoritate; etsi autem hæc apponatur conditio, vel intelligatur apponi: *Salva Sedis Apostolicæ auctoritate*; non tamen istiusmodi statuti, nisi expressa eorum fiat mentio, per rescripta Apostolica derogari censetur. Casus extat c. 19. de Rescriptis, ejusque parte decisa.

V. Non nunquam vi statutorum capitularium, aut consuetudinis pro obtinendis canonicatibus certæ qualitates præter jus commune requiruntur, ut puta, ne ad canonicatus vel dignitates admittantur alii, nisi illustri sanguine procreati. „Quod statutum (inquit V. C. Zech.) si a Sede Apostolica confirmetur, non est improbandum; modo his Nobilibus aliæ qualitates de jure communi requisitæ non desint. Unde Pontifex non admittit allegationem qualiscunque consuetudinis, nisi scilicet alligetur simul Apostolica confirmatio (m).“

(m) *De Hierarchia Eccl. Tit. XXIII. §. 261. In hanc sententiam eleganter differitur c. 37. de Præbend.*

§. 136. Jus ferendi Ecclesiasticas leges Principibus & Magistratibus politicis aliud tribui non potest, nisi ut legitime latas auctoritate Ecclesiastica imitentur, aut sequantur, eas firment potentia sua, ac protegant, atque executionem curent; quemad-

modum explicavi in Ifagoge C. XI. Celebre est c. Ecclesia S. Mariæ. 10. h. t. ibi: *Nos attendentes* (inquit Pontifex), *quod laicis etiam religiosis* (id est, Religionis studio accensis) *super Ecclesiis & personis Ecclesiasticis, nulla sit attributa facultas: quos obsequendi manet necessitas, non auctoritus imperandi, a quibus siquid motu proprio statutum fuerit, quod ecclesiarum etiam respiciat commodum & favorem, nullius firmitatis existit, nisi ab Ecclesia fuerit approbatum.* Desumpsit hoc Innocentius III. ex Synodo Romana, sub Symmacho P. a. 502. celebrata, in qua cum recitata fuisset lex, quam Basilius, præfectus prætorio & Patricius, de rebus Ecclesiasticis Odoacris regis nomine post Simplicii obitum, vacante Sede, promulgaverat; omnes eam nullius roboris esse, ex indicata in cit. cap. ratione adseverarunt, quemadmodum Gratianus can. 1. dist. 96. refert. Hanc legem, tanquam latam a non habente potestatem, Symmachus suffragante Concilio abrogavit, & lege speciali alienationes rerum Ecclesiasticarum, de quibus agebatur, irritas declaravit, adjecta pœna excommunicationis; can. 20. XII. q. 2. & can. 1. XVII. q. 4. (n)

(n) *Concil. Edit. Mansi. T. VIII. Col. 265.*

§. 137. *Præter potestatem & jus ferendi leges, spectanda est causa, & materia potestati legislativiæ subiecta.* Principi Politico subjacent politica, Ecclesiastico ecclesiastica; quales sunt causæ fidei, Sacramentorum, internæ honestatis morum, dein materia disciplinæ, tum liturgicæ de sacris ritibus, & exercitio Religionis, tum ejus, quæ ad ordinationem, politiam & functiones cleri, ad modum regiminis e. g. formam judicii quasi civilis & criminalis

lis, ad bonorum temporalium administrationem pertinet. In his Apostoli, non imperatores aut præsidēs provinciarum, non Magistratus Judaicus, ipsa nascente Ecclesia, potestatem a Deo acceptam exercuerunt, quemadmodum singillatim ostendi C. III. Juris Eccl. Publici. *Nemini obscurum esse potest, quid apostolici & episcopalis, quid secularis & imperatorii sit juris; & ut uno rem absolvam: Episcopalis habeatur juris, quidquid ante Constantinum sub imperio gentilium perficiebant Episcopi. Neque enim tunc vel suspicio ipsos ulla afflare potest, quasi imperatoria jura invaserint (o).*

(o) *Thomasin. Dissert. 3. in Synod. Nicæn.*

§. 138. Omnes leges circa humanas actiones, & negotia, tanquam materiam, versantur, eisque formam præbent, ex qua rectæ, prævæ, validæ, irritæ censeatur. Quapropter regula est, eas ad futura duntaxat, non præterita pertinere negotia; *ne detrimentum ante prohibitionem possint ignorantes incurrere.* c. 2. & 13. h. t. Exceptiones sunt:

I. Nisi nominatim in eis (legibus) de præteritis caveatur; cit. c. 13. h. t. quoad effectus scilicet pendentes. Consentit L. 7. C. de LL. Exempla hujus exceptionis extant L. ult. C. de pactis pignorum; nempe de lege commissoria pignorum, cujus irritationem ad præteritas portiones extendi vult Imperator. Et L. 22. §. 1. C. de SS. Eccl. sed casus hujus legis ad exceptionem sequentem trahi potest.

II. Nisi lex, de cujus effectu quæritur, sit mera declaratio vel authentica interpretatio legis prioris & antiquioris. Talis enim non censetur nova lex, sed prior authentice declarata; unde locum ha-

bet id, quod Novella 143. prope fin. statuitur : *Quam interpretationem non in futuris tantummodo casibus, verum in præteritis etiam valere sancimus, tanquam si lex nostra ab initio cum interpretatione tali a nobis promulgata fuisset.* Exemplum extat Nov. XIX. & argumentum peti potest ex L. 21. §. 1. D. qui testam. fac. pos.

§. 139. Ad materiam legis referendum est id, quod Gratianus can. 2. dist. 4. ex S. Isidoro Hispalensi L. V. C. 21. Originum exscripsit : *Erit autem lex honesta, iusta, possibilis, secundum naturam, secundum patriæ consuetudinem, loco temporique conveniens, necessaria, utilis, manifesta quoque, ne aliquid per obscuritatem in captionem contineat, nullo privato commodo, sed pro communi civilium utilitate conscripta.* Lex igitur fere nititur ratione, desumpta ex bono & fine communitatis, cui fertur. Multiplex autem *legum ratio* distingui solet, ceu *moralis, historica, legalis*; alia *suasoria*, quæ legislatorem re ipsa permovet: alia *justifica*, quæ ab eo obtenditur: alia *sufficiens, insufficiens*, arcana. Sed talia ad politicas leges pertinent. Ecclesiasticas leges de indifferentibus ferri, nolunt Febroniani, id est, de iis, quæ *indifferentè se habent, & quibus non observatis minime salus periclitatur, vel observatis minime juvatur.* In his callida latet ambiguitas. Multi enim pro adiaphoris & indifferentibus habent, quidquid lege divina sub periculo æternæ salutis præscriptum non est, etsi idem maxime pium sit, sanctumque, ab ipso divino Servatore laudatum, a sanctissimis viris observatum, longoque usu confirmatum. Quid ergo? nihilne præcipi aut vetari ab Ecclesia potest, quod non ante divina lege præceptum est, vetitumve? Hoc quidem modo innumeri canones generalium
Con-

Conciliorum, & præcepta Ecclesiæ abolenda erunt: quasi Christus Petro & Apostolis eam tantum dedisset potestatem, ut, quod in cælis ligatum est, ipsi ligarent in terris; & non adpromississet potius, id in cælis ligandum fore, quod ipsi in terris ligaverint.

§. 140. Quærunt, utrum materia legum Ecclesiasticarum sint actus *mere interni*, id est, tales, qui nec per se, nec per accidens conjungi necessario debent cum actu externo; sive an Ecclesia legem ferre possit, quæ impletur *solo actu interno*. Vitandæ sunt captiones verborum. Hinc dico

I. Jure divino præcepti sunt actus fidei, spei, caritatis, dilectionis item erga proximum; hæc præcepta sæpe impleri possunt solo actu interno; Ecclesia autem hoc jus divinum authentice declarare potest. Hinc ab Innocentio P. XI. damnata est propositio n. X: *Non tenemur proximum diligere actu interno formali*; & n. XI. *Præcepto proximum diligendi satisfacere possumus per solos actus externos*. n. XVI. *Fides non censetur cadere sub præceptum speciale, & secundum se*. n. XVII. *Satis est, actum fidei semel in vita elicere*. Eodem pertinet præceptum negativum: *Non concupisces*; &: *Qui viderit mulierem ad concupiscendum eam, jam mæchatus est eam in corde suo*.

§. 141. Dico II. Dum Ecclesia præscribit actum externum, eo ipso etiam præscribit internum, cum eo conjunctum. Nam 1. cum actu externo *per se* conjuncta est voluntas cum obeundi. 2. Ut actus externus suam naturam aut substantiam moralem habeat, requiritur internus, e. g. intentio in Sacramento, applicatione Sacrificii pro Parochianis, attentio in oratione. In his actus internus *concomi-*

tanter, alii dicunt, *indirecte* præcipitur. Si lex præcipit actum externum, sola deliberata voluntas eam legem violandi, *consecutive* contra legem est. Sed quæro, an hæ sint istiusmodi leges, quæ *implentur solo actu interno*?

§. 142. Dico III. Quando Ecclesia authentice declarat doctrinam fidei, ejus definitioni præstandus est assensus *internus*, nec satisficit per obedientiam externam, quæ contradictionem externam vetat, nec per silentium obsequiosum. Sacrosanctum Concilium Tridentinum Sess. 13. in Decreto de sanctissimo Eucharistiæ Sacramento *omnibus Christi fidelibus interdicit, ne posthac de sanctissima Eucharistia aliter credere, docere aut prædicare audeant, quam ut est hoc præsentis decreto explicatum atque definitum.* Quod de fide, & doctrina ab Apostolis annuntiata dictum est: *Corde creditur ad justitiam, ore autem confessio fit ad salutem*, Rom. X. 10., id eodem prorsus modo, eademque ratione pertinet ad fidem & doctrinam, ab Ecclesia fidelibus annuntiatam. Manet enim apostolica missio: manet Apostolica prædicatio: manet assistentia Spiritus Sancti. Non est hæc lex arbitraria Ecclesiæ: est lex divina & naturalis, quæ annuntianti divinam doctrinam præstari jubet assensum cordis & oris, eumque conspirantem. Falsæ Sectariorum hypotheser, quæ nullum agnoscunt infallibilem judicem controversiarum fidei, per se & natura sua faciunt hypocritas, quibus aliud interius sentire & credere, aliud exterius profiteri licet.

§. 143. Dico IV. Quævis lex, non Ecclesiastica tantum, sed civilis quoque, effectum habet internum, seu pro foro interno, imponendo obligationem, concedendo jus: sic administratio Sacramentorum, absolutiones, dispensationes &c. intus in animo operan-

rantur aliquid; sed ob id dici haud potest, & versatileia præcipi actus mere internos, aut ferri legeat: quæ impleri possint solo actu interno.

§. 144. His præmissis videtur statuenda hæc Thesis: *Lex humana Ecclesiastica non potest præcipere actus mere internos; nisi forte determinando tempus, occasionem, frequentiam vel modum exercendi illos, qui jam ante præcepti sunt lege divina naturali vel positiva.* Prob. cum S. Thoma 1. 2. q. 91. art. 4: *Homo de his potest legem facere, de quibus potest judicare; judicium autem in hominis esse non potest de interioribus motibus.* Quod fatetur ipse Pontifex c. 33. in fine & c. 34. de simonia. Non intelligitur potestas homini concessa a Deo, nisi quæ modo naturæ hominis accommodato exerceri potest (p).

(p) *Civilem potestatem ad actus mere internos non extendi, fatentur passim. Quod ab Ecclesia censura ferri possit ob delictum mere internum, vix persuadet doctrina a P. Cardenas fuse tradita in Crisi Theol. diss. 34. Nam ut S. Thomas ait 1. 2. q. 100. art. 9. „præceptum legis habet vim „coactivam. Illud ergo directe cadit sub præcepto legis, ad „quod lex cogit; coactio autem legis est per metum pænæ. „Ad instituendam autem pœnam aliter se habet lex divina, „& aliter lex humana. Non enim pœna infligitur, nisi „pro illis, de quibus legislator habet judicare; quia ex „judicio lex punit. Homo autem, qui est legis lator hu- „manæ, non habet judicare, nisi de exterioribus actibus: „quia homines vident ea, quæ parent, ut dicitur I. Reg. „XVI. sed solius Dei, qui est legis lator Divinæ, est ju- „dicare de interioribus motibus voluntatum, secundum illud „Psal. VII. Scrutans corda & renes Deus.“*

§. 145. *Juri ac potestati ferendi leges in causa seu materia subiecta respondet subiectio eorum, qui legibus parere debent, sive principium aut subiectum activum, & subiectum passivum, tanquam bini re-*

lationis termini simul spectandi sunt in legibus perinde, ac in aliis juribus; secus vim non habent leges; uti nulla est sententia a non suo iudice lata, id est, ab eo, cui aliquis subiectus non est: nulla est vox activa seu jus eligendi, nisi tendat in eum, qui passive eligibilis est: nulla est ultima voluntas, nisi instituat is, qui capere potest.

§. 146. Subiectum passivum legis est communitas, in cuius utilitatem fertur. Nam *jura non in singulas personas, sed generaliter constituuntur*. l. 8. D. de LL. Hinc lex maxime differt a præcepto, quod omnibus personæ adhæret, cui datum est: at lex adhæret communitati, seu districtui & territorio, quo communitas constringitur; & quamvis in communitate sint membra, quæ vi privilegii, exemptionis, aut ob alias causas non afficiantur lege, tamen lex vere dicitur communitati lata.

§. 147. In legibus ecclesiasticis distinguere in primis debent *generales* latæ a Romano Pontifice, aut Concilio generali; & *particulares*, quæ provincialium, diœcesium aut locorum propriæ sunt. Distinguunt etiam inter *vim directivam* legis, & *coactivam*: fieri potest, ut quis teneatur eo, quod lege Ecclesiastica humana præscriptum est; quia e. g. idem jure divino præceptum est, vetitumve; quin subiaceat pœnæ & coactioni a lege humana constitutæ: talis, ajunt, obligatur vi directiva legis, non item coactiva; malletm dicere: obligatur lege materialiter, non item formaliter, id est, quatenus hac lege præscriptum est. Denique de legibus particularibus, quæ loci aut territorii finibus constringuntur, quæstio existit, utrum membrum communitatis ceteroquin subiectum legibus, si extra communitatem & terri-

territorium, cui lex particularis affixa est, versetur, lege lata pro communitate, adstrictum maneat: utrum eidem legi particulari obnoxii sint, qui ceteroquin communitatis membra non sunt, sed extrinsecus adveniunt, & territorium ingrediuntur; istorum alii dicuntur *advenæ*; alii *peregrini*, qui ipsi in duplici classe sunt; alii *vagi*; quod quidem discrimen a notione domicilii, vel quasi domicilii pendet.

§. 148. *Domicilium* acquirere dicitur, qui loco quodam existens, vel eo reipsa perveniens, animum habet perpetuo ibi manendi, donec nimirum alia causa avocet (*q*). Acquiritur ergo non nuda voluntate, ejusve declaratione, sed voluntate seu animo, & facto simul; ut nempe locum jam attigerit, aut etiam rerum & fortunarum suarum sedem ibi constituerit (*r*): estque hoc *Domicilium verum*. *Quasi domicilium* appellatur, si quis uno loco, e. g. in patria, habens *Domicilium verum*, ad alium se locum transfert cum animo ibi manendi tempore longiore, e. g. pluribus mensibus, aut etiam annis. Fieri ergo potest, ut aliquis alio loco habeat *domicilium verum*, alio *quasi domicilium*: imo ut aliquis in binis locis habeat *verum domicilium*, e. g. si æquali prope anni tempore & pari animo commoretur utroque loco: aut binis locis habeat *beneficium stabile*, l. 6. §. 2. D. ad municipalem. Ibi: *Viris prudentibus placuit, in duobus locis posse aliquem habere domicilium, si utrobique ita se instruxit, ut non minus apud alteros se locasse videatur.* Adde l. 27. §. 2. ib. c. 2. de sepulturis. in 6. Quemadmodum autem nullum acquiritur *domicilium*, nisi animo & facto; quod aperte decisum est l. 20. D. ad Municipalem: ita concludunt Auctores, illud non amitti, nisi

nisi per utrumque, scilicet per discessum actua-
lem cum animo non redeundi. Dicta pertinent ad
Domicilium *habitationis*; quod aliquando etiam *ac-*
cidentalē & adscititium vocatur; aliud est *naturale* vel
originis, nempe locus, in quo quis oriundus vel
natus est, si pater ibi Domicilium habitationis ha-
buit. In jure Romano l. 33 D. ad Municipalem di-
citur: *Roma communis nostra patria est.* Et c. fin. de
for. comp. *Omnium Ecclesiarum mater & magistra*
dicitur.

(q) L. 7. C. de incolis, & ubi quis Domicilium. Ibi: „In-
„colas - - domicilium facit; & in eodem loco singulos ha-
„bere domicilium, non ambigitur, ubi quis larem, rerum-
„que ac fortunarum suarum summam constituit, unde rur-
„sus non sit discessurus, si nihil avocet.“

(r) L. 20. D. ad Municipalem. l. 5. in f. & l. 25. D. de
captivis. l. 2. C. ubi senatores. Ceterum hæ notiones ma-
gno usui sunt tum hoc loco, tum ubi agitur de foro domi-
cilii vel quasi: de parcho proprio in causa matrimonii
contrahendi, vel sepulturæ.

§. 149. Hisce prælucentibus notionibus advena
existimatur is, qui extra patriam suam alibi figit
domicilium cum animo, ibi manendi perpetuo, si
nempe causa non avocet improvisa. Sic quidem ad-
vena opponitur indigenæ. *Peregrinus* dicitur in lo-
co, ubi ad tempus moratur extra verum domici-
lium, cum animo tamen eo redeundi. Peregrinos
in duplicem dividendos classem dixi; vel enim ex-
tra locum veri domicilii alibi morantur tanto tem-
pore, ut *quasi domicilium* censeantur ibi acquirere,
vel ut ne *quasi domicilium* quidem acquirant, uti si
iter facientes loco quopiam transeant cito discessuri.
Ad acquirendum etiam quasi domicilium & animus
& factum requiritur. *Vagi* appellantur, qui nullibi
verum Domicilium habent, & fixam sedem, aut re-
lieto

lieto domicilio aliud inquirunt. l. 27. §. 2. D. ad Municipalem.

§. 150. Hac facta personarum, & legum universalium & particularium distinctione, duæ sunt præcipuæ de subiecto passivo legum decisiones:

I. Legibus universalibus Ecclesiæ tenentur omnes, qui per Baptismum Ecclesiam ingressi, sive eisdem subiecti sunt; nec vero contumacia, rebellio contra Ecclesiam, id est, defectio a fide Catholica, aut a Communione Catholica (in qua defectione crimen hæresis & schismatis consistit) a subiectione & obligatione quemquam eximere aut liberare potest; cum præsertim vitium defectionis nullo pacto aut cursu temporis possit sanari. Secus est de infidelibus, seu non baptizatis (s).

(s) I. Cor. V. 12. c. gaudemus 8. de divort. SS. Concil. Trid. Sess. XIV. c. 2.

§. 151. II. Ut quis obligetur legibus particularibus provinciarum, diœcesium, locorum, in regula duo requiruntur copulative; 1. ut sit in territorio, 2. ut de territorio, hoc est, ut versetur in communitate, cui lex affixa est; & sit membrum ejus communitatis. Hinc c. 2. h. t. in 6. deciditur, statuto Episcopi non ligari ejus subditum, qui extra diœcesin versatur; & c. 11. de sent. excom. eodem statuto non ligari exterum, Episcopo non subditum, etsi ejus diœcesin ingressus sit. Ratio est, quia lex pro bono rectoque ordine communitatis fertur, non autem in singulas personas, ut supra dictum est; sphaeram ergo activitatis suæ communitati ejusve districtui alligatam habet, neque ultra protenditur. Nam, ut dicitur cit. c. 2. in 6. *extra territorium jus dicenti impune non paretur* (t).

(t) Hoc

(t) *Hoc est, jurisdictionem extendenti ultra terminos, quibus eadem constricta est. Atque hoc sensu istuc axioma juris refertur ad subiectum passivum extra territorium existens. At Clementina Unic. de foro comp. idem dictum refertur ad subiectum activum, quando versatur extra suum territorium; e. g. Episcopus extra suam diocesin degens jus dicere non potest, nisi in casu excepto per cit. Clementinam.*

§. 152. Duplex ergo, cum de particulari quadam agitur lege, existit quaestio: 1. Utrum ea teneatur subditus, e territorio, cui affixa est, egressus: 2. utrum teneatur non subditus in illud territorium ingressus? Subditus e territorio egressus & physice absens censetur *praesens moraliter*, si culpa ab illo commissa, aut datum damnum, vel omisso actionis praescriptae in ipso territorio contingunt, uti si vocatus ad synodum non comparet, si in beneficio non residet, mandatis avocatoriis non pareat. Dein alia est ratio praeparatorum; alia vero legum: item alia subditorum, alia illorum, qui superiori adstricti sunt vinculo personali, ceu liberi parentibus, religiosi praelatis, uxor marito, milites duci suo vi sacramenti militaris.

§. 153. Non subditus territorium ingressus ita, ut nec domicilium, nec quasi domicilium acquirat, sed subditus *temporarius* per ipsum ingressum quoad leges pro ejusmodi peregrinis constitutas, aut ratione contractus, delicti forte commissi, vel rei sitae, verbo, quatenus forum sortitur in territorio; quia a pari procedunt, forum sortiri, & statutis ligari (u). Dicunt: Praesentia perpetua in territorio operatur subjectionem perpetuam: ergo temporaria temporaria. Resp. n. c. subiectio perpetua vel longior e. g. annorum 10 ex praesumptione juris operatur domici-

micilium; domicilium vero ex dispositione juris operatur subjectionem erga leges particulares; at vero transitus per territorium, vel solus ingressus nec domicilium, nec quasi domicilium tribuit.

(u) *Sperellus Decif. X. fori Ecclesiastici n. 41. Card. Tuscus lit. F. Concl. 444.*

§. 154. Dispensationes aut relaxationes legum generalium Ecclesiæ aliquando particulari territorio conceduntur, cum aliis locis leges illæ vigeant; ac tum peregrinum forte transeuntem favore aut privilegio illius loci uti posse, non ambigunt, etsi in loco sui domicilii legem servare deberet. Sed quærent, utrum declinandæ legis causa territorio suo egredi licite quis possit? Resp. non potest, si alia egrediendi non subest justa causa, nisi ut legem declinet, seu potius legi illudat. Quid est enim in fraudem legis agere, si hoc non est? *Fraus enim legi fit, ubi, quod fieri noluit, fieri autem non vetuit; id fit. l. 30. D. de Legibus.* Porro legislator spectata litera legis non vetuit egredi; at noluit certe ex hac tantum causa, ut lex servantibus salutaris impune a socordibus eludi possit. Qui legem Concilii Tridentini contra matrimonia clandestina evitaturus ad alium locum accedit, ubi ea lex promulgata non est, ibique clandestine contrahit, inutiliter agit; ita declaravit Urbanus VIII. Clemens X. in const. *Superna magni patrisfamilias* edita a. 1670. §. 7. decidit, posse regularem confessorem in ea diœcesi, in qua est approbatus, confluentes ex alia diœcesi a peccatis in ipsa reservatis, non autem in illa, ubi idem confessor est approbatus, absolvere, nisi eosdem pœnitentes noverit in fraudem reservationis ad alienam diœcesin pro absolutione obtinenda migrasse.

Adeo

Adeo fraus, quæ in utroque casu pro fundamento declarationis assignatur, nemini patrocinari debet, nequidem si de valore actus agitur, quod plus est; multo etiam minus, si agitur de honestate & licentia.

§. 155. Adversarii illud perpetuo oggerunt: Quivis habet jus egrediendi saltem ad tempus e suo domicilio; *nullus autem videtur dolo facere, qui utitur jure suo.* l. 55. D. de R. J. Respondeo 1. quid ergo? valebit in datis exemplis matrimonium clandestine contractum, & absolutio in extra diœcesi obtenta? 2. Honestas & licentia actionis non ex sola libertate & jure agendi, sed præterea ex motivo & circumstantiis pendet. Motivum autem legis per fraudem declinandæ honestum non est, nec a lege eximit.

§. 156. Dicunt præterea: Filius patrem rogare potest, ut pœnam irrogatam remittat, aut datum præceptum revocet; quo facto liberatur. Sic qui egreditur, medium non malum adhibet, ut a lege immunis fiat. R. At pater sine justa causa nec pœnam remittet, nec præceptum revocabit. Quidquid fit; dispensatio aut relaxatio legis generalis sine justa causa nec licite peti, nec licite concedi potest; justa autem causa relaxandi legem e. g. jejunii non est, ut genio suo indulgere possit subditus.

§. 157. Lex, inquiunt, territorio adhæret, ex quo egressus est subditus, & in loco, ad quem accessit, non obligat. R. Lex territorio adhæret; at obligatio non eludendi leges per fraudem adhæret ossibus ac medullis personæ; uti qui dolo desit possidere, aut qui rem alienavit judicii mutandi causa, adhuc possidere censetur; sic qui per fraudem legi
illulit,

illusit, ubicunque versatur, lege constringitur. Finge, si vis, civem Ninivetanum, cum indictum esset jejunium lege publica, & incolæ faccis se vestirent agendaë pœnitentiæ causa, ut molestiam evitaret, urbe tantisper egressum fuisse; aut in memoriam revoca parabolam Luc. XIV. v. 16. de invitatis ad cœnam, quibus juste indignatus est paterfamilias, etsi causas minime inhonestas obtenderent; at nempe non ita urgebant objectata negotia, ut humanitati patrisfamilias recte illuderent, ejusque expectationem frustrarentur. Nunquid enim aliud supererat tempus, quo primus villam inspiceret, alter juga boum examinaret, tertius cum uxore confabularetur, quam duxerat jam, & ob cœnam amissurus non erat? Quid? si quis prænoscens, se vocandum esse ad judicem, ut testimonium ferat, adversario respondeat, rationem gestæ administrationis reddat, eo ipso tempore discedat, aut se occultet? Quid? si prævideat quis, nisi matutinis horis ad Sacrum accedat, aut canonicas horas recitet, postea vel copiam Sacrificii vel tempus recitandi pensi defuturum; juste differet ea solum de causa, quod lex horam non definiat, nec dilationem vetet? Quis vel pueros fert Magister, qui, cum doctrinæ specimen præbere debeant, eo ipso tempore medicinam sumant, aliave ponant obstacula? Appello ad bonas mentes, non dissolutas, nec feminea corruptas astutia, utrum obscurum esse possit his expensis, quid sit agere in fraudem legis?

§. 158. De subiecto passivo legum alia superest controversia, utrumne ipse Princeps & Legislator obligetur legibus suis, ut idem sit principium seu subiectum activum, & passivum legis? In thesi respondendum est *negative*: Legislator legibus *suis*, quæ nempe & quatenus vim obligandi a voluntate

Zallinger L. I. Decretal. H &

& potestate legislatoris habent, non obligatur. Est enim principium generale, ratione cognitum, quod extat in jure Romano: *Neque enim imperare sibi, neque se prohibere quisquam potest* (x).

(x) *L. penult. D. de receptis, qui arbitrium. Addendum: neque se voluntate sua inhabilitare, sive ad agendum inhabilem reddere quisquam potest. Inhabilitates & nullitates actuum vel ex principiis juris naturalis, aut ex lege Superioris, aut ex translatione juris in alios oriuntur.*

§. 159. Thesis & regula mox demonstrata exceptiones habet non paucas.

I. Optimates in aristocratia, & singuli patres-familias in statu democratico legibus a collegio Optimatum, vel toto populo latis sine dubio obligantur; quippe quæ vim obligandi non a singulis, sed universis habent.

§. 160. II Quando Imperans jure privati agit emendo, contrahendo &c. stare debet pretiis rerum lege positiva taxatis. Si fiscus Principis lite implicatur cum subdito, ipsæ Principum leges statuunt, ut judices in subditum magis inclinentur, & æquitatem causæ penes hunc esse præsumant (y). Ex testamento imperfecto nec Princeps hæreditatem capit, vel legatum (z).

(y) *L. 10. D. de Jure fisci. L. Un. §. 14. C. de Caducis tollendis. De Marco Antonino, dicto Philosopho, Julius Capitolinus in vita testatur, quod fisco in causis compendii nunquam judicans favit. Eandem ob causam Trajanum imp. laudat Plinius in Panegyri. §. 36. & Cassiodorus Variar. Lett. L. 1. ep. 22. Theodoricum, Gothorum regem.*

(z) *L. 23. D. de legat. 3. & l. 4. c. ad leg. falcidiam.*

§. 161.

§. 161. III. Si Princeps aut ejus antecessor cum subditis vel extraneis pactum iniit, necesse habet fidem servare, & jus translatum servare illæsum. Id poscit jus divinum naturale. Nec dici potest, *antecessorem non potuisse præjudicare successor*, nisi aliunde vitio laboret pactum; quia dignitas Principis, quæ in ejusmodi pactis maxime spectatur, non censetur mori vel extingui. Nec contra observacionem pacti facile locum habet *exceptio manifestæ utilitatis aut necessitatis publicæ*; quia ad publicam tranquillitatem nihil utilius, nec aliud quidquam magis necessarium est, quam observatio pactorum, datæque fidei.

§. 162. IV. Siqua est lex quoad materiam aut substantiam naturalis, aut divina positiva, quæ ex dispositione humana solam habet sanctionem pœnalem, aut determinationem temporis, modi vel quantitatis, ad eam observandam legem Imperans certe obligatur; secus legi non satisfaceret divinæ. Non nulli generatim ita differunt: Lex lata ex motivo certæ virtutis, ceu religionis, caritatis, temperantiæ, honestatis morum, hanc vim habet, ut actus positivus aut negativus constituatur in materia necessaria ejus virtutis relate ad totam communitatem: cumque imperans communitatis membrum sit, idque præcipuum; lege obligabitur, non qua subditus, sed qua membrum communitatis. Quidquid sit de vi hujus argumenti, certum est, præter obligationem ex jure imperii & subjectione ortam, aliam distinguere debere, ex altioribus juris naturalis principiis provenientem, ceu ex servanda æquitate, præbendo virtutis exemplo, vitando scandalo & contemptu legis (aa).

(aa) C. 6. h. t. ibi: *Cum igitur, quod quisque juris in alterum statuit, ipse debeat uti eo; & sapientis dicat auctoritas: Patere legem, quam tu ipse tuleris &c.* Can. 2. dist. 8. *turpis est omnis pars, suo universo non congruens.* Trid. Sess. 24. C. 1. de ref. *Totius familiæ domini status & ordo nutabit, si, quod requiritur in corpore, non inveniatur in capite. Ceterum quod l. 4. C. de Leg. dicitur: „Digna vox majestate regnantis est, legibus se „alligatum Principem profiteri;“ id speciosius, quam verius dictum putant; quamdiu enim Romani Principes (inquit Heineccius ad Pandectas P. I. §. 37.) tyrannidis suspicionem averfabantur, hoc libertatis simulacro illudebant civibus, ut se legibus teneri præ se ferrent, quippe non a se, sed a populo, senatueque latis.*

§. 163. V. Non tenetur utique Legislator sanctione pœnali, quam legi adjicit; hinc ejus obligationem internam dicunt, non externam; nec adstringitur ad formalitates actibus subditorum præscriptas; ac si ipse omissis solemnitatibus gerit actum, jure supremæ potestatis censetur agere (bb). De solemnitatibus testamenti ab ipso Principe confecti, egi in Jur. Nat. Publico §. 264. lit. c.

(bb) L. 8. De manumissis. L. 3. D. de officio Præt. C. 1. de Temporib. ordinat.

§. 164. In notione legis continetur ejusdem promulgatio, quæ est actus, quo communitas venire potest in notitiam ejus, quod rationabiliter ordinatum est; idque contingit variis modis, ceu voce præconis, programme publice affixo, literis Apostolicis, misso codice ad judices, vel ad scholas, convocata Synodo, ac lege ibidem prolata. Ejusmodi promulgatio ad vim & rationem legis omnino necessaria est, ita, ut nondum censeatur existere lex, quamdiu promulgata non est, etsi conclusa sit in sena-

senatu, vel a Principe in præsentia ministrorum decreta (cc); nam lex est locutio Principis ad communitatem, & pro forma habet actum publicum, ad subjectam communitatem directum: aut citatio & sententia judicis non intelligitur, nisi per actum, quo vocati in iudicium, aut litigantes mentem iudicis cognoscere possunt. *Attributum* a Philosophis dicitur id, quod rationem sufficientem in essentia rei habet. At voluntas legislatoris sine promulgatione rationem & essentiam legis non habet; igitur promulgatio non est attributum legis; sed recte ab Jurisconsultis *legis forma* dicitur; quia, ut ajunt, forma dat esse.

(cc) L. 9. C. de LL. ibi: „*Sacratissimæ leges, quæ constringunt hominum vitas, intelligi ab omnibus debent, ut universi præscripto earum manifestius cognito vel inhibita declinent, vel permissa seclentur.*“ Adde Gratian. can. 3. §. *leges dist. 4.* Hæc ad *leges proprie dictas* pertinent. Nam constitutiones speciales, mandata, privilegia, rescripta gratiæ vel justitiæ, satis est, si innotescant ei, ad quem pertinent. c. 1. v. *nec obstar. de concessione præbend. in 6.*

§. 165. Dubium movetur aliquando de Pontificiis legibus, utrum sufficienter promulgatæ sint; respondeo:

I. Necessè non est, ut lex singulis subditis intimetur, aut singulis particularibus locis publicetur c. 1. de postul. prælat. Satis est, si *solemniter editur, aut publice promulgatur*; quæ sunt verba æquipollentia.

II. Promulgatio, quatenus ad vim legis omnino necessaria est, distinguere debet a singularibus mediis a legislatore præscriptis, ut, quantum fieri potest,

test, lex singulis proponatur, explicetur, commendetur, in memoriam revocetur. Exemplum extat c. omnis. 12. de pœnit. & remiss.

III. *Expressa fit* promulgatio per actum publicum, quo communitas in notitiam legis venire potest: *Tacita* per usum & consuetudinem, quæ vim legis habet.

IV. Promulgatio, præsentī communitati facta, censetur perdurare, & pertinet etiam ad posteros; quia communitas non moritur.

§. 166. Si lex Pontificia Romæ promulgata est, publicoque affixa loco, quæritur, utrum in provinciis & diœcesibus promulgari debeat, ut illic obliget? Auctor Principiorum Jur. Publ. Ecclesiastici catholicorum C. V. §. 49. ait: Solemnitas promulgationis Romanæ stat in eo, quod Papales constitutiones publicentur in curia, affigantur in acie campi Floræ, & ad valvas Basilicæ Apostolicæ, nec non in cancellaria Apostolica pro publicatis declarentur. Hunc promulgationis modum cit. auctor concilio politico Italicorum tribuit: *Sciunt enim*, inquit, *Itali, multis eorum bullis denegari promulgationem a Principibus & Episcopis potentioribus, quos desuper requirere parum censent honorificum.* Similiter scribit Febronius refutatus ab Antifebronio T. III. L. II. C. III.

§. 167. Respondeo: I. Non illud videndum est, quid fiat a Principibus & Episcopis potentioribus, sed utrum *jure* fiat; & utrum fideles, quibus tenor Romanæ constitutionis certo innotuit, tuta conscientia eam negligere possint hac solum de causa, quod in diœcesi omīssa sit promulgatio.

II. Diversi esse possunt actus externi, per quos Legislator suam voluntatem manifestat; hinc generalis

ralis est regula juris publici universalis: Ad legislatorem pertinet definire modum et formam promulgationis: neque is ad certam formam a subditis adstringi potest.

III. Tres causæ assignari possunt, ob quas, præter Romanam promulgationem Pontificiæ legis, diæcesana requiritur: *Primo* quia ob distantiam locorum fieri non potest, ut ex sola promulgatione Romana ad omnes fideles certa notitia legis perveniat. *Secundo* quia Summus Pontifex iustis de causis *non vult* obligari fideles, in quorum diæcesibus promulgatio non repetitur. *Tertio* quia fideles ad servandam legem obligare *non potest*, nisi Principes & Episcopi diæcesani legi Pontificiæ *consentiant*, eumque consensum sua promulgatione significant.

§. 168. Primam causam, ob quam necessaria dicitur diæcesana promulgatio, assignat auctor Princip. loc. cit. inquires: *Cum Roma, ubi conduntur Papales constitutiones, immense distet ab Ecclesiis India, Africa & America, ac Septemtrionis, ad oculum patet, promulgationem Romæ duntaxat factam, utut solemnis esset, ex ipsa natura rei & disproportione locorum haud sufficere, sed requiri, ut fiat in singulis diæcesibus, imo paræciis.* Resp. Nemo ita ineptit, ut physicum actum promulgationis Romanæ sufficere dicat ad obligationem eodem die in quavis remota regione inducendam; sed requiritur nempe lapsus temporis, intra quod Romana promulgatio exteris innotescere potest, quod facile obtinetur tum per ministros Principum & agentes Episcoporum Romæ commorantes, tum missis Apostolicis literis, ac per frequens commercium urbis & orbis. Labente eo tempore ad fideles universi orbis loqui censetur Romanus Pontifex per promulgationem

nem Romæ factam, quæ, sicuti sonus, successive in remotiora loca propagatur. Secundum leges etiam civiles Romanas provinciæ & civitates reliquæ ad ea jura, quæ in capite omnium civitatum, scilicet in regia urbe, observantur, respicere jubentur. §. 7. I. de Satisfactionibus & l. 3. §. 5. D. de sepulcro violato (*dd*). Ceterum si lex fideles etiam rudes tangit, ejus juridica promulgatio utique distingui debet ab explicatione, & commendatione legis. Illa spectatur tanquam actus legislatoris: hæc ad officium doctorum, concionatorum & parochorum pertinet.

(*dd*) *Conf. Leyser Medit. ad Pandect. Spec. VII. §. II.*

§. 169. Siquis contenderet, quod pro tertia causa promulgationis diœcesanæ propositum fuit, Pontificias leges sine consensu fidelium, aut inferiorum Præsulum vim obligandi omnino non habere; is destrueret sane Primatum jurisdictionis Pontificiæ, & subjectionem, debitamque obedientiam singulorum fidelium, quam solemnii juramento profitentur Episcopi universi orbis.

§. 170. Dici igitur potest, si lex Pontificia generalis, Romæ promulgata, in provinciis speciatim non promulgetur, subditos ab ejus observatione regulariter excusari ex præsumpta voluntate Summi Pontificis non urgentis observationem in provinciis. Hæc præsumptio fundatur in jure (§. 125.); & quia Episcopi non pro meris executoribus Pontificiarum legum, sed pro veris pastoribus, debita potestate præditis, habendi sunt, a quibus Deus de commissis a se ovibus rationem exiget. Duæ sunt hujus thesæos exceptiones:

I. Si lex Pontificia est mere declaratoria vel juris divini, vel disciplinæ antea vigentis; talis enim non eget speciali promulgatione.

II. Si in hypothefi alterius legis, dictæ præfumptioni obstat contraria & rationabilis voluntas Ecclesiastici legislatoris; quia omnis præfumptio cedit veritati certo cognitæ.

§. 171. *Vis & effectus legis promulgatæ est obligatio & jus*, quod in subditis producit, si nempe concurrant ea, quæ de jure & principio activo, de materia & communitate subjecta dicta sunt. Ea obligatio afficit conscientiam, & ad forum tam internum, quam externum pertinet, ex principiis juris divini tam naturalis, quam positivi. Nam quod lex Ecclesiastica ligat in terris, censetur ligatum in cælis; & Paulus Rom. XIII. potestatibus parendum docet non tantum *propter iram, sed etiam conscientiam*. Nam qui præfunt, *ministri sunt Dei*. Adde Prov. VIII. 15. Sap. VI. 4. I. Petr. II. 13.

§. 172. Uti lex duas continet partes, directionem & coactionem; sic utrumque operatur, & transgressorem facit reum culpæ & pænæ; unde reatus culpæ & pænæ nomen habet. Aliquando lex effectum moralem ex voluntate legislatoris per se ipsam producit sine alio actu vel ministerio hominis, aut judicis. Sic dicitur aliquando pœna ipso jure incurri sine sententia condemnatoria: dominium ipso jure transferri: donatio per mortem donantis ipso jure confirmari: obligatio ipso jure extinguí. Tanquam effectus legis spectari etiam possunt actiones judiciales, certis negotiis adcommodatæ; itemque ut res per legem præcepta, si natura
H 5 sua

sua indifferens est, fiat bona; prohibita vero mala: unde nec jurata promissio valet faciendi contra legem etiam mere positivam; fecus in eodem subjecto, & quoad eundem actum concurrerent, ex promisso quidem obligatio, adeoque & facultas faciendi id, quod promissum est, & ex lege obligatio, id non faciendi. Quæ duo non minus pugnant, quam *neceffe, & impossibile*; vel *possibile & impossibile*.

§. 173. Auctor Princip. loco supra cit. agens de promulgatione legum ait: *Distinctiones obligationis in actu primo, & secundo, per se & per accidens - - facile exploduntur.* At quod contemtores Scholasticorum explodunt, non continuo confutare possunt. Dico: Distinctio obligationis in actu primo & secundo rejici & juste explodi non potest. Lex obligat *in actu primo*, quatenus virtutem & vim completam habet, ut actiones eidem tamquam normæ conformentur: obligat *in actu secundo*, quatenus operantes legem cognoscunt, eoque statu sunt, ut legi parere possint, debeantque. Fieri potest, ut, etsi lex communitati promulgata sit, subditus aliquis eam invincibiliter ignoret; quia consensu omnium juris saltem positivi possibilis est ignorantia. Hoc casu is subditus obligatur in actu primo; quia lex completam vim obligandi habet; non obligatur in actu secundo; quia legem sine culpa ignorat. Quemadmodum enim causa naturalis & necessaria requirit applicationem, ut vim, quam habet, in actu secundo exerat: ita lex per notitiam applicari debet, ut obligationem in actu secundo producat. Aliud est, per se non obligari lege; aliud, ab ejus observatione per accidens excusari. Bestiæ non subjacent legibus ne quidem in actu primo: infantes nec in actu primo obligantur legibus humanis, quæ certæ ætati ferun-

feruntur; at ligantur legibus naturalibus & divinis, etsi per accidens deficiat libertas & intellectus: sic dormientes, amentes, furiosi obligantur in actu primo, quatenus lex ad ipsos pertinet; non item obligantur in actu secundo. Diverſa ergo hæc ſunt; lege non obligari & affici omnino, & ab ejus obſervatione excuſari in actu ſecundo.

§. 174. Quemadmodum cauſa neceſſaria & naturalis effectum mox producit, cum applicata eſt: ita lex ſtatim obligat, ac promulgata fuit, niſi ipſa met certum tempus exprimat, a quo vigere & quodammodo operari incipiat. Tempus hoc intermedium a Veteribus dictum eſt *vacatio* (ee); Ceterum de jure civili etiam antiquo lex vires obtinuit ex ea die, qua promulgata eſt l. 65. C. de decurionibus.

(ee) Sueton. in *Auguſto* c. 34, ubi agit de triennii vacatione civibus data ob legem *Juliam de maritandis ordinibus*; quam vacationem *Dio* l. LVI. pag. 66. *eleganter* vocat tempus ad præparandum datum.

§. 175. Petrus de Marca L. II. C. XV. Concord. cum aliis non nullis Doctõribus objicit Juſtiniani Novellam 66., cujus hæc eſt rubrica: *Ut factæ novæ conſtitutiones poſt inſinuationes earum, poſt duos meſes valeant.* Cum igitur ſecundum receptam regulam, ſacri Canones, ſi in contrarium nihil ſtatuant, ſequantur jus civile (ff); id ad leges etiam Eccleſiaſticas applicandum eſt. R. Rubricæ Novellarum, cum a privatis collectõribus adſutæ fuerint, vim legalem non habent; ac manifeſtum eſt ſane, a Juſtiniano illum terminum duorum meſium non pro generali regula, ſed ſingulari caſu Teſtamentorum, de quibus in ea Novella agitur, conſtitutum fuiſſe: ne ſcilicet, ſi illico a promulgatione lex valeret, multi Teſta-

Testamentis caderent, ut ait. Edita fuerat illa Novella anno 538. In Novella 116 edita an. 541. adeoque posteriore, triginta dierum terminum præfigit. In alia itidem posteriore Novella 58., quæ certe edita non est ante an. 546. trimestrem partitionis terminum statuit. Sic Bonifacius VIII. possidentibus duo beneficia curata ad alterutrum dimittendum unius mensis spatium concessit c. 32. de præb. in 6. SS. Concilium Tridentinum legem matrimonii, sub præscripta solemnitate celebrandi, ad 30. dies post factam in singulis parochiis promulgationem suspendit, Sess. 24. c. 1. de ref. matr. Nulla igitur nec in sacris, nec politicis legibus de suspendenda vi legis promulgatæ generalis extat regula; & siqua olim extitisset, ea contrario usu utriusque fori dudum fuisset abolita; vi cuius, si lex ipsa terminum non differt, ea mox vim habet, & transgressores pænæ subjicit, ut hoc quoque loco verum sit: Initium fervet.

(ff) *Conf. in Isag. §. 170. & can. 7. dist. 10.*

§. 176. Multi antiquiores decepti legibus Romanis, ad statum democraticum pertinentibus, pro inducenda obligatione legis, consensum, receptionemque subditorum requirunt. Similia scripserat Petrus de Marca cit. L. II. c. XV. & XVI. At in secunda præf. t. §. VI. sic declaravit mentem suam, *nec legibus ecclesiasticis, nec secularibus seu publicis subditos obstringi, donec tacito vel expresso consensu receptæ fuerint; ad eum vero consensum adhibendum subditos ex officio teneri juxta præscriptum juris divini, nisi leges eorum commodis aperte officiant.* Sic igitur videtur statuendum: Leges vim habent ab auctoritate & potestate legislatoris; at si nunquam in usum deducantur, aut contrarius usus publice invalescat, eam vim amittunt, non sine consensu saltem tacito legis-

legislatoris; hinc usus & observatio ad stabilitatem legis utique requiritur secundum illud apud Gratianum can. 3. dist. 4. *Leges instituuntur, cum promulgantur: firmanur, cum moribus utentium approbantur.*

§. 177. De vi & effectu legum hætenus tractatum est generatim; nunc seorsim spectandæ sunt.

I. *Leges præceptivæ sunt, quæ actum positivum præcipiunt, si sint affirmativæ: prohibent, si negativæ.* Earum effectus per se est obligatio pro utroque foro; ex obligatione autem agendi, vel omitendi recte infertur jus seu facultas moralis, itidem agendi vel omitendi; uti si pastor obligatur invigilare gregi, jus habet eundem inspiciendi, seu visitandi. *Non enim potest esse pastoris excusatio, si lupus oves comedit, & pastor nescit.* C. 10. de R. J.

§. 178. II. Ad leges præceptivas, quæ actum prohibent, accedunt *pœnales*, quæ duplicis sunt generis, aliæ *mixtæ*, quæ simul prohibent sub culpa; aliæ *pure pœnales*. Priores sunt hujus tenoris: *Non facies; & si feceris, hanc pœnam dabis*; posteriores hanc continent sententiam: *Aut non facies, aut pœnam vel mulctam solves.* Neque hoc casu legislator mulctam instar tributi spectat, vel appetit; sed ita judicat, necessarium non esse, conscientis laqueum injicere, ac solius pœnæ metu satis absterri posse subditos. Exemplum præbet Concilium Toletanum anni 1355. Cap. 1. ibi: *ne onerentur culpæ pondere ex transgressione constitutionum provincialium Christi fideles, quos divina pietas jugo suavi & oneri leviori supponere misericorditer est dignata; sacro approbante Concilio ordinamus, quod constitutiones provinciales Prædecessorum nostrorum, & quæ in futurum conden-*

condentur, nisi aliter in condendis expresse fuerit ordinatum, non ad culpam, sed ad pœnam tantum, eandem obligent transgressores (gg). Sed hæc, etsi possibilitatem legis pure pœnalis ostendant, non pertinent ad leges jure naturali, vel divino constitutas; neque ad casum, quo transgressionem legis contemptus, aut scandalum comitatur; nec demum a constitutionibus provinciæ Toletanæ ad aliarum provinciarum leges, multo etiam minus ad canones generales extendi possunt.

(gg) *Concil. Edit. Mansi. T. XXVI. col. 412. Otho card. & Episc. Augustinus ad statuta Collegii Ecclesiastici Diligani ita præfatur: „Quamquam autem volumus, hæc nostra Decreta & præcepta exactissime a nostris omnibus, alumnis observari, nolumus tamen illos eorum violatione, in ullum peccatum & Dei offensam incurrere, sed in eam, duntaxat pœnam, quæ vel ipsis legibus præscripta fuerit, vel quam Nos Rectori significaverimus.“ De lege pœnali confer dicta in Jure Nat. publico §. 257.*

§. 179. III. *Leges concessivæ & permissivæ* quoad vim & effectum multo etiam magis differunt a præceptivis affirmativis, quam pure pœnales a prohibitivis. Sed illarum non una est diversitas. Nam *primo* aliquæ leges, etsi non præcipiant, tamen ita concedunt actum, ut propositis etiam præmiis ad illum invitent, & alliciant; cujusmodi sunt consilia Evangelica. Hæ cunctis tribuunt jus, actum concessum ponendi: aliis imponunt strictam obligationem, neminem in usu juris concessi impediendi. *Secundo* aliæ simpliciter concedunt & quidem pro foro utroque e. g. jus faciendi testamentum, instituendi actionem, utendi privilegio. Atque in his inest *plena* concessio vel permissio; est enim alia permissio *minus plena* in iis legibus, quæ appellantur, *tertio* mere *permissivæ*, quæ actum tolerant,

rant; eique impunitatem dant pro foro externo, quin approbent, aut jus internum præbeant. Exemplum extat c. 2. de præscript. conf. dicta l. c. in Jur. Nat. publ. Si agitur de iis, quæ vere ac generatim concessa sunt, valet regula: *Omnibus licet, quibus non est specialiter prohibitum*; in iis autem, quæ generatim prohibita sunt: *Nunquam, aut nemini licet, nisi quando, aut cui specialiter est concessum.*

§. 180. IV. *Leges fundatæ in præsumptione non eandem semper vim habent*; nam *primo* si lex positiva quidquam prohibet, aut quoquo modo disponit ob generale incommodi, fraudis, aut perversionis periculum, cui oppositus actus subjacet; tum illa lex omnino servanda est, etsi particulari casu nihil incommodi, fraudis aut perversionis imminere videatur; quia ratio dispositionis est certitudo periculi generalis, seu præsumtio juris; quæ generatim manet; neque ea lex nititur facto quodam, conditione aut qualitate particulari. *Secundo* aliquando lex, ut vim obligationis habeat, nititur præsumptione facti particularis; qua cessante lex vim non habet: talis est lex: *Vir uxori debitum reddat: similiter Uxor viro*; quæ supponit, validum coisse matrimonium. Casus extat c. 13 de restit. spoliat. & c. 44. de sent. excom. *Tertio* Præsumtio etiam juris & de jure, quæ scilicet probationem in contrarium non admittit, non producit eum effectum, qui ex facto pendet, quod *falso* præsumitur. Sic jure antiquo, cum clandestina valerent matrimonia, copula carnalis post sponsalia de futuro præsumebatur animo maritali habita, indeque consummatum fuisse matrimonium. At si animus maritalis revera non suberat, matrimonium nullum coit. Similia exempla peti possunt ex Concilio Trident. Sess. 25 de Regul. c. 19.

c. 19. item de herede, qui inventarium non confecit, utrum creditoribus hereditariis ultra vires hereditatis teneatur, si falsa est præsumptio, de qua agitur Novella 1. c. 2. De debitore, qui spe numerandæ pecuniæ chirographum dedit, si intra biennium non agat de non numerata pecunia; utrum in foro Dei ad solvendum obstringatur: denique de eo, qui in judicio condemnatur ad solvendum, utique ex præsumptione, quod omnia secundum rei veritatem gesta sint; si de falsitate ejus præsumptionis certo constat.

§. 181. V. *Legis irritantis* hæc vis est, ut omnem vim atque effectum actus per legem irritati tollat, vel impediat; quod fit triplici modo. *Primo* si ea, quæ jure naturæ ob intrinsecam turpitudinem, aliudve vitium nulla & irrita sunt, etiam pro foro externo & authentice per leges tanquam nulla & irrita declarantur. *Secundo*, si actus, qui jure naturæ validi essent, per leges declarentur nulli *ipso jure & facto*, vel *directe* inducta inhabilitate, vel *indirecte*, præscripta forma substantiali, sine qua actus naturam suam non habet, atque irritus est. *Tertio* si quis actus *per sententiam & ministerium judicis* causa cognita rescinditur, si nempe talis naturæ sit, ut rescindi & dissolvi possit. Quovis casu lex irritans pro foro externo censenda est pariter irritans pro foro interno: neque hi effectus in lege justa sunt separabiles (§. 143.). Perspicacia tamen opus est in expendenda lege irritante, ut adpareat, quid disponat, & *quatenus* valorem actus tollat. Constat enim, plures effectus quorundam actuum proprios esse, quorum alii naturali & divino jure, alii humano iisdem attributi sunt. Unde fieri potest, ut lex irritans considerato tenore ac fine suo aliquem effectum tollat, alium salvum relinquat (*hh*).

(*hh*) *Quæ-*

(hh) Quærunt præterea, utrum actus, qui lege prohibiti, sunt, ob hanc ipsam causam irriti censi debeant. Decisiones ad hanc litem pertinentes congeffi §. 59. Jur. Nat. priv. Interpretes juris civilis vexat lex §. C. de legibus. Ibi: „Ea, quæ lege fieri prohibentur, si fuerint facta, „non solum inutilia, sed pro infectis etiam habeantur: „licet Legislator fieri prohibuerit tantum, nec specialiter „dixerit, inutile esse debere, quod factum est. „ Hæc lex a jure nostro correctæ est; certe in foro sacro locum non habet, cum Innocentius III. c. 16 de Regularib. aperte dicat: Nulla prohibentur, quæ, si facta fuerint, roboris obtinent firmitatem. Contraria quidem huic declarationi videtur regula juris 64. in 6.: Quæ contra jus fiunt, debent utique pro infectis haberi. At vocabulum juris multiplicem significatum habet, neque necessario legem prohibentem denotat, sed sensum facit, quæ contra facultatem moralem fiunt, nulla sunt, veluti sententia a judice non suo lata, aut lex de rebus sacris promulgata a politico Magistratu. Neque enim est, neque major defectus esse potest, quam potestatis & jurisdictionis.

§. 182. Manente lege ab ejus transgressione excusat, I. defectus libertatis, id est, sufficientis cognitionis & voluntatis. II. Epiikia.

§. 183. Libertati maxime obest justa & probabilis ignorantia, de qua agitur toto titulo diggestorum & codicis de juris & facti ignorantia. Multiplex in hoc genere fit distinctio, quæ sane explodi non potest. Est enim relate ad actionem ignorantia antecedens, consequens, comitans: est dein invincibilis, alia vincibilis; in quo veluti gradus insunt, ut alia censeatur simpliciter vincibilis, alia crassa & supina: alia demum affectata. Ignorantia juris vel naturalis, vel positivi: ignorantia juris clari, vel dubii; ignorantia pœnalis seu pœnæ a legibus constitutæ: denique ignorantia juris irritantis. Ignorantia etiam facti tum proprii, tum alieni allegari potest.

Zallinger L. I. Decretal.

I

Deni-

Denique spectari potest, utrum & quatenus ignorantia in foro Dei & conscientia excuset, & quatenus in foro humano; in quo illud maxime attenditur, utrum tanquam invincibilis præsumi possit, aut contra (ii).

(ii) *Notiones multiplicis ignorantiae explicatae sunt in Jur. Nat. priv. C. VI.*

§. 184. Decisiones præcipuæ de ignorantia sunt hæ:

I. *Pro foro interno* ignorantia aut error invincibilis & antecedens juris, tam divini, quam humani, a culpa excusat; quia id, quod ex tali ignorantia vel errore commissum, aut omissum est, nullo modo imputari potest.

II. *Pro Foro externo* ignorantia invincibilis juris naturalis & divini circa ea, quæ ratione utentibus vulgo nota & explorata sunt, nunquam præsumitur.

III. Pueri & puellæ infantes, id est, ante 7. ætatis annum completum non obligantur legibus humanis sub culpa; quia ex generali præsumptione ante septimum ætatis annum non censentur rationis & doli capaces; at obligantur post 7. annum, etsi non statim sub pœna saltem ordinaria c. 1. & 2. de delictis pueror. An & quatenus rationis & doli capaces sint infantes, quoad jus divinum & naturale, ex circumstantiis singularibus judicandum est.

IV. Omnis ignorantia iusta & probabilis, seu, quæ probari in foro externo potest, excusat a culpa. c. 2. h. t. in 6. Ac proinde etiam a pœna. Nam, quod *culpa caret, in damnum vocari non debet.* c. 2. X. h. t. Si præsumptionibus decidendum est, utrum
vin-

vincibilis aut invincibilis sit; ignorantia invincibilis in feminis, rusticis & militibus facilius præsumitur, quam in aliis; nec tamen in illis etiam, si facile vinci potuit. Si ignorantia obtenditur, etsi vincibilis videatur, jura favent ei, qui damnum vitare vult, dum adversarius in lucro hæret. Leyser Specim. 289. §. II. III. IV.

V. Si contra legem agitur *ex ignorantia facti*, ea in facto *proprio* non præsumitur, nisi ob diurnitatem temporis, difficultatem rei memoria tenendæ, uti fit in calculis & rationibus, ob molem negotiorum, morbum præcedentem, & istiusmodi causas probabiles. In factis *publicis* difficile est, præsumere ignorantiam invincibilem, in aliis factis *alienis* facile præsumitur.

VI. *Ignorantia juris pœnalis* seu determinatæ pœnæ legibus constitutæ non excusat eum, qui gravitatem præcepti & delicti agnovit, nisi ipsa lex prærequirat notitiam pœnæ impositæ, uti fit in censuris, aut nisi pœna sit admodum extraordinaria, & ob causas incognitas exasperata. Si lex pœnam iis tantum infligit, vel comminatur, qui eam *scienter*, *temere* aut *præsumtuoſe* violaverint, videtur excusare ignorantia simpliciter vincibilis; modo non fuerit crassa, supina aut affectata.

VII. Ignorantia juris actum directe irritantis, & personam inhabilitantis, aut ignorantia formæ substantialis a lege præscriptæ non excusat, id est, validum non reddit actum, qui contra irritationem directam aut sine forma substantiali gestus est. Exemplum præbent impedimenta dirimentia matrimonium. Similiter irregularitates etiam ab ignorantibus incurruntur. Si enim Ecclesia quempiam

ob defectum aut delictum promovere, aut ordines exercere non vult; etsi is idem ignoret, propterea jus promotionis aut exercitii non habet (kk).

(kk) *Aliquando Ecclesia jurisdictionem, cujus defectu actus per se irritus foret, supplet. concurrente errore communi, & titulo colorato, quo jurisdictio exercetur. Arg. l. Barbarius 3. D. de officio Prætorum. Sic per SS. Canones declaratur, in extrema necessitate quemlibet Sacerdotem a peccatis absolvere posse.*

§. 185. *Epiikia seu æquitate utimur, quando spectatis omnibus circumstantiis judicamus, credibile non esse, quod Legislator eo tempore obligare velit, aut considerata humana conditione possit, licet casus alias in verbis legis comprehendatur, cum in omnibus, maxime tamen in jure, æquitas spectanda sit. l. 90. D. de R. J. Ea locum habet, quando lex sine certo periculo gravis mali, aut jacturæ in vita, membris, sanitate, famæ aut fortunarum observari non potest. c. 2. de observatione jejun. Præceptum divinum affirmativum de integritate confessionis, lex naturalis de re aliena non accipienda &c. epiikiam admittit. Duæ hic sunt exceptiones:*

I. Si tali tempore transgressio legis sit intrinsece mala, scandalosa, religioni, divino honori, potestati Ecclesiasticæ injuriam & contemptum irrogans, aut officio pro tali etiam casu repugnans; uti si pastor peste laborantes destituit, miles stationem deserit. c. 5. de his, quæ vi, metusve causa.

II. Lex irritans, uti excusationem ignorantiae non admittit, ita neque ratione vis, metus, præsentis necessitatis cessat. Irritum judicatur testamentum, etsi testium numerus in casu particulari cogi non potuerit. Nullum est matrimonium clandestine con-

contractum absente vel mortuo paracho, tametsi gravis causa ad contrahendum urgeat.

§. 186. *Cessat lex humana, quoad totam communitatem* I. cessante fine legis intrinseco & adæquato; uti lex apostolica de abstinence a sanguine & suffocato: II. abrogatione & derogatione. (II). III. Relate ad unam personam, vel unum statum subditorum lex cessat dispensatione & exemptione seu privilegio contra jus.

(II) *Hæ voces desuntæ sunt a veteri statu reipublicæ Romanæ. Ulpianus fragment. L. 3. ait: Lex aut rogatur, id est, fertur: aut abrogatur, si prior tollitur: aut derogatur, si aliqua pars tollitur: aut subrogatur, si adjicitur aliquid legi: aut obrogatur, si mutatur aliquid ex priore lege. L. 102. D. de V. S. ibi: Derogatur legi, cum pars detrahitur; abrogatur legi, cum prorsus tollitur.*

§. 187. *Regulæ de abrogatione, & derogatione legis sunt hæ:*

I. Qui legem condidit, aut ejus Successor, vel Superior, minime autem inferior, eandem abrogatione totam, derogatione, quoad partem tollere aut mutare potest. Est hoc principium juris publici universalis, id est, ratione cognitum, quod jure canonico approbatur. Clem. 2. de elect. ibi: *Lex superioris per inferiorem tolli non potest.*

II. Abrogatio & derogatio legis voluntate tum expressa, tum tacita legislatoris fit, aperta scilicet revocatione, consuetudine contraria, aut contraria lege, etsi de priore nulla fiat mentio. c. 1. h. t. in 6.

III. Hinc generalis est regula: *Constitutiones tempore posteriores, potiores sunt his, quæ eas præcesserunt, l. 4. D. de constitut. Princip. licet; prior*

constitutio munita fuerit clausula, omnium posteriorum legum derogatoria, quæ aliam vim non habet, nisi ut enixam legislatoris, cum priorem constitutionem ederet, voluntatem significet. Conf. dicta §. 158.

IV. Lex tamen posterior generalis non abrogat priorem specialem, multo minus consuetudines particulares, nisi in lege posteriore generali singularis de juribus specialibus fiat mentio, aut clausula omnium anteriorum jurium, tam generalium, quam specialium derogatoria inseratur. c. 1. h. t. in 6. & l. 80. D. de R. J. ibi: *In toto jure generi per speciem derogatur, & illud potissimum habetur, quod ad speciem directum est.*

§. 188. De abrogatione ac derogatione SS. Canonum, & universæ propemodum disciplinæ mutatione frequens hodie fit mentio a temerariis, pravisque scriptoribus, qui cum toti Antichristi sint, de Spiritu tamen Christi & christianæ legis audent differere, omniaque ad præsentium temporum labem, atque instabile hominum ingenium accommodare gestiunt. Regulas ad mutationem disciplinæ pertinentes proposui C. X. Jur. Eccl. publici; quibus adde ex Concilio Lateran. IV. c. 8. de consang. & affinit. ibi: „Non debet reprehensibile judicari, si secundum varietatem temporum, statuta quandoque varientur humana, præsertim cum *urgens necessitas vel evidens utilitas id exposcit.*“ SS. Concilium Tridentinum cum impedimenta matrimonii diminueret, Sess. 24. c. 2. de ref. matr. ait: *Docet experientia, propter multitudinem prohibitionum, multoties in casibus prohibitis ignoranter contrahi matrimonia.* Sunt hæc justæ mutationis causæ. Ceterum monui cit. loc. ex SS. Augustino & Thoma, ipsam mutationem consuetu-

fuetudinis etiam, quæ adjuvat utilitate, novitate perturbare, præsertim si in suspensionem veniant fideles, opera virtutum, ritus, exercitia religionis, quibus ipsos consuetudo & exempla majorum assuefecerant, repente tanquam mala reprobari. Sæpe fit, ut mutari omnino disciplina non possit, quin multorum jura lædantur, gravioresque oriantur querelæ. Id de nova constitutione quadam a Bonifacio VIII. edita eleganter docuit Benedictus XI. Extrav. 1. de privilegiis int. comm. ibi: *Sed pro ea, quam intendebat, quiete (Bonifacius VIII.) turbatio nata est; pro concordia sunt oborta dissidia, & pullulata inquietudines pro tranquillitate nascuntur: sicque dum ansam soluisse se credidit, nodum ligasse videtur, & septem, uno hydræ amputato capite, suscitasse. Nec mirum; quia plerumque pariunt novitates discordiam, præsertim dum ab eo, quod diu æquum visum est, per novam constitutionem receditur, nec quare recedatur, utilitas evidens vel alia causa subest (mm).*

(mm) De toto hoc argumento eruditissime disseruit auctor Italus in dissertatione: *Lasciamo star le cose, come stanno; quam argutam inscriptionem sic expressit versor latinus: Nequid immovetur, seu dissertatio de mutabilitate disciplinæ Ecclesiasticæ. Aug. Vind. sumtibus fratrum Veith 1791. De mutatione legum in Novella III. locisque aliis præfertur Justinianus, quem ob fixas, & re-fixas leges jure reprehendunt Eruditi.*

189. Dictum est, quomodo lex ejusve pars cesset pro tota communitate. Relate ad unam personam, certumve statum subditorum cessat dispensatione & privilegio exemptionis contra jus. De privilegiis specialis in Jure nostro extat titulus. Dispensatio dicitur *provida juris communis relaxatio*. Inferes:

I. Dispensatio concedi potest a legislatore, ejus successore. c. 20. de Elect., aut superiore, siquem in eo genere habet. Est enim instar axiomatis in omni jure, *leges solvi non posse, nisi ea auctoritate, qua conduntur.*

II. Poscit justam causam; secus non est dispensatio, sed crudelis dissipatio, ut inquit S. Bernardus L. 3. c. 4. de consideratione, & S. Thomas 1. 2. q. 97. a. 4. Conf. Concil. Trid. Sess. 25. c. 18. de ref.

III. Ipsa facultas dispensandi censetur favorabilis; fieri enim potest, ut lex maximæ parti communitatis, cui fertur, perquam utilis sit, quibusdam tamen temporibus, aut personis valde molesta, noxia, & talis, ut expediret, eam non extare. Cum autem ejusmodi tempora & adjuncta prævideri, & in lege exprimi haud possint, necesse est, ut pro omni tempore facultas præsto sit dispensandi.

IV. At ipsa dispensatio censetur odiosa, quia est vulnus legis; idcirco non prodest, nisi illis, quibus concessa est, etsi alii pari urgeantur ratione. Cessat etiam cessante causa adæquata, si dispensatio habeat tractum successivum, velut cum dispensatur in lege jejunii; secus, si effectum habet indivisibilem, tollendo inhabilitatem, impedimentum, votum. Tunc enim valet illud: Obligatio semel extincta non reviviscit.

§. 190. Celebris hoc ævo, multorumque scriptis agitata lis est, utrum Episcopi in generalibus Ecclesiæ legibus dispensare possint. Extra casum obtentæ per Canones aut Summum Pontificem facultatis, aut legitimæ consuetudinis, ceu in rebus levioribus, frequenter occurrentibus, aut urgente forsan necessitate, ex indubitata decisione juris respon-

spondendum est, Episcopos non posse dispensare, ceu in irregularitatibus, votis solemnibus & reservatis, impedimentis dirimentibus matrimonium. Ex principiis quidem rationis, seu juris publici universalis inferior solvere non potest, quod superior ligavit. Eadem principia jure sacro agnita, approbata, & confirmata sunt. c. 15. de temp. ord. Clem. 2. de Elect. c. 16. de M. & O. id quod Innocentius III. Regest. 12. Epist. 194. hic verbis docet: *Cum illis (Episcopis) hujusmodi dispensatio minime sit permessa, quam ad solum Romanum Pontificem non est dubium pertinere (nn).*

(nn) *Totum hoc argumentum diligenter expensum est in dissertatione, quæ inscribitur: Antonii a Torre Expositio. C. II.*

§. 191. Sunt, qui facultatem dispensandi in generalibus legibus Episcopis tribuunt *in regula*; & pro *exceptione* statuunt casus, in quibus dispensatio soli Romano Pontifici expresse reservatur, eo scilicet modo, quo absolutio ab excommunicatione per canones lata, pertinet ad Episcopum, nisi Pontifex specialiter sibi eam retineat. c. 29. de sent. excom. ibi: *Quia tamen conditor canonis absolutionem sibi specialiter non retinuit, eo ipso concessisse videtur facultatem aliis relaxandi.* Resp. 1. In hoc cap. dicitur: *A suo Episcopo, vel a proprio Sacerdote poterit absolutionis beneficium obtinere.* Anne igitur ob eam causam, quod parochus, si nulla adest reservatio, ab excommunicatione per legem lata possit absolvere, idem dispensare poterit in legibus generalibus, si specialiter non prohibeatur? Resp. 2. Absolvens rite dispositum ab excommunicatione per canones lata, nec reservata nihil agit contra canones, imo secundum canones agit; c. 11. h. t.; cum

ea excommunicatio sit pœna medicinalis, & ex mente Ecclesiæ temporaria. At dispensans in lege generali in ipsam legem exercet potestatem, quod a subdito & inferiore fieri per se non potest. R. 3. Secundum dicta §. 179 confundi non oportet regulam cum exceptione, sed accurate, atque ex certis principiis distingui ea, quæ per se competunt, nisi prohibeantur; atque ea, quæ per se non competunt, nisi concedantur. Eruditissimus Gonzalez in Commentario c. 15. de temp. ordinat. Acute docet, & gravissimis auctoritatibus confirmat: *Dispensatio non est ex his, quæ competunt, si non prohibeantur; sed ex his, quæ non competunt, nisi concedantur.* Auctor citatæ Expostulationis id distincte exponit; atque exemplis illustrat cap. II. pag. 73.

§. 192. Reliquum est, ut de *legum interpretatione* agatur; quæ vel mere lexicalis & grammaticalis est, uti si quæras, quid Justinianus per *Sigla*, & *Paratilla* denotet; alia *juridica*, eaque *Authentica*, quæ fit ab ipso legislatore aut ejus successore; c. 31. de sent. excom. ibi: *Ut, unde jus prodiit, interpretatio quoque procedat.* Adde l. fin. C. de LL. Est etiam superioris, statuta inferiorum interpretari, & ad jus commune conformare. c. 11. h. t. Ad authenticam refertur *usualis*; l. 37. D. de LL. *Optima est legum interpret. consuetudo.*

§. 193. *Doctrinalis* interpretatio fit a iudicibus, & Jurisconsultis *declarando* legem obscuram, *extendendo* ad casus similes ob rationes similes, *restringendo* ob cessantem vel contrariam rationem, aliavé juris principia: unde dicitur interpretatio *comprehensiva, extensiva, restrictiva.*

§. 194. Sunt quædam generales interpretatio-
num regulæ. I. Verba communi & usitata significa-
tione

tione sumenda sunt. Sic alius est sensus in verbis: *Sit privatus fructibus ipso jure*; alius: *Privetur fructibus*. Minor 25 annis est, qui annum quintum & vigesimum non complevit, etli attigerit. II. Incivile est, nisi tota lege perspecta, una aliqua particula ejus proposita, judicare vel respondere. l. 24. D. de Legibus. Adde c. 41. de appellat. III. Ex toto igitur contextu legis eruenda est ejusdem vis & potestas; nam *leges scire non hoc est, verba earum tenere, sed vim & potestatem*. l. 17. D. de Legib.; & interpretatio nihil est aliud, quam facultas vim & potestatem legum ex earum verbis eruendi. Qui sola captat verba, *legulejus* dicitur. Qui autem quæstum facit, arbitraria applicatione legum, aut rudi praxi evertendo aliorum causas & fortunas, *rabula* nuncupatur. IV. Verba autem legum conferenda sunt cum mente seu intentione legislatoris, & ratione legis, quæ ejusdem *legis anima* dicitur; *quia non debet intentio verbis deservire, sed verba intentioni*, ut inquit Gregorius M. Can. II, XXII. q. 5. Si ratio legis, & mens legislatoris obscura est, ea investigari debet ex historia temporum, aut communibus principiis. Jus quidem civile Romanum ex rationibus tum civilibus, id est, status Romani propriis, tum naturalibus collectum dicitur §. 4. I. de J. & J. Rationes civiles sunt *Domesticæ* & particulares; rationes naturales & gentium vero sunt *Communes*. V. In omni demum interpretatione maxime vitari debet absurdum; quale est vitium, & peccatum, contrarietas legum, præjudicium singulare tertii; ipsa inutilitas legis; si nempe sic exponitur, ut finem & effectum nullum habere possit; nam ut acute scripsit auctor quidam, cum varia interpretandi enumerentur genera, nulla adhuc nominata est interpretatio *annihilativa* legis.

§. 195. Interpretationis *comprehensiva* exempla sunt: *Verbum hoc*; si quis, tam masculos, quam feminas complectitur. l. 1. D. de V. S. Liberatorum appellatione nepotes & pronepotes, ceterique, qui ex his descendunt, continentur. l. 220 ib. Adde ibid. l. 201. Similiter in correlativis, quod dicitur de sponsa duorum, intelligitur etiam de sponso duarum. Adde c. inter ceteras. 4. de rescript.

§. 196. Interpretatio *extensiva* eo fit securior, quo propius accedit ad *comprehensivam*, ut aliquando ægre discernatur, quorsum pertineat. Nam ut Felinus ait in c. super quæstionem. 27. de offic. Del. *quod venit a mente, non est extensio*. Est autem interpretatio *extensiva*, quæ ab uno casu expresso ad alium non expressum progreditur, hoc nixa principio: *Ubi eadem ratio, ibi eadem est legis dispositio*; eaque ob mentem legislatoris per totum jus dominatur; quia omnia legibus comprehendere non possunt. l. 11. D. de LL. Exempla præbent ipsi legislatores. c. 4. v. 1. Nos igitur, de confir. util. c. 2. de postul. §. unic. l. de legit. patron. tutel. l. 16. D. de sponsal. l. 32. D. ad leg. Aquil. Si eadem reperitur adæquata ratio in casibus non expressis, quæ inest in expressis, censetur is casus solius exempli causa expressus, uti contingit in casibus c. fin. de condit. appof. Hinc vulgo dicitur: *Casus, similis expresso, non censetur omissus*.

§. 197. Istiusmodi extensio recte fit in *indefinitis*, in *connexis*, in *correlativis*, in *contentis*, in *æquiparatis*; nec multum interest, utrum *comprehensivam* velis dicere interpretationem; qualis esse videtur in *indefinitis*, quæ pro generalibus accipienda sunt; ubi enim jus non distinguit, nec excipit, neque

que nos distinguere debemus, vel excipere, nisi specialis obstat ratio vel lex. Reliquorum exempla sunt hæc:

I. *De Connexis* c. 3 h. t. statuitur: *Quod de uno dicitur, necesse est, ut de altero intelligatur*; ac vulgo ajunt: Connexorum idem est judicium. Sic procurator agendo ea, quæ connexa sunt cum mandato, non excedit fines mandati; & cui unum committitur, censetur etiam committi id, sine quo illud rite obtineri non potest. Adde c. 5. de offic. deleg. & l. 2. D. de jurisd. omn. jud.

II. *De correlativis*, quæ de raptu sponsæ dicuntur, recte extenduntur ad raptum sponsi.

III. *De contentis*. Si quis cum irregulari dispensare potest ad sacerdotium; poterit enim dispensare ad ordines inferiores. Si dispensare potest in voto; poterit etiam commutare: quia in commutatione inest aliqua dispensatio.

IV. *De æquiparatis*. Pecunia, & res pecunia æstimabilis æquiparatur in tit. de Simon. Nullum eligere intra præfixum tempus, & eligere inhabilem, æquiparantur: ergo si priore casu fit devolutio; fiet etiam posteriore.

§. 198. Ab interpretatione extensiva vulgo excluduntur ea, quæ odiosa judicantur, ceu pænæ & irrationes ob reg. juris 49. in 6. *In pænis benignior est interpretatio facienda*; nisi nempe unum in altero contineatur, aut adæquata omnino insit ratio, uti fit c. 33. de elect. in 6. & l. Siquid 7. D. de jurisd. omn. jud. item l. cum mulier 49. D. soluto matr.

§. 199. Interpretatio restrictiva hoc nititur principio: *Ubi cessat ratio, cessat legis dispositio*; si nempe ratio certo explorata, & adæquata cesserit; quia

quia non omnium, quæ a majoribus constituta sunt, ratio reddi potest; & rationes eorum, quæ constituuntur, inquiri non oportet; alioquin multa ex his, quæ certa sunt, subvertuntur; l. 20. & 21. D. de LL. Cavendum, ne talis fiat restrictio, ut lex nullo casu habeat locum; aliquando enim cum isto dicendum: *Lex dura quidem, sed scripta est.* Ad hoc genus interpretationis referendæ regulæ juris in 6. ceu reg. 15. *Odia restringi, & favores convenit ampliari.* Reg. 28. *Quæ ab jure communi exorbitant, nequaquam ad consequentiam sunt trahenda.* Adde l. 141. D. de R. J. reg. 30. *In obscuris minimum est sequendum.*

§. 200. Pro interpretatione recte facienda spectari oportere materiam, de qua agitur, dubium non est; arg. c. 6. de donat. ibi: *In contractibus plena, in testamentis plenior, in beneficiis plenissima est interpretatio facienda;* & ex cit. reg. 15. in 6. *odia restringi, favores convenit ampliari.* Sed dicunt: Eadem res diverso respectu odiosa, & favorabilis est; ergo regula est inutilis. R. 1. potest etiam eadem lex e. g. de asylo Ecclesiastico, quatenus refertur ad Ecclesiam, ejusque sanctitati favet, ampliari; quatenus refertur ad impunitatem delictorum, restringi. 2. Ipsum jus sæpe utitur distinctione odii & favoris. l. 10. D. de liberis & posthumis in f. dicitur: *aliam causam esse institutionis, quæ benigne acciperetur: exheredationes autem non essent adjuvandæ.* Sic pœnas, tanquam odiosas, interpretatione legum molliendas esse potius, quam adjuvandas, docet l. 42. D. de pœn. correctionem jurium, tanquam odiosam, restringi debere, docent omnes. Ex jure sacro de eodem discrimine odii & favoris elegantissima exempla Laymannus affert in Commentario ad c. 35. de Rescriptis.

TITULUS III.

DE RESCRIPTIS.

ARGUMENTUM.

- I. Definitio, antiquus usus & abusus rescriptorum; in quibus primo spectatur materia: §. 201. II. Forma externa & interna: §. 206. III. Personæ, quæ, contra quas, pro quibus impetrant. §. 209. IV. Regulæ generales pro valore, & interpretatione: §. 212. V. Speciales pro rescriptis gratiæ & iustitiæ. §. 213. VI. Effectus rescriptorum. §. 216. VII. Executio. §. 219. VIII. Cessatio. §. 220.*

§. 201. *Rescriptum est responsum Principis scripto redditum ad alterius instantiam. Tria ergo ingrediuntur notionem. I. Est Principis responsum, nempe Summi Pontificis, a quo solo, si verborum proprietas tenenda est, in rebus Ecclesiasticis rescripta conceduntur. II. Scripto datum; unde rescripta differunt ab oraculis vivæ vocis. III. Ad alterius instantiam, seu præcedentem supplicationem pro impetranda iustitia aut gratia; unde alia sunt rescripta iustitiæ, quæ dantur ad delegationem, vel decisionem causarum: alia rescripta gratiæ, quæ ex liberalitate Principis procedunt, concedendo indulgentias, privilegia, dispensationes, absolutiones, beneficia Ecclesiastica. Clausula, motu proprio, rescriptis aliquando adjecta, non excludit omnem præviam instantiam & supplicationem; sed significat, Principem congenita potius clementia, quam petitione orantis ad faciendam gratiam fuisse permotum (a).*

- (a) *Ex his intelligitur, rescripta arte sumi hoc loco, & distinguere a variis Apostolicarum literarum generibus, in Isagoge §. 83 & seq. enumeratis.*

§. 202. Antiquissimus ac perpetuus usus rescriptorum Apostolicorum certis constat monumentis, etsi multo maxima pars temporum injuria interierit. S. Hieronymus epist. olim 110. nunc 91. ad Agerruchiam ita scribit: *Cum in chartis Ecclesiasticis juvarem Damasum Romanæ urbis Episcopum, & Orientis, Occidentisque consultationibus responderem, &c. (b).* Neque de necessitate, summaque utilitate istiusmodi rescriptorum ex Apostolicis fontibus dimanantium ullum esse dubium potest. At enim quod est bonum adeo tutum, quo non pessime abutatur humana malitia? *Sedes Apostolica* (inquit Innocentius III. c. 15. h. t.) *consuevit exhibere se petentibus liberalem: sed quidam ejus gratia nequiter abutuntur, dum, quod ipsa de benignitate concedit, ipsi ad malignitatem retorquent.* Istiusmodi querelas Summorum Pontificum leges præterea c. 16. c. 28. pr. c. 31. in parte decis. c. 43. seu fin. h. t. & maxime l. V. Decretalium de crimine falsi.

(b) Recte animadvertit P. Coustant Tom. I. epist. RR. PP. col. 603.: *Apostolicorum rescriptorum usum nec ab Hieronymi in urbem accessu, nec ab ipsius Damasi Pontificatu coepisse, aut in eo desisse, facile quisque largietur. Unde colligere est, quantæ vel Damasi, vel Decessorum vel Successorum ejus Epistolæ interierint.*

§. 203. Abusus rescriptorum fit, si falsa penitus confingantur (c): si vera depraventur: si falsis suggestionibus & dolo eliciantur, nempe per *obreptionem*, quæ fit narrando, aut exprimendo falsum; aut per *subreptionem*, quæ fit reticendo, aut supprimendo verum, quod nimirum intrinsece ad negotium pertinet, & exprimi debebat: si denique non recte intelligantur, adhibeantur, executioni dentur. Summi Pontifices editis identidem regulis diligentissime

tissime caverunt, ne cui *fraus & dolus patrocinari possit* c. 16. h. t. ac ne per *judicium injuriis aditus patere possit*, quas *juris observantia* interdicat. c. 28. h. t.

(c) *Exempla istiusmodi falsorum opus non est ex medio ævo arcessere; cum ea magno numero, nostra memoria præsto sint ex Pontificatu Benedicti XIV. Clementis XIII. & XIV. Pii item VI. gloriosissime regnantis.*

§. 204. Ut falsitas aut falsitatis indicia detegantur, rectusque rescriptorum fiat usus, spectari debet I. Materia rescripti. II. Forma interna & externa. III. Personæ, quæ impetrant. IV. Regulæ generales pro valore, rectaque interpretatione. V. Regulæ speciales pro rescriptis gratiæ, & rescriptis justitiæ. VI. Effectus. VII. Executio. VIII. Cessatio seu expiratio rescriptorum.

§. 205. I. Spectata materia, rescripta aliqua sunt præter jus, ut variæ gratiæ: vel contra jus, ceu dispensationes, exemptiones &c.: vel secundum jus, ut si jus dubium declaretur, aut judex delegetur ad causam secundum jus dirimendam. Res omnis, quæ in judicium deducitur, quæve ex officio vel gratia concedi potest, materia rescripti est. Mandata tamen Apostolica & gratiæ expectativæ multum usum perdiderunt tum ex concordatis Germaniæ, tum ex Decreto Concilii Tridentini, a Sede Apostolica approbato, Sess. XXIV. c. 19. de ref. Pro diversa maxime materia Romæ sunt diversæ Cancellariæ, in quibus expediuntur rescripta, præsertim Signatura gratiæ & Signatura justitiæ, Pœnitentiaria, Dataria, Secretaria Brevium &c.; de quibus agit Em. Card. de Luca Relat. Cur. Rom. Ad materiam rescripti referendæ sunt hæc decisiones:

I. Si in rescripto committitur, aut mandatur aliquid insolitum, nimis durum, alienum a recta ratione, cujus executio offendiculo esset publice, aut si prohibetur cognitio causæ (c. 2. h. t.); fit suspectum de falsitate, aut penitus nullum c. 5. h. t. c. 6. de præb. Nov. 134. c. 6. II. Vitiatur rescriptum, si fit in præjudicium tertii, vel derogans juri alieno, nec faciat expressam de iis mentionem c. 15. juncta glossa v. *intentionis*. de offic. Delegati.

§. 206. II. *Forma externa* differunt *Bullæ*, seu literæ latius extensæ cum sigillo plumbeo: & *Brevia Apostolica*, seu compendiosa, paucisque verbis expedita rescripta sub annulo Piscatoris, subscripta a Secretario Brevium. Ad formam pertinet stilus Curiaæ alias consuetus in salutatione, filo, charta, sigillo &c.; de quibus agitur ad tit. de crimine falsi, aut de fide instrument.

§. 207. *Forma interna* sita est in tribus partibus rescripti; narratione, supplicatione, & conclusione. *Narratio* facta a *supplicante*, est propositio eorum, ob quæ quis nititur impetrare rescriptum: facta a *rescribente* est vel summaria repetitio narrationis a supplicante positæ, vel nova expressio rerum, quas rescribens commemorat. *Supplicatio* est, qua preces ab oratore oblatae repetuntur. *Conclusio*, seu *dispositiva* est pars præcipua rescripti, in qua mens rescribentis cum debitis clausulis exprimitur. Præcipuæ sunt: I. *Si preces veritate nitantur: si ita est.* II. *Motu proprio.* III. *De plenitudine potestatis.* IV. *Ex certa scientia.* V. *Non obstantibus* &c. Has clausulas singulari tractatu collegit, & explicavit Barbosa.

§. 208. Decisiones, ad formam rescriptorum pertinentes, sunt hæ: I. Ex forma, stilo curiaæ contraria,

ria, colligenda est falsitas rescriptorum c. 5. & 6. de crimine falsi. II. Suspectum, aut nullum sit rescriptum, si lituram aut rasuram continet in parte substantiali. c. 6. de fid. instrument. III. Item si aperte peccet graviter in latinitatem c. 11. h. t. IV. Quæ in narratione rescripti commemorantur, tantæ auctoritatis esse nolunt ipsi Pontifices, ut vel in favorem, vel præjudicium cujusquam allegari queant, uti si Papa aliquam Ecclesiam vocet exemptam, non propterea illius Ecclesiæ exemptio probata est. c. 10. de privil. in 6., nisi Papa loquatur ex certa scientia, aut de facto proprio testetur, atque in his gratiam vel intentionem fundet. Clem. unic. de prob.; tunc enim verbis literarum plenaria adhibenda est fides.

§. 209. III. De personis, quæ rescriptum impetrare possunt, generalis est regula: Quilibet impetrare potest non prohibitus, a jure nempe, vel ipso Papa; nam inferior prohibere non potest, quin reverentiam erga sanctam Sedem abjiciat, & manifestam fidelibus inferat injuriam, quibus communicandi cum Cathedra Petri, gratiasque Apostolicas percipiendi jus & facultas competit. Prohibentur autem sequentes. I. Rescriptum justitiæ impetrare non possunt falsi, vel jam revocati procuratores. c. 28. §. 1. & c. 33. h. t. II. Simpliciter prohibentur heretici. l. 2. c. de Sum. Trinit. In foro seculari id intelligitur de non toleratis. III. Prohibentur excommunicati excommunicatione majore c. 26. X. & c. 1. in 6. h. t., etiamsi sint occulti tantum, & non vitandi, nisi impetretur rescriptum super ipsa causa excommunicationis, vel Papa excommunicationis conscius rescripserit. Hinc ad cautelam ab excommunicatione absolvi solent, qui aliquam gratiam vel privilegium obtinent, quod stante excommunicatione

K 2

acqui-

acquiri non potest. Valet autem hæc absolutio ad solum actum in rescripto expressum. IV. Non valet rescriptum impetratum ad beneficium, si in eo tacetur dignitas impetrantis. c. 8. h. t. (d).

(d) *Huc referendum videtur c. 4. de crimine falsi, de eo, qui est apud Sedem Apostolicam; a quo recipere possit litteras Apostolicas.*

§. 210. Potest quis rescriptum gratiæ impetrare non pro se tantum, sed & pro alio (l. 6. C. de prec. imp. offer.), cujus dein sufficit ratihabitio; secus est de rescripto justitiæ, quod impetrari absque mandato pro alio non potest, nisi id fiat a personis conjunctis, & de rato caventibus. l. 24. C. de procurat. & c. 33. h. t.

§. 211. Impetrari rescriptum potest contra quemcunque, modo sit subiectus jurisdictioni concedentis; quod per se manifestum est. Decisiones speciales sunt. I. Si rescriptum habeat clausulam: *Et quidam alii, item res aliæ*; vi illius rescripti conveniri non possunt, ultra tres vel quatuor, quorum nomina in primo citatorio exprimenda sunt, ne variationi sit locus. c. 2. h. t. in 6. Nec conveniri possunt personæ digniores, neque agi potest circa negotia expressis graviora. c. 15. h. t. II. Abbates per rescriptum conveniri possunt in causa conventus, in quo nulla fit mentio de conventu; *cum ex officio suo teneantur congregationum suarum negotia procurare: nisi forte abbatis & conventus negotia essent omnino discreta.* c. 21. h. t. III. Cistercienses vi privilegii conveniri non possunt per rescriptum Papæ, nisi in eo mentio fiat Ordinis Cisterciensis. c. 6. h. t. IV. Si conveniendus ex rescripto moritur, cum nondum fuit *ad judicium evocatus*,
contra

contra ejus successorem ex eodem rescripto agi non potest c. 36. h. t. Inferes a contrario sensu, contra successorem agi posse, si defunctus fuit citatus, ac multo etiam magis, si cum illo lis fuit contestata.

§. 212. IV. *Regulæ generales de valore & interpretatione* rescriptorum sunt hæc potissimum. I. In omnibus rescriptis intelligenda est hæc conditio, etiam si non apponatur: Si preces veritate nitantur. c. 2. h. t. vel conditio: Si ita esset. c. 25. h. t. II. Interest, an rescriptum ipso jure nullum sit, an per exceptionem elidi possit. Si rescriptum justitiæ, quo datur judex delegatus, ipso jure nullum sit, acta judicis delegati invalida sunt, etsi nihil opponatur; si vero tantum irritari potest, valent acta, quamdiu pars non excipit. III. Si expressio falsi, vel suppressio veri fit per dolum & malitiam, ipso jure nullum est rescriptum quodcumque; & quidem vitiata una parte rescripti per dolum, totum vitiatur. Justum est enim, ut dolosi oratores nullum ex illis literis commodum consequantur, c. 20. h. t.; & mendax precator careat penitus impetratis. c. 15. h. t. IV. Pari- ter nullum est rescriptum ipso jure, si expressio falsi aut suppressio veri est causa finalis rescripti, vel impulsiva talis, ut ea cognita Pontifex fuisset negaturus rescriptum, e. g. si dispensetur ad alterum beneficium ob defectum congruæ sustentationis, quæ tamen habetur abundans. c. 20. h. t. De rescriptis gratiæ, etsi obreptio vel subreptio non dolo contigerit, sed per ignorantiam, vel simplicitatem, tenent omnes, tali casu nulla esse ipso jure; si nempe remota obreptione aut subreptione Pontifex nullum dedisset rescriptum: at c. 20. aperte idem asserit etiam de rescriptis justitiæ. V. Si reticetur solum qualitas quædam extrinseca, atque ad finem rescripti ma-

terialiter se habens, ob id rescriptum non fit nullum ipso jure, etsi Pontifex re bene cognita illud non concessisset, e. g. si beneficium impetrat gravis criminis reus; quo tamen non fit inhabilis ipso jure.

§. 213. V. Speciales regulæ interpretandi *rescripta gratiæ*, eorumque vim & valorem definiendi continentur his decisionibus. I. Rescripta ad beneficia sunt strictæ interpretationis, utpote ambitiosa. de præb. in 6. Si tamen literæ beneficiales sint concessæ vel motu proprio, vel in compensationem damni, forte occasione Ecclesiæ tolerati, majorem merentur favorem; quia suspicio ambitionis cessat. II. Etiam dispensationes, tanquam vulnera legis, sunt strictæ interpretationis c. 28. de R. J. in 6. & l. 141. D. eod.; facultas tamen dispensandi late interpretanda est (§. 189. n. III.): cum ea nec juri communi, nec privatorum præjudicet. III. Non valet rescriptum ad beneficium, de beneficio, vel dignitate impetrantis non faciens mentionem c. 17. & c. 8., imo de beneficio, quod jam habet impetrans rescriptum, mentio fieri debet, etsi quod habet, non sit competens c. 42., etsi ipsum non habeat beneficium, sed tantum jus ad illud c. 32. Si rescripto ad beneficium propter annuam pensionem renuntiavit, non valent literæ beneficiales, per eum hoc tacito impetratæ, c. 31. Non valent literæ justitiæ (e), quas impetrat habens perpetuam vicariam, vel sufficiens patrimonium; nec literæ gratiæ ad obtinendum beneficium, in quibus impetrans tacuit perpetuam vicariam. Si impetrans ignoret tempore supplicationis sibi collatum esse beneficium, valet quidem rescriptum ad beneficium non faciens de collato mentionem; *utrumque tamen, si talia sint beneficia,*
quæ

quæ simul nequeant de jure teneri, habere non potes: sed eligas, quod ex eis malueris retinere. c. 7. in 6. IV. In rescripto ad beneficium intelligitur, si dignus existat, vel si non obstet canonicum impedimentum. c. 17. V. Non valet impetratio in Ecclesia numerata, non facta de numero mentione, si per eam frangitur numerus canonicorum, etsi non frangatur numerus præbendarum. c. 19. VI. Vacatio per mortem, & vacatio per renuntiationem sunt diversa; & ideo in literis ad beneficium impetratis, uno expresso non venit alterum. c. 6. in 6. VII. Literæ super conferendo beneficio vacaturo directæ ad beneficium, post datam ipsarum creatum, non extenduntur. Clem. ult. VIII. Gratia, ut de dignitate aut beneficio curato alicui provideatur, renuntiare videtur, qui ante adeptionem ejusdem aliud beneficium pacifice assequitur, quod simul de jure cum dignitate vel beneficio, virtute dictæ gratiæ ipsi debito, retinere non posset, licet illud resignaverit, aut sit resignare paratus. Clem. 4. quia nempe ad renuntiata non datur regressus. IX. Gratia generalis, facta e.g. Episcopo, percipiendi fructus beneficiorum primi anni ad persolvenda debita, non præjudicat juri speciali, vi cujus tales fructus fabricæ Ecclesiæ vel alteri usui aut personæ singulari de speciali consuetudine, privilegio vel statuto forsitan debentur; nisi in gratia generali expresse de his caveatur.

(e) *Literæ beneficiales justitiæ appellantur, per quas necessitatibus pauperum clericorum providetur secundum formam communem: Cum secundum Apostolum. c. 16. de præbend.*

§. 214. Singularem mentionem huic loco propriam meretur, c. 8. h. t. in 6. cujus hæc est senten-

tia : Titius a Pontifice obtinuerat gratiam de beneficio proxime vacaturo in Ecclesia A. Mox idem Pontifex, vel ejus Succëssor hanc gratiam revocat. Dein similem gratiam pro eadem Ecclesia confert Cajo. Postea Titius restitutionem gratiæ revocatæ impetrat a Sede Apostolica. Vacante nunc in illa Ecclesia beneficio dubitatur, Titiusne, an Cajus in ejus afsecutione esset præferendus. Pontifex decedit, præferendum esse Cajum; *cum talis restitutio, ubi aliud non exprimitur, intelligatur fieri sine juris præjudicio alieni (f).*

(f) *Conf. Laymann in comment. ad hoc cap. Similis circulus occurrit, cum quæritur, an uxor vel vidua pro sua dote creditoribus anteriorem hypothecam habentibus sit præferenda: item an legitimatus per subsequens matrimonium in primogenitura sit præferendus ex intermedio matrimonio legitime nato.*

§. 225. *Speciales regulæ de interpretatione & vi rescriptorum justitiæ* his maxime comprehenduntur juris decisionibus. I. Si mens rescribentis dubia manet, rescripta justitiæ explicari debent secundum jus commun. c. 18. Exemplum talis explicationis extat c. 4.

II. Rescripta justitiæ, quæ jurisdictioni Ordinarii derogant, censentur odiosa, & stricte sumenda sunt. c. 32. de offic. Deleg. & c. 40. eod. III. Non valent rescripta justitiæ, per quæ incerti dantur judices, quos impetrans elegerit, vel per quæ futura negotia committuntur. c. 10. & c. fin. IV. Si super eodem negotio contra eundem duo rescripta impetrentur, quorum posterius non facit mentionem prioris, valet primum, non secundum; alias, si in posteriore sit mentio prioris, valet posterius: si
primum

primum fuit impetratum communi consensu partium, non valet secundum impetratum per alteram partem hoc tacito. c. 3. Valet secundum rescriptum impetratum ab adversario, etsi non faciat mentionem de primo, si primus impetrans dolo vel negligentia eo usus non est intra annum. c. 9. & c. 23. Posteriores etiam literæ *speciales* derogant prioribus generalibus in iis, quæ in prioribus non sunt specialiter expressa, etsi nullam de prioribus faciant mentionem. c. 14. v. *quoniam*.

V. Literas impetrans post appellationem, ejus mentionem facere debet. c. 12. h. t. & c. 44. in fin. de appellat. VI. Non valent literæ ab auctore contra reum impetratæ ad diversos judices super pluribus causis personalibus, nec processus earum, sed reo condemnatur in expensis. Dein reus quoque, si eodem durante judicio auctorem sibi obnoxium duxerit reconvencionis beneficio vel convencionis (si contra eum literas impetrare maluerit), de jure suo debet apud eosdem judices experiri: nisi eos ut suspectos poterit recusare. c. 3. in 6. & c. fin. X. VII. Statuimus, inquit Innocentius III., nequis ultra duas dietas extra suam diocesim per literas Apostolicas ad judicium trahi possit, nisi de assensu partium fuerint impetratæ, vel expressam de hac constitutione fecerint mentionem. c. 28. sed adde c. 11. §. 1. & 2. in 6. VIII. Siquis privilegium appellandi, quod est secundum jus, obtinuit, is appellare non potest pro casu, quo contra ipsum datur judex delegatus remota appellatione; quia speciale mandatum derogat generali.

§. 216. VI. *Effectus rescriptorum* pendet a valore concessionis, de quo hactenus dictum est. Instat generalis regulæ sumi debet: *Rescripta faciunt*

ius tantum particulare, nisi 1. sint declaratio juris ante existentis: vel 2. inferantur codici legum: aut 3. pro norma generali ad futura similia negotia definienda dentur a concedente (g).

(g) *Ratio hujus regulæ est, quia jura non in singulas personas, sed generaliter constituuntur. l. 8. D. de LL. adde l. 2. C. eod. Nempe id, quod in particulari negotio decidit, aut statuit Legislator, cadit in factum præteritum, Et a singularibus pendet circumstantiis. Exceptio continetur l. 3. C. de Leg. l. 2. C. de nov. cod. fac. Et const. II. §. 3. de Justiniano codice confirmando. Videntur tamen in codicibus legum quedam inesse mere locales definitiones, ceu c. 1. de loc. Et cond. c. 9. de for. compet. l. 1. D. de censib.*

§. 217. *De tempore, quo effectum operantur rescripta, prænotandum: Ipsæ supplicationes primum signantur in materia gratiæ per verbum fiat, vel concessum; in materia justitiæ per placet (h). Ex hoc tamen gratiæ sunt adhuc informes, donec in forma legitima expédiantur, juxta quas deinde erit judicandum. Si Papa post supplicationem signatam, sed ante expeditas literas moriatur, conceditur a Successore gratia illa sub forma: Rationi congruit. Reg. Cancell.,*

(h) *Vid. Card. de Luca Relat. Cur. Rom. disc. 9. n. 36.*

§. 218. Hoc prænotato dicendum; I. rescripta gratiæ effectum suum operantur a die datæ, si gratia jam facta, e. g. beneficium actu collatum est. Si autem gratia sit facienda; uti si dispensatio non sit Romæ, sed committitur facienda in partibus, rescripta effectum obtinent, non a die, quo expedita sunt, sed a tempore executionis. In rescriptis justitiæ, si e. g. lis intra certum tempus decidenda dicitur,

citur, tempus currit a *die præsentatæ*. c. 12. & 59. de appellat. II. Si plures sint, qui impetrent literas beneficiales in eadem Ecclesia, statur *datæ*. Sic vulgo explicatur c. 30.; additur tamen c. 12. in 6. limitatio pro eo, qui prior impetravit: *Dum tamen dolus tibi non possit, vel notabilis negligentia imputari*. III. Si tali in *gratia sint æquales, is, qui prior præsentaverit, erit potior in præbenda*. c. 14. in 6. IV. Si primus sub conditione impetravit, alter pure ante eventum conditionis, præfertur secundus. c. 13. in 6. V. Quia in literis ad beneficium datis inspicitur tempus *datæ*, per illas beneficium curatum obtinere non potest, qui tempore *datæ* non habuit sufficientem ætatem, etsi nunc habeat. c. 9. in 6. Aliud est, si impetranti defuit ordo ad beneficium requisitus. c. 8. de præb. in 6.

§. 219. VII. *Executio rescriptorum* Sedis Apostolicæ, ejusve Legatorum, si causæ cognitionem, & jurisdictionem in foro externo requirit, a quo fieri possit jure communi, deciditur c. 11. pr. v. *Sancimus* in 6. & Clem. 2. h. t. uti dicitur ad tit. de offic. Deleg., quocum titulo multa communia & connexa habet præsens. Dein de executione dicendum; I. Executori stricte inhærendum est verbis & clausulis rescripti, a quibus tota istius vis, & executoris potestas pendet. II. Sententia, ex literis falsis lata, non est danda executioni. c. 2. de crim. falsi.

III. Siquis contra statuta Concilii generalis (c. 48. de sent. excom.) se asserat excommunicatum, atque ob id excommunicatori dirigatur rescriptum, ut eum absolvat, datis executoribus, qui eo non parente exequantur; causæ cognitio non excommunicatori, sed executoribus censetur demandata. c. 41. h. t.

§. 220. VIII. *Rescripta expirant*, I. *revocatione*. Illustre exemplum extat c. fin. h. t. in 6. de indulgentia non residentibus concessa percipiendi fructus beneficiorum, quam, ait Pontifex, se nunquam in posterum daturum, *quodque Nobis licere non patimur, Nostris successoribus indicamus*. II. *Morte concedentis* expirant rescripta iustitiæ re integra, id est, ne citatione quidem facta a iudice delegato. c. 28. & 30. de offic. Deleg.; quia nempe mandatum morte mandantis re integra finitur. §. 10. I. de mand. & l. 15. C. eod. Similiter expirant gratiæ faciendæ in favorem certæ personæ. Secus, si cui potestas sit generaliter concessa providendi e. g. de beneficio in favorem ipsius providentis, vel Ecclesiæ: tunc enim gratia non expirat etiam re integra c. 36. de præb. in 6.; quia nempe *decet concessum a Principe beneficium esse mansurum* c. 16. de R. J. in 6. (i). III. Si Papa per rescriptum gratiæ promotus ad Episcopatum, concedit retentionem beneficiorum, quæ antea canonice obtinuit, usque *ad beneplacitum suum*, ea gratia cum Papa expirat: secus, si concedit usque *ad beneplacitum Sedis Apostolicæ* (quæ non moritur), aut sub hac forma: *Donec revocavero, vel aliud ordinavero*. IV. Rescripta expirant morte ejus, cui *executio nominatim committitur*; nec ad ejus successorem transeunt, nisi censeantur commissa dignitati, quæ non moritur. V. *Morte ejus, contra quem nominatim rescriptum iustitiæ est impetratum*, si res adhuc integra sit, ita, ut contra ejus heredem ex eodem agi non possit (§. 211. n. IV.); Gonzalez & Laymann in c. 36 h. t. ubi docet, Prælatum successorem conveniri posse per rescriptum, vivente antecessore impetratum; quia non per se convenitur, sed ratione Ecclesiæ aut dignitatis, quæ itidem non moritur. VI. *Morte ejus, cui concessa est gratia e. g. retinendi*

nendi fructus, corrui ipsa gratia, si nempo tempore datæ jam obierat. l. 191 D. de R. J. Idem contingit *renuntiatione* gratiæ sibi factæ etiam tacita. Clem. 4. h. t.

(i) *Ne per mortem Pontificis plurima rescripta gratiæ & justitiæ faciendæ expirent, per regulas recentiores Cancellariæ revalidantur a novo Pontifice ea, quæ infra annum ante diem obitus a Prædecessore data sunt (Reg. Cancell. 12). Sede tamen Papali vacante viribus carent.*

TITULUS IV.

DE CONSUETUDINE.

ARGUMENTUM.

I. Definitio, & divisio consuetudinis, in qua spectatur primo materia. §. 221. II. Ut sit rationabilis. §. 223. III. Forma, seu actus populi. §. 227. IV. Consensus Legislatoris. §. 230. V. Auctoritas consuetudinis & probatio. 231. VI. Speciatim de consuetudine contra legem §. 233. præter legem §. 237. secundum legem §. 238. VII. Abrogatio consuetudinis §. 239.

§. 221. Consuetudo est jus, suppositis diuturnis populi moribus aliquo consensu legislatoris introductum. Nota: I. *jus* sumitur primo pro obligatione agendi, quam efficit consuetudo, perinde ut lex; atque hæc est consuetudo *præter legem*, quæ obligationem inducit, ubi lex expresse promulgata non existit: *secundo* pro facultate seu libertate agendi; quæ est consuetudo *contra legem*, & lege priore abrogata libertatem agendi restituit: *tertio* nominatur consuetudo *secundum legem*, quæ obligationem aut facultatem lege concessam tum confirmat nova addita vi, tum etiam declarat. II. Consuetudo continet
jus,

jur, & *factum*, seu mores populi, id est, actus frequentes, publicos, uniformes, quodammodo inveteratos. III. Quemadmodum in lege spectatur *materia*, circa quam versatur, nempe actus, quos attingit; & *forma*, seu promulgatio: sic in consuetudine in primis considerari debet *materia*, seu qualitas actuum, ad quos obligat, aut libertatem dat: tum *forma*, seu mores populi, & consensus legislatoris, ex quibus obligatio aut libertas agendi resultat (a).

(a) In *Isagoge* §. 37. exposui, quomodo a traditione differat consuetudo. Exemplum attuli in *Chronographia* §. 122.

§. 222. De materia & forma consuetudinis dicendum est primo generatim: tum seorsum de consuetudine contra, præter, secundum legem. Spectata materia omnis consuetudo debet esse *rationabilis*, uti lex (b); hinc passim dicunt, quod lege introduci non potest: id nec consuetudine. Addunt: Satis est, ut consuetudo rationabilis sit *negative*; etsi positiva & specialis ratio non appareat. Semper enim præsto est ratio *generalis*, ut populus receptis moribus vivere & libertate sua uti permittatur. Consuetudini rationabili opponitur *corruptela*, quæ est assuefactio ad res malas vel per se, vel decisione & iudicio legum.

(b) *L. 2. C. quæ sit longa consuetudo. c. 4. ibi*: „Ad excusandas excusationes in peccatis. solam consuetudinem prætendentes; cum diuturnitas temporis peccata non minuat, sed augmentet, quæ tanto graviora existunt, quanto infelicem animam diutius detinent alligatam.“ Pariter *c. fin. requiritur*, ut consuetudo sit rationabilis, & legitime præscripta; quæ verba ad materiam ejusdem, & formam referenda sunt.

§. 223. Plurima extant exempla consuetudinum, quæ rationabiles non sunt, & a jure tolluntur, damnantur & reprobantur tanquam corruptelæ, atque etiam in posterum prohibentur; cujusmodi sunt:

I. Quæ repugnant naturali & divino juri, reverentiæ Ecclesiarum & sacrarum legum, salutis & spirituali utilitati populorum, ritibus a Christo vel Apostolis institutis. Suprema enim lex est Dei honor & sempiterna hominum salus. Hinc reprobatur consuetudo accipiendi pretium pro ministerio spirituali c. 9. de Simonia; dissolvendi matrimonium ratum c. fin. de spons. duor.; provocandi ad duellum; exhibendi spectacula ludicra in templis c. 12. de vit. & honest. cleric.; nec ea in re tolerantia Ecclesiæ excusat, quam tristis aliquando extorquet necessitas. can. fin. §. 1. dist. 4.

§. 224. II. Reprobantur consuetudines, quæ honestati morum, & ædificationi populorum obsunt, quæ peccati periculum, & concupiscentiam foveant; nam *bona est lex, quæ, dum hoc prohibet, omnia mala prohibet.* c. 6. de constit. Talis est consuetudo provocandi ad æquales haustus. Recess. Imp. a. 1500. art. 28 & a. 1530. a. 8.; consuetudo tanquam de radice ambitionis procedens, ut quis in eadem Ecclesia plures habeat dignitates c. 1. h. d. in 6.; ut vir dissipatis bonis suis uxoris bona pro libitu alienet, aut uxor adultera medietatem bonorum, quæ vir fuerit adeptus, sibi vindicet. c. 10.; ut judices aut officiales provinciam circumcuntes nova onera imponant hominibus, aut prælati novis censibus Ecclesias gravent, vel antiquos augeant. Nov. 134. c. 1. & c. 7. de cens.: hæc enim ex avaritiæ gurgite proveniunt.

§. 225.

§. 225. III. Reprobantur consuetudines, quæ obsunt libertati & immunitati Ecclesiasticæ, ut si laicus ferat sententiam in causis Ecclesiasticis. c. 3. vel propria auctoritate contributiones imponat clericis. c. 4. de cens. in 6. Tolluntur generatim consuetudines, quæ Ecclesiis gravamen inferunt. c. 1.

§. 226. IV. Reprobantur consuetudines, quæ disciplinam Ecclesiasticam relaxant, correctionem morum impediunt, hierarchiam turbant, ordinem judicarium pervertunt. Istiusmodi est consuetudo, ut tempore generalis interdicti in loco exempto publice divina officia celebrentur c. 5.; ut Clerici beneficia sine consensu Episcopi recipiant, c. 3. de inst. aut dignitatem sine consensu superioris dimittant c. 7.; ut Clericus exerceat ea, quæ sunt ordinis Episcopalis, c. 4.; ut a vicario Episcopi ad Episcopum appelletur, c. 2. in 6.; ut actor, qui testibus, vel instrumentis plene probavit, præterea jurare cogatur, c. 2. de prob.; ut distributiones quotidianæ etiam absentibus dentur, c. un. de Cleric. non residentibus in 6.; ut non recipiantur Legati Sedis Apostolicæ, nisi mittantur de beneplacito eorum, qui recipiunt, aut petiti fuerint, Extrav. Un. h. t. int. com.; ne prælati Ecclesiarum excessus subditorum, maxime Clericorum, libere corrigant, & reforment, c. 13. de offic. jud. ord. (c).

(c) *Ad classẽ consuetudinum irrationabilium aliqui revocant eas, quæ derisorie dicuntur, quæque nullam afferunt utilitatem, homines tamen molestia afficiunt, qualem putant, vi cujus studiosi ad academiam adventantes variis ritibus initiantur; conf. I. const. Justiniani Digestis præfixa: omnem reipublicæ. §. 9.*

§. 227. *Forma consuetudinis exprimitur verbis c. fin., legitime præscripta, ut nempe condiciones habeat*

beat legibus præscriptas, sive ut I. vigeat in communitate perfecta, & ab illa vel maiore ejus parte sit inducenda, sitque instar legis, l. 32. §. 1. l. 33. l. 35. D. de Leg. l. 3. C. quæ sit long. conf. In privatos & communitatem imperfectam non cadit lex proprie dicta, sed præscriptio, quæ aliquam affinitatem habet cum consuetudine, ut in casu c. 8; non requiritur tamen, ut totum regnum, vel totam diœcesin afficiat; quia datur consuetudo tum *universalis*, tum *particularis*, velut circa decimas.

§. 228. II. Actus, quibus inducitur consuetudo, esse oportet *uniformes*, saltem non contrarios; III. *diuturnos & longævus*; hinc dicitur *inveterata*, l. 32. §. 1. D. de Leg. *longæva*, l. 2. C. quæ sit long. conf. c. 9. & ult. h. t. *perpetua* l. 6 pr. D. quod cujusque univ. nom. *vetustissima*, l. ult. pr. c. de privil. Scholar. *diuturna* §. 9. I. de J. N. G. & C. Spatium autem temporis jura non determinant. Si per consuetudinem læditur jus proprietatis alterius, ceu per consuetudinem non solvendi decimas, minus tempus non sufficiet, quam ad præscriptionem proprie talem requiritur; c. 18. & 20. de Decimis. Nulla autem suppetit ratio id extendendi ad omnem consuetudinem; neque id requiritur ad mores populi, ejusque voluntatem cognoscendam, quam legislator per consensum saltem legalem approbat, ratamque habet.

§. 229. IV. Iidem actus esse debent *frequentes*, pro data nempe occasione; idque poscit ipsa uniformitas ac diuturnitas: secus *mores* aut *usus* populi dici non possunt. Unus alterve actus habens tractum successivum e. g. constructio pontis in loco prohibito, sufficere potest ad acquirendam possessionem juris, &

complendam demum præscriptionem, non autem ad consuetudinem inducendam. V. *Publici item, notorii & liberi*. Nam quod latenter, aut per vim, aut alias illicite introductum est, nulla debet stabilitate subsistere. c. 5. de R. J. Si populus per multos annos observaret aliquod festum vel jejunium ex errore, id esse præceptum, non induceret obligationem. In consuetudine tamen contra legem intercedere posse errorem, infra dicam.

§. 230. VI. Consensus legislatoris (quisquis sit pro diversa ratione status) *tacitus* appellatur, si is habeat notitiam actuum, nec contradicat, cum facile posset: *expressus*, si claris signis consuetudinem approbat, ferendo sententiam secundum illam: *legalis* & *generalis*, qui præstatur per legem, vel jus ipsum, in quo legislatores omnes consuetudines rationabiles & legitime præscriptas volunt esse firmas & legis vim habere. c. ult. h. t. l. 1. & 2. C. quæ sit long. conf. l. 32. seq. D. de Leg. Ab hoc consensu legislatoris tota vis & auctoritas consuetudinis pendet tum civilis, tum Canonice, ita, ut frequentati actus materiam duntaxat, & occasionem dent jus aliquod inducendi (d).

(d) L. 32. D. de Leg. vis consuetudinis repetitur a tacito populi consensu; sed recte observat Stryckius de Us. mod. Pand. tit. de Legibus. §. XI Tribonianum minus caute reliquias status democratici Juri Justiniano inseruisse. Auctores quidam ad consuetudinem Canonicam negant sufficere legalem Pontificis consensum, sed singularem poscunt, quo, habita notitia actuum, consuetudo approbetur. Sed contra est 1. ratio approbandi consuetudinem rationabilem & legitime præscriptam eadem est, sive particularem notitiam habeat Princeps, sive non habeat. 2. Romanus Pontifex c. 1. de Const. in 6. manifeste supponit, dari consuetudines particulares locorum, quas ignoret, atque una

una declarat, se nolle illis per generales constitutiones posteriores derogare. Qui ab iis auctoribus allegantur contrarii canones, pertinent ad consuetudines a Romanis Pontificibus & Conciliis reprobatus. Decisiones Rotæ Romanæ, ad quas provocant, non adstringunt alia tribuna- lia, nec fundamentum præbent argumenti universalis; quia versantur circa causas particulares.

§. 231. Vis & auctoritas consuetudinis ex ipsis legibus dimanat, ut ex dictis intelligitur. c. 9 h. t. ratio est, quia populus tenacius inhærere solet propriis moribus, quam alienis legibus; & quia discordiam pariunt novitates. cit. c. 9. Sane in omni communi- tate multis legibus scriptis priores sunt consuetudi- nes; ac ex ipso populi usu constat, quid bonum sin- gulorum poscat, quod a communi segregari per se non debet. Quantum in primitiva Ecclesia & con- suetudo & traditio valuerit, patet ex can. 5. & 7. dist. 11. Hinc iudices & præsides provinciarum eam, causa co- gnita, sequi tenentur l. 1. C. quæ sit long. conf. secus pars contra consuetudinem quamdam gravata iuste appellat. c. 3. de eo, qui mittitur in poss. adde. pr. Inst. de officio iudicis.

§. 232. Consuetudo autem in iudicio allegata probari debet, si satis notoria non sit; quia involvit aliquid facti, c. 1. de const. in 6. & quia facta non præsumuntur (e). Probatur autem per testes saltem duos omni exceptione majores, vel per actus judi- ciales, siqui haberi possint. l. 34. D. de Leg. Isti autem actus judiciales, etsi magnum pondus habeant, tamen ad probandam consuetudinem simpliciter ne- cessarii non sunt; nam antequam iudex secundum consuetudinem primo pronuntiet, illa prius existe- re, satisque probari debet. Id notandum, plures quidem actus requiri ad inducendum jus non scri-

ptum: pauciores sufficere ad probandam observantiam inde deductam, de qua ex paucis actibus constare potest (f).

(e) *Arg. l. 1. C. de prob. ibi: „Debitor, qui solutam affirmat, ejus rei probationem præstare debet.“*

(f) *De probatione consuetudinis vid. Mascardus de prob. concl. 423. seq.*

§ 233. De consuetudine generatim dictum est hætenus. Ad particularia ut descendatur, statuendum est de consuetudine contra legem: *Consuetudo rationabilis & legitime præscripta potest abrogare legem civilem & canonicam.* Prob. 1. consuetudo in utroque jure æquiparatur legi; at vero per legem potest abrogari lex: ergo etiam per consuetudinem. 2. Id manifesto colligitur ex c. fin. ibi: *Licet etiam longævæ consuetudinis non sit vilis auctoritas, non tamen est usque adeo valitura, ut vel juri positivo debeat præjudicium generare, nisi fuerit rationabilis, & legitime sit præscripta.* Igitur a contrario sensu, si rationabilis est, & legitime præscripta, etiam juri positivo præjudicium generare potest. Exempli extant c. 1. de const. in 6. vi cujus consuetudines speciales locorum legi generali prævalent, adeoque præjudicium ei generant. C. 3 h. t. in 6., admittitur consuetudo, qua Episcopus in inquirendis, puniendis & corrigendis subditorum excessibus consilium sui capituli exquirere minime teneatur. Lex Apostolica de abstinencia a sanguine & suffocato contraria consuetudine abrogata est. Lege generali partus sequitur ventrem, l. 42. D. de Statu hom. sed additur: *Nisi lex specialis aliud inducit.* De tali lege seu consuetudine speciali fit mentio c. 3. de conjug. Servor.

§. 234. *Objiciunt* 1. Consuetudo contra legem continet actus legi oppositos, adeoque peccaminosos:

fos; imo, ut aliqui docent, omnino requirit actus peccaminosos, per quos contra legem agendo populus legem abrogare intendit: ergo talis consuetudo non nititur bona fide, ac legitime præscribi non potest; quod est contra c. fin. h. t. R. tr. a. nam absolute necesse non est, ut actus scienter contra legem, multo etiam minus cum voluntate abrogandi legem committantur; quia vis & auctoritas consuetudinis non ex voluntate subditorum, sed consensu saltem legali principis pendet; is consensus moribus & actibus populi attribui potest, siue mala siue bona fide, atque ex errore, quod lex nulla existat, vel non obliget, positi sint. n. c. & supp. quod consuetudo bonam fidem perinde requirat, ac præscriptio. Sed dices: Necesse est, ut consuetudo sit legitime *præscripta*. R. d. legitime præscripta, h. e. per actus uniformes, diuturnos, frequentes, publicos, legibus requisitos, & cum quadam analogia præscriptionis, c. præscriptione proprie tali n. vel subd. si agitur de consuetudine præscriptiva, quæ lædit jus alterius, c. si tantum agitur de consuetudine legi contraria, & communitatem obligante, n.

§. 235. *Obijciunt 2.* Omnis lex est rationabilis: ergo contraria consuetudo, quæ est contra legem, rationabilis esse non potest. R. c. a. n. c. lex potest abrogari lege contraria, quæ rationabilis censenda est: ergo etiam consuetudine contraria, quæ legi æquiparatur, pariter rationabilis esse potest, alio nempe respectu, vel ob mutatas rerum & temporum circumstantias, ob irrepentes abusus, vel genium populi.

§. 236. *Obijciunt 3.* L. 2. C. quæ sit long. conf. negatur, consuetudinem suo usque adeo vigere momento, ut aut rationem vincat, aut legem: ergo le-

gem vincere seu abrogare consuetudo non potest. R. d. c. non potest vincere legem supervenientem, quæ ob publicam utilitatem abrogat priorem consuetudinem, c. c. legem antea existentem. n. c. Sic apte conciliantur textus. Heineccius tit. de Legib. SC. & longa conf. citatam leg. 2. explicat de consuetudine rationi adversa, maxime de religione pagana. Ceterum consuetudo contra legem utique ad casus alios similes extendi non debet l. 14 & 39. D. de Leg.

§. 237. De consuetudine præter legem statuendum est: *Consuetudine induci potest obligatio, quam nulla lex scripta imposuit.* Prob. ex c. 9. h. t. ex can. 5 & 7. dist. 11. ipsa Synodus Nicæna, ut antiqui mores serventur, præcipit can. 6.: *Antiqua consuetudo servetur per Ægyptum &c.* can. 7. *quia consuetudo obtinuit, & antiqua traditio.* Prob. 2. ex l. 32. 33. 35. D. de Leg. ex l. 1. C. quæ sit long. conf. Exempla extant c. 2. de modo transferendi possessionem rei absentis. c. 6. de prærogativis & functionibus novæ dignitati attribuendis. c. 22. de cens. de procurationibus visitatori præstandis. c. 42. de Simon. de redditibus stolæ ob ministeria sacra. Videtur tamen in actibus ad hoc genus consuetudinis requisitis necessarium esse, ut ii faciant animo inducendi obligationem; nam actus meræ facultatis, liberalitatis, devotionis &c. non inducunt obligationem (g): quia actus non operantur ultra intentionem agentium, arg. l. 19. D. de reb. creditis; & quia jura proniora sunt ad solvendum, quam ligandum, hoc est, ad extinguendam, quam inducendam obligationem. l. Arianus. 47. D. de O. & A. Fieri sane potest; ut actus seorsim sumti boni sint & honesti, universalis tamen eorum obligatio utilis non sit communitati, e. g. obligatio audiendi quotidie Missam. Præsumitur animus

mus inducendi obligationem, si actus sint ardui, & tamen uniformiter continuati: si reipublicæ valde utiles, statui personarum magnopere accommodati: si ex eorum omissione oriatur scandalum, remorsus conscientiæ &c. Tali ratione inducta videtur obligatio, qua ad horas Canonicas adstringuntur subdiaconi & Diaconi, qui neque ex professione religiosa, neque ex beneficio Ecclesiastico ad chorum sunt edstinati.

(g) *Talis est usus ter salutandi in die B. Virginem: aspergendi se aqua benedicta in ingressu templi: faustæ ap-
preccationes ad initium anni, vel diebus aliis.*

§. 238. *Consuetudo secundum jus legem præcedentem confirmat, novoque constringit vinculo, uti lex posterior priorem confirmans causa cognita.* Istiusmodi consuetudo maximi momenti est in foro Ecclesiastico, a novitatibus, quæ discordiam pariunt, semper alieno. Talis consuetudo præterea declarat legem existentem, cujus *optima interpret* dicitur c. 8. h. t. & l. 37. D. de Legib. Iis ergo, qui præsentem Ecclesiæ disciplinam oppugnant, resque novas identidem moliuntur, opponenda sunt & momenta pro observatione expressorum canonum, & momenta pro observatione veterum consuetudinum.

§. 239. *Abrogatur consuetudo, sicut lex per legem posteriorem, aut consuetudinem contrariam legitime præscriptam.* Positiones de abroganda consuetudine sunt hæc potissimum:

I. Quia omnis correctio legum odiosa est, si consuetudo præcedens, vim legis habens, & lex posterior aperte non pugnant, potius conciliandæ sunt, quam altera per alteram corrigenda.

II. Lex posterior generalis tollit priorem consuetudinem generalem, non autem particularem, c. 1. de Conf. in 6.: particularis autem dicitur consuetudo, non quia in loco particulari æque observatur, ac alibi; sed quia nititur speciali ratione, privilegio, vel statuto.

III. Per clausulam: *Non obstante consuetudine contraria*; tollitur generalis tantum consuetudo. Ad particularem abolendam videtur se extendere clausula: *Nulla obstante consuetudine*; quæ alias non verificatur; item clausula: *Nulla obstante consuetudine, privilegio vel statuto*; quæ utique jura specialia attingit.

IV. Difficulter abrogatur consuetudo immemorialis, sine speciali ejus mentione, utpote quæ sæpe habet vim & effectum privilegii specialis (h).

V. Per ordinarias clausulas derogatur consuetudini tantum præfenti, nisi expressa mentio fiat futuræ, aut præfens tanquam corruptela reprobetur: adeo tamen circumstantiæ mutari possunt, ut ratio reprobandi cessaret.

(h) *Can. 8. IX. q. 3. c. 26. de V. S. l. 3. §. 4. D. de aqua quot. Et æstiv. Si consuetudini jus vehementer resistit, eandem vim, etsi immemorialis sit, non habet, ac privilegium: hoc enim non datur, nisi causa cognita; illa ignorante legislatore sæpe inducitur, vel potius irrepit. Exemplum extat c. 4. h. t.*

TITULUS V.

DE POSTULATIONE PRÆLATORUM.

ARGUMENTUM.

- I. Vox, electio, quam vim habet: differt ab ordinatione & missione. §. 240. II. Non competit Principi politico, nec populo §. 243. III. Quæ postulatio sollemnis? quis postulare possit, & postulari? §. 251. IV. Forma postulationis: numerus suffragiorum §. 257. V. Effectus postulationis §. 264. VI. Admissio postulationis: & admissæ effectus §. 266. VII. Ex his patet, quomodo ab electione differat. §. 269. VIII. Postulatio simplex, seu minus sollemnis. §. 271.*

§. 240. Præmissis de jure scripto generali & speciali, itemque de jure non scripto principiis, agitur in Jure utroque de personis, & in Canonico quidem earum primo exponitur promotio ad prælaturas, seu regimen Ecclesiasticum; de qua animadvertente:

I. Promotio ad prælaturas, imo ad ministerium quodvis Ecclesiasticum generatim & latissime dicitur *electio*, quæ excludit omnem modum, ex jure promoti profectum, ad munus Ecclesiasticum perveniendi, ceu ex naturali propagatione, ut fiebat in tribu Levi veteris Testamenti, ex hereditaria successione, ex prærogativa ætatis, nobilitatis &c.: includit autem quamvis aliam designationem personæ, præsentationem, institutionem, provisionem, collationem dignitatis vel beneficii Ecclesiastici.

II. *Electio* late sumpta est assumptio personæ ad munus Ecclesiasticum facta plurium suffragiis; accedente fere legitimi Superioris confirmatione; atque

hoc modo excludit electio præsentationem & sequentem institutionem, item liberam collationem seu provisionem; includit autem postulationem, & electionem strictè dictam. *Postulatio* dicitur, si per suffragia plurium ad dignitatem expetitur persona, impedimento Canonico affecta, petitione ad Superiorem directâ, ut eam admittat: *electio vero strictè dicta* est Canonica vocatio personæ *habilis* ad prælaturam vacantem facta per suffragia legitimorum electorum, a Superiore fere confirmanda. Hinc alia dicuntur beneficia *patronata*, alia *collativa*, alia *electiva*: item postulatio dicitur *admitti*, electio *confirmari* (a).

(a) *Differentia est non tantum in modo perveniendi ad dignitatem Ecclesiasticam, sed etiam in effectu ac jure, quod ex variis modis resultat: Et quia quævis designatio personæ ad munus sacrum latissime electio dicitur (c. 24. Et 31 h. t. Et can. 12. 13. 14. dist. 63); hinc in proposita specie facti dispiciendum est, quam vim ea electio, vel personæ designatio habuerit.*

§. 241. Electio seu designatio personæ ad munus Ecclesiasticum distinguenda est ab *ordinatione*, seu consecratione, & a *missione*; etsi primis Ecclesiæ temporibus hi tres actus fere conjuncti fuerint: in Apostolis tamen re & temporibus erant segregati. Nam Luc. VI. 13. Christus vocavit discipulos, & elegit duodecim ex ipsis, quos & Apostolos nominavit. Dein potestatem consecrandi dedit Matth. XXVI. 26. 27. Luc. XXII. 19. 20.; potestatem absolvendi Joan. XX. 22. 23. Demum cum potestate in universum orbem misit Matth. ult. 18 seq. Marci ult. 15.

§. 242. Ordinatio ac missio legitimorum pastorum tota pendet ab auctoritate & potestate sacra, ac spirituali Ecclesiæ. Circa electionem & designationem

nem personarum, quæ dein judicio Ecclesiæ ordinentur, consecrentur, seu sacris ritibus initientur, certanque in Ecclesia acquirant jurisdictionem, varia pro temporum varietate disciplina fuit, estque nostris etiam temporibus pro varietate locorum varia. Quisquis vero facultatem aut jus nominandi, seu præsentandi, seu quoque modo eligendi personas ad munus sacrum habuit unquam, id non nisi concessione & auctoritate Ecclesiæ habere potuit; quia illud ipsum jus refertur ad ordinationem & potestatem sacram, sive ut ajunt, rei spirituali antecederet annexum est. Certe si quis illud pretio temporali sibi comparare vellet, omnium consensu simoniam committeret contra jus divinum & naturale.

§. 243. Principi politico jus, nominandi ad prælaturas vel dignitates sacras, non competit vi summi imperii, seu *jure majestatico*; secus idem etiam competeret principibus infidelibus, saracenis, apostatis, hæreticis, schismaticis: quo quidem modo pessime consultum esset divinæ Religioni, & Ecclesiæ Christi. Totum id facile deceditur ex principiis Juris Eccl. Publ., addique possunt can. Apostol. 29. can. 3. Concilii Nicæn. II. Edit. Mansi Tom. XIII. col. 748. & can. 22. Concil. CPni IV. ibid. Tom. XVI. col. 174. Si cui ergo Principi illud jus competit, id derivandum est ex *speciali Privilegio* ab Ecclesia dato, vel ex *jure patronatus*, quod item ecclesiastica auctoritate concessum est iis, qui Ecclesias fundant, construunt vel dotant; aut demum ex *concordatis* cum Sede Apostolica initis.

§. 244. Ab ipso populo eligendos esse Episcopos, eorumque vicarios, & pastores inferiores, hodie contendunt scriptores quidam, & Pseudoepiscopi Galliæ. De qua re statuendum est. I. *Initio nascentis Eccle-*

Ecclesiæ, ac multo post tempore ad electiones episcoporum plerumque convenerunt non modo Episcopi provincie seu vicinie, Metropolitanus, ac Clerus inferior, sed fere populus etiam fuit admissus, testimonii ferendi, aut voti seu desiderii sui manifestandi causa. Id constat innumeris documentis vel apud solum Gratianum can. 13. dist. 61. can. 1. dist. 62. can. 27. dist. 63. can. 9. dist. 65. can. 15. VIII. 9. 1. Rationem a nobis indicatam confirmant iidem canones, & S. Cyprianus epist. 68.: Ut plebe præsentem vel detegantur malorum crimina, vel bonorum merita prædicentur.

§. 245. II. *Populus, ad electiones admissus, non habuit proprie jus suffragii, aut veræ electionis, quæ electo jus conferret, sed poterat optare, præoptare, desiderare, Clero, Episcopis præsentibus & Metropolitanis, expetere pastorem, a quo regi, & cui subesse vellet. Prob. 1. antiquissimo testimonio Clementis I. in epist. ad Corinthios in causa schismatis data, in qua constitutio Episcoporum tribuitur Apostolis, eorumque successoribus & Populo solus consensus in electum adscribitur (b). Prob. 2. ex can. 12. dist. 63. ibi: Sacerdotum est electio: & fidelis populi consensus adhibendus est; quia docendus est populus, non sequendus. Prob. 3. ex eo, quia Clerus, id est, Episcopi & Presbyteri, ad electionem convenientes, merito reprehendebantur a Summis Pontificibus, si populi Postulationi, quæ re vel modo peccabat, obsecundassent. Docendus est populus, non sequendus, ait Cælestinus P. I. ad universos Episcopos per Apuliam & Calabriam constitutos (Edit. constant. col. 1074.); Nosque, si nesciunt, eos, quid liceat, quidve non liceat, commonere, non his consensum præbere debemus. In eandem sententiam Episcopos Africanos provincie Mauritanie cæsariensis reprehendit S. Leo*

Leo M. (Epist. 12. Edit. Ballerin. col. 658. apud Gratianum can. miramur. 5. dist. 61:).

(b) *Verba S. Clementis sunt hæc: „Apostoli quoque nostri „per Dominum nostrum Jesum Christum cognoverunt, „futuram esse de nomine Episcopatus contentionem. Eam „igitur ob causam perfectam præcognitionem adepti, „præditos constituerunt, ac deinceps futuræ successionis „hanc tradiderunt regulam, ut, cum illi decessissent, ministerium eorum ac munus alii probati viri exciperent. „Qui igitur ab illis, aut deinceps ab aliis viris eximiis, „consentiente Ecclesia universa, constituti sunt & ovili „Christi humiliter, quiete, liberaliterque ministrarunt, — „hos censemus officio injuste dejici.“ Edit. constant. n. 44. pag. 30.*

§. 246. III. *Populus jure exclusus fuit a tota causa electionis Episcoporum.* Prob. divino jure nullam potestatem, aut suffragationem in Episcopis eligendis populus arrogare sibi poterat, ejusque in ea causa admissio & præsentia perquam molesta & perniciosa evasit ob studia partium, factiones, seditiones, tumultus, competitorum artes, sollicitationes, corruptiones; conf. can. 6. dist. 63. ex Concilio Laodicens. c. 2. de Elect. can. 16. VIII. q. 1. (c). Hinc in Oriente, exclusa turba, primores civitatis ad id negotium admissi sunt, ut indicat Novella 123. c. 1. in Occidente vero consensus *regius* expetitus tum pro facienda electione, tum pro agnoscenda & approbanda, can. 9. 17. 18. 24. 25. dist. 63. Nostra quidem ætate, si diocesium amplitudo, & fidelium numerus spectetur, non apparet, qua ratione aut utilitate populus ad eligendum sibi pastorem admitti queat. Quantæ enim, & quam frequentes dissensiones existunt, si incolis unius etiam pagi jus præsentandi parochum competit, qui etsi multo maximo suffragiorum munero gaudeat, tamen partem, quam in
adeun-

adeundo munere habuit contrariam, deinceps in exequendo semper experiri debet adversam, rebusque suis obluentem?

(c) *Conf. Sidon. Apollinar. l. 4. epist. 25. & Goffrid. Vin-*
docinenf. l. 3. ep. 11. S. Chrysof. l. III. de Sacerdotio.

§. 247. Qui contra II. conclusionem populo attribuunt verum propriumque jus eligendi prælatos, obijciunt electionem S. Matthiæ in Apostolum; quam a toto fidelium cœtu factam fuisse dicunt. Act. I. a v. 15. R. 1. S. Matthiam elegit totus cœtus *jure suo*, aut divinitus concessio n. concessu & jussu Petri c. 2. Elegit, hoc est, cœtus præsentavit duos, Joseph, qui vocabatur Barsabas, & Matthiam: post hanc præsentationem aut nominationem non iterum ad cœtus suffragia itum est, sed ad exquirendam divinam voluntatem, præmissa communi oratione. 3. Cœtus hoc modo nominavit, qui erat *hominum simul, fere centum viginti*. In hoc autem numero erant 11. Apostoli, & 72. discipuli, Presbyteros repræsentantes, certe in sortem domini jam assumti, ut laici nec tertiam partem efficerent: in hoc etiam laicorum numero nullus erat infidelium, nullus pervicacium Judæorum. Quid ergo pro jure populi ex hoc loco confici potest? Populum in electionibus prælatorum primis temporibus præsentem fuisse, concedo: at præsentem fuisse jure suo aut ex divina institutione; aut ita fuisse præsentem, ut vero electionis & suffragii jure potiretur, nego. Si omnia Apostolorum facta ad necessitatem divini juristrahas; quam frequenter in jus divinum impinges? Si hunc præcise locum divinæ institutionis esse contendis, erit ejusdem institutionis, ut populus eo jure uti non possit, nisi præmonitu & præcepto Successorum Petri.

tri. At nempe ufum hic habet regula, quam, cum de disciplina generatim agerem C. X. J. E. P., proposui §. 390. „*Eadem potestas sacra, quæ ex institutione ac lege Christi de fide ac divino jure infallibiliter judicat, pari auctoritate definire potest, utrumne & quatenus ad disciplinam variabilem, an ad jus divinum immutabile quidquam pertineat.*“ Cæterum de consensu aut electione populi nulla fit mentio in electione aut ordinatione Timothei (1. Timoth. IV. 14.), nec Titi, neque cum Titus juberetur Presbyteros, id est, Episcopos constituere per civitates Insulæ Cretæ, neque Act. XIV., cum Paulus & Barnabas venientes iterato Lystram, Iconium & Antiochiam constituerunt Presbyteros seu Episcopos per novas Ecclesias illius districtus.

§. 248. Objiciunt præterea electionem S. Ambrosii, quam a Populo Mediolanensi factam fuisse ajunt. Factum narrat Theodoretus his verbis: „Cum Auxentius Ecclesiæ Mediolanensis Episcopus, „labe ariana infectus, & in multis Conciliis abdicatus e vita exivisset, Imperator (Valentinianus) „accerfitis ad se Episcopis, sic apud eos verba facit: „Est vobis, utpote sacris & divinis literis institutis, „explorate cognitum, qualis debeat esse is, qui sit „ad Episcopatum gerendum delectus; — — quare „hominem ita instructum in sede & gradu Episcopali jam collocate, ut & nos, a quibus hoc gubernatur imperium, ei vere & ex animo capita inclinemus, & illius reprehensionem (nam cum simus „homines, errore labi necesse est) velut medicum, nam animorum cupide amplexemur. Hac oratione ab Imperatore habita, Concilium Episcoporum contendit ab eo, ut ipse, utpote sapientiæ & pietatis insignibus exornatus, Episcopum deligat. At ille: „Major

„Major est, inquit, hæc provincia, quam quæ vi-
 „ribus nostris sustineri possit; proinde vos divina
 „repleti gratia, & illius splendore illuminati, multo
 „melius hoc Episcopi deligendi negotium transigetis.
 „Illi igitur egressi separatim per se de eo deliberare
 „cœperunt: civitatis autem habitatores inter ipsos
 „dissidere, quorum alii hunc, illum alii deligere
 „contendebant. Nam qui errore Auxentii erant im-
 „buti, hi suæ opinionis fautoribus suffragati sunt;
 „qui autem a partibus sanæ & sinceræ doctrinæ sta-
 „bant, illi rursus Episcopum secum de fide consen-
 „tientem habere laborarunt. Hac dissensione cog-
 „nita Ambrosius, urbis præfectus, veritus, nequid
 „novarum rerum molirentur, propere ad Eccle-
 „siam contendit. Illi seditione compressa, uno ore
 „omnes postulant, ut Ambrosius, qui adhuc sacris
 „Baptismi mysteriis non erat initiatus, ipsis desig-
 „netur Episcopus. Qua re audita Imperator jubet
 „illum egregium virum extemplo & initiari myste-
 „riis, & Episcopum ordinari. Noverat enim, men-
 „tem ejus omni perpendiculo rectiorem esse, &
 „sententias ejus quaque regula exquisitiores. Atque
 „conjectura ex consensu eorum, qui dissentientem
 „sectabantur doctrinam, ducta, suffragationem il-
 „lam divinitus factitatem arbitratus est. Postea ve-
 „ro, quam Ambrosius divinum sacrosancti Baptis-
 „matis munus adeptus erat, & gratiam Episcopa-
 „lem receperat, dicitur Imperator longe præstantis-
 „simus (nam rebus his gestis intererat) hymnum
 „ad gratias Servatori ac Domino agendas recitasse,
 „his fere verbis: Gratia sit tibi, Domine omnipotens
 „& Servator noster, quod cum ipse corpora huic
 „viro commissem, tu etiam animas ei commenda-
 „sti: indeque declarasti, meam justam fuisse senten-
 „tiam (d).“

(d) Theo-

(d) *Theodoretus H. E. ex interpretatione Christophorsoni l. IV. c. 5. & 6. Socrates in H. E. ejusdem editionis paucioribus verbis rem narrat l. IV. c. 25. Item Cassiodorus in Historia tripartita, nempe ex Socrate, Sozomeno, & Theodoro collecta l. VII. c. 8., ex quo Gratianus descripsit dignissimum lectu canonem 3. dist. 63. Demum Nicephorus Callistus l. XI. c. 32.*

§. 249. Dico: *Ambrosius non a populo, sed ab ipso Deo electus in Episcopum censi debet.* Apertum divinæ electionis indicium habebatur repentina Populi antea dissentientis & tumultuantis consensus. Extraordinarius hic modus electionis in jure nostro appellatur *quasi inspiratio* c. 42. de elect., ac pro tali habita fuit electio Ambrosii ab Imperatore, & ab Episcopis provinciæ. Nam, ut scribit Socrates l. c., *Episcopis, qui aderant, videbatur hæc consentiens populi vox divinitus sane emissæ.* Pro tali habita fuit a scriptoribus eorum temporum, quos supra laudavi; pro tali habita quoque fuit a Nicolao P. I. Cum enim Photius & Photiani schismatis assectæ exemplum Ambrosii inter alia obiectarent, respondit S. Papa Nicolaus his verbis: *Beatus fulgidissimus doctor Ambrosius, quem similiter ex militia, & catechumeno asseveratis Episcopum, cum divinitus, & per miraculorum signa ab ipsis cunabulis usque ad consecrationis suæ tempus fuisset evocatus, & ad regimen a dissidentibus populis, subito in unam sui concordiam provocatis, compelleretur Ecclesiasticum suscipiendum, minime seditioni vel schismati studuit; quin potius eas, quas reperit, semetipsum non ultro, sed coactè offerens populo, repulit, ac removit (e).* Denique pro divina habendam fuisse Ambrosii electionem manifeste ostendit exitus, nempe admirabilis sancti Præfulis zelus & indefessus labor in regenda diœcesi, & catholica re defendenda. Ceterum

Zallinger L. I. Decretal. M rum

rum Valentiniano imperatori ignotum esse non potuit, cui jus eligendi Episcopum competat; atqui is illud jus Episcopis, non populo competere asseveravit, ut ex Theodoreto constat. Si Episcopi in Ambrosium consenserunt, id divino moti iudicio fecere, non populi electione, nisi dicere velimus, homines etiam arianos pro legitimis electoribus habitos fuisse, agnitosque ab Episcopis.

(*) *Concil. Edit. Mansi Tom. XV. col. 172.*

§. 250. Objiciunt denique sententiam S. Cypriani, qui in ep. 68. ad Clerum & plebem Asturicensem populo tribuit *potestatem vel eligendi dignos Sacerdotes, vel indignos recusandi*, addens, *quod & ipsum videmus de divina auctoritate descendere, ut Sacerdos plebe præsente sub omnium oculis deligatur, & dignus atque idoneus publico testimonio comprobetur*. Resp. S. Cyprianus plebi tribuit potestatem eligendi, nempe plebi præsenti, tanquam *testi*, non tanquam iudici, aut proprium electionis jus exercenti: eligi debet Sacerdos (nempe a Clero & Sacerdotibus seu Episcopis) plebe *præsente*, sub *omnium oculis*, ut idoneus *publico testimonio* comprobetur: sub populi *assistentis conscientia*, ut plebe *præsente* vel detegantur malorum crimina, vel bonorum merita prædicentur. Ait, *ex divina id traditione descendere*, hoc est, ex imitatione quodam veteris legis. Narrat enim ex libro Num. XX. v. 27., Eleazarum coram omni multitudine a Moyse constitutum fuisse Sacerdotem; id quod præsente Synagoga, seu multitudine, non auctoritate multitudinis factum est. Adjungit, *quod postea secundum divina magisteria* (nempe ex eo plo veteris legis) *observatur in actis Apostolorum*, cum de electione Matthiæ & Diaconorum

rum ageretur. Concludit: *Propter quod diligenter de traditione divina, & apostolica observatione servandum est, & tenendum, quod apud nos quoque, & fere per provincias universas tenetur, ut ad ordinationes rite celebrandas ad eam plebem, cui præpositus ordinatur, Episcopi ejusdem provinciæ proximi quique convenient, & Episcopus deligatur plebe præsentē, quæ singulorum vitam plenissime novit, & unuscujusque actum de ejus conversatione perspexit. Si hæc electionis forma ex jure divino vere, propriæque descenderet, per provincias omnino universas, non fere universas tenenda fuisset, nec quoquam casu poterat prætermitti; atqui prætermissa aliquando fuit ab ipso Cypriano in ordinatione Aurelii epist. 33. ubi ait: Expectanda non sunt testimonia humana, cum præcedunt divina suffragia. Adeo totum referebatur ad testimonium, non auctoritatem plebis.*

Hæc quidem ob temporum errores præmittenda fuere; explicanda nunc est recta via, qua personæ Ecclesiasticæ ad regimen promoventur.

§. 251. *Postulatio solemnī est concors petitio eorum, qui jus eligendi habent, directā ad Superiorem, ut pro necessitate vel utilitate Ecclesiæ aliquem admittat ad prælaturam, qui ob impedimentum canonicum, in quo tamen dispensari solet, eligi non potest. Nota: 1. Solemnis dicitur postulatio, de qua hic agitur; de simplici, quæ æquivoca est, & longe dispar, postea. 2. Concors in sensu non stricto, quasi omnes plane consentirent; sed tamen usitato significatu censetur actio Collegii vel Capituli, quæ sit a majore, vel tali illius parte, ut negotium secundum jus regulariter exitum habere possit. 3. Pro necessitate vel utilitate Ecclesiæ; fieri enim potest,*

ut qui viduatæ Ecclesiæ præ aliis utilis judicatur, per canones eligi non possit. Ne ergo canones, qui pro utilitate Ecclesiæ constituti sunt, aliquando obstaculo sint utilitati, postulatio, tanquam remedium extraordinarium, atque in subsidium electionis antiquissimis, jam temporibus adhibita fuit.

§. 252. Postulatio dicitur petitio eorum, *qui jus eligendi habent*. Nam postulare possunt, qui *eligere*. c. 30. de Elect. ibi: *Electionem de postulando Prælato facere*. & c. 4. h. t. v. *Nos igitur*. & in fin. Inferes: 1. qui est in quasi possessione coeligendi, erit etiam in quasi possessione compostulandi; quia sunt jure ipso connexa. 2. Compromissarius ad eligendum datus, etiam postulare potest. c. 30. de Elect. & c. 11. de renunt., nisi expresse *limitatum* sit compromissum. 3. Qui jus nominandi habet, inhabilem non simpliciter nominare, sed *cum postulatione* potest.

§. 253. Notionem postulationis ingreditur *impedimentum canonicum* ejus, qui postulatur. Sunt autem impedimenta, in quibus dispensari non potest, aut non solet: alia, in quibus solet: hinc aliqui dicuntur impostulabiles seu indigni: alii, postulabiles: alii, qui postulatione non egent omnino, sed qui eligi possunt.

§. 254. Impostulabiles sunt, I. qui jure naturali aut divino sunt inhabiles, ceu *criminosi*, hæretici, schismatici, alique, quales recensentur tum can. un. dist. 84. tum dist. 46. 47. 49. 50., item falsarii c. 7. de crimine falsi., simoniaci. c. 59. de Elect., infames ratione delicti. arg. c. fin. de temp. ord. II. *Natura inutiles*, ceu prorsus rudes. c. fin. de ætat. & qual., corpore vitiati enormiter c. 6. de corp. vitiat.,
epi-

epileptici. c. 21. de Elect. III. Qui violavit interdictum c. 1. h. t., ubi includi videntur omnes, qui peccarunt contra *obedientiam canonicam*, Papæ, ejusque legatis debitam. Ibi: *Nos igitur, qui secundum Apostolum promti sumus inobedientiam omnem ulcisci, — ne nil obedientia prodesse videretur humilibus, si contentus contumacibus non obesset: cum juxta canonicas sanctiones quædam sint culpæ, in quibus culpa est relaxare vindictam, &c.* IV. Bigamus & ex damnato coitu procreatus. arg. c. 10. de renunt. V. Juniores 27. annis postulari nequeunt ad *Cathedralem Ecclesiam*. Extrav. un. h. t. int. com. (f). VI. Episcopus, qui *criminis eluendi causa* in monasterium descendit; aliud, si ex alia causa, aut si loco tantum, non ordini & dignitati renunciavit. c. 11. de renunt. VII. Religiosus de mendicantibus postulari non potest ad Ecclesiam secularem, *Cathedrali inferiore*, vel regularem non sui ordinis. cit. Extrav. un.

(f) Qui contra hanc extravagantem scientes postulant, aut postulationem de se factam urgent, incurrunt pœnam eadem extrov. contentam. In aliis vero casibus indignum scienter postulantes privantur pro ea vice voce activa & passiva tam ad eligendum, quam ad postulandum, penes solos innocentes tunc manente potestate eligendi aut postulandi c. 1. h. t. in f. & c. 40. in f. de Elect., multoque magis, si postulationem semel repulsam innovare audent. c. 2.

§. 255. Impedimenta, in quibus dispensari solet, sunt I. defectus natalium in progenitis ex simplici fornicatione. c. 20. de Elect. II. Defectus ætatis c. 19. eod.; at si quis ne annum quidem 27. implevit, postulari non potest cit. Extrav. un. h. t. inter com. (g). III. Defectus præscripti ordinis c. 22. eod.; necesse est enim, ut eligendus saltem per sex menses in sacro ordine extiterit. IV. Siquis ali-

cui Ecclesiæ alligatus liberum non habet sine Pontificia permissione volatum, c. fin. h. t.; id fit in Episcopis *confirmatis*, etsi consecrati necdum essent. c. 2. de transl. Episc. Idem videtur dicendum de Episcopis titularibus in partibus infidelium (*h*).

(*g*) *Exempla postulantium, & postulorum ante 27. ætatis annum afferuntur in thesauro Jur. Eccl. Tom. II. N. XVIII. §. II. & in animadvers. ibid.*

(*h*) *Negat id Nellerus auctor cit. dissertationis. Ibid.*

§. 256. Postulatione non egent, sed eligi possunt I. Coadjutor datus etiam cum successione; potest enim renunciare suo favori. II. Episcopus, qui electioni consensit, sed necdum est confirmatus. III. Episcopus, qui cum auctoritate Papæ renuntiavit loco, non dignitati. IV. Præpositus secularis, licet habeat jurisdictionem quasi episcopalem. V. Abbas, si petitur ad aliud monasterium sui ordinis, vel ad Episcopum. VI. Is, qui non est de gremio capituli, uti Canonicus Domicellaris, vel Clericus plane extraneus, nisi contraria adsit lex per speciale statutum a Superiore præscripta (*i*).

(*i*) *Neller cit. diff. Solet tamen in his aliquando tutior teneri via per obtentum indultum eligibilitatis.*

§. 257. An forma capituli, quia propter 42. de Elect., tenenda sit in postulatione, ut nempe per viam scrutinii vel compromissi procedatur, dubitarunt veteres Canonistæ, & dubitant recentiores. Negat Laymann in Comment. C. un. h. t. in 6.; negat etiam Nellerus cit. diff. §. III. idque colligit ex c. 4. h. t. in fin. ibi: *Licet diversis temporibus convenerant*, quod fieri haud potuisset adhibito scrutinio. Tutius esse eam adhibere formam, monent omnes;

omnes; imo si postulatio concurrit cum electione, omnino necessarium. P. Zech, qui in Hierarch. tit. XX. §. 230. eam formam omnino adhibendam putat, hæc addit: Confirmat id praxis & sensus tum Capitulorum postulantium, tum curiæ Romanæ examinantis instrumentum postulationis ad normam capitul. *quia propter*. Ceterum quia electio & postulatio reipsa differunt, certæ *verborum formæ*, quas pernicioſa curiositas invenit, sine nullitate adhiberi non possunt. Tales sunt: *Eligo postulando*; vel: *Postulo eligendo*: *eligo in postulandum*, aut *postulo in eligendum*. Hæc etiam forma: *Eligo & postulo, prout potest melius de jure valere*, irritum reddit actum, nisi quando probabiliter dubitatur, utrum quis sit eligendus, vel potius postulandus: quo casu is, qui sic postulatus fuerit, aut electus, consensus tempore viam electionis vel postulationis, ne in incerto vagetur, eligere necessario teneatur, redeundi ad aliam, postquam unam elegerit, sibi licentia penitus interdicta. c. un. h. t. in 6.

§. 258. De numero suffragiorum in casu postulationis secundum jus decidendum est: I. Si postulatio concurrit cum postulatione, requiruntur & sufficiunt absolute majora suffragia, uti ad alios istiusmodi actus Capitulares; quando electio concurrit cum electione c. 1. de his, quæ fiunt a maiore parte. l. 19. D. ad Municipal. II. Si postulatio concurrit cum electione, tunc ut postulatio prævaleat, postulandus habere debet duplo majorem numerum suffragiorum, quam electus: ut electio prævaleat, suffragia eligentium superare debent tertiam partem suffragiorum simul sumtorum, quæ in postulatam & electum concurrunt. c. 40. de Elect.; ubi in specie facti quorundam postulantium, aliorum eligentium Pontifex pro admittenda postulatione

latione illud primo inquire jussit, utrum ii, qui postularunt Archiepiscopum, duplo majorem facerent numerum, quam sexdecim Electores Plebani. Si vero ad faciendum duplo majorem numerum simul omnes prædicti minime sufficerent, — postulatione repulsa electionem Plebani auctoritate nostra confirmes. Ex his inferes, ut postulatio prævaleat, non requiri duas tertias respectu totius Capituli: sed comparatione numeri eligentium. Calus figurari potest in tribus factionibus sic: Sunt 24. Capitulares: 7 eligunt: 14 postulant: tres vota dispergunt, sive eligendo sive postulando diversum. Dico, postulationem prævalere electioni secundum cit. c. 40., in qua specie Delegatus Apostolicus non jubebatur inquire, an adsint duæ tertiæ totius Capituli, sed an postulantes duplo majorem facerent numerum, quam eligentes. Atque hæc sane diversa, ut patet in proposito exemplo, ubi postulatus habet duas tertias, si vota, quæ in postulatam & electam concurrerunt, simul sumantur, non autem respectu totius Capituli. III. Addenda videtur limitatio: ut tamen electio concurrere censeatur cum postulatione, & singularem mereri favorem, necesse videtur, ut postulatus numeret absolute majora suffragia, sive ultra dimidiam partem omnium suffragiorum, secus nec postulatio, nec electio merentur attendi; quia secundum communes regulas non sunt actus Capitulares.

§. 259. Exempla concurrentis postulationis & electionis sunt istiusmodi. I. Sint suffragia 30: ex his 20 postulant: 10 eligunt; valet postulatio. At si 19 postulent: 11 eligant; valet electio. II. Sint suffragia 24.: ex his 13 postulant: 9 eligunt: duo disperguntur; valet electio. III. Sint suffragia 20. si ex his 9 postulent: 6 eligant: & quinque dispergan-

gantur; puto, nihil valere; cum postulatus nec absolute majora habeat. Idem cenſeo, ſi ex ſuffragiis 24 ſint 9, quæ eligant: 11, quæ poſtulent, quinque diſperſis.

§. 260. Ad id, quod N. III. in regulis, & exemplis propoſitum eſt, referri debet caſus a Nellero in cit. Diſſ. & a Cl. Bæckhn excogitatus. Capitulum conſtat ex 60. Canonicis; 30 poſtularunt Cajum: 20. elegerunt Titium: 10 diſperſerunt vota ſua. Hoc caſu ſentit Cl. Bæckhn, electionem prævalere: eoquod poſtulantium numerus non ſit duplo major numero eligentium; unde videtur locum habere decifio c. 40. ſupra relata. At Nellerus diſtinguit. Si 10 illi, qui vota ſua diſperſerunt, liti non ſe immiſcent, ſe ipſos facient alienos, & Capitulum conſiderabitur ut reductum ad 50; quo reſpectu valebit electio; quia poſtulantes non ſunt numero duplo majore, quam eligentes. At ſi decem illi ſe opponant tam poſtulationi, quam electioni; repelletur in primis poſtulatio; quia 30 huic contradicent, nempe illi 10, & eligentes 20, & ſic *nimia foret contradictio & diviſio*: caſſabitur etiam electio; quia 40 ei contradicent, illi 10 ſcilicet, & 30. poſtulantes; eritque pars major, imo duæ partes Capituli invitæ. At ego non puto ſpectandum eſſe, an aliqui, & quot contradicant poſt factam jam talem electionem; ſed quid iudex decidere, & quam in cauſa contradicentium ſententiam ferre debeat; neque etiam, jacta jam ſuffragiorum velut alea, in poteſtate ſuffragantium eſſe debet, quam in partem contradicendo aut non contradicendo electionis exitum inclinare velint. Quapropter in propoſito caſu, & ſic concurrente poſtulatione & electione, ut poſtulatus non numeret absolute majora, nihil capitula-

riter atque ad negotii exitum concludi posse arbitror; quia singularis favor electioni, ultra tertiam suffragiorum partem habenti, ideo tantum attributus est, ut excludat postulationem, tanquam remedium extraordinarium, in quo jus contemnitur. Si autem postulatio simpliciter majori suffragiorum numero nititur, non ipsa excluditur, sed aliorum aliter suffragantium iudicium.

§. 261. De concursu electionis & postulationis, & univ[er]se de collatione suffragiorum præterea notandum. I. *Absolute* majora dicuntur relate ad omnes congregatos, qui suffragium ferunt: *respective*, comparate ad coelectos vel compostulatos. Si ex 14 suffragiis unus obtineat 7, alter 5, tertius duo; nullus habet absolute majora. II. In numero suffragiorum inæquali votum dimidia aut quavis parte majus facit majora: quia tam persona, quam votum est res individua; unde quivis excessus ad se trahit totum. Sic ex 5. majora sunt tria; ex 7 majora quatuor; ex 9 majora quinque. Si ex 20 suffragiis postulatus numeret 13, electus 7; hic electus censetur ultra tertiam habere suffragiorum partem, etsi tertiam partem duntaxat superet hac fractione $\frac{1}{3}$.

§. 262. Illustris & notus casus concurrentis electionis & postulationis contigit sub Innocentio XI. & Leopoldo I. Imp. in Ecclesia Colonensi an. 1688. Sereniss. Bavarie Dux, Josephus Clemens, habens Breve eligibilitatis (eoquod jam esset Episcopus Frisingensis & Ratisbonensis, & careret ætate Canonica) a novem capitularibus eligebatur: sed Eggo a Fürstenberg Cardinalis & Episcopus Argentinen[sis] postulabatur a tredecim: duo electores de viginti quatuor disperferant in alios vota: vicit Bavarus Eggonem

nem iudicio Romæ; quia ultra unam tertiam votorum habuit (k). His verbis casum indicat Nellerus in cit. diff. §. III. Sed ibidem paulo post docet, tunc tantum concurrere postulationem cum electione, quando unus postulantium suo & sibi consentientium nomine, in communi publicavit postulationem, & ex altera parte alius unus suam electionem; non autem quod vota in Protocollo scripta sint quorundam postulantium, quorundam vero eligentium. Sine communi & electione & postulatione nullum fieri concursum scribit Nellerus, sed rediri debere ad novum scrutinium: at ego contra sentio, hanc communem duplicem, & electionem ac postulationem non esse necessariam, aut facta communi electione fieri debere, aut pro facta habendam communem postulationem; secus postulantes collatis jam suffragiis faciendo, aut non faciendo communem postulationem, in potestate haberent, utrum prævaleat, aut non prævaleat electio. Quid? si in proposito casu 13 postulantes communem fieri postulationem omisissent; num præjudicare poterant electo, habenti plus una tertia suffragiorum?

(k) Casum enucleate exponit Vitus Pichler in decisionibus casuum ad h. t.

§. 263. Unus superest memorabilis casus ad hunc concursum pertinens. C. 30. de elect. concurrit postulatio cum electione: tres ex quinque compromissariis postularunt: duo elegerunt: postulatio fuit admissa, etsi non numeraret duas tertias. Inferunt: in compromissariis postulantibus attendi præcise pluralitatem votorum. Rationem dat textus: Quia postulatio fit per eos, in quos totum capitulum eligendi transtulerat potestatem: propter quod unanimiter de consensu totius capituli intelligitur esse facta.

§. 264.

§. 264. Ad effectum postulationis rite peractæ spectant hæ definitiones juris. I. Debito tempore intimanda est postulatio, uti tit. de elect. dicitur. II. Postulatus facta intimatione dicere non potest: *Consensio*, cum affectus sit impedimento, & nullum jus postulatione nactus sit; secus notaretur de ambitione; debet tamen declarare intentionem suam dicendo: *Non dissentio*; imo postulatus Episcopus, qui liberum non habet volatum, neque consentire, neque non dissentire debet, sed dicere: *Dispositioni D. Papæ me committo & suppono* (1). III. Post hunc etiam qualemcunque consensum postulantibus, si pars major velit, *re integra*, id est, antequam sit postulatio Superiori præsentata, *pænitere* licet, & voluntatem mutare; quia postulatus jus nullum acquisivit. Quia tamen postulatio *statim*, postquam in Capitulo secrete peracta est, clero, populoque in Ecclesia præstolanti *publicari* debet, ne vitium clandestinitatis contrahat, cavendum est, ne ex variatione fama postulati periclitetur. c. 33. de R. J. in 6. ibi: *Mutare consilium quis non potest in alterius detrimentum*. IV. Interea vero, donec postulatio non tantum Superiori præsentetur, sed ab eo etiam admittatur, postulatus nullo modo administrare potest in spiritualibus, vel temporalibus. c. 23. de elect.; secus postulatio certo certius repellitur, nisi nova & specialis fiat gratia.

(1) C. 16. de elect. in 6. ibi: „Salvo eo, quod postulati hujusmodi nec suis postulationibus præstare consensum - - si non dissenserint.“ Item Glossa in cit. c. 16. v. *consensum*. & Panormitanus in c. fin. de post. prælat. post med.

§. 265. IV. Cum Superiori præsentanda jam est postulatio, fit discrimen inter defectus postulato-
rum; si enim aliqui *patientes in ordinibus, vel ætate defectum*

defectum vel his similes postulentur, ipsi personaliter arripere debent iter Romam: si vero postulentur alligati Ecclesiis, secundum jus vetus c. 1. de elect. in 6. comparent per procuratorem. In hunc modum locus obscurior c. 16. de elect. in 6 explicatur per Glossam in d. cap. v. Nostra, & veteris. V. Ex-pensas, quæ ministrari debent personis ad Superiorem missis a postulantibus, ministrare debent ipsi postulantes; quia totum ipsorum est negotium; cit. c. 16. de elect. in 6.: aliter fit in electione. VI. Effectus præsentatæ coram Superiore postulationis, est, ut resilire & pœnitere non liceat postulantibus. c. 4. de postul. præl., ne Superiori illudatur, ejusque judicium a postulantium pendeat arbitrio. Hæc ratio non a postulato, sed Superiore derivatur; unde si Superior etiam post præsentatam admittit variationem, postulatus non habet, de quo conqueratur. Panormitan. in c. 4. de postul. præl. nota 11. VII. Superior, cui præsentata est postulatio, diligenter inquirat tam de meritis postulati, quam de necessitate Ecclesiæ, ad quam est postulatus, aut a qua forte avocatur. C. 3. h. t. repulsa est postulatio Cardinalis, quod ejusdem præsentia utilior esset non solum Romanæ, sed etiam Ecclesiæ generali.

§. 266. VIII. Admittere postulationem Superior non tenetur ex *justitia*; ipsa postulatio vi notionis est mera *supplicatio pro gratia*; & ideo neque postulantes quidquam *suffragante jure* petunt a Superiore, nec postulato aliquid juris acquiritur. c. 3. ibi: Cum Apostolica Sedes, etiam quando aliquis ab aliis unanimiter postulatur, ad admittendam postulationem eorum non tam ex *justitia*, quam *gratia* moveatur, & c. 5. h. t. per postulationem hujusmodi nullum jus est alicui acquisitum, ideoque sine præjudi-

judicio alicujus postulationem potuiffemus spellere memoratam. Huic decisioni non obstant concordata Germaniæ (m). IX. Quia negotium postulationis est res gratiæ; & solus Papa hunc rigorem præscripserit postulationi, ut suffragia duplo majora, quam concurrens electio, requirat, infert Nellerus in cit. diff. §. III. a Papa non obstante c. 40. de elect. admittere postulationem posse, quæ pro se habet majora capituli, non tamen est votis duplo major electione, quacum concurrit, absque injuria electi, habentis pro se ultra unam tertiam (n); si tamen Papa de *speciali gratia* nolit admittere postulationem talem, tum (si plenitudine potestatis non utatur) confirmare deberet electionem tali postulationi oppositam, utpote Canonicam, nempe conformem c. 40. de elect. X. Si postulatio concurrit cum postulatione, unaque, nempe facta *per duas tertias*, fuerit rejecta, altera habens *unam tertiam* non videtur *de jure* admittere posse; quia nimia foret suffragiorum divisio & contradictio; & quia *duæ tertiæ* faciunt præsumptionem partis sanioris. c. 9. de elect. in 6.

(m) *Papa in Concordatis §. 3. spondet, quod electiones, si Canonice fuerint, sit confirmaturus, nisi ex causa rationabili & evidenti, & de Fratrum consilio, de digniori & utiliori persona duxerit providendum. De postulationibus nihil memorat. Ipsum Concilium Basileense agens Sess. XII. de electionibus & confirmationibus Episcoporum, addit: „Postulationibus in juris communis dispositione remanentibus.“ Concil. edit. Mansi Tom. XXIX. Col. 61. Putant tamen, rejecta tali postulatione jus eligendi vel postulandi redire ad Capitulum. Vide Animadversiones in cit. dissert. Nelleri.*

(n) *Id etiam post Concordata in Germania habere locum defendit Nellerus l. c. de studio partium Romanarum minime suspectus.*

§. 267. *Effectus admissæ postulationis* est, quod habeat vim confirmatæ electionis: non videtur tamen sola admissio, nisi postulatus absolute, & de novo consentiat, efficere conjugium spirituale ratum inter Ecclesiam & Postulatum. Sane si impediti contrahere matrimonium carnale sponsalia faciant sub conditione, *si Papa dispensaverit*, post obtentam dispensationem requiritur novus consensus.

§. 268. Superior, cui præsentanda, & a quo admittenda est postulatio, plerumque est Papa; quia in ejusmodi impedimentis solus plerumque dispensare potest. Ad Episcopum dirigenda esset, 1. si canonicatus ponitur electivus, & obstat statutum Episcopale vel antiqua consuetudo, ne minor 25. an. eligatur. 2. Si in casu personatus electivi locum habet c. un. de ætat. in 6., vel 3. in casu beneficii simplicis electivi c. 1. de fil. presbyt. in 6. 4., vel in casu contractæ bigamiæ similitudinariæ c. 4. de cler. conjug. & c. 1. qui clerici., vel 5. in casu, quo Episcopus vi Trid. dispensare potest in irregularitate occulta, cujus oborta suspicione aliquis sic ferret suffragium: *Eligo, vel posulo, prout potest melius de jure valere.*

§. 269. Hactenus de postulatione solemnium actum est: quæ ab electione sane differt 1. *origine & natura*; quia supponit impedimentum Canonicum, estque medium extraordinarium. 2. *Perficiendi modo*; nam in concursu cum electione, duplo majorem suffragiorum numerum requirit, nec admittit consensum absolutum postulati. 3. *Effectu*; quia admittit variationem, antequam præsentetur Superiori, imo etiam cum istius consensu post præsentationem: nullum dat jus, nec actionem Postulato: innititur gratiæ, non justitiæ; & ideo a Superiore
admitti

admitti dicitur postulatio; electio vero confirmari.
 4. *Expensis* postulantium obtinenda est *postulatio*: contra electus suis sumtibus de jure communi tenetur procurare confirmationem.

§. 270. Ob has postulationis molestias fere fit hodie, ut, quibus atas vel alius Episcopatus, aut quidvis aliud impedimento est, aut esse videtur, quo minus eligi possint, ii a Sede Apostolica indultum, seu Breve eligibilitatis impetrare studeant. Sed quid? si quis Episcopus indulgentiam Apostolicam sub hac obtineat forma? *Quodsi ad aliam vocaretur forsitan Ecclesiam, eam sibi liceret assumere?* Anne eligi potest, aut postulari debet? R. Postulari debet. c. ult. de transl.; quia vi hujus indulti Episcopus neque solutus est a vinculo prioris Ecclesiæ, neque se ipsum propria voluntate absque novo examine tum personæ, tum factæ postulationis absolvere potest. Putant multi, talem indulgentiam locum dare electioni; alii negant ex cit. cap., in quo res acta est via postulationis, ut adeo indulgentiæ illius alius effectus non sit, nisi ut postulatus jus consentiendi acquirat, & postulantes jam variandi amittant.

§. 271. *Simplex postulatio*, de qua agendum est demum, est petitio licentiæ, ut superior in electionem Personæ sibi subditæ, nullo alias Canonico defectu impeditæ, consentiat. Dicitur *minus sollemnis*, quia nullas requirit solemnitates, ac fieri potest quocunque modo, verbis, vel per Epistolam, ante electionem ab eligentibus, non quatenus ipsorum, sed eligendi Superior est: vel post electionem petita ab electo licentiæ; antea enim consentire non potest; secus electio est irrita; c. 27. de elect. in 6. Inducta est hæc Postulatio antiquissimis temporibus honestatis

tis Canonicae causa, tanquam *observantia*, quæ *pacem custodit*. Can. 6. dist. 71.; ne scilicet Clericus vel Monachus sine consensu vel præscitu Prælati, cui subest, ab Ecclesia abstrahatur.

§. 272. Hac ratione postulantur 1. Cardinales non Episcopi. c. 3 h. t. 2. Prælati, Episcopis inferiores, Abbates c. 36. de elect. in 6. 3. Clerici beneficiati alienæ dioceseos. can. 14. dist. 63., nisi ante obtinuerint dimissorias a suo Episcopo.; can. fin. dist. 76 & can. 37. VII. q. 1.: ac si talis Clericus petendæ ab Episcopo suo licentiæ copiam non habeat, postulandus est a Papa, can. 5. dist. 71. 4. Monachus vel Canonicus regularis, imo quivis religiosus c. 27. de elect. in 6 & c. 11. de renunt., ac Superior monasterii facultatem dare potest, irrequisitis conventibus. cit. c. 27. 5. Cum Episcopo dandus est Coadjutor, etiam sine jure successionis. c. Un. de Clerico ægrot. in 6. Si vero cum successione dandus est, postulari debet: tunc enim opus est Apostolica dispensatione; quia Canones pridem recepti prohibent viventi dare successorem. Praxis est, prævie petere licentiam a Summo Pontifice; qua obtenta per viam electionis proceditur; nisi successor vocetur alligatus jam Ecclesiæ, aliterve impeditus.



TITULUS VI.

DE ELECTIONE, ET ELECTI POTESTATE.

. ARGUMENTUM.

- I. Notio electionis: fit Sede vacante: debito tempore & loco. §. 273. II. Vox activa: sententia collegialis & libera. §. 278. III. Vox passiva, seu eligibilitas. §. 288. IV. Præparatio remota, vocatio absentium, constitutio procuratorum, tractatus §. 296. V. Actus electionis & forma per scrutinium, compromissum, quasi inspirationem. §. 303. VI. Publicatio electionis & consensus electi §. 315. VII. Confirmatio Electionis §. 316. VIII. Causa & processus Electionis §. 319. IX. Consecratio Electi §. 331. X. De Electione Summi Pontificis, & Abbatum &c. §. 337.*

§. 273. Electio stricte dicta (240. n. II) est canonica vocatio Personæ habilis ad Prælaturam vacantem, facta per suffragia legitimorum electorum, a Superiore fere confirmanda. Notionem non ingreditur sexus; quia etiam abbatissæ eliguntur: neque necessario, sed fere aut plerumque confirmatio Superioris; quia aliquæ dignitates electivæ in quibusdam locis, e. g. Decanatus, confirmari non solent ex consuetudine. At notionem ingreditur I. Prælatura vacans. II. Suffragia legitimorum Electorum, & sententia collegialis. III. Habilitas Personæ eligendæ. IV. Forma Canonica. V. Secundum modernum Germaniæ usum Confirmatio.

§. 274. Primum igitur est, ut constet de Sede vacante, seu ut Ecclesia dici possit viduata. Quomodo vacatio contingat *de facto tantum*, *de jure tantum*, *de jure & facto simul*; itemque quomodo ea vacet *vere* aut

aut *fiſſe*, quidve juris vacante Sede Capitulo, vel Administratori Eccleſiæ viduatæ competat, exponitur l. 3. Decretal. tit. 9. *Ne Sede vacante aliquid innovetur*. Si viventi Præſato Coadjutor cum jure ſucceſſionis detur, id ſpeciali nititur diſpenſatione, aut facultate præcedente Romani Pontificis, Trident. Seſſ. XXV. c. 7. de ref. In regula, *vivente Præſato*, licet ejus vita deſperata ſit, I. irrita eſt electio. II. Non tantum prohibitus, ſed etiam invalidus eſt tractatus de Electione ſucceſſoris, c. *bonæ memoriæ* 36. h. t. & can. 7. diſt. 79. III. Citatio ſeu vocatio ad Electionem peragendam, emiſſa ante mortem Præſati, ipſo etiam jure eſt irrita, nec conſtringit vocatum. IV. Si ante mortem Præſati extra Capitulum, vel in Capitulo velut incidenter mentio fiat de Perſona ei ſubſtituenda, de tempore vel loco futuræ Electionis; cavendum, ne id videatur habere ſpeciem tractatus capitularis, mutuæ promiſſionis, vel pacti de certa Perſona eligenda: tales enim pactiones reprobantur; ac ſi poſtea appareat, Electionem ex ejusmodi pactione originem duxiſſe, ea caſſari poterit; ut obſervant interpretes ad cit. c. *bonæ memoriæ*. V. Potestas Præſati eo etiam pertinet, ut de forma, tempore & loco Electionis poſt ſuam mortem futuræ ſtatuat: ut ante mortem Electores convocet, ad concordiam hortetur, de ſucceſſore conſul-
tet: certum etiam proponat: arg. can. 10. diſt. 79. Capitulares tamen poſt mortem non prohibentur recedere, & alium, ac propoſitus fuerat, eligere; quia jure cautum eſt, ne Episcopuſ ante vitæ finem ſibi ſucceſſorem conſtituat. can. Episcopuſ. 4. VIII. q. 1.

§. 275. *Cum primum Eccleſia vacaverit, ſup-
plicationes ac preces publice, privatimque habeantur, atque a Capitulo per civitatem, & diœceſin indi-
cantur,*

cantur, quibus clerus, populusque bonum a Deo pastorem valeat impetrare. Trid. Sess. XXIV. c. 1. de ref. Ante corpus sepulturæ traditum, ac tertium depositionis diem de Electione instituenda collegialiter ac definitive decernendum non est, can. 7. dist. 79. c. bonæ memoriæ 36.; nisi gravis causa festinationem exigat. Huic exceptioni non obstant verba cit. c. 36. ibi: *Quia, corpore dicti Episcopi nondum tradito sepulturæ, habuerunt de ipsa electione tractatum;* nam in proposita ibi specie facti Electio cassata fuit, non tam ob tractatum ante sepulturam habitum, sed ob vitium convocationis Electorum, quæ Canonica non fuit, quippe facta ante mortem Episcopi, ut notat Glossa ibi v. *Tractatum.* Reipsa post mortem Prælati Ecclesia est viduata, & morte ejusdem mox cognita, currit etiam tempus ad Electionem concessum.

§. 276. Post tertium ergo depositionis diem præfigendus est terminus futuræ Electionis, & locus. *De tempore ergo, intra quod Electio fieri debet, & de loco nunc agendum.* Ac de tempore quidem, intra quod fieri debet Electio, distinctio fit inter cathedrales & regulares Ecclesias ex una parte: & alias prælaturas, dignitates ac beneficia Ecclesiastica ex altera parte. *De Ecclesiis cathedralibus & regularibus* jus decedit, I. ne ultra tres menses vacent; intra quos (*justo impedimento cessante*) si Electio celebrata non fuerit, qui eligere debuerant, eligendi potestate careant ea vice, ac ipsa eligendi potestas ad eum, qui proximo præesse dignoscitur, devolvatur, C. 41. can. 11. dist. 50. (a). II. Ex verbis: *justo impedimento cessante*, infertur, tempus præfixum non esse continuum, sed utile in initio, & decursu, Glossa marginal. in can. *bene novit.* 18. dist. 61. adeoque non currit primo ignorantibus: vel postea impe-

impeditis. III. Terminus trimestris statutus non est, ut ante eum eligere non liceat, sed ne *ultra* cum Electio differatur; ac fieri potest, ut ob varia pericula accelerari debeat electio; quo casu Capitulares ad id cogi possunt a Superiore. IV. Si electio ex eo non sortiatur effectum, quia electus consentire recusat, vel post consensum renuntiat juri suo, aut forte diem claudit extremum, seu propter occultum ejus vitium irritatur, electores (qui jam fecerant, quod spectabat ad ipsos intra juris terminum eligendo) habebunt a dissensu, renuntiatione, morte, vel irritatione prædictis, ac si vacatio nova esset, tempus integrum ad electionem aliam celebrandam: dummodo nil fraudulenter egerint in præmissis. c. 16. in 6. V. Ad tempus electionis illud etiam videtur referendum, congruum esse, ut Electio de die instituat, non autem noctu, præsertim si forma adhibetur scrutinii. Si qua urgens necessitas aliud exposcat, tot adhibenda sunt luminaria, ut omnis fraudis suspicio excludatur (b).

(a) *Cit. locis adduntur gravissimæ rationes hujus dispositionis. Ceterum aliæ Prælaturæ, dignitates & beneficia Ecclesiastica ultra sex menses vacare non debent. c. 2. de concess. præb. Secus fit devolutio ad alios, quemadmodum explicatur ad tit. de suppl. neglig. Si in cathedralibus vel regularibus Ecclesiis intra tres menses non fit electio, ex concordatis Germaniæ jus providendi devolvitur ad Papam.*

(b) *Rodriquez. Tom. II. Regular. q. 51. art. 15.*

§. 277. *Locus, in quo electio Prælati institui debet, est Ecclesia, c. 28. & can. 1. §. 4. dist. 23.; & quod ejus ambitu continetur, cœu chorus, c. 19. aut Capitulum, c. 21. secundum cujusque Ecclesiæ consuetudinem. Si Capitulares in loco Ecclesiæ suæ*

convenire non possint, e. g. ob violentiæ timorem, obsidionem civitatis, alio in loco tuto electionem instituere non prohibentur, arg. can. 1. §. 4. dist. 23.; cum præsertim universitas expulsa e loco proprio, alibi congregari, ac de rebus suis statuere possit, ut notat Baldus in l. cunctos populos. 1. n. 11. C. de Sum. Trinit.; quia, ut ait, hoc non est jurisdictio contentiosæ, sed voluntariæ.

§. 278. Quia Electio vi notionis fieri debet per suffragia legitimorum electorum, & sententiam collegialem (§. 273); agendum est de *voce activa*, quæ est jus coeligendi. Ea spectatur 1. in singulis, quibus id jus competit. 2. Quomodo ex suffragiis singulorum fiat sententia collegialis. 3. Neceffe est, ut in usu hujus juris tum singuli, tum universi gaudeant libertate.

§. 279. Suffragia inhabilium, id est, eorum, qui jure eligendi non gaudent, nullum omnino pariunt juris effectum; in quam sententiam proprie cadit regula juris 64. in 6.: *Quæ contra jus fiunt, debent utique pro infectis haberi.* Talia sunt suffragia laicorum, populi, potestatis secularis, c. 2. 43. 51. (conf. dicta a §. 243. seq.). Si inter habiles misceantur aliqui inhabiles, sola habilium suffragia attenduntur, etiamsi constituent minorem partem; imo jus eligendi potest devolvi ad unum, si reliqui omnes facti essent inhabiles. Siqui e. g. extranei, aut inhabiles facti electioni se immiscent, & jus coeligendi prætendunt, ne sufflaminentur habiles, & electio extrahatur, interponi solet protestatio, *quod vox eorum, qui non deberent interesse de jure vel consuetudine, non valeret.* c. 50. In Processu dein confirmationis examinatur quæstio, siquidem ex ea pluralitas suffragiorum, & exitus electionis pendeat.

§. 280.

§. 280. Vocem activam, seu jus suffragii in electione de *jure communi* & *ordinario* habent omnes Capitulares Ecclesiæ vacantis. c. 1. h. t. & soli; omnes, inquam, nisi impediuntur defectu, censura, irregularitate, delicto: & soli; nam *extranei*, qui non sunt de Capitulo eligente, habent præsumptionem contra se, & *jus speciale* atque *extraordinarium probare debent*; de quo infra. *Excorporatione* igitur illud jus amittitur; nec valet reservatio vocis activæ quoad prius monasterium facta a monacho, qui in alterius monasterii abbatem electus, eo transmigravit. c. 47. Si de jure eligendi Canonicos in Ecclesiis cathedralibus agitur, Episcopus relate ad Capitulum nequit pro *extraneo* haberi, nec habet præsumptionem contra se; quia electio Canonicoꝝ de jure communi videtur pertinere ad Capitulum, & Episcopum simul. Qui privative jus eligendi sibi competere ait, id probare debet. c. 31. h. t.

§. 281. Impediuntur aliqui ex dispositione juris, quo minus eligant, seu vocem activam habeant, etsi sint de Congregatione, aut Capitulo Ecclesiæ vacantis *ex defectu* I. ætatis, seu impuberes. c. 32. in 6. eo referendi sunt omnes, qui discretionem carent e. g. Furiosi. II. Ordinis, nondum Subdiaconi, etsi essent de Capitulo, & reliqui Capitulares eos vellent admittere. Clem. 2. de ætat. & qual. quam constitutionem SS. Conc. Trid. in terminis renovavit Sess. XXII. c. 4. de ref. III. justæ causæ absentiæ; siquis enim sine legitimo impedimento absit, ne quidem per procuratorem admittitur ad eligendum. c. 42. §. 1.

§. 282. Impediuntur *per censuram* I. *excommunicationi* excommunicatione majore c. 23. de appellat. c. Un. ne Sede vacante. in 6. Excommunicatio mi-

nor jus suffragii non adimit, c. fin. de Clerico excom. II. *Suspensi* simpliciter, vel ab officio tantum. c. 16 h. t. & c. 8. de conf. Qui scienter eligunt indignum, triennio suspenduntur a beneficiis c. 7. §. fin. h. t.; & tamen pro una tantum vice privantur voce activa. Si ergo intra triennium incidit secunda vel tertia electio, admittendi sunt ad eligendum, c. 25. ergo suspensio a beneficio tantum, vocem activam per se non adimit. III. *Personaliter interdicti propter delictum*; arg. c. 16. h. t. Ceterum affecti censura, si sint tolerati, & adversus eos non excipiantur, videntur valide eligere (c); quia jus eligendi non respicit favorem eligentium, sed Ecclesiæ & fidelium.

(c) Vid. Cl. Zech de Hierarchia tit. 19. §. 210.

§. 283. Impediuntur *irregulares* ob eam causam; quod scienter celebraverint in loco interdicto, c. 18. §. Un. de Sent. excom. in 6. De *infamia* expressum non est, quod removeat ab eligendo: nam quod regula juris 87. in 6 dicit: *Infamibus portæ non pateant dignitatum*; id de suscipiendis honoribus, non conferendis intelligi debet. Sed anne pati tenentur reliqui viri honesti, ut secum in Capitulo confideat, gravissimumque tractet negotium homo, cujus infamia vel per sententiam constat, vel ita aperta est, ut nulla tergiversatione celari possit? Non tenentur sane; arg. l. 2. D. de officio adfessorum, nec tenentur admittere ejus procuratorem; quia legitima non est absentiae causa, quam sua culpa quis posuit.

§. 284. Impediuntur *delicto*, at pro una tantum vice, I. scienter eligentes vel postulantes indignum, c. 1. de postul. Prælat. c. 7. §. 3. X. & c. 7. in 6. II. Ad

II. Ad Episcopatum scienter postulantes eum, qui 27. non attigerit annum, Extrav. Un. de postul. Præl. int. com. III. Attentantes innovare postulationem a Superiore jam cassatam, c. 2. de postul. Præl. IV. Permittentes fieri electionem per abusum secularis potestatis, c. 43. de elect. ; nempe ii, qui scienter admittunt laicos ad coeligendum, vel immiscentes se electioni cum auctoritate, & intervenientes tolerant. V. Qui non observant formam præscriptam c. 42. h. t., per sententiam privandi sunt jure eligendi. De his dicitur infra a §. 318.

§. 285. *Jura specialia*, ob quæ eis, qui de Capitulo eligente non sunt, vox activa competere potest (§. 280) nituntur I. privilegio Summi Pontificis; II. reservatione in foundatione facta; III. singulari concessione totius Capituli per unanimem consensum, c. 40. h. t.; IV. bonæ fidei possessione canonicatus; V. nomine procuratorio; VI. consuetudine ab antiquis deducta temporibus: constat enim, electiones Episcoporum olim celebratas fuisse a toto clero civitatis, donec capitula majora Seculo XII & XIII. præscripsissent jam contra eos, ita, ut *secundum statuta Canonica* (eorum temporum) *electiones Episcoporum ad cathedralium Ecclesiarum clericos regulariter pertinerent, nisi alibi secus obtineret de consuetudine speciali*, c. 3. de caus. poss. ff. VII. Præscriptione, cit. c. 3.; quapropter si consuetudo specialis allegatur, ea tanti temporis esse debet, quæ ad legitimam præscriptionem sufficiat §. 228. Extraneus, qui jus eligendi quasi possidet, in possessione manutenetur, c. 3. de caus. poss.: hinc præstat tueri se possessorio, non cumulando petitorium; probari autem in possessorio debet non solum, quod quis electioni interfuerit, & scrutatores etiam volunta-

tem ad id dederint, sed etiam, quod inquisita fuerint ipsius vota, & ipse elegerit, c. 24. & 50. h. t. Si quis incautus petitorium cum possessorio cumulet, fieri potest, ut vincat in possessorio, succumbat in petitorio per eandem sententiam, c. 3. de caus. poss.

§. 286. Dictum est de voce activa seu jure eligendi, quatenus *singulis* competit. Electio autem canonica fieri debet *capitulariter*, hoc est, sub forma Congregationis, aut Capituli congregati; nec sufficit, singulos seorsim extra congregationem interrogari, & decernere. Hinc post data a singulis suffragia *communis* fieri debet electio, ut dicetur §. 309. De Capitulo nota: I. Jure civili tres sufficiunt personæ, ut habeatur collegium, & sententia collegialis. l. 85. D. de V. S. jure canonico videntur etiam duæ sufficere. c. 1. h. t. II. Collegium in pluribus institutum conservari potest in uno l. 7. §. 2. D., quod cujusque universitatis. III. In tanta paucitate cavendum cuique, ne collusionem efficiat, ut ipse eligatur: multo etiam minus se ipsum eligere quis potest. arg. l. 4. D. de tutorib. & c. fin. de institut. can. 9. VIII. q. 1.; potest tamen quivis assensu suo efficere, ut habeantur majora capituli. c. 33. h. t. (infra §. 313.).

§. 287. In usu juris eligendi necesse est, ut tum singuli, tum universi plena gaudeant suffragiorum libertate; hinc I. non valet electio vi & metu extorta c. 23. h. t., ii vero, qui persequuntur, aut spoliant eligentes propterea, quod noluerint ad sua desideria accommodare suffragia, ipso facto excommunicantur. c. 12. in 6. (d). II. Nec valet electio dolo, & per subreptionis astutiam elicita. c. 32. h. t.

(d) Ut

(d) *Ut metu censeatur extorta electio, opus est, ut agens metui cesserit, & ex metu egerit. Ex defectu hujus requisiti frustra videtur opponi metus illatus in electione Urbani VI. Pontificis; neque causa justa fuit inducendi in Ecclesiam fatale schisma, ope Concilii Constantiensis demum extinctum.*

§. 288. *A voce activa transeundum est ad passivam, siue habilitatem personæ electæ. Generaliter eligi possunt omnes & soli digni. Indignitas jure communi oritur I. ex defectu, II ex delicto, III ex censura, IV ex irregularitate. Si nihil hujusmodi opponi possit electo vel eligendo, jus speciale, quo forte excluditur, probandum est ab opponente.*

§. 289. *Defectus, qui a prælaturis excludunt, sunt I. ætatis, uti si quis relate ad Episcopatum, nondum complevit annum 30 ætatis, & relate ad dignitates inferiores & beneficia curata annum 24. II. Ordinis, si quis in Episcopum eligendus antea non fuerit in subdiaconatu per sex menses. Trident. Sess. XXII. c. 2. de ref. III. Literarum & scientiæ. Trid. ibid. & c. 7. h. t., quod renovatum est a Concilio Trid. Sess. VII. c. 1. de ref. & Sess. XXIV. c. 12. de ref. (e).*

(e) *Huc pertinent omnes irregulares ex defectu.*

§. 290. *Ob delictum eligi non possunt I. consentientes in electionem sui per abusum potestatis secularis. c. 43. II. Ambitiosi, qui nempe alios sollicitarunt precibus, ut eligerentur ipsi, maxime si pacta & juramenta intervenerunt. c. 26. Quia, sicut locus regiminis desiderantibus negandus est, ita fugientibus offerendus. can. 9. VIII. q. 1. III. Retinentes sine dispensatione plura beneficia incompatibilia. c. 54. IV. Scienter eligentes simoniacum; tales enim*

enim se reddunt indignos Ecclesiasticis beneficiis. c. 26., ubi summarium, quod nullius est auctoritatis, differt a textu. V. Hæretici, & ex hoc maculato genere descendentes usque ad secundum gradum quoad lineam paternam, & primum quoad maternam c. 15. de Hæreticis in 6. VI. Schismatici. c. 5. h. t.; si tales tempore electionis abjurato schismate jam rediissent ad catholicam unitatem, neque ullum ordinem a schismatico susceperint, eorum electio *dispensative*, id est, per indulgentiam canonicam confirmatur (f).

(f) *Ad hanc classẽ pertinent omnes irregulares ex delicto.*

§. 291. *Censuræ omnes* excludunt a prælaturis & dignitatibus; nempe I. excommunicatio, etiam minor. c. 7. pr. & c. fin. de Clerico excomm. ibi: *Eoquod ad susceptionem eorum eligitur, a quorum perceptione a sanctis Patribus est privatus.* Nempe electus deberet suscipere Sacramentum Ordinis, imo etiam in sacrificando pro populo Eucharistiam; cum a perceptione Sacramentorum per excommunicationem minorem sit exclusus. Conf. Glossam in hoc c. finale. II. Suspendio a beneficio vel officio c. 8. de consuet. III. Interdictum personale, & violatio interdicti localis per celebrationem. Affectis censura nil prodest, quod tolerati sint; quia per constitutionem: *Ad evitanda scandala*, Martini V. nihil favoris ipsis censuratis indultum est.

§. 292. *Irregularitas omnis* ex defectu vel delicto, de qua infra erit agendum, excludit a prælaturis, dignitatibus & beneficiis. Huc ergo pertinent illegitimi, infames & criminosi. c. 7. h. t.

§. 193. De electione indigni quæritur I, an sit irrita *ipso jure*? Resp. I. Si indignitas oritur *ex de-*

defectu, est irrita ipso jure; quia tum procedi debet per postulationem. c. 20. h. t. 2. Si *ex delicto*, multi putant inspicienda esse verba legis, utrum prohibeant duntaxat, vel etiam irritent. Non potest quidem jure canonico generaliter statui, id, quod prohibitum est, pariter irritum esse (§. 181. in nota): at siquid per se improbat, ac prohibetur, nec aliunde e. g. a jure naturali valorem acquirit, tutius habetur pro irritato. Sola electio ejus, qui excommunicationem incurrit, dicitur *irritanda*. c. fin. de Clerico excomm. ministr.

§. 294. Quæritur II, utrum electio, quæ ob defectum vel delictum irrita est pro foro externo, etiam irrita pro foro interno censi debeat? sive an electus ad prælaturam, impedimenti occulti conscius, eam salva conscientia acceptare possit? Resp. Non potest. c. 20. h. t., ubi de illegitimo electo dicitur: *quod sponte ac humiliter suum maluit confiteri reatum, quam læsa conscientia thronum conscendere pastorem*; item c. 10. §. 6. de renunt. ibi: *Licet irregularitatem hujusmodi non potuerit subtere*, & ibi glossa. Dices: Difficile est carere prælatura, aut manifestare defectum. Resp. Difficile id est ambizioso c. homini probo & prælaturæ onera expendenti n. conf. can. 9. VIII. q. 1. & l. 31. C. de Episcopis & Clericis. Qui impedimenti sibi conscius est, agnoscit, se reipsa esse ineligibilem; nec ullum acceptandi jus habere potest, quem Ecclesia vult exclusum: nulla igitur reipsa est electio: nulla est acceptatio: nullus prælaturam tenendi titulus.

§. 295. Actum est de indignis, qui eligi non possunt. In horum autem numero non sunt I. *Extranei* Clerici vel Religiosi, si utiliores futuri Ecclesiæ videantur. c. 21. h. t. Ceteris tamen paribus præfe-

præferendus est aliquis ex gremio Ecclesiæ c. 41. h. t. & can. 13. & 15. & 16. dist. 61. can. 19. dist. 63. can. 5. §. 2. XVIII. q. 2. II. Canonici doctores, non illustres aut nobiles; nec obest, quod reliqui canonici nobiles semper ita convenerint in nobilem pluralitate votorum, ut nullus de canonicis doctoribus, non nobilibus, unquam electus fuerit: *Nam ex hoc non concluditur ad ineligibilitatem, sed solum ad æmulationem evahendi nobilem præ doctoribus canonicis* (g). III. *Personæ regulares, five Monachi, five Canonici, five Clerici*; nam hos posse evocari ad Episcopatus, certi & antiquissimi juris est. Clem. 1. h. t. c. 28. in 6. arg. can. 39. XVI. q. 1. Nov. VI. c. 1. §. 7. Non tamen in prælatum regularem eligi potest non professus, aut professus alterius ordinis, vel habitus, c. 27.; ubi additur ratio ex Deuteron. XXII. 10. *Non arabis in bove simul & asino*, id est, homines diversæ professionis in officio uno non sociabis. Ita scripturam interpretatur, vel applicat can. 22. XVI. q. 7. & ratio: *Non indueris vestimento, quod ex lana, linoque contextum est*. Deut. ibid. v. 11. id est, homines diversi habitus sociari non debent. IV. *Absentes vel inscii factæ de se electionis*. c. 20. h. t. V. *Digni simpliciter*, etsi alii digniores in gremio præsto sint. Illorum enim electio valida censeri debet, ne infinitis ambitiosis litibus ansa detur contra plerasque electiones. De obligatione autem eligendi digniores agitur ad tit. *De ætate, & qualitate & ordine præficiendorum*.

(g) Ita Nellerus scribit in *diff. de sacræ electionis processu*. §. II. Tom. II. *Thef. Jur. Eccl. n. XVII.*

§. 296. Ad præparationem remotam electionis pertinet I. ut expectetur adventus eorum, qui per se,

se, vel commissarios eidem interesse debent, etsi non sint de numero eligentium; secus electio firma non est. c. 28. h. t. & c. 2. de in integr. restit. II. Aliquando ex mandato Papæ consilium quorundam ad tractatum electionis adhibendum est; eo non requisito, aut non expectato responso nulla est electio. c. 52. h. t.: similiter ex placito partium vel arbitrorum consilium certorum requiri aliquando debet, etsi illud sequi necesse non sit. c. 7. de arbitris. III. Maxime autem ad remotam præparationem pertinet *vocatio*, sive citatio edictalis omnium, qui jus eligendi habent; *cum electioni plus contemptus unius, quam multorum contradiçtio obsit.* c. 36. Qui vocati non sunt, cum debuissent vocari, intra tempus ad faciendam electionem a jure præscriptum agere possunt de contemptu ad irritandam electionem, etsi forte jam confirmatam. cit. c. 36. Electio igitur ob contemptum non fit irrita ipso jure, sed ad instantiam ejus, qui contemptus est, irritatur. c. 33. de præb. in 6.

§. 297. Vocandi autem sunt, *qui debent, & volunt, & possunt commode interesse.* c. 42. Hinc præteriri possunt I. *qui vocem activam non habent, nisi alio muniantur jure interveniendi electioni.* II. *Nimis remoti a loco electionis.* C. 18. ad electionem Capuanam vocari non debent, qui Panormi in Sicilia versantur. C. 25. dicitur: *Fratribus omnibus, qui fuerint in provincia, convocatis.* At in c. 55. in fin. *Cum de toto regno Franciæ vocentur absentes de consuetudine Ecclesiæ Gallicanæ.* Consuetudines ergo diocesium hac etiam in respectandæ sunt. III. Qui vocari non possunt sine periculo vocantium. c. 28. in parte decisa; e. g. si electores sine gravi Principis vel hostis, qui civitatem forte occupavit, indignatione aliquem fortassis suspectum Principi vel hosti vocare non possunt.

§. 298.

§. 298. Absens per votum epistolare eligere non potest. c. 46. §. 3. in 6. ibi: *Quia votum non est ante scrutinium, sed in ipso scrutinio secrete & sigillatim tantummodo exprimendum.* Accedit, quod cum epistola non posset tractari, nec ea de utilitate Ecclesiæ, & mutatis forte circumstantiis moneri. Procuratorem ergo constituere potest absens; at sub binis conditionibus copulative, *primo*, si abest eo in loco, de quo vocari debeat; *secundo* si justo impedimento distentus, ipse venire non possit. c. 42. §. 1. Non sufficit autem impedimentum allegare, sed de eo, nisi notorium sit, fides facienda est per attestata medicorum, magistratus, vel jurejurando, dato nempe procuratori mandato speciali, jurandi in animam absentis super veritate impedimenti. cit. c. 32. §. 1. Quæ justa censeri debeant impedimenta, non definitur hoc loco; hinc aliunde petuntur argumenta e. g. de justa causa absentiae a Synodo. can. 1. V. q. 3., ex jure item civili tit. *Siquis cautionibus in judicio sistendi causa factis non obtemperaverit.* l. 2. §. 2. & 3. l. 4. §. 3. item l. 54. §. 1. D. de re judicata. At justa impedimenta non sunt, quæ ex causa privatae utilitatis proficiscuntur, ceu pluralitas præbendarum, indeque orta impossibilitas vel magnum incommodum veniendi. Conf. §. 283.

§. 299. Procurator constitui potest, I. *cum mandato generali*, ut eligat, quem suo arbitrio duxerit eligendum: ac tum si ipse est de Capitulo eligente; non potest alterum suo, alterum alieno nomine eligere; quia duplicem habere non potest conscientiam de eligendo digniore: potest autem vi generalis mandati eligere suum principalem; imo si eum judicat digniorem, tenetur ob eandem rationem; quia dividere non potest conscientiam; modo
absit

absit affectata absentiae conditio; ut quis per fidelem sibi procuratorem eo perveniat absens, quo praesens voto proprio pervenire non poterat. Si absens plures constituit, eos constituere debet in solidum, & erit tunc melior conditio occupantis; in casu autem mandati generalis, si ambo concurrant insimul, & postulent se admitti, audiri eos non expedit: quia possent vota sua dirigere in diversos, sicque res non haberet exitum, & quod ab eis hoc casu fieret, non valeret; sed is admittatur duntaxat, quem Capitulum vel pars major elegerit, vel si concordare nequeant, is, qui primo instrumento vel literis procurationis extiterit nominatus. c. 46. pr. & §. 1. & 2. in 6.

§. 300. II. Constitui potest procurator cum mandato speciali de eligenda certa Persona; ac tum alium suo, alium alieno nomine potest eligere. cit. c. 46. §. 2. in 6. nisi nempe ex dictamine conscientiae suae cum, cujus eligendi speciale mandatum accepit, iudicet indignum; ac tum suo principali refutare deberet mandatum, ne alienis peccatis communicaret, ut inquit Trident. Sess. XXIV. c. 1. de ref.

§. 301. Ex dictis patet, constitui posse vel unum, vel plures procuratores; at in solidum. cit. c. 46 in 6. Extraneus autem invito Capitulo obtrudi non potest; & quia generatim nemo tenetur mandatum suscipere: hinc absens, si nullus ex gremio mandatum suscipit, voto carebit. cit. 46. §. 3. in 6.

§. 302. Praemitti electionibus fere solent tractatus; qui sunt duplicis generis. Primo si electores agunt inter se de personis, quae eligi possunt pro Ecclesiae praesente utilitate vel necessitate; is tractatus, si ambitiosus, simoniacus, & factiosus non sit, Zallinger L. I. Decretal. O præ-

præmitti potest, præterquam in electionibus regularium, ubi nomina suffragantium occulta manere debent. *Secundo* Tractatus nomine veniunt capitulationes super certis articulis ab eligendo observandis (h). De hoc genere tractatum jus sacrum decidit: I. Omnes capitulationes, quæ libertati Ecclesiasticæ, quæ juribus electi, vel Ecclesiæ, ad quam eligitur, præjudicant, sunt illicitæ & irritæ; quia Ecclesia Sede vacante caret legitimo defensore. tot. tit. Ne sed. vac. aliq. innov. II. Si dubium sit, an ejusmodi capitulationes vel pactiones Ecclesiæ prosint, & juribus electi non præjudicent, locum obtinet Constitutio Innocentii XII. quæ incipit: *Ecclesiæ Catholicæ*. An. 1695. ejusque constitutionis declaratio facta a Benedicto XIV. a. 1754, quæ incipit: *Pastoralis regiminis*; vi quarum tales pactiones, si ante electionem sunt factæ, declarantur irritæ, & omni obligatione vacuæ: si autem post electionem, suspensa manet earum obligatio, donec a Sede Apostolica examinatæ & approbatæ fuerint. III. Quoad jura temporalia & feudalialia Episcoporum in Germania, tales pactiones ab Imperatore Leopoldo I. omni robore obligandi exutæ sunt, antequam ab Imperatore examinatæ & confirmatæ fuerint.

(h) E. g. *Ut Episcopus de sua mensa aliquid cedat Capitulo: ut de negotiis, quæ Episcopo reservantur de jure, nil disponat sine consensu Capituli: ut ad certas dignitates e. g. ad Vicariatum in temporalibus vel spiritualibus non eligat, nisi canonicum capitularem.*

§. 303. *Ventum jam est ad actum electionis, ejusque formam canonicam.* Ipso igitur electionis die campanæ signo convocantur electores. c. 30. Invocatur gratia Spiritus S. (celebrata Missa de Spiritu S.) c. 14. & 18. h. t. & c. 3. de caus. poss. Congre-

gregantur electores in loco electioni destinato. Personæ, ad actum electionis requisitæ, ut procurator electionis, notarius, testes &c. juramenta consueta faciunt. Notarius cum testibus refigit edictum citationis a valvis: superscribit actum refixionis, & reprodūcit illud coram Capitulo: docetur omnes rite esse vocatos: accusatur contumacia absentium. Præses vel director electionis in Ecclesiis cathedralibus Germaniæ est Decanus, vel eo absente Capitularis Senior; qui orationem habet ad Capitulares: dein constituitur numerus præsentium per se vel procuratores, ut constet, quot vota faciant majora: juratur de eligendo dignore: quæritur, qua forma procedere velint ad electionem; per scrutinium nempe, an compromissum.

§. 304. Formæ Canonice sunt duæ, scrutinium, & compromissum. c. 42. ibi: *aliter electio facta non valeat*. Additur exceptio: *nisi forte communiter esset ab omnibus, quasi per inspirationem absque vitio celebrata*. De hac exceptione animadvertite: I. In primitiva Ecclesia sæpe aperto Spiritus S. indicio designabantur eligendi, ut constat act. XIII. 2. Ad eundem modum quidam sensu proprio explicanda dicunt verba Act. XX. 28. *Attendite gregi, -- in quo vos Spiritus S. posuit Episcopos, regere Ecclesiam Dei*. II. Posterioribus etiam temporibus divini impulsus, aut quasi inspirationis frequentia extant exempla, quorum aliqua leguntur in Horis Canonicis: velut de S. Petro Chrysologo 4. Decemb. de S. Nicolao 6. de S. Ambrosio 7. (conf. §. 248. 249.) de S. Eusebio Vercellensi 16. ejusdem mensis. De Alexandro, Cappadocum Episcopo: cum Hierosolymam veniret, narrat Eusebius H. E. l. VI. c. 9. III. Vitiosa aut suspecta censeretur electio, per quasi

O 2

inspi-

inpirationem celebrata, si tractatus aut conquisitio votorum præcessisset.

§. 305. *Scrutari* vi notionis videtur idem denotare, ac inquirere diligenter, singilatim, ac secreto. Tale scrutinium, vel talis inquisitio observatur in hac forma; ac fit *secreto*; ne posteriores suffragio suo electionem inclinare queant, quo ipsi volunt. Constat hæc forma quinque his actibus, qui sequuntur. I. *Electio scrutatorum*. Eligi solent tres, a Capitularibus congregatis; nisi jure speciali id munus ad quosdam digniores Canonicos pertineat. Non videntur eligi posse extranei; quia c. 42. dicitur: Assumantur tres de Collegio fide digni. Aliter est in compromisso.

§. 306. II. *Secreta suffragiorum Collectio* fit edito prius, ubi moris est, aut ubi exigitur, juramento. Secreto igitur, singilatim, ac diligenter exquiruntur vota Capitularium, eaque, sive ore prolata fuerint, sive, quod usitatius est, scripta & clausa ad scrutatores delata, annotantur in Protocollo: *Capitularis NN. dedit votum suum Capitulari NN.* expressis tum eligentis, tum electi nominibus. Scrutatores vel primo, vel post ejus, qui collegio præest, votum scrutantur se ipsos, nempe secundus & tertius primum, primus & tertius secundum, primus & secundus tertium. Infirmi, in civitate vel monasterio præsentés, deberent, sicut ceteri absentes, votum dare per procuratorem; revera enim absunt justa ex causa: solent tamen alicubi scrutatores ad aedes vel cameras infirmorum accedere, & scrutari infirmorum vota. Porro scrutatorum, dum suffragia colligunt, non est, vota perperam data, admonitione corrigere, sed ea, uti enunciata sunt, redigere

gere in scriptum; etsi contra c. 2. in 6. vota enuntiata, fuerint conditionalia, alternativa, incerta. Talia enim in collatione habentur pro non adjectis. cit. c. 2. in 6. Videtur tamen ad officium scrutatorum vi notionis pertinere, mentem & voluntatem suffragantium diligenter exquirere, si ea obscure, & incertis verbis primo proponatur.

§. 307. III. *Publicatio scrutinii* fit illico nullo actu extraneo, longiorisve moræ intervallo interposito, & quidem *in communi*, recitando coram universis electoribus protocolium, in quod vota fuerunt consignata. Hanc publicationem nemo potest appellando suspendere. c. 42. Effectus est, ut nemini liceat pœnitere post hanc publicationem, c. 58. unde etiam accessus ad aliorum suffragia permissus non est cit. c. 58 & 29. extra electionem Summi Pontificis, & Abbatissarum, c. 6. X & c. 43. §. Sane. in 6. Regulares, qui suffragia scripta sine suffragantis nomine mittunt in urnam, etiam ante publicationem pœnitere non possunt.

§. 308. IV. *Collatio suffragiorum* est triplex, numeri ad numerum, zeli ad zelum, meriti ad meritum, ut appareat, quis a *majori* parte, quis a *digniore*, & quis inter coelectos *dignior* sit electus. c. 55. h. t. & can. 5. dist. 23. ubi non modo de numero statuitur, sed etiam persona eligentium & electi spectanda dicitur. Hæc collatio suffragiorum necessaria est, ejusque omissio irritam facit electionem. c. 50. in fin. & c. 55. Electores ad eam, si opus fuerit, compelli debent per Superiorem, c. 58. nec oiberit actui, si ejus continuitas hoc modo interrumpitur, ne renitentes ex sua resistentia lucrum habeant. Gloss. in c. 52. v. *compellantur*. in f. Porro animad-

vertendum I. *de comparatione numeri ad numerum*. Vota conditionata, alternativa, incerta rejiciuntur penitus. c. 2. in 6. In Electionibus Prælatorum majorum requiruntur absolute majora. c. 48. & 55. h. t. (§. 261); adeo autem requiruntur absolute majora, ut ne quidem compromissum valeat sub hac formula: *Quod compromissarius secreto & singulatim, votis singulorum de Capitulo exquisitis, & in scriptis redactis illum eligat, in quem plures de Capitulo partium comparatione minorum consenserint, licet consentientes majorem partem totius Capituli non attigant.* c. 23. in 6. quia hæc formula est in fraudem Canonis absolute majora requirentis, c. 42. & obstat regula juris 84. in 6. Absolute majora computantur ex toto Capitulo, ut est congregatum, non uti institutum & ordinatum est. c. 42. ibi: *qui volunt interesse.* & c. 19. ibi: *quoniam ad electionem faciendam accedere noluerunt, alienos se fecisse videntur (i).* De casu, quo minora vincunt, dicetur infra de vitiosa electione §. 319. 320.

II. *De comparatione zeli ad zelum, & meriti ad meritum.* Si in unum duæ tertiæ votorum conspirent, comparatio zeli aut meriti omnino opponi non potest: potest tamen opponi, quod vota illius reddat irrita ipso jure. c. 9. in 6. Pars Capituli absolute major saltem præsumitur sanior c. 57. Si tamen superiori electio subjicienda est, contra hanc præsumptionem locum habet probatio in contrarium, quia copulative requiruntur vota majora & saniora c. 42.

(i) Si instituti sint 16, & 12 congregati, pars major sunt 7. Putant, saltem duas tertias Capituli, ut institutum est, adesse debere; sed Canones nullibi id statuunt, & ex locis citatis infertur contrarium. Dicitur quidem c. 19. pr. in parte decisa: Cum hoc, quod duæ partes Capituli faciunt,

faciunt, totum facere videatur; *sed enim id refertur ad Capitulum congregatum, non institutum. Satis ergo est, spectari majora Capituli congregati; modo absentes contenti non fuerint. L. 3. & 4. D. quod cujusque Universitatis. agitur de Syndico vel actore ad causas universitatis constituendo, nec traditur generalis regula, quod ad valorem cujusvis actus Capitularis præsentia duarum tertiarum Universitatis vel Collegii requiratur.*

§. 309. V. *Communis electio* sequitur factam collationem votorum, quando aliquis Capitularium surgens dicit: *Ego meo nomine, & totius Capituli (vel in discordia) mihi adhærentium eligo in Episcopum & pastorem Ecclesiæ NN. talem NN. electumque pronuntio in nomine Patris & Filii & Spiritus S. Hæc communis electio adeo necessaria est tum in scrutinio, tum compromisso, ut, si omittatur, electio formæ vitio fiat nulla. c. 55. v. Nec etiam, ibi: Ne sequeretur absurditas, ut tot essent electiones, quot essent numero eligentes, & c. 4. de sent. & re jud. in 6. ut censeatur evidentius unica & communis electio. Adde c. 21. h. t. in 6. Nec communis ista electio, si omissa est, per aliud æquivalens e. g. per solemnitatem deportationis suppletur; quia, quæ formæ sunt, non supplentur per aliud. Si tamen ea in discordia prohibetur ab adversa parte, vel alterius fiat communis electio, id non obest, modo petita fuerit a parte altera; tum enim suppletur officio Superioris, præsertim quia duæ electiones fieri non possunt. Ceterum jus non definit, a quo fieri debeat, a Præsidente, uno ex scrutatoribus, vel alio ad id constituto nomine omnium; modo non fiat ab eo, qui majora tulit suffragia, quia non potest eligere se ipsum.*

§. 310. *Compromissum* fit, quando ii, qui jus eligendi habent, id transferunt in alium, vel alios

promittendo, quod recipiant illum, quem is, vel ii elegerint in prælatum, c. 8. & 32. pr. In constitutione compromissi duo interveniunt; *primo* abdicatio voti proprii per se ipsum dandi, atque hoc fit singulariter, non capitulariter; ita, ut singuli consentire debeant, & unius contradictio compromissum impediatur, c. 29. de R. J. in 6. *secundo* translatio potestatis eligendi in alium vel alios; id fit Capitulariter, immediate vel mediate c. 30. non tamen per sortes, c. 3. de fortilegiis.

§. 311. Compromissarii eligi possunt unus vel plures, c. 8. & 21. & c. 32. h. t. etiam extraneus vel extranei. cit. c. 8. quod secus habere videtur in scrutatoribus §. 305. Necesse tamen est, ut iis instructi sint qualitatibus, quæ alias requiruntur in eligentibus. arg. c. 51.

§. 312. *Formula compromissi* præscribitur a compromittentibus, quæ exacte servanda est; secus nihil agitur: hinc vel simplex & illimitatum est compromissum, ut in casu c. 30. vel limitatum e. g. ut eligatur unus de gremio Ecclesiæ c. 32. nam alias etiam extraneus potest eligi a compromissariis c. 21. vel ut exploretur mens singulorum, nec eligatur, nisi quem omnes, aut major & sanior pars nominasset, c. 29. in 6. confer tamen §. 308. n. I. Potest etiam præfigi tempus, intra quod compromissarii eligere debeant, c. 52. Si nullum præfixum fuit tempus, & compromissarii totum id, quod electioni faciendæ a jure concessum est, elabi patiantur, quin inter se conveniant, compromittentes sibi imputent, quod jus eligendi ea vice amittant, c. 37. Prob. in 6.

§. 313. *Effectus & vis compromissi* est, ut, quem compromissarii rite elegerint, censeatur electus a toto

toto capitulo. c. 30. Prævalent autem inter compromissarios majora, sicut inter eligentes, nisi unanimia fuerint præscripta. Per se non tenentur suffragia dare secreto, atque hinc unus *consentiendo* electioni de se factæ potest efficere majora c. 33. forte argumento l. 4. D. quod cujusque universitatis. aut exemplo §. 1. in fin. Inst. de Satisfactione tutor. In hunc sensum c. 33. vulgo explicatur. In ea specie facti septem fuerant electi compromissarii hac formula, ut illum, quem ex se vel aliis de gremio ipsius Ecclesiæ omnes pariter, vel major eorum pars nominaret, idem Capitulum reciperet in Decanum. Cum unus ex illis septem a tribus ipsorum, & alius, qui non erat de numero eorundem, a tribus aliis in Decanum fuerint nominati, Innocentius III. decidit, priorem juxta compromissi tenorem esse assumendum, dummodo electioni de se factæ consentiat. Carolus Sebastianus Berardi in J. E. T. I. diff. IV. c. 8. putat, tres posteriores alium extra gremium contra formulam compromissi nominasse, ideoque electionem priorem prævaluisse. Sed hoc ex Decretali minime colligi potest.

§. 314. *Exspirat compromissum* I. per factam electionem, etsi hæc non sortiatur effectum. c. 37. in 6. II. Per lapsum temporis a Capitulo vel jure præscripti. cit. c. 37. in 6. c. 41. X. III. Per revocationem re adhuc integra factam. c. 30. Revocatio autem re integra fieri non potest a singulis, sed per majora Capituli: re non integra, si minor compromissariorum pars renuntiat, non exspirat compromissum. cit. c. 30. IV. *Morte unius ex compromissariis*, per ea, quæ de pluribus judicibus delegatis, & saltem inspecto jure civili de pluribus arbitris compromissariis statuta sunt.

§. 315. Facta etiam in forma compromissi, uti scrutinii communi electione (§. 309.) eaque mox publicata, ne clandestina sit electio c. 42. §. 21. *de consensu & requirendo, & præstando ab electo jura decidunt sequentia.* I. Consensus ante communem electionem exhibitus non valet; unde postea repetendus est. c. 46. nec tamen præmaturo consensui vitium ambitus impingunt Canones, ut aliqui volunt. II. Quia electio etiam de absente & inscio celebrari potest; tenentur electores eandem, sive in concordia, sive discordia celebrata fuerit, intra dies 8. postquam commode potuerunt, præsentare electo, & quidem sub pœna prosecutionis processus, & suspensionis indicta c. 16. v. *ceterum si eligentes*, versus finem. in 6. III. Eligentes tenentur expectare consensum, vel declarationem electi; nec possunt interea pœnitendo ab electione recedere. c. 21. in fin. conf. c. 17., de præb. in 6. IV. Certior de sui electione factus spatium *unius mensis* habet ad deliberandum, an eandem acceptare velit, vel ei renunciare: eo elapso nî consenserit, eo ipso excidit omni jure per electionem acquisito c. 6. in 6., ubi additur ulterior provisio pro casu, quo is *electioni de se celebratæ absque Superioris sui licentia, ex prohibitione, seu quavis provisione Sedis Apostolicæ consentire non possit.* Adde Extrav. 2. h. t. int. com. V. Effectus præstiti consensus est, *primo* ut electus acquirat jus *ad rem*, & Superior jure ordinario teneatur electionem confirmare, si excipere non possit de vitio personæ, aut formæ. c. 3. ac docet historia omnium ætatum, electos jus suum ad Ecclesias viduatas strenue defendisse. Aliud est de præsentatis a patrono, qui, si laicus est, sine injuria præsentati potest variare, & quamvis non variet, sed consentiat tantum, a beneficio excludi potest præsentatus. Hoc jus ad rem,

rem, quod electus consentiendo acquirit, per deductionem in chorum, quæ statim fit, si electus adsit, non fit jus *in re*, nec dat ei jus actuale in prælatura, neque jus administrandi in temporalibus vel spiritualibus ante obtentam confirmationem c. 18. de præb. c. 9. & c. 17. h. t. & c. 5. eod. in 6., vel ante obtentum a Summo Pontifice indultum administrationis c. 44. in 6. (k) — *Secundo. Per mutuum consensum eligentium & electi quasi conjugale vinculum* (Sponsalia de futuro) *contrahitur.* c. 21. h. t. secundum elegantem allegoriam c. 4. de translatione. paritas claudicat in eo, quod his non obstantibus velut sponsalibus de futuro electus possit etiam invitis eligentibus renuntiare juri suo, & sine postulatione ad aliam eligi Ecclesiam, & electioni consentire (§. 256. n. II.), saltem *antequam* electio cum consensu electi Superiori ad confirmationem fuerit præsentata, arg. c. 4. de postul. præl. ne mutata voluntate electus Superiori illudere videatur.

(k) *Dum electis sub gravibus pœnis loc. cit. prohibetur administratio, in c. 44. §. ceterum. h. t. excipiuntur ii, qui valde remoti, videlicet ultra Italiam constituti sunt, si electi fuerunt in concordia. Hac tamen indulgentia adeo non utuntur Episcopi Germaniæ, ut ejus usus jam non videatur tutus. Zech. de Hierarch. Tit. 19. §. 224.*

§. 316. *Post consensum ab electo præstitum spectanda sunt ea, quæ confirmationem antecedunt.* I. Si in electione discordi adsit coelectus, vel oppositor, is nominatim vocandus est ad causam suam agendam: si nullus adsit, generale mandatum ad Ecclesiæ valvas affigendum, in quo citandi sunt, qui opponere volunt electionem; aliter sequens confirmatio non tenet. c. ult. in 6. II. Ipsa autem confirmatio a Superiore petenda est *intra menses tres* a præstito consensu

sensu: alias iusto impedimento cessante electio ipso jure viribus destituitur. c. 6. in 6. III. Hoc trimestre tempus quoad confirmationes a Sede Apostolica petendas Nicolaus III. in Constitutione: *Cupientes*, c. 16. in 6, quæ confirmata est per concordata Germaniæ, ita temperavit, ut Electus intra unum mensem post consensum ad Sedem ipsam iter arripiat, & post lapsum temporis ex distantia locorum moderandi, intra 20. dies electionis confirmationem petere teneatur. Ex Germania, aliisque remotis locis Electi plerumque coram Papa comparent per *procuratorem* & agentem suum excusantes personalis comparitionis intermissionem juxta benignitatem cit. c. 16. in 6. IV. Fit ergo in partibus processus informativus de Electi Natalibus, ætate, doctrina moribus; quod perquam conforme est c. 3. & c. 40. h. t. & quidem a *Sedis Apostolicæ legatis*, seu *Nuntiis provincianum*, aut ab *ejus* (Electi) *Ordinario*, eoque *deficiente a vicinioribus Ordinariis*. Trident. Sess. XXII. c. 2. de ref., qui iidem fidei professionem ab Electo exigunt, eamque una cum capta informatione, & voto suo ac publico instrumento de actu electionis, a Notario Apostolico confecto, aut a Capitularibus vel scrutatoribus subscripto ac subsignato ad Summam Sedem transmittunt; prout hæc omnia accurate præscribuntur a Gregorio P. XIV. in Bulla: *Onus Apostolicæ*. edita an. 1591. Id. Mai. VI. His Romæ diligenter discussis tam *super forma electionis*, quam *super Electi persona*, collectis etiam Cardinalium votis, succedit verbis solemnibus confirmatio per ipsum Summum Pontificem. conf. c. 19. h. t.

§. 317. *Literæ confirmationis* expediuntur in forma Bullæ gratiosæ. Extrav. 1. h. t. int. com. In
iis,

iis, si electio minus canonica deprehensa est, inseritur clausula: *Cassata electione providemus ex integro eidem Ecclesiae de eadem persona, exemplo c. 3. de Sortilegiis.* Ob defectus autem dubios, adhibetur clausula *supplentes.* c. 39. h. t.

§. 318. *Vis & effectus confirmationis est, I ut tribuat jus in re, & quasi dominium in Prælatura. II. Per eam electus vere promovetur, & censetur promotus, seu præfectus Ecclesiae a Summo Pontifice. Trid. Sess. XXIV. c. 1. de ref. ibi: Sancta Synodus tot gravissimis Ecclesiae incommodis commota, non potest non commemorare, nihil magis Ecclesiae Dei esse necessarium, quam ut Beatissimus Romanus Pontifex, quam solitudinem universae Ecclesiae ex muneri sui officio debet, eam hic potissimum impendat, ut — bonos maxime, atque idoneos pastores singulis Ecclesiis præficiat. Ante confirmationem Electus dicitur promovendus: post eam promotus. c. 16. de accus. III. Confirmatio tribuit jurisdictionem, sine qua omnia, quæ ex jurisdictione procedunt, inutiliter & nulliter aguntur. IV. Confirmationis ergo literis Capitulo exhibitis (cit. Extrav. 1. h. t. int. com.) confirmatus obtinet potestatem plenæ administrationis & jurisdictionis, præterquam in iis, quæ majoris inquisitionis discussionem exigunt, & ministerium consecrationis desiderant. c. 15. h. t. Potest tamen confirmatus ea, quæ sunt Ordinis Episcopalis, delegare alteri Episcopo. V. Per confirmationem etiam contrahi censetur vinculum spiritualis matrimonii rati cum Ecclesia. c. 4. de transl.*

§. 319. *Agendum jam est de causa & processu electionis, qui ante confirmationem instituitur. Vitium electionis provenit I ex persona electa. II. Ex modo*

do & forma electionis. Vitium personæ habetur, *primo* si eligitur vel postulatur omnino indignus, idque scienter vel ignoranter; *secundo* si persona impedimento affecta, in quo dispensari solet, *eligitur*; cum debuisset *postulari*. Si scienter eligitur indignus, pœna, de qua mox dicam, incurritur *ipso jure*: si peccatur in formam, c. 42. præscriptam, *per sententiam*. Semel electus, ob vitium electionis repulsus, iterum ad prælaturam eligi potest his casibus: I. Si electio irrita vel cassata fuit non vitio personæ, sed ob aliam causam, excepta Simonie labe. c. 12. h. t. II. Si defectus e. g. ætatis, aut vitium corporis cessavit. c. 21. Ceterum si de præcedente morbo e. g. epileptico constat, isque durabilis est, & ægre curari solet, non præsumitur, eum esse curatum, sed id probari debet. III. Si electio cassata fuit ob *crimen* personæ electæ, ea iterum eligi non potest. Quod etsi jure expressum non sit, tamen communiter a doctoribus statuitur, cum agunt de c. 12. & 21. h. t. Plane opinio personæ ex tali repulsa labem passa est, neque ea jam *sine crimine* esse intelligitur, qualem Canones volunt. Simili ratione si quis propter criminis conscientiam prælaturæ renuntiavit, aut renuntiare coactus, vel depositus fuit, iterum eligi non potest c. 11. §. 4. & 5. de renuntiat.

§. 320. *Pœna scienter eligentium indignum*, id est, qui 30. an. nondum complevit: qui non ex legitimo natus matrimonio, aut moribus & scientia commendatus non est, c. 42. statuitur duplex. Prima est, ut electores ea vice potestate eligendi ipso jure sint privati. De qua pœna animadvertet. I. Non est hæc suspensio ab officio vel jure eligendi, neque privatio, quæ per se ad totam vacationem prælaturæ extenditur, sed exclu-

exclusio ab una proxima electione, ita, ut tota vis capitularis in aliis non delinquentibus resideat, etsi pauciores sint numero, imo unicus. II. Si ex 10 electoribus sex elegerint scienter indignum, quatuor reliqui, si inter se consentientes sint, possunt suum electionis decretum promulgare, aut si consentientes non sint, exclusis sex novum scrutinium inchoare, ut una electio celebretur sine delinquentibus. III. Si non privati electionis suæ decretum semel promulgarunt, exclusis iis, qui privati erant pro una vice, cessat pœna & privatio, etsi decretum electionis ob aliquam causam extrinsecam non haberet effectum, e. g. quia electus non acceptavit, aut statim mortuus est. IV. Scienter eligentes indignum non incurrunt pœnam privationis, nisi electionis *communis* decretum forment. c. 7. in 6. V. Si aliqui *scienter*, aliqui *ignoranter* indignum elegerint, spectari debet, utrum numerus ignoranter eligentium indignum, sit major, vel par, vel minor numero eorum, qui dignum elegerunt: si est major vel par, nulla valet electio: si est minor, tunc ii, qui digno dederunt suffragia, faciunt majora Capituli, uti exclusis privatis constat, possuntque electionis suæ decretum promulgare. Si e. g. sint 30 electores, ex quibus 20 indignum elegerunt: in his 11 scienter, 9 ignoranter, tunc decem, qui elegerunt dignum, electionem suam jure promulgabunt.

§. 321. *Altera pœna scienter eligentium indignum, est suspensio triennalis a beneficiis ipso jure. c. 7. §. 3. De qua pœna animadvertit ex c. 37. in 6. I. Restrigitur dicta pœna solum ad ea beneficia, quæ sic peccans, in illa obtinet Ecclesia, quam taliter eligendo specialiter noscitur offendisse. II. Eandem etiam incurrit compromissarius, indignum eligendo,*
non

non tamen compromittentes, nisi talem electionem habuerint ratam. III. Eam non incurrit Episcopus, si ad eligendum sit compromissarius; quia de jure nullam sententiam suspensionis incurrit, nisi de eo expressa fiat mentio. IV. Hæc pœna locum non habet in aliorum, quam Episcoporum, & Episcopis Superiorum, electionibus. Sed quæritur, utrum pœna privationis non incurratur ab iis, qui ad prælaturam inferiorem scienter eligunt indignum? Resp. Videtur sane ex c. 22. h. t. eam pœnam incurri.

§. 322. Utraque pœna non tantum ad casum indigni *electi* Episcopi, sed etiam *postulati* pertinet. c. 1. & 2. de postul. Præl. nec tantum ad defectus c. 7. h. t. indicatos, sed etiam ad alios e. g. ad defectum ordinis requisiti. c. 22. h. t.

§. 323. Ob vitium formæ c. 42. præscriptæ electio est nulla; sed pœna privationis juris eligendi incurritur per sententiam. cit. c. 4. X. & c. 18. in 6. Multa formæ vitia ex dictis intelligi possunt, uti I. si electio non fit per scrutinium, compromissum, quasi inspirationem, sed per sortes. c. ult. de Sortileg. can. 4. XXVI. q. 2. II. Si electio sit præmaturatione, vel nimis fera. §. 247. seq. III. Si clandestina. c. 42. §. 2. ibi: *Electiões quoque clandestinas reprobamus, statuentes, ut quam cito electio fuerit celebrata, sollemniter publicetur.* IV. Si facta per vim, vel subreptionis astutiam. §. 287. V. Si per abusum potestatis laicalis §. 284. adde c. 2. & 59. h. t. c. 10. de ætat. & qual. can. 1. 2. 5. 7. dist. 63. can. 2. §. 7. I. q. 7. IV. Si simoniaca; quæ nullo penitus jure valet c. 11. & 23. de Simonia. Extrav. 2. eod. int. comm. Si Simonia a tertio commissæ sit, electus, etsi innocens sit, in eadem Ecclesia nunquam promote-

moveri poterit c. 12. & 59. h. t. nisi tertius id in fraudem egisset.

§. 324. De Protestationibus & Appellationibus, quæ in causis electionum latissime sumtarum (§. 240. n. I.) interponuntur, agitur maxime l. 6. h. t. c. ut circa 4. c. is, qui contra 19. c. qui contra. 20. c. procurator. 38. c. constitutio 41. His addenda Clement. 4. h. t. quæ incipit. *constitutionem*. Generaliter animadvertendum: I. Protestatio vel omnino appellatio interponi potest *ante electionem*; e. g. si quis admitti nollet ad eam celebrandam: si attentatur electio contra privilegia hujus Ecclesiæ: si forma canonica vel alias consueta immutari tentatur: si quis exclusivam daret certæ personæ, appellans, ne hæc eligatur: si quis appellaret, ne fiat electio, nisi duplici sibi concessio voto &c. aut *post electionem*, nempe post ejus publicationem; quo casu vel opponitur electio electioni aut postulationi, vel uni electioni contradicatur sine oppositione alterius. Priori casu contradicens est *competitor*: posteriore *oppositor*.

§. 325. Animadvertendum II. *concors* electio hoc respectu dicitur, quæ contradicere caret; *in discordia vero electus* censetur, quando aliquis eorum, qui sua vota ei non dederunt, vel ob supervenientem notitiam pro non datis haberi volunt, protestando vel opponendo se opponit.

§. 326. Animadvertendum III. Id, quod opponitur, directe respicere potest *primo jus Ecclesiæ*, cui providendum est (l), *secundo jus ipsius opposantis* (m), *tertio personam electi*, nempe ejus crimina & defectus, aut *electionis formam*. IV. Appellationes in causis electionum penitus removeri non
Zallinger L. I. Decretal. P pos-

possunt, ne jura Ecclesiarum, vel opponentium sine remedio lædantur, aut mali prælati contra canones promoveantur: eadem tamen appellationes justis legibus restringendæ sunt, ne ob temerarias vel protractas lites prælaturæ & beneficia cum dispendio Ecclesiarum diu vacent, aut malignitati vel ambitioni hominum deferatur, qui dignitatum, quas sibi vel amicis obvenire mallent, provisionibus facile adversantur.

(l) *E. g. Si Capitulum quempiam ad dignitatem eligit non vocato ad electionem Episcopo, isque electioni se opponat, dicendo, esse de jure Ecclesiæ, ut ad talem electionem vocetur Episcopus; vel si quis electus fuerit non de gremio, & opponatur, Ecclesiam habere jus, ut ad talem dignitatem aliquis de gremio eligatur.*

(m) *E. g. Si Canonici aliquem eligere volunt ad dignitatem, & opponens dicat, ejus collationem ad se spectare: si quis factæ jam electioni se opponat, agens de contemptu: vel si quis dicat, se legitime esse electum, & electioni novæ se opponat.*

§. 327. Si ante electionem incidit protestatio, pars altera tuto pergit ad eligendum suo judicio, & justitiam vel injustitiam protestationis ad processum confirmationis rejicit: si appellatio omnino interjecta est ante electionem, ne ad eam procedatur; nisi aperte frivola sit, deberent consistere electores, donec causa ad Superiorem delata sit, c. 10. & c. 29. h. t. Si tamen appellatione non obstante ad electionem proceditur, hæc per se valida est; propterea, quod talis appellatio sit extrajudicialis, quæ effectum suspensivum non parit. Si autem Superior postea pro appellatione judicet, omnia acta rescindi debent, perinde ac si ab initio irrita fuissent.

§. 328.

§. 328. De appellatione ante electionem interjecta tres præterea extant decisiones juris. I. Appellare nemo potest, ne fiat electio, nisi probet, sua interesse. c. 16. h. t. & c. 3., de his, quæ sunt a majore. II. Appellatio interjecta, ne fiat electio, nisi canonica, non impedit canonicam. c. 19. h. t. III. Qui appellat pro exclusiva contra certam personam, subicere se debet oneribus c. ut circa. 4. in 6. præscriptis. c. 20. eod. in 6.

§. 329. Si in causis electionum, postulationum, vel provisionum appellatur, inprimis dispiciendum est, quis sit iudex competens, a quo appellationis causa cognosci & decidi debeat. I. Causæ electionis Episcoporum, & dignitatum Episcopatu majorum, & immediatarum prælaturarum reservatæ sunt Sedi Apostolicæ. c. quamvis. 10. in 6. Si nempe appellatio in tali negotio ex causa probabili & in scriptis fuit interposita. ib. Partes ab ea recedere possunt, antequam Papæ fuit præsentata, modo in recessu non interveniat pravitas (Simoniaca). II. Si ab electione facta in cathedrali vel regulari Ecclesia ex causa probabili & in scriptis appelletur ad Sedem Apostolicam, ea pendente causa, confirmatio facta per Ordinarium non valet. c. si postquam. 33. in 6.

§. 330. Eligens vel electioni consentiens electo, nisi ex causis postea emergentibus, vel postea primum cognitis opponere nihil potest. c. nulli. 8. in 6. de aliis vero, qui electionibus, postulationibus vel provisionibus se opponunt, proponendo aliqua contra electionis, postulationis seu provisionis formam, aut personam eligentium, vel electi, sive illius, cui erat provisio facienda, sive facta, & propter hoc contigerit appellari, quid in libello exprimere debeant & quam specificè & determinate, quale item præstare

juramentum, videatur c. ut circa. 4. in 6. & Clem. 4. h. t. De procuratore, quem ad hanc causam constituunt, vid. c. procurator. 38. in 6. De appellatione intimanda adversario Clem. 3. h. t. De itinere ab opponente & defendente succipiendo Romam, c. 1. in 6. de necessitate plene probandi, & de pœna, si quis in probatione defecerit, cit. c. 1. §. 2. in 6. de casu, quod ab opponente evidens defectus objicitur, c. 11. in 7. de casu denique, quo unus competitorum durante lite moritur, c. 10. de arbitris.

§. 331. Confirmatus Episcopus intra tres menses tenetur accipere munus consecrationis. Trid. Sess. XXIII. c. 2. de ref. ibi: *Ecclesiis Cathedralibus seu superioribus quocunque nomine ac titulo præfetti, etiamsi sanctæ Romanæ Ecclesiæ Cardinales sint, si munus consecrationis intra tres menses non susceperint, ad fructuum perceptorum restitutionem teneantur. Si intra totidem menses postea id facere neglexerint; Ecclesiis ipso jure sint privati.* conf. can. 2. dist. 75. ex Concil. Chalcedonenſi (n).

(n) *Dispensatio contra hos canones, etiam in beneficiis inferioribus aliquando data c. 14. & 34. de elect. in 6. appellatur facultas de non promovendo, de qua Trident. Sess. VII. c. 9. de ref. „Ad majores Ecclesias promoti munus consecrationis infra tempus a jure statutum accipiant; & prorogationes ultra sex menses concessæ nulli suffragentur. & c. 12. ibid. Facultates de non promovendo, præterquam in casibus a jure expressis, concessæ ad annum tantum suffragentur. Jura expressa extant cit. c. 14. & 34. de elect.*

§. 332. Consecratio vero, si extra curiam Romanam fiat, in Ecclesia, ad quam promoti fuerint, aut in provincia, si commode fieri poterit, celebretur. Trid.

Trid. Sess. XXIII. c. 2. de ref. Fit ea hodiernis moribus non a Metropolitano & Comprovincialibus, sed ex commissione Sedis Apostolicæ. Unde Consecrator quærit: *Habetis mandatum Apostolicum?* Quo deinde recitato Electus præstat juramentum fidelitatis Sedi Apostolicæ, de quo mox infra. Fieri hæc consecratio potest quovis anni tempore, die Dominico vel Natalitio Apostolorum, vel ex speciali indulto Pontificio alia die festiva (o). Ex antiquissimo autem usu præter Episcopum Consecratorem assistere deberent saltem duo alii Episcopi. can. 3. dist. 64. can. 5. & 9. dist. 65. can. 33. XXIV. q. 1. add. c. un. pr. de Sacra unct. (p).

(o) Pontificale Roman. Tit. de consecrat. Elect. in Episcop.

(p) Probari potest antiquis exemplis, pluralitatem Episcoporum ad consecrationem non requiri jure divino, sed valde antiquo usu. Nellerus in diff. altera de sacro electionis processu §. IV. scribit in hunc modum: „His temporibus sæpe consuevit dispensari, ut loco duorum Episcoporum assumerentur alii mitrati; sed studiosissimus veterum canonum Benedictus XIV. denegatione dispensationis ejusmodi nos admonuit, venerandam canitiem canonum posthabendam non esse quorundam commoditati, & suntuum parsimonia.“ Theaur. Jur. Eccl. T. IV. n. I.

§. 333. Juramentum obedientiæ & fidelitatis, quod Episcopi ante consecrationem Sedi Apostolicæ præstant, est hujus tenoris. „Ego N. Electus Ecclesiæ N. ab hac hora in antea fidelis & obediens ero Beato Petro Apostolo, Sanctæque Romanæ Ecclesiæ, & Domino nostro Domino N. Papæ N. suisque Successoribus canonice intrantibus. Non ero in consilio aut consensu vel facto, ut vitam perdant, aut mem-

brum; seu capiantur mala captione; aut in eos violententer manus quomodolibet ingerantur; vel injuriæ aliqua inferantur, quovis quæsito colore. Consilium vero, quod mihi credituri sunt, per se, aut Nuntios suos, seu literas, ad eorum damnum, me sciente, nemini pandam. Papatum Romanum, & Regalia Sancti Petri adjutor eis ero ad retinendum, & defendendum, salvo meo Ordine, contra omnem hominem. Legatum Apostolicæ Sedis in eundo & redeundo honorifice tractabo, & in suis necessitatibus adjuvabo. Jura, honores & privilegia, & auctoritatem Sanctæ Romanæ Ecclesiæ, Domini nostri Papæ & Successorum prædictorum conservare, defendere, augere, promovere curabo. Neque ero in consilio, vel facto, seu tractatu, in quibus contra ipsum Dominum nostrum, vel eandem Romanam Ecclesiam aliqua sinistra, vel præjudicialia personarum, juris, honoris, status & potestatis eorum machinentur. Et, si talia a quibuscunque tractari, vel procurari novero, impediam hoc pro posse, & quanto citius potero, significabo eidem Domino nostro, vel alteri, per quem possit ad ipsius notitiam pervenire. Regulas Sanctorum Patrum, decreta, ordinationes seu dispositiones, reservationes provisiones & mandata Apostolica, totis viribus observabo, & faciam ab aliis observari. Hæreticos, schismaticos & rebelles eidem Domino nostro vel successoribus prædictis pro posse persequar & impugnabo. Vocatus ad Synodum, veniam, nisi præpeditus fuero canonica præpeditio. Apostolorum limina singulis (quadrienniis) personaliter per me ipsum visitabo; & Domino nostro, ac Successoribus præfatis rationem reddam de toto meo pastoralis officio, ac de rebus omnibus ad meæ Ecclesiæ statum, ad Cleri ac populi disciplinam, animarum

rum denique, quæ meæ fidei traditæ sunt, salutem quovis modo pertinentibus, & vicissim mandata apostolica humiliter recipiam, & quam diligentissime exequar. Quodsi legitimo impedimento detentus fuero, præfata omnia adimplebo per certum Nuntium, ad hoc speciale mandatum habentem, de gremio mei Capituli, aut alium in dignitate Ecclesiastica constitutum, seu alias personatum habentem; aut his mihi deficientibus, per diocesanum Sacerdotem, & Clero deficiente omnino, per aliquem alium Presbyterum, secularem vel regularem, spectatæ probitatis & religionis, de supradictis omnibus plene instructum. De hujusmodi autem impedimento docebo per legitimas probationes, ad S. Romanæ Ecclesiæ Cardinalem proponentem in Congregatione sacri Concilii, per supradictum Nuntium transmittendas. Possessiones vero ad mensam meam pertinentes non vendam, nec donabo, neque oppignorabo; nec de novo infeudabo; vel aliquo modo alienabo; etiam cum consensu Capituli Ecclesiæ meæ, inconsulto Romano Pontifice. Et si ad aliquam alienationem devenero, pœnas in quadam super hoc edita constitutione contentas, eo ipso incurrere volo.

§. 334. Apologiam hujus juramenti scripsit Paschalis II., quæ continetur c. 4. de Elect. Dudum ab Episcopis consecrandis exacta fuit professio fidei; clausulam subjectionis & obedientiæ adhibuit S. Bonifacius, Apostolus Germaniæ, eamque etiam aliis præscripsit in Synodo, de qua agit Epist. 105. ad Cudbertum Episcopum. Quasdam novas fidelitatis clausulas sub Pontificatu S. Gregorii P. VII. extorsit necessitas eorum temporum, quæ deinceps per multa secula ab Episcopis universi orbis fuerunt adhibitæ; neque

vero ob importunitatem & pravitatem obtreſſatorum & hoſtium Sanctæ Sedis receptæ jam per orbem ſolemnes formulæ immutari debent: cum præſertim illud maxime a diſpensatore myſteriorum Dei requiratur, *ut fidelis quis inveviatur*. I. Cor. IV. 2. conf. can. 6. diſt. 23. Ibi: *Quamquam omnes, qui ſacris mancipantur ordinibus, canonicis regulis teneantur adſtricti, expedibile tamen eſt, ut promiſſionis ſuæ vota ſub cautione ſpondeant, quos ad promotionis gradus Eccleſiaſtica probat diſciplina. Solet enim plus timeri, quod ſingulariter pollicetur, quam quod generali ſponſione concluditur.*

§. 335. Neque dici poteſt, per eam formulam derogari juribus Principum, in quorum ditione degunt Episcopī; quaſi nec Principes temporum anteaſtorum, nec innumerabiles Episcopī orbis, ſumma ſanctitate & ſapientia clari, jura ſua, & obligationes noviſſent. Nempe Episcopī præſertim Germaniæ duplicem perſonam gerunt, & ſacri Præſulis & Principis ſecularis. Unde in ſacris Romano Pontifici ſubjacent: in profanis Imperatori ac Imperio, duplici jurisjurandi vinculo ſingilatim adſtricti; redduntque hoc modo Cæſari, quæ ſunt Cæſaris, Deo, quæ Dei ſunt. Fidelitati, quam Imperatori ac Imperio circa temporalia debent, non præjudicari, verba indicant ipſius formulæ: *Salvo meo Ordine*, Germani in Concordatis ſuis permittunt haud ægre, Episcopos aliis præſtare juramenta: *Proviſo, quod confirmati prædicti, & per nos proviſi Metropolitani ſuis & aliis præſtent debita juramenta.* Cur ergo Romano Pontifici, tanquam viſibili capiti Eccleſiæ, & centro unitatis catholicæ, idem exhiberi nolunt?

§. 336. Effectus conſecrationis ſunt, 1. character ordinis Episcopalis, & ſpecialis gratia divina ad Episcopos.

Episcopatus munia rite obeunda. 2. Consecratus obire potest etiam ea, quæ majoris inquisitionis discussionem exigunt, & ministerium consecrationis desiderant. c. 15. h. t. (§. 318. n. IV.). Talia recensentur a Glossa in cit. c. 15. ordinatio clericorum, consecratio Chrismatis, depositio Clericorum, benedictio Virginum & Ecclesiarum, consecratio altarium. 3. Consecratus simpliciter vocatur *Episcopus*: ante consecrationem vero non nisi cum addito: *Episcopus electus* (Patriarchæ & Archiepiscopi appellationem patriarchalis, vel archiepiscopalis nominis non per consecrationem, sed per pallium consequuntur). 5. *Fratri* etiam appellatione a Papa honoratur. 6. Conjugium Spirituale inter Episcopum & Ecclesiam in consecratione intelligitur consummatum. c. 4. de Transl. 7. Beneficia, ab Electo ante possessa, post consecrationem vel tempus ad consecrationem præfixum vacant, c. 7. §. 1. de elect.

§. 337. Electio Summi Pontificis, ut demum a generalibus ad indicanda quædam specialia descendamus, diversis temporibus varia habuit fata, multæque de ea extant constitutiones tum in corpore Juris, tum in Bullariis. Epitomen earum recensuit Aloysius Guerra Tom. I. *De Summo Pontifice*, de *Conclavi*, de *Electione Pontificis*. Specialia sunt hæc potissimum. I. Solis Cardinalibus competit jus eligendi Pontificem. II. Hi ab electione repellere non possunt prætextu alicujus censuræ. Clem. 2. §. *ceterum* h. t. III. Non opus est, ut absentes specialiter vocentur ad electionem: sed expectantur tantum per decem dies; nec possunt absentes constituere procuratorem. IV. Si electio fit per scrutinium, requiruntur secreta schedularum suffragia duarum ex tribus partibus Cardinalium in conclavi clauso præ-

sentium. V. Post scrutinium permittitur accessus. VI. Eligendo Pontifici non obstant impedimenta juris positivi. Unde sufficientibus votis electus *abque ulla exceptione* ab Universali Ecclesia Romanus Pontifex est habendus; c. 6. de elect. VII. Papa electus potest statim administrare ante coronationem; neque requiritur aliqua confirmatio; cum Superiorem non habeat, & quam primum electus est, supremam a Deo potestatem sine medio consequatur. Pius II. in celebri constitut. *In minoribus*. §. 3 fin. & Innoc. III. c. novit. 13. de judiciis. ibi: *Potestas nostra non est ex homine, sed ex Deo.*

§. 338. Constitutio Præpositorum regularium fit secundum approbatas a Sede Apostolica Ordinum regulas. Si ea per *electionem* Capitularium fiat, necesse est, ut eligantur per *vota secreta*, ita, ut *singulorum eligentium nomina nunquam publicentur*; nec in posterum liceat, provinciales aut abbates, Priores aut alios quoscunque titulares ad effectum electionis faciendæ constituere, aut voces & suffragia absentium supplere. Si vero contra hujus decreti constitutionem aliquis electus fuerit, electio irrita sit; SS. Conc. Trid. Sess. XXV. de Regul. c. 6. Idem observandum est in electione abbatissarum, atque aliarum Præpositarum. De Abbatibus Germaniæ, Sedi Apostolicæ immediate subjectis, agitur in Concordatis Germaniæ. Eorum electio fieri debet ad normam c. quia propter. 42. more Episcopaliū electionum, & confirmari a Summo Pontifice.



TITULUS VII.

DE TRANSLATIONE EPISCOPI.

ARGUMENTUM.

- I. Translationes Episcoporum juxta annumerantur causis majoribus. §. 339. II. Exponitur paritas inter conjugium spirituale & carnale. §. 340. III. Ad translationem requiritur legitima auctoritas & justa causa §. 343. IV. Effectus translationis, & differentia ab aliis mutationibus Sedium §. 346.*

§. 339. *Translatio est assumptio personæ Ecclesiasticæ ab una Ecclesia, cui præerat, ad aliam Canonice facta. Spectatur maxime in Episcopis, qui Ecclesiæ suæ censentur alligati nexu alarum, ut suo arbitrio liberum non habeant sine Apostolica auctoritate volatum. Unde postulatione indigent. c. fin. de postulat. prælat. imo conjugii spiritualis vinculum contraxerunt cum Ecclesia sua, per confirmationem quidem ratum, per consecrationem consummatum, c. 4 h. t. Ob hanc Episcopi cum Ecclesia sua conjunctionem, atque ob ambitionem & avaritiam quorundam a minoribus Ecclesiis ad majores adspirantium, translationes ad causas majores, Apostolicæ Sedi reservatas, referri cœptæ sunt (a).*

(a) *Criminationes adversariorum S. Sedis in hac re erudite atque invictè confutatæ sunt in Antifebronio T. III. C. V. edit. an. 1770. & in Antifebronio Vindicato P. III. Diff. VIII. C. III.*

§. 340. Laborant interpretes in explicandis verbis Innocentii III., a quo omnia hujus tituli capitula profecta sunt. Ac primo, quod is huc applicet verba Christi: *Quod Deus conjunxit, homo non separet.* Nam matrimonium consummatum inter fideles ne

Pon-

Pontificia quidem auctoritate dissolvi potest: at conjugium spirituale inter Ecclesiam & Episcopum, quantumvis in consecratione consummatum, potest sane Pontificia auctoritate dissolvi; & tamen Innocentius III. in c. 2. h. t. *fortius* appellat *spirituale vinculum, quam carnale*. Addit ib. *Non humana, sed potius divina potestate, conjugium spirituale dissolvitur; cum per translationem, depositionem aut cessionem auctoritate Romani Pontificis (quem constat esse Vicarium Jesu Christi) Episcopus ab Ecclesia removetur: & ideo tria hæc, quæ præmissimus, non tam constitutione canonica, quam institutione divina, soli sunt Romano Pontifici reservata*. At, inquiunt, olim auctoritate synodorum factæ sunt istiusmodi translationes. can. 36 & 37. Vll. q. 1.

§. 341. Respondeo I. Analogia inter matrimonium spirituale & carnale multo ante Innocentium III. non modo audita, sed omnino recepta, & communi usu adhibita fuit. Primis enim sæculis Ecclesia, Episcopo destituta, vocabatur *viduata*; vidua autem non dicitur, nisi quæ maritum habuit. Ob eandem Analogiam S. Cyprianus in epist. 2. ad Cornelium, cujus sedem invadere tentavit Novatianus, hunc vocat *adulterum & contrarium caput*. & in ep. 52 & alibi *adulterum atque extraneum Episcopum*. Multa extant Similia in antiquis monumentis. Vinculum spirituale carnali fortius esse, itidem antiquitas censuit. Synodus Alexandrina an. 340. Eusebium, qui relicta Berytensi Ecclesia Nicomediensem invaserat, & hac quoque repudiata occuparat Constantinopolitanam, coarguit his verbis: *Neque animadvertit Pauli præceptum: Alligatus es uxori? noli quaerere solutionem. Quod si hoc de uxore dictum est, QUANTO MAGIS de Ecclesia, & de ipso Episcopatu:*
cui

cui alligatus quispiam aliam quærere non debet, ne adulter ex sacris literis deprehendatur (b). S. Chrysostomus, cum de ejus expulsionem ageretur, populum tranquillans, & consolans inter alia sic inquit: Caritatem vestram precor, ut æquo animo sitis. Nemo enim nos a vobis poterit divellere; quos enim Christus conjunxit, homo non separabit. Quodsi de muliere & viro dicitur: Propter hoc relinquet homo patrem suum, & matrem, & adhærebit uxori suæ, & erunt duo in carne una; & sic hujusmodi nuptiarum conjunctio ab homine non potest separari; MULTO MAGIS Ecclesia non potest a pastore divelli (c).

(b) Concil. edit. Mansi D. II. col. 1286.

(c) Tom. V. Op. S. Chrysost. edit. antverp. a 1614. pag. 382.

§. 342. Respondeo II. Ecclesia quidam sponsa Christi dicitur, quam acquisivit sanguine suo, Apoc. XIX. 7. & XXI. 2. 9. Ephes. V. a v. 25. At dicitur sponsa Episcoporum, quatenus hi sunt ministri Christi, ejusque Personam gerunt, & repræsentant; & quia olim eorum electio, missio, & consecratio conjunctim fiebant, nec vage, sed ad certam Ecclesiam; hinc sicut potestas Episcopalis a Deo est, censebatur vinculum inter Episcopum & Ecclesiam, ad quam consecratus est, a Deo quasi copulatum & constrictum fuisse; quod nemo Episcoporum suo arbitrio poterat abrumpere: quia is Ecclesiæ suæ non temporaliter, sed perpetuo, nempe usque ad suam mortem, fuit addictus. Agnovit tota retro antiquitas, Episcopum legitima auctoritate, & justa causa necessitatis vel utilitatis ad aliam Ecclesiam posse transferri, sed non suo transire arbitratu, præsertim ex ambitione & avaritia; quod a multis præsertim

sertim arianis factitatum est. Censebatur tamen vinculum spiritualis conjugii *fortius*, quam carnalis; quia ea, quæ spiritualia sunt, majore consideratione, & ex gravioribus causis tractari debent, majoreque haberi in pretio, quam carnalia. Potestatem dissolvendi hoc spirituale vinculum *non tam ex constitutione canonica, quam institutione divina* provenire, ait Innocentius III.; quia ea ex divino primatu profluit, vi cujus causæ graviores, præsertim exigente Ecclesiæ necessitate, merito Apostolicæ Sedi reservantur.

§. 343. Primo ergo in Translatione Episcopi spectanda est *legitima auctoritas*. Nemo sua ipsius voluntate Ecclesiam, cui addictus est, deferere, & ad aliam transire vel transmigrare potest; hinc *translatio*, non *transitus* vel *transmigratio* dicitur, quasi is, qui ab una ad aliam Ecclesiam assumitur, *passive* habere se debeat. Is transitus prohibitus est can. Apost. 13. — can. Nicæno 15. apud Gratianum can. 19, & 23. Vll. q. 1. — can. Antiocheno 21. apud Gratianum can. 25. Vll. q. 1. — can. 27. Concilii Carthaginensis an. 398. apud Grat. can. 37. ead. — can. Chalced. 5. apud grat. can. 26. Vll. q. 1. & maxime can. sardicensi 1. qui a Gratiano non refertur, estque hujus tenoris. „*Osus Episcopus dixit: Tam mala consuetudo, quam ipsa rerum pernicioſa corruptela funditus eradicanda est, ut non liceat Episcopo de civitate sua ad aliam transire civitatem. Manifesta est enim causa, qua hoc facere quis tentet; cum nullus in hac re inventus sit Episcopus, qui de majore civitate ad minorem transfiret: unde apparet, avaritiæ ardore eos inflammari, & ambitioni servire, & ut dominationem exerceant. Si omnibus hoc placet, ut hujusmodi perniciēs sævissime & auste-*
rius

rius vindicetur, ita, ut nec laicam habeat Communionem, qui talis est? Responderunt universi: Placet' (d). Exemplum illiciti transitus extat c. 3. h. t. de Hildesienſi Episcopo, de quo Papa decidit, eum utraque in posterum carere debere Ecclesia: ut nec illis præſideat, quos per superbiam spreuit, nec illis, quos per avaritiam concupivit. Ita Innocentius III. præeunte S. Leone M. apud Gratianum can. 31. VII. q. 1.

(d) *Ex editione prisca. Tom. III. Op. S. Leonis edit. Bal-
lerin. col. 514.*

§. 344. Non quæcunque auctoritas sufficit, ut Canonica sit translatio; non populorum violenti attractus, non suasiones Episcoporum (can. 25. VII. q. 1.), non Patriarchæ, non Metropolitanæ potestas (c. 1 & 2. h. t.); sed auctoritas Apostolicæ Sedis, tanquam in causa majore interponi debet: præsertim postquam statuta synodus provincialis prætermissa, ejusque libertas a magistratibus secularibus constringi & opprimi cœpta est. Ne autem laici apud Sedem Apostolicam de Episcopo suo ad aliam transferendo Ecclesiam instarent, idque evincerent non favore, sed odio Episcopi, cautum est, ne Episcopi inviti facile transferantur (e). Ceterum auctoritas Pontificia pro translatione, & postulationis admissione illi etiam Episcopo necessaria est, qui jam ante indultum Papæ habet, quo, si ad majorem vocaretur forsitan dignitatem, eam sibi liceret assumere, dum tamen nihil ei de statutis Canonicis obviaret. c. 4. h. t. conf. §. 270.

(e) „Cum Prælati nonnunquam jura, & libertates Eccle-
ſiarum suarum translationis formidine non adeo solerter,
„ut alias, prosequantur: ne ad importunitatem quorun-
„dam, quæ sua, & non quæ Jesu Christi, quærentium,
„Roma-

„*Romanus Pontifex forsan, ut homo facti nescius, in iusmodi circumveniat, aut alias leviter inclinetur: præsentibus statuimus & ordinamus, invitorum Episcoporum & Superiorum translationes absque magna & rationabili causa, quæ, vocata parte, cognita fuerit, & decisa de Consilio S. Romanæ Ecclesiæ Cardinalium, vel majoris partis eorundem, & cum subscriptione, fieri de cetero non debere.*“ Concil. Constantiens. Sess. 39. edit. Mansi Tom. XXVII. col. 1162. Regulariter invito Episcopo alius in ejus locum subrogari non potest. *can. quavis. 14. VII. q. 1. ibi ait Gregorius M. epist. 7. libr. XI. & ideo, quia viventem Episcopum ab officio suo necessitas infirmitatis, non crimen abducit, alium loco ejus, recusante eo, nulla finit ratio ordinari. In textum Gratiani fœdum hic irrepsit mendum, non indicatum a correctoribus Romanis, nisi recusante eo; pro: recusante eo. De translationibus invitorum conf. Thomassin. P. II. l. II. c. 64. n. 9.*

§. 345. Præter auctoritatem Apostolicæ Sedis iusta etiam causa ad translationem requiritur, nempe *necessitas aut utilitas Ecclesiæ*, non ipsius translati favor, aut odium; neque enim SS. Canones istiusmodi approbant pænæ genus, ut Episcopus retenta dignitate Episcopali ad inferiorem detrudatur Sedem. Hinc Innocentius III. ad Patriarcham Antiochenum, qui Archiepiscopum confirmatum ad Sedem Episcopalem transtulit, absurditatem facti verbis exprimens ita scribit c. 1. h. t. *Novo quodam mutationis genere parvificasti majorem, & magnum quodammodo minorasti, episcopare Archiepiscopum, imo potius dearchiepiscopare præsumens.* Hinc etiam rarius dispensatur, ut quis ad *parem* Sedem vel dignitatem transferatur: *cum in majori dignitate propter majorem utilitatem facilius soleat dispensari.* c. fin. h. t. Iustæ translationis causæ sunt, 1. debilitas corporis, si hæc ex malignitate loci, vel rigido climate oriatur.

2. Odium

2. Odium malæ plebis. c. 10. §. 5. de renunt. & can. 49. VII. q. 1. 3. Siquis Episcopus doctrina & zelo emineat in extirpandis heresibus, quæ loco quodam succreverunt. 4. Si propter hostilitatem vastata terra hac illac palans oberrare deberet; etsi eo *casu* non tam translatio, quam *incardinatio* habeat locum, vi cujus Episcopus alteri quidem civitati præficitur, sed non *perpetuo*, vel *absolute*; quia cessante hostilitate vel seditione ad priorem reverti Sedem debet. can. 42. VII. q. 1.

§. 346. *Effectus translationis* est, ut solvatur prius vinculum; & novum inducatur. Gratianus ad can. 41. VII. q. 1. & can. 3. XXI. q. 2. Et quidem Ecclesia, a qua quis volens transfertur, vacat ab eo tempore, quo Episcopus ab ejus vinculo absolvitur in Consistorio Papæ, etiam ante expeditionem literarum Apostolicarum, vel adeptam possessionem secundæ Ecclesiæ. Habita hujus absolutio- nis notitia, tenetur Episcopus abstinere ab exercitio ordinariæ jurisdictionis; quæ in Capitulum transit, tanquam Sede vacante. Sic declaravit Congregatio Cardinalium super negotiis Episcoporum, approbante S. D. N. an. 1624. die 12. Dec. (f).

(f) *Conf. Thef. Jur. Eccl. Tom. III. N. I. diff. I. de transl. Episc. §. II. Zech Hierarch. Tit. XXI. §. 244.*

§. 347. Ex dictis colliges, translationem non censeris, 1. quando de jure Episcopi ad aliquam sedem electi non *certo* constat; 2. neque incardinatio (§. 345.) proprie est translatio; 3. neque simplex commendatio alienæ Ecclesiæ: exempla extant can. 3. XXI. q. 1. can. 22. VII. q. 1. can. 25. XXV. q. 2. Neque 4. translatio fit, dum Episcopus, qui renun-

Zallinger L. I. Decretal. Q tia-

tiavit suæ Ecclesiæ, aut canonice ab ea depositus fuit, postea ex concessu Canonum (c. 11. de renunt.), aut ex benignitate Apostolica alium Episcopatum consequitur. Neque 5. mutatio Sedium, multo etiam minus mutatio Residentiæ Episcopalis pro translatione haberi potest: mutationis Sedium exempla extant can. 44. VII. q. 1 can. 25. XXV. q. 2. In his casibus neque absolvitur Episcopus a vinculo prioris Ecclesiæ, neque novo vinculo alterius adstringitur.

TITULUS VIII.

DE AUCTORITATE, ET USU PALLII.

ARGUMENTUM.

I. Forma & qualitas pallii. §. 349. II. Datur ad significandam Hierarchiam inter Episcopos §. 351. III. Quæ sit auctoritas pallii §. 356. IV. Usus. 357.

§. 348. Hac veluti appendice præcedentium titulorum *de Postulatione, de Electione & Electi potestate, de translatione*, exponitur, qua ratione Episcopi, qui supra alios Episcopos dignitate & potestate in Ecclesiastica Hierarchia eminent, ceu Patriarchæ, Prælati, Archiepiscopi, plenitudinem Pontificalis officii, & Patriarchalis vel Archiepiscopalis nominis appellationem consequantur, non postulatione, vel electione, non admissione postulationis, non confirmatione electionis, non translatione, non ipsa consecratione, sed *traditione Pallii*; de quo explicanda primo est ejus *forma & qualitas*; dein dictante Rubrica exponenda *auctoritas, & usus legitimus*.

§. 349. *Pallium* est fascia lanæ coloris nivei, tres circiter digitos lata, in modum circuli contexta quæ humeros cingit, habetque ab utraque parte lineas, seu fasciolas, quarum anterior ante pectus, posterior intra humeros demittitur, intextis partim in binis hisce fasciolis, partim in circulo humeris incumbente, sex sericis, nigrisque crucibus. De solemni ritu, quo Pallia Romæ benedicuntur, agit Benedictus XIV. in const. *Rerum Ecclesiasticarum*, 60. Tom. 2. Bullarii, quam his verbis orditur: *Rerum Ecclesiasticarum origines, quo altius ex sacra memoria repetimus, eo magis illas & solidis fundamentis innixas, & sublimi non minus, quam vetusta institutione venerabiles, ipsaque disciplina & ritu graves ac religiosas agnoscere & comprobare gaudemus* (a).

(a) *Enimvero de origine sacrorum palliorum multa inepte & profane commenti nonnulli sunt, ex solo Pallii nomine conjectantes, quod fuerit imperatorium ornamentum, & ab his Patriarchis & Metropolitibus sit concessum: quod principio usque ad talos profluxerit: quod sine auctoritate imperatoris nemini concedi a Papa potuerit; quæque sunt generis istius, a solertissimis viris — penitus confutata; quibus prætermisissis vera & Ecclesiastica origo ac ratio aperienda est, ex qua simul Pallii auctoritas intelligi queat.*

§. 350. Jure divino nulla est Episcoporum, & Episcopalis potestatis distinctio, excepto Divino Primatu Petri, ejusque Successorum. Sed ut hic ipse Primatus auctoritatem & sollicitudinem suam per universum orbem commodius, tutiusque exereret, exemplo Petri inter Apostolos, eminentis Episcoporum quoque est orta distinctio, & magna ordinatione provisum est, ne omnes sibi omnia vindicarent, sed essent in singulis provinciis (Metropolitæ), quorum inter fratres haberetur prima sententia, & rursus quidam

in majoribus urbibus constituti (Primates & Patriarchæ) sollicitudinem susciperent ampliore, per quos ad unam Petri Sedem universalis Ecclesiæ cura conflueret, & nihil usquam a suo capite dissideret (b). Institutio ergo Metropolitaram, & Archiepiscoporum, Primatum & Patriarcharum ad faciliorem, tutioremque communionem & communicationem cum Sede Petri facta est; neque omnino dubitari potest, quin omnis prærogativa, eminentia, ac potestas quorundam Episcoporum, ac Sedium Episcopaliū supra reliquos provinciæ, nationis, & patriarchatus Episcopos ex concessione Apostolicæ Sedis profluxerit; cum ea per Concilia posteriora non introducta, sed confirmata fuerit.

(b) *S. Leo Epist. XIV. c. 11. edit. Ballerin.*

§. 351. Facta ergo divisione provinciarum Ecclesiasticarum, atque institutis veluti gradibus hierarchicæ potestatis, ornamentis etiam sacris distingui cœperunt, qui supra alios eminebant Episcopos, uti diaconi a presbyteris, presbyteri ab Episcopis ornato sacro distinguebantur. Normam verisimiliter præbuit ornatus Summi Sacerdotis V. T. Exod. XXVIII. 4. quod autem præcipuum erat, ab his, qui aliis præfecti erant Episcopis, jure exigebant Summi Pontifices 1. apertiore fidei professione: 2. arctiorem adhæSIONem, subjectionemque erga Sedem Apostolicam: 3. majorem curam, sollicitudinem pastorem, ac zelum: 4. ardentius studium observandi Canones, & constituta Apostolicæ Sedis. Hæc nempe Romani Pontifices exigebant ab iis, quibus ipsi singularem potestatem, certa privilegia, & majores honores tribuerant; nec ipsi tanta fiducia hæc ab iis exigere poterunt, si non ipsis honores quoque

quoque & privilegia concessissent, aut sub iis oneribus concessuri erant. Atque hæc, quæ modo indicavi, manifeste exprimuntur per antiquos Canones, aliaque monumenta, quæ de auctoritate & usu Pallii extant; ut deinceps ostendam.

§. 352. Hinc I. Pallium dicitur *sumtum de corpore Beati Petri*, non tam, quod super altari B. Petri necessario benedicendum sit; sed quia velut particulam Ecclesiasticæ potestatis significat, derivatam ex plenitudine Pontificiæ potestatis, quæ in Petro, ejusque Successoribus residet. Unde Paschalis Papa ad Archiepiscopos scripsit: *Cum igitur a Sede Apostolica vestræ insignia dignitatis exigitis, quæ a Beati Petri tantum corpore assumuntur: justum est, ut vos quoque Sedi Apostolicæ subjectionis debita signa solvatis, quæ vos cum B. Petro tanquam membra de membro habere, & catholici capitis unitatem servare declarant.* c. 4. in fin. de elect.

§. 353. II. Symmachus P. qui an. 498. ad Pontificatum ascendit, ad Theodorum Laureacensem scribit his verbis: „Diebus vitæ tuæ Pallii usum, „quem ad sacerdotalis officii decorem, & ad ostendendam unanimitatem, quam cum Beato Petro Apostolo universus grex dominicarum ovium, quæ & „commissæ sunt, habere dubium non est, ab Apostolica Sede, sicut decuit, poposcisti, quod utpote „ab eisdem Apostolis fundatæ Ecclesiæ majorum more „libenter indulimus, ad ostendendum te Magistrum „& Archiepiscopum, tuamque sanctam Laureacensem Ecclesiam provinciæ Pannoniorum Sedem fore „metropolitanam. Idcirco pallio, quod ex Apostolica caritate tibi destinamus, quo uti debeas secundum morem Ecclesiæ tuæ, solerter admonemus,

„pariterque volumus, ut intelligas, quia ipse vestitus, quo ad Missarum solennia ornaris, signum „præstendit, per quod scito, te cum fratribus debere „compari. ac mundialibus illecebris in affectu crucifigi. Unde cum te foris hujusmodi insignio indueris, intus in animo considera, quod hoc sit „magis oneris, quam honoris“ &c. (c). Adde can. 9. dist. 100.

(c) Concil. edit. Mansi Tom. VIII. col. 228. *Ex his patet etiam antiquitas pallii.*

§. 354. III. Romani Pontifices Episcopos illos, quos Vicarios suos constituerant, uti singulari prærogativa potestatis, ita etiam honore pallii exornarunt. Vigilius P. factus Pontifex an. 538. ad Auxanium Arelatensem: *Digna, inquit, credimus ratione compleri, ut agenti vices nostras pallii non desit ornatu* (d). Pelagius I. cum Vicarium Apostolicum creasset Sapandum itidem Arelatensem, literis ad eum datis an. 557. pallium ei se attribuere dicit, ut *in tanto loci fastigio constitutus præclaro quoque habitu decoraretur* (e). Adde can. 10. & 11. dist. 100.

(d) Concil. edit. Mansi. T. IX. col. 42.

(e) *Ibid.* col. 725.

§. 355. IV. Joannes P. VIII. Vuliberto Episcopo Aggrippinensi scribit: *Optatum tibi pallium nunc conferre nequivimus; quia fidei tuæ paginam minus, quam oporteat, continere reperimus: cum videlicet in ea nullam sanctorum universalium Synodorum, in quibus fidei nostræ Symbolum continetur, nec Decretalium Pontificum Romanorum constitutorum, secundum morem, feceris mentionem: sed nec illam propria subscriptione munieris, nec aliquem, qui hanc jurejurando firmaret, miseris.* can. 4. dist. 100. Adeo
nempe

nempe ad pallium, ejusque obtinendum finem necessaria censebatur aperta, atque integra fidei professio (§. 351.). De subjectione vero erga Apostolicam Sedem, & humilitate, quam profitentur ornati pallio, in hunc modum scripsit S. Gregorius M. ad Joannem Episcopum Ravennatensem, qui contra morem & generale præscriptum Apostolicæ Sedis pallio utebatur extra Missarum solemnities: *Decorari pallio volumus, forsan moribus indecori; dum nihil in Episcopali cervice splendidius fulget, quam humilitas.* can. 8. §. 2. dist. 100. — *Pervenerat ad nos, quædam in Ecclesia vestra contra consuetudinem, atque humilitatis tramitem geri, quæ sola, ut bene nostis, est officii Sacerdotalis erectio.* can. 7. ead. Huc sane pertinet dictum Leonis M. can. 14. II. q. 6. *Qui scit, se quibusdam esse præpositum, non moleste ferat, aliquem sibi esse prælatum: sed obedientiam, quam exigit, etiam ipse dependat.* — *Discipuli enim sumus humilis & mitis magistri, dicentis: Discite a me, quia mitis sum, & humilis corde.* Hinc S. Bonifacius Apostolus Germaniæ, ut Metropolitanis arctius, apertiusque adstringerentur Apostolicæ Sedi, in Synodo, & cum Synodo decrevit; — *Metropolitanos pallia ab illa Sede quærere, & per omnia præcepta Petri canonice sequi desiderare, ut inter oves sibi commendatas numeremur* (f).

(f) In epist. ad Cudbertum.

§. 356. Auctoritas ergo pallii intelligitur I. ex singulari prærogativa, ac fere etiam ampliori potestate Ecclesiastica supra alios Episcopos, cujus indicium est. Hinc *solus Romanus Pontifex in Missarum solenniis pallio semper utitur, & ubique; quoniam assumptus est in plenitudinem Ecclesiasticæ potestatis,*

statis, quæ per pallium significatur: alii autem eo nec semper, nec ubique, sed in Ecclesia sua, in qua jurisdictionem Ecclesiasticam acceperunt, certis debent uti diebus; quoniam vocati sunt in partem sollicitudinis, non in plenitudinem potestatis. c. 4. h. t. II. Intel- ligitur eadem ex ipsa persona concedentis, quæ est solus Romanus Pontifex relate ad universum occi- dentem, & ad Patriarchas majores orientis; qui de- in pallia concedunt suffraganeis suis, recipientes pro se professionem canonicam, & pro Romana Ecclesia sponsonem obedientiæ ab eisdem. c. 23. de Privil. III. Intellegitur ex effectu, quem confert, nempe ex plenitudine Pontificalis officii cum Patriarchalis (vel Archiepiscopalis) nominis appellatione (g). IV. In- telligitur ex ipsis personis, quæ pallii jure gaudent, & in Hierarchia Ecclesiastica eminent; quales sunt Romanus Pontifex, Patriarchæ, Primates, & Ar- chiepiscopi. Ex singularibus privilegiis, & præro- gativis quarundam Sedium Episcopaliū non nullis etiam Episcopis pallium concessum est, salva per se erga Metropolitanum subjectione, ceu in Germania Episcopo Bambergensi, Passaviensi & an. 1735. Wir- ceburgensi (h).

(g) *Formula, qua Electis pallium imponitur a quodam Episcopo, cui ista res committitur, est hæc: „Ad hono- rem omnipotentis Dei, & B. Mariæ semper Virginis, „ac beatorum Apostolorum Petri & Pauli, Domini no- „stri N. Papæ N. & S. Romanæ Ecclesiæ, nec non Ec- „clesiæ N. tibi commissæ, tradimus tibi pallium de cor- „pore B. Petri sumtum, in quo est plenitudo Pontificalis „officii cum Patriarchalis (vel Archiepiscopalis) nominis „appellatione; ut utaris eo intra Ecclesiam tuam certis „diebus, qui exprimuntur in privilegiis ab Apostolica Se- „de concessis.“ In nomine Patris &c.*

(h) *Orta est tum disceptatio, utrum Episcopo suffraganeo concedi pallium possit a Papa sine consensu Metropolitan.*

§. 357. *Ufus legitimus pallii distingui in primis debet a jure petendi.* Hoc quidem jus pallii a Sede Apostolica petendi secundum canones adhæret Ecclesiæ, & ad Successores transit, adeoque inter privilegia realia numerari potest. At ipsum pallium conceditur personæ, ita, ut ejus usus alteri concedi nequeat, & extinguatur cum persona. Ab hac igitur peti debet instantè, instantius, instantissime (i), can. 1. & 2. dist. 100. Dein antequam imponatur, Sedi Apostolicæ juramentum præstari debet; quod primigeniæ naturæ ac fini pallii perquam consentaneum est (§. 352. 355.). Ac sane necessarium fuit, ut ob nova identidem pullulantia schismata Patriarcharum, Primatum, Archiepiscoporum, nova etiam invenirentur media pro conservanda Ecclesiæ unitate. Petitio fieri debet intra tres menses a die consecrationis. can. 1. dist. 100. Facta autem petitione ejus traditio retardari non debet per objectum petenti crimen vel defectum, nisi objiciens præmisso juramento de objectis promptam fidem faciat. Extrav. un. h. t. int. comm.

(i) *Benedictus XIV. in cit. const. Rerum Ecclesiasticarum. prope finem.*

§. 358. Adstringitur pallium I. *ad personam*, ita, ut non possit alteri commodari. c. 2. h. t. Si ad aliam transfertur Ecclesiam, pallii jure gaudentem, aliud pallium *ad nomen*, & *ad usum ejusdem Ecclesiæ* petere debet. c. 4. in fin. de postul. Præl. Quodvis dein pallium cum ipso Archiepiscopo sepelitur, c. 2. h. t.

§. 359. Adstringitur II. *ad provinciam*; inter cujus Episcopos Archiepiscopus velut Princeps, & Dux censetur; quam ipsam Archiepiscopalis nomi-

nis adpellationem ope pallii consequitur, c. 3. h. t. uti vero ipsius *potestas* provinciæ finibus constringitur, sic & pallii usus. Ante acceptum pallium exercere non potest, quod facit, ut *Archiepiscopus*, ceu quoad *actus jurisdictionis* convocare Concilium, visitare provinciam, vel quoad *actus ordinis*, qui inter Missarum solennia, aut cum Episcopalibus ornamentis peraguntur, e. g. Clericos ordinare, Chrisma conficere, Ecclesias consecrare; cum id non tanquam simplex *Episcopus*, sed tanquam *Archiepiscopus* in Ecclesia sua facere videatur. c. 28. v. præterea. de elect. (k). Intra provinciam vero in omnibus Ecclesiis pallio uti potest, quando posset in sua, c. 1. & 6. h. t.

(k) *Potest tamen Archiepiscopus confirmatus, etsi nondum receperit pallium, mandare alicui ex suffraganeis, ut consecret Electum, qui ad jurisdictionem Archiepiscopi pertinet. c. 11. de elect.*

§. 360. Adstringitur pallium III. ad Ecclesiam, nempe inter Missarum solennia, atque in iis; quæ cum Episcopalibus ornamentis peraguntur. Id continetur in forma traditionis pallii: *Ut utaris eo intra Ecclesiam tuam* (§. 356. in nota). Si vero te sacris indutum vestibus Ecclesiam processionaliter, vel alio modo exire contigerit, tunc tuo pallio minime uti debes. c. 1. h. t. & can. 6. dist. 100. Solum privilegium Apostolicum, non autem consuetudo efficere potest, ut Archiepiscopus pallio utatur extra Ecclesiam (can. 8. dist. 100.), aut omnino extra provinciam in Ecclesia quadam; at tum præterea consensus Episcopi, qui illi præest Ecclesiæ, requiritur. c. 5. h. t. in fin.

§. 361. Adstringitur pallium, ejusque usus IV. ad certos dies; qui exprimuntur in privilegiis ab Apo-

Apo-

Apostolica Sede concessis. (§. 356. in not. & c. 7. h. t.)
Hi dies enumerantur in Pontificali Romano tit. de
Pallio; ac paulo aliter, quam a Glossa ad c. 4. h. t.

TITULUS IX.

DE RENUNTIATIONE.

ARGUMENTUM.

I. Renuntiatio est tacita, vel expressa: pura vel conditionalis. §. 362. *II. Ut legitime fiat, spectatur voluntas renuntiantis, causa, auctoritas Superioris, alia requisita.* §. 364. *Effectus.* §. 368.

§. 362. *Renuntiatio* aut *Resignatio* est Ecclesiasticæ dignitatis aut beneficii abdicatio ex justa causa, & auctoritate Superioris sponte ac legitime facta. Hac notione etiam comprehenditur *renuntiatio tacita*, quæ fit, cum quis ponit certum factum, ex quo jus præsumit, vel potius inducit renuntiationem: uti fit, 1. si beneficiatus in minoribus constitutus contrahit matrimonium (c. 1. & 3. de Clericis conjugatis), etsi forte invalidum ob incognitum impedimentum; *cum in matrimoniis contrahendis non juris effectus, sed animi destinatio attendatur*, c. 4. de Bigamis non ordinandis. 2. Si consequitur possessionem secundi beneficii incompatibilis, c. 28. de præb. 3. Si professionem emittit in ordine regulari, c. 4. de Regular. in 6. Hæc exempli causa fore posita: ceterum sine expressa juris dispositione non est statuenda tacita renuntiatio; arg. c. 14. h. t. ubi Abbas per hoc, quod ab obedientia absolverit subditos, nondum censebatur renuntiasse prælaturæ. Tacitæ renuntiationi opponitur expressa, quæ etiam fieri potest per procuratorem, clericum vel laicum, unum, vel plures.

§. 363. In expressis renuntiationibus spectatur I. voluntas renuntiantis. II. Justa causa. III. Auctoritas Superioris, & aliorum consensus, quorum interest. IV. Effectus. Ex voluntate est renuntiatio *pura* sine ulla conditione, vel modo: *conditionalis*, facta in favorem certæ personæ, ex causa permutationis, cum reservatione fructuum aut pensionis, regressus, ingressus, accessus. *Regressus* est, quando Papa concedit, ut, si resignatarius præmoriatur, beneficium revertatur ad resignantem. *Ingressus*, si Papa contulerit mihi beneficium; ego autem, antequam capiam possessionem, illud resignem concedente Papa, ut, si resignatarius moriatur, ego ingrediar meum beneficium, quod nunc resigno. *Accessus*, quando ille, cui conferendum esset beneficium, propter ætatis immaturitatem capax non est; & ideo Papa confert alteri, donec ille efficiatur habilis perveniendo ad legitimam ætatem; qua adveniente poterit propria auctoritate accedere ad beneficium. Regula generalis est, omnes privatas pactiones circa beneficia esse prohibitas & irritas, c. 4. 6. & fin. de Pactis. De voluntate legitimi Superioris, ac plerisque in casibus, solius Papæ potest adjici modus, aut conditio; sed cujus vis & effectus a voluntate Superioris, non a resignantibus provenit.

§. 364. Voluntas renuntiantis debet esse libera, id est, immunis a vi, metu, & dolo. Renuntiatio, vi gravi & injusta extorta, jure naturali est irrita; tit. de his, quæ vi metusve causa; & c. 2. 3. & 4. ib. Id clare deciditur pro casu, quo seculares captum, vel detentum ad renuntiandum compellunt. Clem. 2. §. *sanæ*. de pœnis. Qui ait, se non sponte renuntiassse, re ipsa affirmat, vim sibi fuisse illatam, idque probare

bare debet. c. 5. h. t. At, qui renuntiavit spoliatus, præsumitur, id non sponte fecisse: *Non est verisimile, quod sponte juri suo renuntiaverit, qui renuntiavit spoliatus.* c. 2. & 3. de restitut. spoliatorum. Dolus nocere non debet ei, qui inductus est; exempla videntur extare c. 7. & 13. h. t., nec prodesse debet dolum adhibenti. c. 2. in 6. Vis *injusta* non est, si quis a legitimo Superiore cogitur ad dimittendum beneficium, uti si quis eo privari posset: si inutilis est Ecclesiæ, vel id fieri necesse sit ad scandalum tollendum. De impuberibus Clericis & minoribus quæstio voluntatis & sufficientis intellectus moveri potest. Ac Clericus quidem impubes sine auctoritate tutoris & decreto Superioris non resignat, c. 2. de ætat. & qual. & ord. præficiend. c. fin. de judiciis in 6.; valide tamen resignat minor 25. annis; cui, si læsum se queratur, an detur restitutio, disputant.

§. 365. *De justa causa* renuntiandi si quæritur, distingui oportet inter dignitatem Episcopalem vel Episcopatu Superiorem, & alias inferiores dignitates, ac beneficia. De Episcopatibus renuntiandis exacte differit Innocentius III. c. 10. h. t., ubi causæ justæ enumerantur sex, at non sine cautelis; debilitas corporis. §. 3. cit. c. 10. defectus scientiæ §. 4. conscientia criminis. §. 2. irregularitas jam promoti §. 6. odium plebis. §. 5. datum scandalum. §. 6. (a). At tanquam insufficientes rejicit, causam humilitatis §. 1. tedium laboris §. 10. amorem vitæ contemplativæ §. 11. & alios istiusmodi obtentus, qui recensentur in parte decisa. De prætenso debilitate corporis & senectute conf. c. 1. h. t. De malitia plebis. c. 9. eod. de ingressu in ordinem religiosum. c. 18. de Regular. Relate ad alia beneficia, vel dignita-

nitates inferiores sufficiunt etiam minores causæ e. g. senium, vitium corporis, crimen, censura &c., quæ enumerantur a Pio V. in const. 58. *Quanta Ecclesiæ.* In his causis vel maxime probatur ingressus in religionem, can. un. XIX. q. 1. & can. 2. ib. q. 2. ac cit. c. 18. de Regular (b). Etsi vero cuique regulariter liberum sit, suo beneficio renunciare, ac minores etiam in hoc genere sufficiant causæ; ex stylo tamen Curiae Romanæ non admittitur renunciatio beneficii Parochialis, vel alterius personalem residentiam requirentis, nisi quis illud saltem possederit per quinque annos.

(a) *Hæc comprehensa sunt notis versiculis:*

*Debilis, ignarus, male conscius, irregularis,
Quem mala plebs odit, dans scandala, cedere possit.*

(b) *Ea de re dignissima lectu est Epistola Benedicti XIV. ad Cardinalem Quirinum. Tom. 2. const. 25.*

§. 366. *Auctoritas Superioris*, nempe ejus regulariter, a quo quis dignitatem vel beneficium habet, ad renunciandum eidem requiritur, c. 4. h. t. quia in his tam institutio, quam destitutio non fit proprio arbitrio; ac ne consuetudo quidem valet dimittendi dignitatem vel beneficium incio aut invito Superiore. §. 226. Hinc Episcopatus & prælaturæ immediatæ quæcunque Summo Pontifici sunt reservatæ (c); omnes item conditionales resignationes e. g. in favorem tertii (d), excepta resignatione per viam permutationis, & sub onere pensionis moderatæ, ex legitima causa per Episcopum imponendæ. Renunciatio facta non in manibus legitimi Superioris, sed laici, non valet; renuntians tamen beneficio suo spoliandus dicitur. c. 8. h. t. Romanum Pontificem, etsi

etſi Superiorem non habet, Papatui renuntiare poſſe, declaratum fuit c. 1. h. t. in 6.

(c) *Innocentius III. in cit. c. 10. in f. Epifcopo ad vitam contemplativam adſpiranti ita ſcribit: Si pennas habeas, quibus fatagas in ſolitudinem avolare; ita tamen adſtriſtæ ſunt nexibus præceptorum, ut liberum non habeas abſque noſtra permiſſione volatum. Adde c. 15. h. t.*

(d) *Trident. Seſſ. XXV. c. 7. de ref.*

§. 367. Ut canonice fiat renuntiation vel reſignatio, præterea opus eſt, 1. ut fiat ſalvo jure tertii e. g. patroni; ejus enim conſenſus requiritur, ſi eſt beneficium patronatum. 2. Ut ſi reſignatio ſit in favorem tertii, beneficium non ſit litigioſum c. 2. ut lite pend. in 6. 3. Ut reſignans aliud poſtea habeat ſuſtentationis medium. Trid. Seſſ. 21. c. 2. de ref. 4. Ut reſignatio beneficiorum, quæ ſit in Germania, publicetur intra novem meſes a die conceſſæ gratiæ, ſi ea facta ſit in Curia Romana: ſi vero coram Ordinario, publicanda eſt intra tres meſes a die collati beneficii, eaque publicatio fiat in Eccleſia Cathedrali, & ſimul etiam in parochiali, ſi beneficium intra fines Parochiæ ſitum eſt (e). In quibusdam diœceſibus ejusmodi publicationes ſolemnes ex conſuetudine omittuntur; Epifcopi autem eſt providere, ne executio nimium differatur. Poſteſt etiam publicatio urgeri ab eo, cujus intereſt, ſi nimias moras in fraudem neſti videat.

(e) *Secundum regulas Cancellariæ de publicandis reſignationibus. Conſtit. Gregorii XIII. Humano vix. Confirmata a Benediſto XIV. in Conſt. Eccleſiaſtica Miniſteria.*

§. 368. Effectus renuntiationis a Superiore admissæ est, 1. ut beneficium censeatur vacare, & quidem in Curia, si in manus Pontificis resignatum fuerit; ut proinde renuntians totum jus ad beneficium, ejusque fructus amittat. 2. Si renuntiatio facta est per procuratorem, ea firma manet, licet procurator primus fuerit revocatus, ipso tamen & Superiore ignorante; nisi per malitiam ipsorum aut aliorum revocatio fuerit occultata, vel retardata. Clem. unic. h. t. 3. Qui sponte renuntiavit e. g. electioni de se factæ, super ea ulterius non auditur. c. 6. h. t. 4. Effectum non sortitur renuntiatio Novitii professionem non secuta; Trid. Sess. XXV. c. 16. de Regular., aliter nempe, ac olim, c. 3. h. t. 5. Neque renuntiatio infirmi infra 20. dies decedentis, juxta regulam Cancell. de infirmis resignantibus. 6. In resignationibus factis cum reservatione pensionis, nulla & irrita sunt pacta, eas pensiones extinguendi per anticipatas solutiones (f).

(f) Const. 30. *Benedicti XIV.* In sublimi. edita an. 1741.

TITULUS X.

DE SUPPLENDA NEGLIGENTIA PRÆLATORUM.

ARGUMENTUM.

I. *Negligentia suppletur vel ex officio ordinario, vel ex dispositione juris. Huc pertinet devolutio. §. 369. Papa & Diocesani ex officio, Metropolitæ ex dispositione juris suppleant. §. 272. Quomodo negligentia suppletur in conferendis beneficiis. §. 375. An valeat collatio beneficii post lapsum temporis legitimi. §. 381.*

§. 369. Fieri potest, ut, qui exequendis Ecclesiasticis muniis præsent, pro humanæ conditionis fragi-

fragilitate quidpiam *negligant*, id est, omittant de eo, quod ex jure vel consuetudine vi officii facere tenebantur. Huic negligentia provident SS. Canones, ac *præcipiunt*, ut alius eam suppleat, id est, auctoritate juris exequatur id, quod ab alio negligenter omissum est. Ipsa enim rubrica tituli vim legis habet, perinde, ac si diceretur: *De negligentia Prælatorum, ut suppleatur*.

§. 370. Auctoritate juris suppleant negligentiam I. illi, qui jurisdictionem ac potestatem ex natura officii ac status sui habent tum in negligentem, tum etiam in personas ac causas, circa quas negligentia committitur. II. Ii, quibus talis jurisdictio ac potestas per se ex natura officii & status sui non competit, sed ex dispositione juris. Prioris generis exempla sunt ea, quæ a Summo Pontifice per universum orbem, & ab Episcopo in Diœcesi aguntur: posterioris, quæ sunt a Metropolitanis in diœcesibus Suffraganeorum, vel a Patriarchis & Primatibus in districtibus suis can. 8. IX. q. 3. & c. 9 de officio jud. Ord. In priore casu competunt omnia, quæ non sunt specialiter excepta: in posteriore, quod non est concessum, censetur prohibitum (§. 179). Neque enim aliorum negligentia alteri per se jus & potestatem in eorum negotia & causas immiscendi se præbet. Cavendum primo, ne potestas ordinaria & vi officii competens restringatur ad solos casus supplendæ negligentia; dein ne facultas, ex dispositione juris supplendi aliorum negligentiam, ad perturbandum ordinem hierarchicum, & limites jurisdictionis confundendos detorqueatur.

§. 371. *Jus Devolutionis* dicitur, quo secundum jura suppletur, vel emendatur, quod ab alio,
Zallinger L. I. Decretal. R omif.

omissum est, aut male actum dicitur; idque spectatur potissimum in conferendis beneficiis & in appellationibus. Regula est, quod devolutio fiat ab inferiore ad Superiorum (a), & quod fiat gradatim. c. 41. de electione; ibi: *Eligendi potestas ad eum, qui proximo præesse dignoscitur, devolvatur.* Habet tamen hæc regula suas exceptiones, præsertim si potestas supplendi non ex natura rei, sed ex dispositione juris contingit. c. 18. de elect. in 6. imo si electio Episcoporum, etiam non exemptorum, in Germania non tantum minus canonica fuerit, sed etiam debito tempore non præsentetur, devolvitur pro ea vice providendi potestas immediate ad Summum Pontificem per concordata Germaniæ §. 3.

(a) Quando beneficia, per Concordata Papæ reservata, certis casibus secundum eadem Concordata consert Ordinarius; non censetur id fieri jure devolutionis; sed quia eo casu cessat reservatio, quæ Ordinarium impedivisset a collatione. Negligentiam Episcopi in conferendis beneficiis non omnibus casibus supplet Capitulum, utpote inferius, sed in iis, quæ jure ordinario Episcopus conferre potuisset, ob specialem nexum inter Episcopum & Capitulum, vi cuius unum velut corpus efficiunt: conveniens autem est, ut defectum unius membri membrum aliud suppleat.

§. 372. Qui vi officii, & potestatis ordinariæ inferiorum defectus & negligentiam suppleant, id faciunt in omnibus casibus, nisi obstet singularis exemptio, quæ tamen relate ad Summum Pontificem locum habere non potest; Episcopus etiam contra exemptos multis casibus procedit vi Concilii Tridentini, tanquam Delegatus Sedis Apostolicæ: de qua re alius est dicendi locus. Huc pertinent sequentes Decisiones.

I. Si inferiores Prælati, qui ex Privilegio, consuetudine vel præscriptione potestatem habent corrigendi

gendi delicta subditorum, id facere negligent, Episcopus eis præfigit terminum, eoque elapso ipse procedit, supplendo eorum negligentiam. c. 13. v. *Excessus*. de officio jud. ordinarii.

II. Si regularis exemptus extra claustrum ita notorie deliquerit, ut populo scandalo sit, & a Superiore intra terminum ab Episcopo præfigendum severe punitus haud fuerit, delinquens ab Episcopo punitur. Concil. Trid. Sess. XXV. c. 14. de Regul. Super hujus Decreti executione an. 1596. Constitutionem; *Suscepti muneris*. edidit Clemens VIII. Cum enim Superiores Religiosum, qui deliquerat, extra Diæcesin Episcopi inquirentis mitterent, quo ille evadere impunitus videbatur; hinc præcipit Clemens VIII. Superioribus Ordinum sub pœna privationis officii, ut delinquentem puniant ad præscriptum ab Episcopis terminum, ubicunque ille fuerit.

III. Si Prælati, ad quos spectat, non corrigunt ea, quæ contra reverentiam SS. Ecclesiis debitam, præsertim in recitandis horis Canonicis, geruntur, jubentur locorum Ordinarii defectum vel negligentiam supplere, si peccantes exempti non sint; alias Superiores istorum. Clem. I. de celebr. Missar.

IV. Inferiore Prælato negligente magistros constituere pro informanda juventute, supplet Ordinarius. c. 2. de Magistris.

V. Si per malitiam vel desidiam judicis a Papa delegati perseverat quis in peccato e. g. in matrimonio incestuoso, Ordinarius supplet. c. 6. de officio jud. ordinarii.

§. 373. De iis, qui negligentiam inferiorum non vi ordinariæ potestatis, & ex officio suo, sed ex

dispositione juris supplet, regula generalis est, id fieri non posse, quando *id non invenitur a jure concessum*. c. 1. h. t. in 6. (§. 370). Hinc si Episcopus excommunicatione adstrictus impeditur fungi Episcopali jurisdictione, non Metropolitanus supplet, utpote qui jurisdictionem in subditos Suffraganeorum non habet, sed Capitulum ob rationem indicatam §. 371. in fine. Et si Episcopus, tertio cum humilitate ac devotione requisitus, Abbates Cistercienses benedicere renuit, defectum non supplet Metropolitanus, sed ipsum jus, quod Abbatibus ante acceptam benedictionem Episcopi omnia exercere permittit, quæ ad officium Abbatis benedicti pertinent. c. 1. h. t. ubi Gonzalez id de aliis etiam Abbatibus intelligendum docet.

§. 374. Ex dispositione juris Metropolitanus supplet negligentiam Episcopi I. in absolvendo excommunicato, observata certa forma, quæ extat in c. 8. de offic. jud. ord. in c. 40. de sent. excom. & c. 7. §. sane. eod. in 6. II. In puniendis notoriis criminibus, quæ Episcopus in suis Diocesanis emendare negligit. c. 1. §. 4. de censibus in 6. ubi id de Archiepiscopo provinciam visitante videtur statui. Concilium Trid. Sess. XXIV. c. 20. de ref. permittit Nuntiis, contra Clericos, aliasque Personas Ecclesiasticas procedere, sed *Episcopo prius requisito, eoque negligente*. III. In institutione parochorum, quos legitime præsentatos Episcopus infra duos menses non instituit. Ex constit. 33. Pii V. *In conferendis*. §. 4. IV. In constituendo Oeconomo. can. 3. IX. q. 3. At can. 2. dist. 89. statuitur, ut omnis Clerus Episcopo constituat Vicedominum, vel Majorem domus, si ipse constituere neglexerit; quibus nominibus videtur idem indicari, ac per
Oeco-

Oeconomum. Ob mutatam administrationem bonorum Ecclesiasticorum jus antiquum non observatur. V. Concil. Trid. Sess. XXIV. c. 20. de ref. permittit partibus litigantibus, vel alteri illarum judicem superiorem, alias tamen competentem adire, quando in prima instantia coram Ordinario, infra biennium a die motæ litis computandum, causa non terminatur.

§. 375. In beneficiis conferendis fit devolutio, cum potestas eligendi, præsentandi, libere conferendi ab ordinario electore, patrono, collatore pro una vice privato, transit ad alium, vel propter negligentiam, si intra tempus a jure præfixum facta non est electio, præsentatio, collatio; vel ob delictum, si indignus est electus, aut non servata forma Canonica. Id tamen huc non pertinet; quia de sola agitur supplenda negligentia, seu omissione. De tempore, intra quod fieri debet provisio, conf. §. 276. Huc ergo pertinent decisiones, quæ sequuntur.

§. 376. I. In metropolitanis & cathedralibus etiam non immediate subjectis Ecclesiis, & monasteriis immediate subjectis Sedi Apostolicæ, fiant electiones Canonice; quæ si debito tempore non præsentatæ, aut minus Canonice fuerint, providet Papa per Concordata nationis Germanicæ §. 3. contra c. ne pro defectu. 41. de elect. at conformiter generali regulæ a Glossa in Clem. un. h. t. verbo *dispositionem*, & ab antiquis traditæ: quod negligentia eligentium vel præsentantium jus devolvat ad confirmantem, vel instituentem.

§. 377. II. Si electio pertinet ad capitulum Ecclesiæ inferioris, non exemptæ, vel collatio beneficii

ad quemvis Clericum Episcopo subjectum, tum propter istorum negligentiam devolutio fit ad Episcopum: hoc negligente ad Archiepiscopum: demum ad Papam gradatim. c. 2. de concess. præb. c. 3. h. t. ac conceditur cuivis tantum temporis, quantum ordinariis electoribus aut collatoribus definitum est. Episcopus autem, ad quem devoluta est potestas eligendi Prælatum Ecclesiæ inferioris, secularis vel regularis, eligere tenetur aliquem de corpore ejusdem Ecclesiæ, si idoneus adest. can. 13. dist. 61. (§. 295). Nec obstat, quod ipsi capitulares extra gremium possint quemdam assumere; ipsi enim possunt renunciare juri ac favori suo, ut dicitur c. 19. in parte decis. de elect. Universe Prælatus, qui jure devoluto eligit vel confert, id facere debet secundum naturam & conditiones beneficii, ut observat Rebuffus tit. de devolut. n. 40.

§. 378. III. Si Prælati regulares beneficia secularia vel regularia, ceu prioratus, administrationes &c. ad suam collationem spectantia intra semestrem tempus non conferant, devolutio fit ad Episcopum, qui ea confert *sua* auctoritate, si ipsi Prælati non sunt exempti: *Apostolica*, si ipsi exempti sint. Clem. un. h. t. Si autem ipsa quoque beneficia essent exempta, devolutionem fieri ad Papam, defendit Glossa in cit. Clem. Un. h. t. v. *sua*.

§. 379. IV. Si electio e. g. Decani, collatio Canonicatus, aut beneficii ad Capitulum pertinet, eo negligente jus devolvitur ad Episcopum: & vicissim si collatio ad Episcopum *jure proprio* & *ordinario* pertinet, isque negligat, fit devolutio ad Capitulum: ab hoc, si negligat, ad Metropolitanum: denique ad Papam. c. 3. h. t. c. 2. de concess. præb.

Dixi:

Dixi: si collatio ad Episcopum *jure proprio* & *ordinario* spectat: si enim *jure tantum devoluto* conferre posset, idque ipsum negligeret, devolutio non fit ad Capitulum, sed ad Metropolitanum; quia in juribus devolutis Capitulum tantam connexionem & communicationem cum Episcopo non habet, quantum habet in juribus propriis Ecclesiæ.

§. 380. V. Si collatio beneficii ad Episcopum & Capitulum communiter, sive conjunctim pertinet, tum a Capitulo moneri debet Episcopus, eoque cunctante Capitulum solum providet instante termino temporis semestris: & similiter Episcopus, si Capitulum ea de re admonitum moram trahat. Eodem casu, quo collatio ad Episcopum & Capitulum conjunctim pertinet, & altera pars ob suspensionem vel excommunicationem conferre non possit, tum altera pars sola conferet. Si vero ad solum Episcopum, vel solum Capitulum collatio pertineret, devolutio non fit, nisi censura irretitus, in mora sit, absolutionem petendi. c. 3. h. t. & c. un. Ne Sede vacante. in 6.

§. 381. Quæri potest, utrumne *valida* sit electio vel collatio, quæ fit post lapsum temporis legitimi? R. 1. non est ita firma, quin a Superiore, ad quem jus devolutum est, tum ipsa, tum, quæ inde secuta sint, rescindi queant. Nam *canon latæ sententiæ habet in se executionem*, ita, ut Superior per sententiam declarare possit, omnia ipso jure irrita esse, quæ contra canonem latæ sententiæ facta sunt. R. 2. Si tamen nemo se opponat, electio vel collatio sustinetur, atque electus vel provisor in conscientia tutus est, modo alias sit dignus. c. 3 & 4 h. t. (b)

(b) *Quid juris sit, si Patroni debito tempore non præsentes: explicatur ad tit. de Jure Patronatus. Quomodo Capitulum aliis casibus defectus & impedimenta Episcopi suppleat, exponi solet titulo: Ne Sede vacante aliquid innovetur; ubi agitur de juribus Capituli, & vacatione vera, aut ficta.*

TITULUS XI.

DE TEMPORIBUS ORDINATIONUM, ET QUALITATE
ORDINANDORUM.

ARGUMENTUM.

*I. Enumerantur Ordinum gradus, ritus, officia. §. 382.
II. Inde intelligitur Hierarchia Ordinis, ejusque fundamentum. §. 395. III. Numerus Ordinum & ratio Sacramenti §. 397. IV. Quid requirat præcise valor ordinationis §. 399. V. Ut vero & licite, observanda sunt tempora & locus §. 400. VI. Item qualitates ordinandorum; inprimis ætas §. 403. VII. Aliæque prominaribus & majoribus Ordinibus §. 404. VIII. Ac generatim, ne irregularis ordinetur §. 407.*

§. 382. Actum est post generalia juris principia de illo genere personarum, quod ad regendam cum potestate Ecclesiam præficitur; deinceps universus Clericorum chorus, statusque proponitur. Assumptio in eum statum fit per *primam tonsuram*, quæ est Cæremonia sacra in his consistens; 1. Pontifex, seu Ordinans præmissis precibus Candidatis status clericalis coram se genuflexis extremitates capillorum incidit, ad designandam vitiorum & desideriorum carnalium depositionem; nam ut S. Hieronymus inquit, *rasio capitis est temporalium omnium depositio*, Cap. 7. XII. q. 1. Hinc singuli dum tondentur, dicunt: *Dominus pars hereditatis meæ & calicis mei;*

tu es, qui restitues hereditatem meam mihi. 2. Post alias orationes Episcopus superpelliceum tonsis imponit, dicens: *Induat te Dominus novum hominem, qui secundum Deum creatus est, in iustitia & sanctitate veritatis.* 3. Persolutis iterum precibus sic eos alloquitur: *Filii carissimi, animadvertere debetis, quod hodie de foro Ecclesiæ facti estis, & privilegia clericalia sortiti estis. Cavete igitur, ne propter culpas vestras illa perdatis, & habitu honesto bonisque moribus, atque operibus Deo placere studeatis; quod ipse vobis concedat per Spiritum sanctum suum. R. Amen.*

§. 383. Vis igitur & effectus Tonsuræ est, I. ut Tonsurati fiant membra status & ordinis clericalis. II. Ut induti superpelliceo assistere possint in Choro ad cantanda divina officia; ac videntur iidem per antiquos Canones nomine *Psalmistarum* ac *Cantorum* designari (a). III. Ad supplendas functiones ordinum minorum admittendi sunt præ laicis. IV. Capaces sunt ad acquirenda & possidenda beneficia Ecclesiastica; modo non careant qualitatibus ad functiones beneficii requisitis. Nemini autem, nisi prima saltem tonsura insignito *valide* confertur beneficium vel dignitas Ecclesiastica. c. 2. de instit. c. 6. de transact. V. Præparantur ad ultiores ordines, ad quos Episcopus ipsos judicaverit dignos. VI. Acquirunt privilegia Clericorum, maxime fori & Canonis. VII. Ad vitæ morumque sanctitatem præ laicis obligantur. can. 21. VIII. q. 1. ibi: *Vehementer Ecclesiam Christi destruit, meliores laicos esse, quam Clericos.*

(a) Can. 1. dist. 21. can. 20. dist. 23. can. 6. XXVII. q. 1.

§. 384. Sequuntur *Ostiarii*, quibus in ordinatione dicit Pontifex: „Suscepturi, filii carissimi, officium

„cium Ostiariorum, videte, quæ in domo Dei agere
 „debeatis. Ostiarium oportet percutere cymbalum
 „& campanam; aperire Ecclesiam & sacrarium; &
 „librum aperire ei, qui prædicat. Providete igitur,
 „ne per negligentiam vestram illarum rerum, quæ
 „intra Ecclesiam sunt, aliquid depereat; certisque
 „diebus domum Dei aperiatis fidelibus, & semper
 „claudatis infidelibus. Studete etiam, ut sicut ma-
 „terialibus clavibus Ecclesiam visibilem aperitis &
 „clauditis; sic & invisibilem Dei domum, corda sci-
 „licet fidelium, dictis & exemplis vestris claudatis
 „diabolo, & aperiatis Christo.“ Tradens claves
 Ecclesiæ dicit: *Sic agite, quasi reddituri Deo ratio-
 nem pro iis rebus, quæ his clavibus recluduntur.*

§. 385. *Lectores* ostiariis digniores, sed ætate
 olim fere minores erant: illorum enim officium
 viros ætate maturos poscebat; Lectorum ordini
 adscribebantur adolescentes, qui aliquando apti ad
 sacerdotium futuri credebantur (b). Pontifex in or-
 dinatione tradens iisdem codicem, de quo lecturi
 sunt, quemque manu dextera tangunt, ait: *Accipite
 & estote verbi Dei relatores, habituri, si fideliter,
 & utiliter impleveritis officium vestrum; partem cum
 iis, qui verbum Dei bene administraverunt ab initio.*
 Lectorum ergo officium est, prælegere SS. Scriptu-
 ras (c), epistolas RR. Pontificum & aliorum Episco-
 porum, Acta martyrum, homilias Patrum: custo-
 dire item libros sacros, quod tempore persecutionis
 frequentibus erat periculis obnoxium (d).

(b) *Can. 3. dist. 77. Ex epist. Siricii P. ad Himerium Tar-
 rac. c. 9. Constant col. 633.*

(c) *Non in Missa solemnī, in qua epistolas & lectiones tan-
 quam partes ejusdem integrantes legit Sacerdos, sed
 extra Missam in psalmodiis, & instar lectionis simplicis.*

(d) *Conf.*

(d) Conf. Acta SS. Martyr. Saturnini &c. apud Hagio-graphos Antwerp. 11. Febr. & Baron. ad an. 303. n. VII, XII. XIII.

§. 386. *Exorcistas* Pontifex in ordinatione admonet his verbis: „Exorcistam oportet abjicere dæmones, & dicere populo, ut, qui non communicat, det locum; & aquam in ministerio fundere. Accipitis itaque potestatem imponendi manum super Energumenos, & per impositionem manuum ventrarum, gratia Spiritus sancti, & verbis exorcismi, pelluntur spiritus immundi a corporibus obsessis. Studete igitur, ut, sicut a corporibus aliorum dæmones expellitis, ita a mentibus & corporibus vestris omnem immunditiam, & nequitiam abjiciatis &c.“ Tradens librum exorcismorum, quem ordinandi manu dextera tangunt, dicit: *Accipite, & commendate memoriæ, & habete potestatem imponendi manus super energumenos, sive baptizatos, sive catechumenos.*

§. 387. Supremum inter ordines minores locum obtinent *Acolythi*; quod nomen a græca ductum origine significat *sequi, obsequi, famulari, proximum esse.* Ad ordinandos Episcopus dicit: „Acolythum oportet ceroferarium ferre, luminaria Ecclesiæ accendere, vinum & aquam ad Eucharistiam ministrare. Studete igitur susceptum officium digne implere. Non enim Deo placere poteritis, si lucem Deo manibus præferentes, operibus tenebrarum inserviat, & per hoc aliis exempla perfidiæ præbeatis. Sed sicut veritas dicit: Luceat lux vestra. — — Estote igitur solliciti in omni justitia, bonitate, & veritate, ut & vos, & alios, & Dei Ecclesiam illuminetis. Tunc etenim in Dei sacrificio digne vinum suggeretis & aquam, si vos ipsi
„Deo

„Deo sacrificium per castam vitam, & bona opera
 „oblatis fueritis. Quod vobis Dominus concedat per
 „misericordiam suam.“ Tradens dein Candela-
 brum cum candela extincta, manu dextera a singulis
 tangendum dicit: *Accipite ceroferarium cum cereo,*
& sciatis vos ad accendenda Ecclesiae luminaria man-
cipari in nomine Domini. Resp. *Amen.* Tradens
 vero urceolum vacuum similiter tangendum ait: *Ac-*
cipite urceolum ad suggerendum vinum & aquam in Eu-
charistiam Sanguinis Christi, in Nomine Domini. Resp.
Amen. Veteres Episcopi Acolythorum opera ute-
 bantur in perferendis ad alios Episcopos literis; uti
 patet ex literis S. Cypriani. Id nuntii munus mag-
 nam exigebat fidem iis temporibus, quibus furore
 & insidiis gentilium omnia infesta erant.

§. 388. A minoribus ordinibus ascenditur ad
 majores, qui & sacri dicuntur; eoquod necessario
 inter Missarum solemnias conferantur, & functiones
 suas supra gradus altaris obeant. In his Subdiaconatus & Diaconatus ad ministerium: Presbyteratus & Episcopatus ad consecrationem Sacramenti Eucharistiae spectant. Pontifex Subdiaconos ordinandos cum mitra sedens coram se stantes sic alloquitur: „Filii
 „dilectissimi, ad sacrum Subdiaconatus ordinem pro-
 „movendi, iterum atque iterum considerare debetis
 „attente, quod onus hodie ultro appetitis. Hactenus enim liberi estis, licetque vobis pro arbitrio
 „ad secularia vota transire; quodsi hunc ordinem
 „susceperitis, amplius non licebit a proposito resi-
 „lire, sed Deo, cui servire, regnare est, perpetuo
 „famulari; & castitatem, illo adjuvante, servare
 „oportebit; atque in Ecclesiae ministerio semper esse
 „mancipatos. Proinde dum tempus est, cogitate,
 „& si in sancto proposito perseverare placet, in no-
 mine

„mine Domini huc accedite (e).“ Officium Subdiaconatus dein explicans: „Subdiaconum, inquit, „oportet aquam ad ministerium altaris præparare, „Diacono ministrare, pallas altaris, & corporalia „abluere, calicem & patenam in usum Sacrificii ei- „dem offerre. Oblationes, quæ veniunt in altare, „panes propositionis vocantur. De ipsis oblationi- „bus tantum debet in altare poni, quantum populo „possit sufficere, ne aliquid putridum in sacrario re- „maneant. Pallæ, quæ sunt in substratorio altaris, „in alio vase debent lavari, & in alio corporales pal- „læ. Ubi autem corporales pallæ lotæ fuerint, nul- „lum aliud linteamen debet lavari, ipsaque lotionis „aqua in baptisterium debet vergi“ &c. Tradens Episcopus calicem vacuum cum patena vacua super- „posita, ab ordinandis manu dextera tangendum: *Vi- dete*, inquit, *cujus ministerium vobis traditur; ideo vos admoneo, ut ita vos exhibeatis, ut Deo placere possitis.* Amictum, qui super collo ordinandorum jacet, imponens singulis super caput, dicit: *Accipe amictum, per quem significatur castigatio vocis, in nomine Patris, & Filii, & Spiritus Sancti.* Resp. *Amen.* Manipulum in sinistrum brachium immit- tens, dicit: *Accipe manipulum, per quem designan- tur fructus bonorum operum, in nomine Patris, & Filii, & Spiritus Sancti.* Resp. *Amen.* Induens quemlibet tunica dicit cuilibet: *Tunica jucunditatis & indumento lætitiæ induat te Dominus, in nomine Patris, & Filii, & Spiritus Sancti.* Resp. *Amen.* Denique tradens omnibus librum epistolarum manu dextera tangendum: *Accipite*, inquit *librum Epistola- ram, & habete potestatem legendi eas in Ecclesia sancta Dei, tam pro vivis, quam pro defunctis. In nomine Patris, & Filii, & Spiritus Sancti.* Resp. *Amen.*

(e) *Hæc in memoriam revocanda sunt hodiernis Clericis quibusdam cupiditatum, & carnis æstu incensis atque ad nuptias anhelantibus: quam Ecclesiasticam continentie legem criminari non erubescunt. Addendus ex SS. Conc. Trid. can. 9. Sess. XXIV.*

§. 389. *Diaconorum* ordinatio antiquissimam refert Ecclesiæ disciplinam instituto publico scrutinio, dum Pontifex ex Archidiacono vel Assistente de dignitate Ordinandorum inquit, eosque Clero & populo annuntiat, veteri nempe more, quo non ordinabantur, nisi testimonio populi essent probati. Archidiaconus inquit: „Reverendissime Pater, postulat sancta mater Ecclesia catholica, ut hos præfentes Subdiaconos ad onus Diaconii ordinetis.“ Episcopus interrogat: „Scis, illos dignos esse? Respondet Archidiaconus: Quantum humana fragilitas nosse sinit, & scio, & testificor, ipsos dignos esse ad hujus onus officii.“ Episcopus dicto: Deo gratias, ait: „Auxiliante Domino Deo, & Salvatore nostro Jesu Christo, eligimus hos præfentes Subdiaconos in ordinem Diaconii. Siquis habet aliquid contra illos, pro Deo, & propter Deum cum fiducia exeat, & dicat; verum memor sit conditionis suæ.“ Exponens dein Pontifex munera & obligationes Diaconorum ait: „Provehendi, filii dilectissimi, ad Leviticum ordinem, cogitate magis, ad quantum gradum Ecclesiæ ascenditis. Diaconum enim oportet ministrare ad altare, baptizare, & prædicare.“ — — Fusis dein precibus manum dexteram extendens Pontifex super caput Ordinandi dicit: *Accipe Spiritum Sanctum ad robur, ad resistendum diabolo, & temptationibus ejus; in nomine Domini.* Stulam super humerum sinistrum imponens, ait: *Accipe stolam candidam de manu Dei, adimple ministerium tuum; potens est enim Deus, ut augeat*

augeat tibi gratiam suam: qui vivit, & regnat in secula seculorum. Resp. Amen. Dalmatica induens Ordinandum, dicit: Induat te Dominus indumento salutis, & vestimento lætitiæ; & dalmatica justitiæ circumdet te semper; in nomine Domini. Resp. Amen. Denique tradens librum Evangeliorum manu dextra tangendum, dicit: Accipite potestatem legendi Evangelium, in Ecclesia Dei, tam pro vivis, quam pro defunctis. In nomine Domini.

§. 390. Officium Diaconorum secundum dicta est I. *ministrare ad altare*. Olim etiam Eucharistiam dabant populo; sed hodie id non possunt Presbytero præsentare, & nisi necessitas flagitet. Concil. Carth. an. 398. can. 38. II. *Baptizare*; sed hoc juri uti nequeunt, nisi in casu necessitatis præ Laicis, aut inferioribus Clericis, aut ex commissione; quia extra casum necessitatis conferendus est baptismus solemnus, cujus proprius minister est parochus. III. *Prædicare*; quod non tantum refertur ad Missam solemnem, in qua Diaconus Evangelium publice legit, sed etiam ad veram divini verbi prædicationem. can. 1. §. 7. dist. 23. Cum autem prædicandi munus ad Episcopos & Presbyteros ex officio pertineat, Diaconus illud suscipere non debet, nisi in eorum defectu, & jussu, aut ex speciali privilegio, quale non modo Diaconis, sed omnibus Clericis S. J. concessit Paulus III. an. 1545. & Gregorius XIII. an. 1585. De his Diaconorum officiis agitur Act. VI. 5. VIII. 5. 12. 38.

§. 391. Alia præterea Diaconis olim imponebantur munia. Nam IV. *Administratio rerum Ecclesiæ* sub cura Episcopi ipsis committebatur, custodia item pecuniarum apud Ecclesiam depositarum, & distributio eleemosynarum. Unde V. *singularis*

extra

cura viduarum, virginum, orphanorum, pauperum, martyrum & confessorum in custodia detentorum ab ipsis gerebatur, ne quid istis ad vitæ necessitatem deesset. VI. *Invigilabant in mores populi & cleri maxime inferioris*, & delicta Episcopo denuntiabant; unde dicti sunt aures, oculi, dextera, os & cor Episcoporum. Auctor constitut. Apost. l. 2. c. 4. edit. Paris. an. 1564. VII. *Oblationes accipiebant*, & offerentium nomina recitabant, quod dicebatur *offerre nomina*. S. Cyprian. Ep. 9. VIII. *Recitabant in Ecclesiis sacra Dypticha*, sive tabulas, in quibus descripta erant nomina tum viventium, tum mortuorum, qui virtute, dignitate, generis nobilitate ceteris præstabant. IX. *Indicebant in sacris conventibus communes preces*, formulam præcuntes, quam in iis adhibere oportebat. S. Augustin. Ep. 55. ad Jannuar. c. 18. X. Denique in *plerisque negotiis, legationibus & jurisdictione exercenda* Diaconorum opera utebantur Episcopi; imo urgente necessitate in remittendis pœnis satisfactoris, quas Episcopus imposuerat. S. Cyprian. epist. 13. Concil. Eliberitan. c. 32. Ex tanta munerum dignitate, copiaque ambitio quorundam Diaconorum tantopere efferbuit ut se presbyteris præferre, imo etiam Sacrificium offerre ausi fuerint: qui abusus gravibus Patrum & Conciliorum decretis reprimi debuit. Acriter eloquentiam suam adversus eos impendit S. Hieronymus epist. 85. ad Evagrium, & S. Cyprianus ep. 65. ab Rogatianum.

§. 392. A ministris ascenditur ad eos, quorum illi servitio deputantur, nempe ad *Sacerdotes*; quod nomen a sacrificando, quasi *sacrum dans* deducitur: iidem ab ætate vel senio *Presbyteri* nuncupantur: *Cani autem sunt sensus hominis, & ætas immaculata*. Sap. IV. 9.

IV. 9. *Presbyteratus*, de quo agimus, est Ordo, quo datur potestas consecrandi Corpus Christi, & remittendi peccata; quæ est duplex potestas ex institutione Christi, in *Corpus Christi verum* conficiendo Sacramentum Altaris, & *corpus Christi mysticum*, seu Ecclesiam per potestatem clavium.

§. 393. In ordinatione *Presbyterorum* secundum ritum Ecclesiæ latinæ præmittitur scrutinium publicum, interrogante Archidiaconum Episcopo, an sciat, præsentatos ad ordinem *Presbyterii* esse dignos, illoque respondente, ut supra §. 389. de Diaconis, Episcopus eos Clero & populo annuntiat his verbis: „Quoniam, fratres carissimi, rectori navis, „& navigio deferendis eadem est vel securitatis ratio, vel communis timoris, par eorum debet esse „sententia, quorum causa communis existit. Neque enim fuit frustra a Patribus institutum, ut de „electione illorum, qui ad regimen altaris adhibendi sunt, consulatur etiam populus: quia de vita „& conversatione præsentandi, quod non nunquam „ignoratur a pluribus, scitur a paucis; & necesse „est, ut facilius ei quis obedientiam exhibeat ordinato, cui assensum præbuerit ordinando. — Si „quis habet aliquid contra illos &c.“ ut supra de Diaconis. Præcipuus dein ritus in Ecclesiâ latina consistit in his. I. Episcopus ordinandos de officio Ordinis, quem suscepturi sunt, instruit: *Sacerdotem oportet offerre, benedicere, præesse, prædicare, & baptizare.* II. Super caput cujuslibet ordinandi utramque manum imponit, nil dicens, idemque faciunt post eum omnes Sacerdotes, qui adsunt; quo facto tam Episcopus, quam Sacerdotes tenent manus dexterarum extensas super illos; & Episcopus stans cum mitra dicit: *Oremus, fratres carissimi, Deum Patrem*
Zallinger L. I. Decretal S *trem*

trem omnipotentem, ut super hos famulos suos, quos ad Presbyterii munus elegit, cœlestia dona multiplicet; & quod ejus dignatione suscipiunt, ipsius consequantur auxilio, per Christum Dominum nostrum. Resp. Amen. III. Aptans stolam ante pectus cujuslibet in modum crucis, ad singulos dicit: *Accipe jugum Domini; jugum enim ejus suave est, & onus ejus leve.* IV. Imponens calulam, singulis dicit: *Accipe vestem Sacerdotalem, per quam caritas intelligitur; potens est enim Deus, ut augeat tibi caritatem, & opus perfectum.* Resp. Deo gratias. V. Invocato divino Spiritu, oleo catechumenorum inungens unicuique ambas manus, dicit: *Consecrare & sanctificare digneris, Domine, manus istas per istam unctionem, & nostram benedictionem.* Resp. Amen. Ut, quæcunque benedixerint, benedicantur; & quæcunque consecraverint, consecrentur, & sanctificentur, in nomine Domini nostri Jesu Christi. Resp. Amen. VI. Postmodum tradit Episcopus cuivis ordinando calicem cum vino & aqua, & patenam superpositam cum hostia; isque eam accipit inter indices & medios digitos, & cuppam calicis & patenam simul tangit, Episcopo dicente: *Accipe potestatem offerre Sacrificium Deo, Missasque celebrare, tam pro vivis, quam pro defunctis: in nomine Domini.* Resp. Amen. Unde mox hac accepta potestate ordinati Sacrum faciunt cum Episcopo, incipientes a *Suscipe Sancte Pater.* VII. Sumta ablutione Pontifex inchoat responsum: *Jam non dicam vos servas.* Eo finito Presbyteri ante Altare stantes profitentur fidem ex symbolo Apostolorum, *credo in Deum Patrem &c.* Tum Pontifex ante medium Altaris imponit ambas manus super capita singulorum coram eo genuflectentium, dicens: *Accipe Spiritum Sanctum; quorum remiseris peccata, remittuntur eis; & quorum retinueris, retenta*

tenta sunt. VIII. Demum explicans casulam, quam unusquisque habet super humeros complicatam, induit illa quemlibet, dicens singulis: *Stola innocentiae induat te Dominus.*

§. 394. Spectandum denique velut in humili loco consistentibus nobis est, quomodo ad apicem Sacerdotii perveniatur, & Episcopalis consecratio secundum præcipua capita peragatur.

I. Quia consecratori Episcopo duo adsunt Assistentes, Senior istorum ad Consecratorem dicit: *Reverendissime Pater, postulat sancta mater Ecclesia catholica, ut hunc præsentem Presbyterum ad onus Episcopatus sublevetis.* Consecrator dicit: *Habetis mandatum Apostolicum?* Respondet Senior Assistentium: *Habemus.* Consecrator: *Legatur.* Notarius Consecratoris accipiens mandatum de manu Episcopi assistentis legit a principio ad finem. Tum Electus de Sede sua veniens, coram Consecratore genuflectit, & legit juramentum de verbo ad verbum: Ego N. Electus Ecclesiae N. &c. (§. 333.); in fine textum Evangelii ambabus manibus tangens dicit: *Sic me Deus adjuvet, & hæc sancta Dei Evangelia.* Consecrator dicit: *Deo gratias.*

II. Electo & Assistentibus in locis suis sedentibus, Consecrator intelligibili voce legit examen de fide & moribus. Electus pro variis articulis respondet: *Volo & Credo.*

III. Inchoatur Sacrum; lecta Epistola & graduali Consecrator sedens cum mitra, versus ad Electum dicit: *Episcopum oportet judicare, interpretari, consecrare, ordinare, offerre, baptizare, & confirmare.*

IV. Dicuntur Lytaniæ; Consecrator, accepto libro Evangeliorum, illum apertum, adjuvantibus duobus assistentibus, imponit supra cervicem & scapulas Electi, nihil dicens.

V. Dein Consecrator & Assistentes Episcopi ambabus manibus caput consecrandi tangunt, dicentes: *Accipe Spiritum Sanctum*; formula ad nullum munus sacrum restricta; quia plenitudo Sacerdotii & Spiritus Sancti infunditur.

VI. Recitatis quibusdam precibus, & invocato Spiritu Sancto, Consecrator pollicem dextrum intingit in sanctum Chrisma, & caput Electi coram se genuflexi inungit, dicens: *Ungatur, & consecretur caput tuum, cœlesti benedictione, in Ordine Pontificali. In nomine Patris, & Filii, & Spiritus Sancti. Resp. Amen. V. Pax tibi. R. Et cum Spiritu tuo.* Post orationem, & cantica eodem Chrismate inunguntur manus a Consecratore dicente: *Ungantur manus istæ de oleo sanctificationis, & Chrismate sanctificationis; sicut unxit Samuel David Regem, & Prophetam, ita ungentur, & consecrentur, in nomine Dei Patris &c.*

VII. Benedicitur baculus pastoralis, & Consecrato traditur: *Accipe baculum pastoralis officii, ut sis in corrigendis vitiis pie saviens, iudicium sine ira tenens, in fovendis virtutibus auditorum animos demulcens, in tranquillitate severitatis censuram non deferens.* Resp. Amen.

VIII. Similiter benedicit anulum Consecrator, & in digitum annularem Consecrati immittit, dicens: *Accipe anulum, fidei scilicet signaculum; quatenus Sponsam Dei, sanctam videlicet Ecclesiam, intemerata fide ornatus, illibate custodias.* Resp. Amen.

IX. Con-

IX. Consecrator tradit eidem librum Evangeliorum, dicens: *Accipe Evangelium, & vade, prædica populo tibi commisso: potens est enim Deus, ut augeat tibi gratiam suam, qui vivit, & regnat in secula seculorum. Resp. Amen.*

X. Consecrator & Assistentes recipiunt Consecratum ad osculum pacis. Abstergitur caput Consecrati: lavantur manus: pergitur in Missa: ad Offertorium Consecratus offert Consecratori duo intortitia accensa, duos panes, & duo barilia vino plena.

XII. Uterque simul peragit Sacrum. Communionem Consecrator Consecrato præbet sub utraque specie.

XIII. Imponitur mitra capiti Consecrati, & chirothecæ manibus sub aptis formulis.

XIV. Inthronizatur Consecratus in Sede Episcopali; & cum cantatur hymnus Ambrosianus, ducitur ab Assistentibus per Ecclesiam, & omnibus benedicit; data dein etiam solenni benedictione, finitur ceremonia dato osculo pacis.

§. 395. Habemus igitur ob oculos positum universum Clerum, certis distinctum ordinibus, a primis tyrociniis sacrae militiæ ad supremos duces, & ab infimo gradu Ecclesiastici status ad apicem Sacerdotii progredientem. Sunt enim Tonsurati, Ostiarii, Lectores, Exorcistæ, Acolythy, Subdiaconi, Diaconi, Presbyteri, Episcopi, qui statum hominum, quos *Clericos* dicimus, ex divina institutione profectum constituunt, a Laicorum statu Dei ordinatione, vitæ professione, & conditionis sanctitate penitus segregatum (f).

(f) *Est tertium quoddam inter Clericos & Laicos genus personarum, quæ ob privilegia, quæ cum Clericis habent communia, & ob Christianæ perfectionis institutum, Ecclesiasticæ nuncupantur, ceu monachi ordinibus non initiati, atque etiam sacræ virgines Deo dicatæ, & siqui sunt alii hujus generis.*

§. 396. Originem ac fundamentum status clericalis exponit SS. Concilium Tridentinum Sess. XXIII. c. 1. his verbis: *Sacrificium & Sacerdotium ita Dei ordinatione conjuncta sunt, ut utrumque in omni lege extiterit. Cum igitur in novo Testamento sanctum Eucharistiæ Sacrificium visibile ex Domini institutione catholica Ecclesia acceperit; fateri etiam oportet, in ea novum esse visibile, & externum Sacerdotium, in quod vetus translatum est. Porro translato Sacerdotio necesse est, ut & legis translatio fiat, inquit Paulus Hebr. VII. 12. Hinc I. Christus duplicem instituit principatum in Sacerdotibus novæ legis, pro Sacrificio obeundo, & pro Ecclesia regenda, sive potestatem Ordinis, & potestatem Jurisdictionis. II. In utraque insunt gradus, per quos alia potestas alia excelsior est, & major. III. Hi gradus potestatis divinitus concessæ efficiunt Hierarchiam. Siquis dixerit, in Ecclesia catholica non esse Hierarchiam divina ordinatione institutam, quæ constat ex Episcopis, Presbyteris & ministris; anathema sit. Concil. Trid. Sess. XXIII. can. 6. IV. Eidem Hierarchiæ annexum est Sacramentum Ordinis, quo datur Spiritus Sanctus, & character imprimitur. V. Hic Ordo tum active sumitur pro statu perpetuo ac stabili, qui inde resultat, vi cujus, qui Sacerdos semel fuit; laicus rursus fieri non potest. S. Concil. Trid. c. 4. & can. 4. (g)*

(g) *Expendencia est vera & catholica doctrina de Sacramento Ordinis, quam SS. Concil. Trid. Sess. XXIII. per pri-*

prima quatuor capita & subiectos canones declaravit. Ad-
dendi ex Sess. VII. Canones de Sacramentis in genere.

§. 397. Hac præmissa generali doctrina, de numero *Ordinum* primo quæritur. Novem esse Ordines, seu gradus censent passim Canonistæ, & quidam Theologi; quia præter quatuor Minores, Subdiaconatum, Diaconatum, Presbyteratum etiam Episcopatus specialem materiam ac formam habet; singularem etiam potestatem ordinandi Clericos, & baptizatos confirmandi confert. Per primam *Tonsuram*, juxta formam Ecclesiæ datam, clericalem ordinem conferri, affirmat Innocentius III. c. cum contingat. 11. de ætat. & qual. præf. in quod capitulum commentans Ostiensis ait n. 5.: *Taceant, qui dicunt, septem tantum esse Ordines: quia imo sicut in cælesti Hierarchia novem sunt Angelorum chori, sic in Ecclesia Dei novem sunt Ordines.* Sperelli Decis. 114. decidit, per saltum censi promotum, adeoque suspensum illum, qui, omissa prima Tonsura, Ordines minores suscipit, & dispositionem Concilii Trident. Sess. VII. c. 10. de ref., vi cujus Capitulum Sede vacante intra annum dimissorias ad Ordines dare nequit, etiam intelligi de prima Tonsura (h). At Theologi, qui præcise Sacramentum Eucharistiæ, ejusque confectioem vel ministerium circa illud spectant, septem statuunt Ordines, exclusa Tonsura, & Episcopatu.

(h) *Certe Tonsurati ad Clerum pertinent; arg. c. 16. de Prob. Cum igitur universus Clerus in suos ordines & gradus distributus sit, vel ipsi singularem ordinem, gradumque constituunt, vel alteri superiori gradui ac ordini erunt adnumerandi, quod dici nequit. Verisimile est, eos Psalmistarum nomine fuisse designatos §. 383. in. not. Horum enim æque, ac hypodiaconorum & Lectorum mentio sit in antiquissimis Documentis. conf. Selvaggii Antiquit. Christian. L. I. P. II. c. III. §. VIII.*

§. 398. Alia est quæstio Theologorum propria, quibusnam horum Ordinum competat ratio veri ac proprii Sacramenti, quo character Ordinis imprimitur. Etsi enim singulis vel pluribus ratio Sacramenti insit, *unum* tamen dicitur *Ordinis Sacramentum*; quia singuli referuntur ad unum finem, nempe Sacrificium, & sanctificationem fidelium. Theologorum diversas sententias recenset Benedictus XIV. de Syn. diœces. l. VII. c. 4. Difficultatem parit ignota origo institutionis Ordinum eorum, qui sunt infra Diaconatum. Si enim ab Ecclesiæ institutione sunt, non intelligitur, quomodo a Christo, qui est auctor Sacramentorum, habeant annexam Sacramenti gratiam. Præterea in antiquis documentis non constans reperitur numerus Ordinum Diaconatu inferiorum. Antiqui Græcorum libri, & hodierni mores non omnes enumerant ordines, qui in usu sunt Ecclesiæ Romanæ. At enim cum Hierarchia ex Dei ordinatione Episcopis, Presbyteris & ministris constet, uti Concilium Trid. definivit, dubitari vix potest, quin Diaconatui vera & propria Sacramenti ratio competat. In Diaconatu plura & diversa erant ministeria, ac functiones dispares, quæ quidem in prima fidelium paucitate, rebusque angustis a Diaconis obiri poterant, sed crescente fidelium, aptorumque ministrorum numero fieri potuit ac debuit sane, ut, quod Ecclesia ex divina institutione habebat in uno Ordine, explicate traderet in diversis; eo fere modo, quo diversi magistratus e. g. Prætorum, Aedilium, Censorum in urbe Roma divisi erant, in Præside autem provinciarum conjuncti. l. 12. D. de offic. Præsid. ibi: *Licet is, qui provinciæ præest, omnium Romæ magistratuum vice & officio fungi debeat.* Hinc intelligitur, divinæ institutioni non obesse, si diversis temporibus aut locis dispar Ordinum,

dinum, qui sunt infra Diaconatum, sit numerus (i). Sane labor regendi universum Israël, ac spiritus Moysis per LXX. viros divisus fuit. Num. XI.

(i) In Ecclesia Romana, quæ fidelissima veterum traditionum Custos semper erat, & habebatur a Catholicis, jam medio Seculo III. omnes & singuli habebantur minores Ordines; quos ordinate recenset S. Cornelius P. in epist. ad Fabium Antiochenum. Constant. Col. 150.

§. 399. De quavis ordinatione, per quam in ordine quodam Clericali Ordinatus constituitur, accurate distingui oportet inter ea, quæ ad *valorem* ejusdem necessaria sunt, ut repeti ea non possit, & ea, quæ ad *licentiam ex præscripto Canonum* requiruntur. Pro valore agnoscendo spectari debent I qualitates necessariæ subjecti, quod ordinatur, ut sit mas, non femina (k): ut sit baptizatus. c. 1. & 3. de presb. non baptiz. arg. c. 2. de cognat. spir. in 6. ut non sit positive invitus. c. 3. §. *item quæritur*. de baptismo. II. Ipse ritus ordinationis, seu necessaria materia & forma cujusvis Ordinis; de qua apte ad tit. de sacra Unctione agi posset. III. *Minister ordinationis*, ut ipse nempe valide sit ordinatus. E. g. qui Episcopus consecratus non est, is nec Episcopos, nec presbyteros ordinare potest (l). Ceterum Episcopus rite consecratus valide ordinat, etsi illicite, & contra Canones, si sit alienus, hæreticus, schismaticus, suspensus, degradatus, etiam qui renunciavit loco & dignitati; quia in iis, quæ pendent ex materia ac forma Sacramenti, & potestate per Christum tradita, nullum impedimentum ponit defectus fidei vel probitatis, aut prohibitio Ecclesiæ. c. 1. & 2. de ordin. ab Episc. qui renunt. can. 97. l. q. 1. & can. 5. IX. q. 1. Opponi his solent quidam Canones, in quibus ordinationes ab Episcopis schismaticis,

cis, aliisve factæ dicuntur irritæ. c. 1. de Schismaticis. Resp. dicuntur irritæ quoad dignitatem, & executionem Ordinum; quodque extra Ecclesiam Sacrificia & dignitates Deo gratæ non sint: ratio hujus responsi colligi potest ex S. Augustino cit. can. 97. I. q. 1. Aliqui Canones vere irritas dicunt ordinationes factas a quibusdam Chorepiscopis, aut iis hæreticis, qui veri Episcopi non erant.

(k) *Diaconissæ in veteri Ecclesia adhibita pia Ceremonia ad varia ministeria deputabantur, ut imperitis mulieribus fidei rudimenta exponerent, & ritus baptismi; easque in baptismo adjuvarent: viduarum pauperum communem cum Diaconis curam gerebant: mulieribus designabant locum in Ecclesia: visitabant feminas ægrotantes: Episcopi mandata deferebant ad feminas, ad quas Diaconi propter offendiculum Ethnicorum mitti non poterant. Scriptores medii ævi longe dispari sensu appellarunt Subdiaconissas, Diaconissas, Presbyteras, Episcopas, nempe uxores eorum, qui post contractum matrimonium, & ipsis consentientibus ordinati fuerunt in Subdiaconum, Diaconum, Presbyterum, Episcopum, interdicto in posterum matrimonii usu.*

(l) *Famosa est lis, an Episcopi Angliæ habeant Ordinem Episcopalem. Le quien ostendit, eos a nullo legitimo Episcopo ordinationem suam derivare.*

§. 400. Ut licite & ex præscripto Canonum fiat ordinatio, præscripta certa tempora ordinationum. I. *Tonsura* quolibet anni die ac hora conferri potest. II. *Minores ordines* diebus Dominicis, ac quolibet die Festo duplici, etiam extra Missarum solemnia, matutino tamen tempore (m). III. *Sacri Ordines* semper conferri debent inter Missarum solemnia, ac certis anni temporibus, quæ sunt Sabbata in jejuniis quatuor temporum, Sabbatum ante Dominicam Passionis, & Sabbatum Sanctum (n). Consuetudo contraria non valet. c. 2. h. t. Ordinans vero
extra

extra tempora dicitur Canonica disciplina corrigendus. c. 8. & 9. in parte decisa; & ordinatus ab exercitio Ordinis suspendendus. c. 2. & ibid. imo ex Constit. Pii II. *cum ex sacrorum*, sic ordinati perpetuo sunt ipso jure suspensi. Conf. c. 16. h. t. IV. Consecratio Episcoporum fit quovis anni tempore, die tamen Dominico, vel natalitio Apostolorum, vel ex speciali indulto Pontificio alia die festa.

(m) Pontif. Roman. Tit. de ordinib. conf. c. 1. & 3. h. t.

(n) Pontif. Rom. l. c. & c. 1 & 3. ubi extra tempora conferre Ordines soli Summo Pontifici esse licitum dicitur; proinde ea facultas etiam privilegio Apostolico Ordinanti vel ordinando concessa obtineri potest. Quando Episcopus electus pluribus sacris Ordinibus est initiandus, necessitas Ecclesie non videtur admittere, ut expectentur quatuor tempora.

§. 401. Ad tempora ordinationum referenda sunt interstitia inter unum, alterumque ordinem observanda. Ac I. Minores Ordines uni, die eodem plures, aut etiam omnes cum prima Tonsura conferri possunt, si Episcopo visum fuerit. Concil. Trid. Sess. XXIII. c. 11. de ref. II. Inter Ordines minores, & Subdiaconatum, item inter unum & alterum sacrum Ordinem suscipiendum regulariter intercedere debent interstitia unius anni, quæ non mathematicæ, sed Ecclesiasticæ computanda sunt e. g. a prima ordinatione quadragesimæ ad primam quadragesimæ sequentis, licet hæc citius incidat. Episcopus ex justa causa dispensandi in hac generali lege facultatem obtinuit per Concilium Trid. cit. Sess. c. 11. 13. 14. de ref. Non potest tamen Episcopus ita constringere interstitia, ut uni una die conferat minores Ordines cum Subdiaconatu, aut duos Ordines majores (c. dilectus 15. h. t.), aut unum majorem
Ordi-

ordinem die Sabbathi, alterum die Dominica continuato jejunio (o).

(o) Ita auctores passim hunc prohibitionis casum etiam hodie referunt hoc loco. Sciendum, ad Diaconorum, & Presbyterorum ordinationes in Vespera Sabbati, sive ut S. Leo inquit, post diem sabbati ejus noctis, quæ lucefcit in prima Sabbati, exordia deligebantur, in quibus his, qui consecrandi erant, jejunis, & a jejunantibus sacra benedictio conferebatur. Epist. 9. S. Leonis edit. Ballerin. & can. 4. dist. 75. sed mendum cubat, in verbo: exordia consecrandi. Hoc præsupposito vetitum, ne mox sequenti mane Dominicæ diei novus ordo conferatur, ne duo majores ordines uno die conferri videantur; nam ut S. Leo l. c. inquit, quod ejusdem observantiæ erit, si mane Dominico die, continuato Sabbati jejunio celebretur, a quo tempore præcedentis noctis initia non recedunt. Idem sensus manifeste patet ex c. 13. h. t. At vero a Pio V. vetitæ sunt nocturnæ Missæ, etiam in Sabbato Sancto; consequenter neque ordinationes fieri possunt vespere illius diei, quod olim fiebat. His expensis non apparet, quomodo hic prohibitionis casus locum habeat nostra ætate.

§. 402. Loci etiam, in quo conferuntur Ordines, habenda est ratio. I. Tonsura quidem & minores Ordines in quocunque loco honesto ac decenti conferri possunt, modo sit proprius Ordinantis (p). II. de Subdiaconatu, Diaconatu & Presbyteratu certum est, quod locus, in quo conferuntur, debeat esse primo proprius Ordinantis; quia eorum collatio fit inter Missarum solemnias, & cum habitu Pontificali. At ex præscripto antiquorum Canonum, & Decreto Concilii Trid. Sess. VI. c. 5. de ref. nulli Episcopo licet cujusvis Privilegii prætextu Pontificalia in alterius Diocesi exercere, nisi de Ordinarii loci expressa licentia, & in personas eidem Ordinario subjectas tantum. Si secus factum fuerit, Episcopus ab exercitio Pontificalium, & sic ordinati ab executione Ordinum

dinum sunt ipso jure suspensi. Secundo *sacer*, ex antiquissima Ecclesiæ consuetudine, & præscripto Pontificalis Romani. Aaron quidem & Filii ejus consecrati sunt ad ostium tabernaculi (Exod. XXIX. 4. Levit. VIII. 4), Christum expectantes: Sacerdotes autem novi Testamenti secretiora Divinitatis adyta pervadunt, ut cælestia populum mysteria doceant, illius personam repræsentantes, qui introivit semel in sancta, æterna redemptione inventa, Hebr. IX. 12. Tertio *publicus*; secus frustra fieret examen publicum (§. 389). III. de consecratione Episcoporum, quæ hodie fit ex mandato Apostolico, jubet S. Synodus Trid., ut ea, si extra curiam Romanam fiat, in Ecclesia, ad quam promoti fuerint, aut in provincia, si commode fieri poterit, celebretur. Sess. XXIII. c. 2. de ref. Defectus enim numeri Episcoporum ad consecrationem necessarii, aut itinerum, negotiorumque ratio aliud nonnunquam poscunt. Fieri certe debet ea consecratio in loco sacro & publico. IV Pontifices Romani hoc ævo in Vaticano eliguntur: in Basilica vero S. Petri consecrantur, & coronantur: ad Lateranensem postea Basilicam ducti, in Solio, Thronoque Pontificio collocantur.

(p) *Etsi ii minores Ordines non conferantur in habitu Pontificali. Barbosa de officio & potest. Episcop. P. 2. alleg. 6. n. 15. SS. Concilium Trid. Sess. XX. c. 8. de ref. ita statuit: „Ordinationes sacrorum ordinum statutis a jure temporibus, ac in cathedrali Ecclesia, vocatis, præsentibusque ad id Ecclesiæ Canonicis, publice celebrentur. „Si autem in alio diœcesis loco, præsente clero loci: dignior, quantum fieri poterit, Ecclesia semper adeatur.“ Quæ verba utique referuntur ad locum proprium, sacrum, publicum.*

§. 403. Inter qualitates Ordinandorum in primis spectatur *ætas*, quæ pro majoribus Ordinibus major & maturior desideratur. I. Tonsura clericalis *infanti* (h. e. annis minori), nisi forte religionem intraret, conferri a nullo Episcopo potest. *Qui vero contra fecerit, ut in eo, in quo peccaverit, puniatur, per unum annum a collatione clericalis Tonsuræ duntaxat noverit se suspensum.* c. 4. h. t. in 6. Ulterior determinatio *ætatis pro prima tonsura* non reperitur; quia tamen Concilium Tridentinum Sess. XXIII. c. 4. de ref. requirit, ut Tonsurandus susceperit Sacramentum Confirmationis: ut edoctus fuerit fidei Rudimenta: ut legere & scribere sciat: ut probabilis conjectura fieri possit, eum non secularis judicii fugiendi fraude, sed ut Deo fidelem cultum præstet, hoc vitæ genus elegisse; hinc requiritur *ætas*, quæ pro ingeniorum varietate dictas dispositiones admittat. II. Nec *pro minoribus Ordinibus* certa *ætas* per Canones definitur; requiritur tamen, ut Minoribus initiandi saltem linguam latinam intelligant, eosque scientiæ spes majoribus dignos ostendat. S. Concil. Trid. cit. Sess. c. 11. de ref. III. *Ad Subdiaconatum* requiritur annus vigesimus secundus saltem inchoatus. Trid. ib. c. 12. IV. *ad Diaconatum* annus vigesimus tertius saltem inchoatus. ib. (q) c. 14. h. t. Episcopus, qui puerum 13 annorum *inordinate in Diaconum dicitur ordinasse, in ludibrium Ordinis clericalis*, suspenditur a collatione Ordinum, & Ordinatus ab ipsius executione usque ad *ætatem legitimam*. V. *Ad Presbyteratum* requiritur annus vigesimus quintus jam inchoatus Concil. Trid. cit. c. 12. de ref. VI. *Ad Episcopatum* requiritur annus trigesimus completus. conf. §. 289. n. I.

(q) *Ætas ergo pro Subdiaconatu & Diaconatu præscripta per Clementinam. 3. De ætat. & qual. præf. per SS. Concilium. Trid. protensa est.*

§. 404. Aliæ præter ætatem qualitates pro varietate & natura Ordinum *variæ & speciales* requiruntur. Nam irregularitas, de qua mox dicam, *generale* impedimentum est Ordinum suscipiendorum. I. De qualitatibus & dispositionibus pro prima Tonfura, & Minoribus §. præc. n. I. & II. dictum est. Hodie quidem minores Ordines fere spectantur, tanquam via & gradus, per quos ad Majores perveniendum est. Olim varia Minoristis committebantur officia, ex quibus de qualitatibus eorundem conjectura fieri potest. Sic quidam ex ordine Minorum vocabantur *Laborantes*, seu *Copiata* aut *Fossarii*, qui circa pium sepulturæ & defunctorum obsequium occupabantur. Nov. 59. c. 2. & S. Epiphanius in fin. libr. contra hæres. *Parabolani*, qui ad ægra debiliū corpora curanda deputabantur l. 18. c. de Episc. & Cleric. *Oeconomi*, *Apocrysiarii*, *Hermeneutæ*, *Defensores pauperum & Ecclesiarum*, *Custodes Martyrum*, *Catechistæ*, seu *Doctores audientium*, id est, Catechumenorum, *Notarii* &c.

§. 405. *Qualitates seu dispositiones pro majoribus Ordinibus* eo majores esse debent, quo graviores iisdem annexæ sunt obligationes. Nam I. Ordines majores stabilitatem inducunt in statu Ecclesiastico, ita, ut omnis interclusus sit reditus ad vitam secularem; qui tamen patet constituto in Minoribus. II. Obstringunt ad perpetuam vitæ continentiam. III. Obligant ad officium divinum quotidie saltem privatim recitandum. IV. Ob ipsam stabilitatem, quam majoribus Ordinibus initiati in Ecclesiastico statu habent, necessarius est *titulus* Ecclesiæ seu beneficii, ad quem ordinati sustentari perpetuo possint; cum non deceat eos, qui divino ministerio adscripti sunt, cum Ordinis dedecore mendicare aut sordidum aliquem quæstum exercere,

exercere, S. Concilium Trid. Sess. XXI. c. 2. de ref. Concilium Chalcedonense can. 6. (apud Gratian. can. 1. dist. 70) ordinationes *absolutas*, id est, vagas, ac sine titulo certæ ecclesiæ factas pronuntiavit irritas, ut sic ordinatus ad injuriam ac dedecus Ordinantis nullibi potuerit ordines exercere. Cum hæc constitutio progressu temporis negligeret cum magna Ecclesiastici Ordinis vilipensione, Alexander III. & Innocentius III. statuerunt, ut Episcopus vel ejus Successor, si quis sine titulo ad Ordines majores fuisset promotus, tamdiu ei necessaria vitæ subministraret, donec in aliqua ecclesia stipendia militiæ clericalis merere possit. c. 4. & 16. de Præb. c. 13. de ætat. & qual. præf. addita tamen clausula, nisi talis de sua vel paterna hereditate possit sustentari. cit. c. 4 & 23. de Præb. Concilium Trid. Sess. XXI. c. 2. de ref. statuit, *nequis deinceps Clericus secularis, quamvis alias sit idoneus moribus, scientia & ætate, ad sacros Ordines promoveatur, nisi prius legitime conslet, eum beneficium Ecclesiasticum, quod sibi ad victum honeste sufficiat, pacifice possidere: id vero beneficium resignare non possit, nisi facta mentione, quod ad illius beneficii titulum sit promotus; neque ea resignatio admittatur, nisi conslito, quod aliunde vivere commodè possit: & aliter facta resignatio nulla sit.* Sess. XXIII. c. 16. de ref. additur: *Quodsi locum* (nempe ecclesiam vel locum pium, pro cujus necessitate vel utilitate assumitur) *inconsulto Episcopo deseruerit, ei sacrorum exercitium interdicatur.* Agit dein S. Synodus de iis, qui non beneficium quidem Ecclesiasticum, sed *patrimonium* vel *pensionem* obtinent. Pensionis vices nunc subit *Titulus mensæ*; de quo varia in locis variis disciplina viget. Auctores inde quadruplex *Tituli* genus inferunt, beneficii, patrimonii, pensionis vel mensæ, & paupertatis pro religiosi.

§. 406.

§. 406. Speciatim pro *Subdiaconatu* & *Diaconatu* requiritur, præter legitimam ætatem, interstitia, ac titulum, ut *digni sint*, & quorum probata *vita senectus sit*: ut habeant bonum testimonium, & in minoribus jam probati, ac literis & iis, quæ ad *Ordinem exercendum pertinent*, instructi sint: qui sperent, Deo auctore, se continere posse. Trid. Sess. XXIII. c. 12. & 13. de ref. Pro *Presbyteratu* præter dicta requiritur; ut idonei comprobentur ad *populum docendum ea*, quæ scire omnibus necessarium est ad salutem, ac ad ministranda *Sacramenta*: ut sint pietate ac castis moribus conspicui, ut præclarum bonorum operum exemplum, & vitæ monita ab eis possint expectari. Trid. ib. c. 14. de ref.

§. 407. Generatim agendum nunc est de *irregularitate*, quæ est impedimentum Canonicum directe impediens susceptionem Ecclesiasticorum Ordinum, & susceptorum usum, indirecte vero consecutionem beneficii (r). Ex notione patet: I. alia est irregularitas antecedens, quæ impedit, ne Ordo suscipiatur; alia superveniens, quæ usum Ordinis jam suscepti impedit. II. Qui jure divino incapaces sunt Ordinum, ceu femina, non baptizatus, huc non pertinent, quia frustra eis indiceretur irregularitas, qui jam jure divino ab Ordinibus eorumque usu semoventur. Fieri tamen potest, ut defectus in irregularitate contractus post Baptismum remaneat, & baptizatum ab Ordinibus excludat.

(r) Irregularitatis vox in antiquis monumentis vix occurrit ante Innocentium III. qui eo usus est c. 10. §. 6. de renunt. & c. 6. de bigam. non ordinand. Sed res ipsa Ecclesiæ cœva est. Nam Paulus Apostolus I. Timoth. III. & Tit. I. prima item Concilia varias pro ordinandis præscripserunt qualitates & conditiones, quibus, qui carerent, Zallinger L. I. Decretal. T dico

dicebantur ordinari non posse, non ministrare Altari, non esse in numero clericorum, ab ordinibus debere removeri &c. Qui ergo extra has ordinationum regulas deprehendebantur, ob qualitatem regulis repugnantem postea irregulares dicti sunt.

§. 408. A susceptione, aut usu Ordinum per Canones impediri aliquis potest defectu, vel delicto. *Irregularitas ex defectu antecedens*, aut perpetua, quæ sola dispensatione tollitur; aut temporalis, quæ cessat lapsu temporis, aliove modo; quales sunt defectus ætatis, scientiæ, liberationis in iis, qui ad ratiocinia obligati sunt. *Irregularitas ex defectu superveniens*, alia est *totalis*, quæ cujusvis Ordinis suscepti exercitio privat: alia *partialis*, quæ aliquo tantum privat usu Ordinis. Omnis irregularitas ex delicto per se videtur perpetua & totalis, nisi ex gratia aliquis usus Ordinum concedatur. Nullus autem defectus, nullum delictum irregularitatem inducit, nisi id in jure exprimatur. c. 18. de sent. excomm. in 6. Unde ea statui non potest, nisi ab iis, qui facere possunt jus commune, nempe a Summo Pontifice, Concilio generali, vel generali Ecclesiæ consuetudine, arg. Clem. 3. de ætat. & qual. præf. & arg. c. 1. de cognat. spirit. causa enim irregularitatum est cultus & reverentia in ecclesiasticos Ordines; quæ quidem causa toti Ecclesiæ communis est & uniformitatem disciplinæ poscit; non enim deceet, ut qui in una diœcesi aut provincia irregularis est, in alia ad Ordines admittatur.

§. 409. Vis & effectus irregularitatis est I. non, ut irritam faciat collationem, aut susceptionem Ordinum (c. 10. §. 6. de renunt.), sed graviter illicitam, etiam quoad primam Tonsuram, qua quis ad superiores Ordines præparatur; inane autem est, præparari

parari eum, quem sacri Canones ab Ordinibus arcent. Irregularis contra Canones ordinatus exercere Ordines non potest, & si id ausus fuerit, gravibus pœnis coercendus est. c. 1. & passim. de Cleric. excom. ministr. Excipitur Baptismus & Absolutio pro casu necessitatis arg. c. 7. Sess. 14. Concil. Trid. II. Irregularitas *totalis ex defectu*, & *quævis ex delicto* impedit electionem ad beneficium, aut collationem sine prævia dispensatione. c. 6. de corp. vitiatis. & c. 18. de sent. excom. in 6. (conf. §. 255 & 292). III. Superveniens *partialis ex defectu* non impedit consecutionem ejus beneficii, quod usum defectui repugnantem non requirit. IV. Beneficio jam possessio ob supervenientem irregularitatem ex defectu spoliari aliquis non debet. toto tit. de Clerico ægrot. X & in 6. irregularis vero ex delicto, etsi in ejus pœnam beneficio jam possessio privari debeat, non tamen videtur illud perdere ipso jure. Alii effectus irregularitatis non exprimuntur in jure, nisi quod bigami omni privilegio clericali priventur. c. un. de bigam. in 6.

§. 410. Ad generalem de irregularitate doctrinam pertinet, indicare, quomodo ea tollatur. Ac I. *temporalis ex defectu* cessat cessante defectu §. 408. II. Quævis alia, cum natura sua perpetua sit, non tollitur, nisi *dispensatione*, vel relaxatione legis generalis, quæ irregulares ab Ordinibus, eorumve usu excludit. Hinc opus est dispensatione Summi Pontificis (c. 15. h. t. conf. §. 189. seq.), nisi Episcopis facultas in quibusdam casibus dispensandi per Canones concedatur. III. Conceditur autem *Episcopis in irregularitatibus omnibus, & suspensionibus ex delicto occulto provenientibus, excepta ea, quæ oritur ex homicidio voluntario, & exceptis aliis deductis ad forum*

contentiosum, dispensare (s). Potest insuper Episcopus cum subdito illegitime nato dispensare ad Ordines minores, & beneficium simplex tantum. c. 1. de filiis Presb. in 6. item dispensare potest in bigamia similitudinaria, & post longam pœnitentiam, vitamque laudabilem continentes officio suo restituere. c. 4. de Clericis conj. c. 1. qui Clerici vel vov. Circa eos vero, qui laborant vitio corporis, ad Ordinarium pertinet declarare, an tale sit, quod irregularitatem inducat. c. 2. de corpore vitiat. IV. Per *Professionem religiosam* tollitur irregularitas ex defectu natalium, quoad suscipiendos Ordines tantum, non vero quoad obtinendas prælaturas. c. 1. & c. fin. de filiis presbyt.: Habent tamen plerique ordines religiosi privilegia, vi quorum cum suis subditis dispensent, etiam in aliis irregularitatibus.: Pelizar. Manual. Reg. tr. 9. c. 3. Sect. 4. a. n. 122.

(s) *Trid. Sess. XXIV. c. 6. de ref. Episcopi nomine intelligi possunt omnes, qui jurisdictionem ordinariam in subditos exercent, etiam Capitulum Cathedrale Sede vacante. Hæc de irregularitate generatim præmittenda erant hoc titulo, in quo de qualitatibus ordinandorum agitur. In specie de irregularitatibus ex defectu agitur a Tit. 17. usque ad Tit. 23. hujus libri, quibus addendus est præcedens Titulus 13. Irregularitates vero ex delicto ad L. V. Decretalium rejiciuntur, ubi de jure criminali Ecclesiastico tractari debet.*

TITULUS XII.

DE SCRUTINIO IN ORDINE FACIENDO.

ARGUMENTUM.

- I. *Triplex Scrutinium ante Ordinationem* §. 411.
 - II. *Edictum Episcopi contra indignos vel prohibitos* §. 414.
 - III. *Occultus defectus an manifestari debeat.* §. 415.
- §. 411.

§. 411. Si ad honores mundi, inquit S. Leo, sine suffragio temporis, sine merito laboris, indignum est pervenire, & notari ambitus solent, quos probitatis documenta non adjuvant; quam diligens & quam prudens habenda est dispensatio divinatorum munerum & cœlestium dignitatum? can. 5. in fin. dist. 61. Hinc triplex scrutinium, seu inquisitio in Ordinandos occurrit in jure sacro. I. Ad minores Ordines promovendi bonum a Parocho, vel a Magistro scholæ, in qua educantur, testimonium habeant. Hi vero, qui ad singulos Majores erunt assumendi, per mensem ante Ordinationem Episcopum adeant, qui Parocho, aut alteri, cui magis expedire videbitur, committat, ut nominibus, ac desiderio eorum, qui volunt promoveri, publice in Ecclesia propositis, de ipsorum Ordinandorum natalibus, ætate, moribus & vita a fide dignis diligenter inquirat; & literas testimoniales, ipsam inquisitionem factam continentes, ad ipsum Episcopum quam primum transmittat. Concil. Trid. Sess. XXIII. c. 5. de ref.

§. 412. II. Scrutinium proximis ante Ordinationem diebus instituit ipse Episcopus, vel ejus Vicarius generalis, adscitis etiam aliis viris peritis, & investigat Ordinandorum genus, personam, ætatem, institutionem, mores, doctrinam, & fidem. Concil. Trid. ib. c. 7. de ref. can. 5. dist. 24.

§. 413. III. Scrutinium fit in ipso Ordinationis actu circa eos, qui in Diaconos & Presbyteros Ordinantur (§. 389 & 393). Quæritur, utrum Archidiaconus vel Assistent Episcopi in Ordinatione, interrogatus, an sciat, ordinandum esse dignum, affirmare possit, esse dignum, si ejusdem conversationem & qualitates exploratas non habet: respondit

Pontifex c. un. h. t. posse affirmare, dummodo *contra conscientiam* non loquatur; quia non simpliciter illum asserit esse dignum; sed in quantum humana fragilitas nosse finit: cum illum, quem indignum esse non novit, dignum debeat affirmare. Colliges: contra conscientiam, quocunque tempore indignitatem cognosceret, pro digno pronuntiare nunquam posse. Si notitiam de indignitate ante hunc actum acquireret, de ea Episcopum ante admonere debet.

§. 414. Hodie Episcopus ante Ordinationis actum presentibus omnibus Ordinandis per unum ex suis ita edicit ex Pontificali Romano. *Reverendissimus in Christo Pater & Dominus N. Dei & Apostolicæ Sedis gratia Episcopus N. sub excommunicationis pœna præcipit, & mandat omnibus & singulis, pro suscipiendis Ordinibus hic presentibus, nequis forsan eorum irregularis, aut alias a jure vel ab homine excommunicatus, interdictus, suspensus, spurius, infamis, aut alias a jure prohibitus, sive ex aliena diœcesi oriundus, sine licentia sui Episcopi, aut non descriptus, examinatus, approbatus, & nominatus, ullo pacto audeat ad suscipiendos Ordines accedere, & quod nullus ex ordinatis discedat, nisi Missa finita, & benedictione Pontificis accepta.* Edictum hoc afficit 1. irregulares quacunque ex causa; & præsertim spurios & infames, qui in eorum numero sunt. 2. Censura irretitos. 3. A jure alias prohibitos, e. g. ne religiosus ad Ordines accedat invito Prælato. c. 5. de temporibus ord. nequis per saltum, omisso aliquo Ordine inferiore, Ordinem superiorem suscipiat. c. un. de Clerico per saltum promotus: nequis uno die duos Ordines majores, aut cum Minoribus Subdiaconatum recipiat. c. 2. & 3. de eo, qui furtive ord. suscep. 4. *Athenos* diocesanos sine dimissoriis. 5. Non examinatos, & approbatos & in catalogo Ordinandum

dorum descriptos. Ab examine excusantur, quorum qualitates Episcopus aliunde perspectas habet, aut qui a suo Episcopo jam examinati cum dimissoriis adveniunt, aut qui speciale a Summis Pontificibus privilegium obtinuerunt. Siquis istorum, non obstante comminatione anathematis tamen Ordines recipit, incurrit excommunicationem, & sine dispensatione Papæ neque in susceptis Ordinibus ministrare, neque ad altiores promoveri poterit. tot. tit. de eo, qui furtive. Deprehenso autem postea defectu deponi jubetur. c. 55. dist. 50.

§. 415. Quærunt, utrum aliquis manifestare teneatur occultum defectum juris Ecclesiastici, quem patitur? R. 1. Si est defectus vel delictum, ob quod irregularis fit, aut a jure ad Ordines suscipiendos accedere prohibetur, manifestare id debet, aut non petere Ordines. Patet tum ex edicto §. præc. tum ex gravitate pænæ; item can. 4. & 5. dist. 81. conf. §. 294. (a). Enimvero nemo in Ecclesiasticum Ordinem furtive & per dissimulationem intrudere se potest, cum Ecclesia ipsum vult exclusum. 2. Quia autem non quodvis delictum grave, si occultum est, neque cum infamia juris aut facti conjunctum, ab Ordinibus excludit, hinc c. 4. de temp. Ord. deciditur, criminofum occultum moneri posse, ne petat Ordines, sed prohiberi non debere; & c. 17. eod. de occulto criminoso (excepto tamen homicida, qui irregularis est), post pœnitentiam in susceptis Ordinibus ministrare sinitur, & ad superiores ascendere: ante pœnitentiam autem monetur, ut etiam in susceptis non ministret.

(a) Conf. Holzmann *Jur. Can. Practic.* l. 1. *caf. XXXVI: quæ S. Concilio Trid. Sess. VII. c. 13 de ref. Et Sess. XXIV. c. 18. de ref. de examine præscribuntur, non ad ordinandos, sed beneficiis præficiendos spectant.*

TITULUS XIII.

DE ORDINATIS AB EPISCOPO, QUI RENUNTI-
VIT EPISCOPATUI.

ARGUMENTUM.

I. Agitur universe de Ministro Ordinationis, ut ea valida sit, atque etiam licita. §. 416. II. Alius est Ordinarius, alius extraordinarius. §. 418. Quis proprius? ib. III. Jus dandi dimissorias. §. 420. IV. Regulares a quo ordinari debeant? §. 421. Minister Ordinum extraordinarius §. 423.

§. 416. Aptus hic est locus congerendi ea, quæ ad Ministrum Ordinationis pertinent, ut ea valida, & licita seu Canonica censeretur possit. Nam in antiquis exemplaribus multis titulus inscribitur: *De ordinatis ab Episcopo, qui renuntiavit Episcopatu, vel excommunicato.* Plures ergo de Ministro ordinante casus huc pertinent. I. *Valide* ordinat aut consecrat quivis Episcopus rite consecratus, si subjecto, quod jure divino capax est, adhibeat, ut oportet, ea, quæ ad Sacramenti substantiam pertinent. §. 399. II. Irregularitatem contrahunt ordinati ab Episcopo hæretico, schismatico, deposito, degradato, excommunicato (c. 2. h. t.), interdicto, suspenso (saltem si hi censurati sint vitandi, & non tolerati); item ordinati simoniace, vel ab Episcopo, quem norunt simoniacum. Tales enim ordinantes legitimam executionem potestatis Episcopalis non habent; proinde etiam legitimum Ordinis exercitium conferre non possunt.

§. 417. III. *De Ordinatis ab Episcopo, qui renuntiavit Episcopatu*, sciendum, id duplici modo
con-

contingere posse. Primo, si quis Episcopus renuntiavit loco tantum, ut subditos, & jurisdictionem in eos amittat, retento honore & dignitate Episcopali; talis, ab alio Episcopo rogatus, in ejus diœcesi recte exercet ea, quæ sunt Ordinis Episcopalis: at si loco & dignitati simul renuntiavit, Ordines majores etiam cum licentia Ordinarii conferre non potest; & si ab eodem sacros Ordines scienter quis receperit, quia indignum se fecit, executionem officii non habebit: ubi autem non scienter, poterit (nisi crassa & supina fuerit ignorantia) discretus Pontifex dispensare (c. 1. h. t.). Prima Tonsura & minores Ordines a tali etiam Episcopo (consentiente Ordinario) recipi possunt. ib. quia & hujusmodi Ordines a non Episcopis quandoque conferuntur.

§. 418. IV. His sepositis singularibus casibus, fit distinctio inter *Ministram Ordinariam*, qui Ordines confert vi status & officii sui sine commissione Apostolicæ Sedis; qua eget *Extraordinarius*. Ordinarius Minister est Episcopus catholicus, in communione Sedis Apostolicæ constitutus, & respectu Ordinandi proprius. Proprius autem est I. ratione *Originis*, scilicet Episcopus loci, ubi parentes Ordinandorum tempore nativitatis eorum habuerunt domicilium. II. Ratione *Domicilii*. §. 148. III. Ratione *Beneficii*, nempe Episcopus Ecclesiæ, in qua, prima saltem Tonsura ab Episcopo Originis vel Domicilii insignito, confertur beneficium; quod tale esse debet, ut ad congruam vitæ sustentationem detractis oneribus per se sufficiat (a). IV. ratione *familiaritatis*, Episcopus ille, quocum aliquis per triennium fuit commoratus, & a quo statim reipsa beneficium est obtenturus. Trid. Sess. XXIII. c. 9. de ref. & c. 3. de temp. ordinat. in 6.

(a) *Super his causis, ex quibus proprius ordinandorum fit Episcopus, Innocentius XII. an. 1694. ob multas Archiepiscoporum & Episcoporum ad se delatas querelas constitutionem n. LIV. edidit, quæ incipit, Speculatores domus Israel. In ea n. 9. & 10. declarat, 1. quis Episcopus originis censeri debeat. 2. Nulli Episcopo licet exterum, id est, ratione originis vel domicilii non subditum, prima Tonsura insignire prætextu beneficii max conferendi. n. 6. Prima autem Tonsura, aut Minoribus ab Episcopo originis vel domicilii jam insignitum alius Episcopus prætextu beneficii ad ulteriores Ordines promovere non potest, nisi ante eorundem collationem testimoniales literas proprii Episcopi tam originis, quam domicilii super suis natalibus, ætate, moribus & vita acceperit. n. 7. — 3. Agit de subdito ratione domicilii ad effectum Ordinum. n. 11. & 12. Denique 4. de familiaritatis ratione n. 13. Additur sanctio pœnalis. n. 15. ut mox dicam.*

§. 419. Ordinans alienum diœcesanum, vel contra formam ab Innocentio XII. (nota præc.) præscriptam a collatione Ordinum suspenditur per annum: ordinatus vero a susceptorum ordinum executione, quamdiu proprio Ordinario videbitur, suspensus est. Concil. Trid. Sess. XXIII. c. 8. de ref. & c. 2. de temporib. ordinat. in 6. & ibi glossa v. *statuerunt*. Qui sine sui Superioris licentia homini diœcesis alienæ clericalem Tonsuram confert, per unum annum a collatione ejusdem tonsuræ suspensus est. c. fin. de temp. ord. in 6. De Episcopis Titularibus, in partibus infidelium commorantibus, ne alienos diœcesanos ordinent, cavet S. Conc. Trid. Sess. XIV. c. 2. de ref. At enim, si Episcopus ex dicta pœna per annum suspensus est a collatione Ordinum, quid facient Clerici ejus diœceseos, qui intra eum annum promoveri volunt? Resp. cit. c. 2. de temp. ord. in 6. Gregorius X. in Concilio Lugdunensi Clericis istorum Episcoporum, postquam eorum suspensio

sio fuerit manifesta, absque ipsorum etiam licentia, interim recipiendi Ordines ab aliis vicinis Episcopis, alias tamen canonice, liberam dat facultatem.

§. 420. Uti Episcopo proprio competit facultas ordinandi subditos: ita eidem vi jurisdictionis, etsi consecratus non sit, modo administrare possit, aut sit confirmatus, nec excommunicatus, competit jus dandi *dimissorias*, seu licentiam scripto exaratam adeundi alienum Episcopum catholicum & in communione Sedis Apostolicæ constitutum pro recipiendis ordinibus. De hoc jure dandi *dimissorias* decidunt SS. Canones: I. Episcopus græcus non potest suo subdito dare *dimissorias* ad Episcopum latinum, neque latinus ad græcum. c. 9. & 11. de temp. ord. ibi: *Nolumus de cetero commixtiones, & consuetudines rituum in Ordinibus observari.* II. Episcopus ultramontanus non potest *dimissorias* dare ad Episcopum Italiæ, nisi per patentes literas, continentes justam causam; quare nolit, aut non possit subditum suum ordinare, aut de speciali licentia Papæ. c. 1. eod. in 6. III. Ad alios Episcopos sic dat *dimissorias* Episcopus proprius, ut *dimissorum* probitatem, ac mores testimonio suo commendet. Concil. Trid. Sess. XXIII. c. 8. de ref. IV. Ad officium Vicarii generalis, aut Officialis dare *dimissorias* non pertinet. c. 3. de temp. ord. in 6. V. Capitulum Sede vacante, infra annum a die vacationis *dimissorias* dare non potest, nisi arctatis ratione *beneficii recepti, aut recipiendi.* Si secus fiat, Capitulum contraveniens Ecclesiastico subjaceat interdicto: & sic ordinati, si in minoribus constituti fuerint, nullo privilegio clericali, præsertim in criminalibus gaudeant: in majoribus vero, ab executione ordinum, usque ad beneplacitum futuri Prælati, sint ipso jure suspensi. Concil. Trid. Sess. VII.

c. 10. de ref. Similem pœnam incurrunt ii, qui in jurisdictione Episcopi, loco Capituli succedunt. Ib. Sess. XXIII. c. 10. de ref.

§. 421. De ordinationibus Regularium, a quo Episcopo fieri debeant, declaravit Benedictus XIV. T. 2. Bullar. in const. 27. *Impositi nobis*; ac I. Regulares ordinari debent ab Episcopo, in cujus diœcesi est conventus, in quo ordinandi Regulares habitant. Ad hunc Diœcesanum tantum Superiores Regularium dare possunt dimissorias; quia Religiosus contra prohibitionem Prælati ordinari non debet. c. 5. de temp. ord. II. Episcopus, in cujus diœcesi est conventus ab his ordinandis exigere non potest dimissorias Episcopi originis ipsorum. III. Potest idem Episcopus, in cujus diœcesi est conventus regularium, iis dare dimissorias ad alium Episcopum pro ordinationibus; sed has dare non potest Superior Regularium, ut dictum; nisi IV. pro casu, quo Episcopus, in cujus diœcesi est conventus, abesset a diœcesi, aut nullas ordinationes habiturus esset (modo hic casus non studio fuerit expectatus a Regularibus, & per fraudem); sed has dimissorias ad alium Episcopum ita dat Superior Regularium, ut habeat attestatum Vicarii generalis, Episcopum ordinarium abesse a diœcesi, aut ordinationem non habiturum. V. Regulares autem nec in minore ætate, nec sine diligenti Episcopi examine ordinantur, privilegiis quibuscunque quoad hoc penitus exclusis, uti statutum fuit a Concil. Trid. Sess. XXIII. c. 12. de ref. VI. Regulares, qui directe, non per communicationem, & quidem *post* Concilium Tridentinum, privilegium obtinuerunt, Ordines recipiendi a quocunque catholico Antistite, id saluum retinent; sed eo uti debent cum causa,
nec

nec pridie ejus diei, quo ab Ordinario habendæ sunt ordinationes, alio migrent. De pœnis, in quas Regulares contra hanc constitutionem peccantes incidunt, videatur eadem constitutio.

§. 422. Ex his intelligitur, fieri posse, ac frequenter contingere, ut ordinatus unum Ordinem ab uno, alium ab alio acquirat Episcopo; modo ratione quadam sit proprius, & a priore Ordinatore, vel ab Ordinario habeantur literæ testimoniales. Qui vero Ordinem quemdam suscepit a Summo Pontifice, non deberet sine hujus licentia ulterius ordinari ab alio Episcopo. c. 12. de temp. ord.

§. 423. *Extraordinarius* minister quorundam Ordinum, nempe Tonsuræ, & quatuor Minorum ex concessione Summi Pontificis esse potest Presbyter. Sic Cardinales Presbyteri in Ecclesia sui tituli eos Ordines conferunt; dein Abbates Sacerdotes, & benedicti, mitræ, annuli, & baculi pastoralis usum habentes, sed suis tantummodo subditis regularibus (b).

(b) *Concil. Trid. Sess. XXIII. c. 10. can. 1. dist. 69. c. 11. de ætat. & qual. præf. c. 3. de Privileg. in 6. Possè Presbytero concedi privilegium conferendi Subdiaconatum, tenent multi; nec defuerunt, qui id etiam ad Diaconatum extenderent. Conf. Zech de Hierarchia Eccl. Tit. VI. §. 76.*

TITULUS XIV.

DE ÆTATE ET QUALITATE ET ORDINE
PRÆFICIENDORUM.

ARGUMENTUM.

I. *Qualitatum ad beneficia ac dignitates non par est ratio, ac ad ordines.* §. 424. II. *Ætas requisita ad beneficia*

ficia & dignitates §. 425. *III. Ordo requisitus.*
 §. 432. *IV. Aliæ qualitates.* §. 433. *V. De ob-*
ligatione eligendi digniores. §. 434.

§. 424. Quia dignitatum & beneficiorum collatio a collatione Ordinum distincta est hac ætate; generalis doctrina hic traditur de qualitatibus eorum, qui dignitatibus, vel beneficiis Ecclesiasticis præficiuntur. Ex præscripto hujus tituli tria spectantur in Præficiendis, I. ætas II. Ordo III. aliæ qualitates ceu morum, doctrinæ &c.

§. 425. De ætate præficiendorum generalis videtur regula constitui a Concilio Trid. Sess. XXIII. c. 6. de ref. *Nullus prima Tonsura initiatus, aut etiam in minoribus Ordinibus constitutus ante decimum quartum annum beneficium possit obtinere.* Nota 1. Proprietati verborum hujus canonis satisfit, si annus 14 sit inchoatus. 2. Si ex singulari & expressa fundatorum voluntate (quæ ab Ecclesia censetur approbata) ante annum 14. beneficium concedatur, id speciale est, & derogat generali. 3. Ex hac lege inferri non potest, post annum 14. quævis beneficia protinus obtineri posse; sunt enim, quæ provectionem ætatem poscunt.

§. 426. Altera generalis de ætate regula hæc est: Si dignitati, personatui, officio aut beneficio annexi sunt certi Ordines e. g. Diaconatus, Presbyteratus &c. tum ei dignitati &c. præfici non potest, nisi ejus sit ætatis, ut infra annum promoveri possit ad hosce Ordines requisitos. Exemplum præbet. c. 1. h. t. Hæc autem ætas adesse jam debet tempore electionis, præsentationis, impetrationis, arg. c. 14. de elect. in 6. (a).

(a) *S. Concil.*

(a) *S. Concil. Trid. Sess. XXIV. c. 12. de ref. præscribit: „Ut in omnibus Ecclesiis cathedralibus omnes canonicatus ac portiones habeant Ordinem Presbyterii, Diaconatus, vel Subdiaconatus; Episcopus autem cum consilio Capituli designet ac distribuatur, prout viderit expedire, quibus quisque ordo ex sacris annexus esse debeat.“ Si ista lex in Germania observaretur, nemo talem canonicatum obtinere posset, nisi haberet ætatem subdiaconatus parem.*

§. 427. Ad dignitates vel personatus, quibus animarum cura nulla subest, Clerici alioquin idonei, & XXII. annis non minores adfiscantur. Ita statuit S. Concil. Trid. Sess. XXIV. c. 12. de ref. Patet autem ex vi verborum, viginti duos debere esse completos. At c. 1. h. t. in 6. permittitur, ut *Episcopi cum iis, qui XX. annum compleverint, quod dignitates vel personatus, quibus animarum cura non imminet, valeant obtinere, possint, si aliud non obstat canonicum, libere dispensare*; cum odiosa sit correctio jurium, dici non potest, hoc jus a Tridentino correctum, aut sublatum fuisse.

§. 428. Ad dignitates quascunque, quibus animarum cura subest, vel ad parœciales Ecclesias, aut earum vicarias perpetuas nemo promoveatur, nisi qui saltem 25. suæ ætatis annum attigerit. Trid. Sess. XXIV. c. 12. de ref. c. 14. de elect. in 6. Clem. un. de offic. Vicarii. c. 7. §. *inferiora*. de elect. Huc etiam pertinent Abbatia & Prioratus conventuales; ceteri Prioratus, etsi curam habeant animarum, exigunt saltem annum 20. completum. Clem. 1. §. 7. de statu Monach. c. 10. h. t. ex dispensatione Abbas esse potest etiam irregularis, & in Minoribus constitutus; si nempe aptus dignoscitur monasterio reformando. Sufficit, ut ex tenore verborum patet, annum 25. esse inchoatum.

§. 429. Nullus in Episcopum eligatur, nisi qui jam annum trigesimum ætatis exegerit. c. 7. de Elect. quod denotat, annos 30. completos. Concil. Trid. Sess. XXIV. c. 1. de ref. Quæ de qualitatibus Episcoporum statuta sunt, ibidem extenduntur ad Cardinales, etiam si Diaconi sint. Sed ex const. 50. Sixti V. *Postquam verus*, ad Cardinalatum sufficit ætas Presbyterio vel Diaconatui intra annum suscipiendo congrua.

§. 430. Si ex dispensatione constituto in Minoribus conceditur Ecclesia, dignitas, beneficium; administratio non ad patrem vi patriæ potestatis, vel ad tutores, sed ad Clericos secundum præscriptum Canonum pertinet. c. 2. h. t. & c. fin. de judiciis in 6.

§. 431. Si candidato beneficii vel dignitatis lis de ætate movetur, antequam id obtinuerit, ipse probare debet ætatem legitimam; quia in ea fundat intentionem. l. cum te minorem. 9. C. de probat. At si lis post obtentum jam beneficium oritur, adversario neganti legitimam ætatem incumbit onus probandi; quia provisus tunc habet intentionem fundatam in ætate.

§. 432. *De Ordine* ad beneficia & dignitates necessario, decedit jus sacrum; I. aliquis ordo, saltem prima Tonsura, ad validam collationem vel receptionem omnino est necessarius §. 383. II. Ordo, quem jus & natura beneficii, aut consuetudo requirit, saltem recipiendus est intra annum. c. 14. de Elect. in 6. Si intra annum ab obtenta pacifica possessione Ordo requisitus absque justo impedimento non suscipitur, privatio beneficii parochialis aut vicariæ perpetuæ incurritur ipso jure: aliorum autem beneficiorum etiam curatorum saltem per sententiam judi-

judicis. c. 1. h. t. c. 14. & 35. de Elect. in 6. III. Ut Canonici gaudeant suffragio in Capitulo, requiritur Subdiaconatus. Clem. 2. h. t. IV. Pro Ecclesiæ utilitate aut necessitate Clerici cogi possunt, ut ascendant ad majores Ordines c. 6. h. t. V. Ad Episcopatum aliquis Ordo facer, saltem Subdiaconatus, ante 6. menses susceptus prærequiritur. c. 9. h. t. Trid. Sess. XXII. c. 2. de ref.

§. 433. Aliæ qualitates ad beneficium rite obtinendum sunt, I. ut, qui est in Minoribus constitutus, habeat intentionem status Ecclesiastici perpetuo retinendi, nisi scilicet aliqua justa causa inciderit (b). II. Qui ad sacros Ordines admissus, ac proin idoneus judicatus est, regulariter censetur idoneus ad recipiendum beneficium Ecclesiasticum, nisi se reddiderit indignum. c. 13. h. t. Ad beneficia tamen curata, vel dignitates obtinendas novo opus est examine. Trid. Sess. VII. c. 13. de ref. & Sess. XXIV. c. 18. de ref. III. Et ad talia beneficia probitas morum & scientia requiritur longe major, quam ad simplicia. c. 4. 14. 15. h. t. IV. Concilium Trid. pro quibusdam dignitatibus, & officiis requirit gradum doctoratus, aut licentiatum ex Theologia, vel Jure Canonico; aut saltem publicum alicujus Academiæ testimonium de idoneitate ad alios docendos, nempe in Episcopis, Sess. XXII. c. 2., de ref. in Canonico Scholastico, Sess. XXIII. c. 18. de ref., in Pœnitentiario, Sess. XXIV. c. 8. de ref., in Vicario Capituli Sede vacante, ib. c. 16., in Archidiacono, ib. c. 12. Hortatur eadem Synodus, ut saltem dimidia pars Canonicatum in cathedralibus Ecclesiis, & Collegiatis insignibus conferatur tantum Magistris vel Doctoribus, aut etiam Licentiatum in Theologia vel Jure Canonico, ib. c. 12. V. Aliæ qualitates non

Zallinger L. I. Decretal.

U

nun-

nanquam requirantur ex fundatione, consuetudine aut legitimo statuto, ceu ne ad beneficia aut dignitates assumantur, nisi ex certa familia, si idonei præsto sunt, aut illustri sanguine procreati (conf. §. 135. n. V.).

(b) *Arg. c. 4. § II. de ref. Sess. XXIII. Concil. Trid. Conf. Lessius de J. & J. l. 2. c. 34. dub. 26.*

§. 434. Propria hujus loci est quæstio de obligatione promovendi *digniores* ad beneficia Ecclesiastica. Notandum I. *dignus* sæpe vocatur, quisquis nullo afficitur impedimento canonico, quo minus promoveri queat, sive id ex jure communi, sive speciali & proprio quarundam Ecclesiarum proveniat. II. Dignitas spectari potest *relate ad subjectum* qualitatibus instructum ad promotionem necessariis, quodque ob præcedentia merita, vel præcellentes dotes aliis videtur præferendum: aut *relate ad dignitatem vel Ecclesiam*, ad quam aliquis promovendus est: & hoc quidem respectu pro ratione temporum, locorum, præsentium necessitatum Ecclesiæ aliæ atque aliæ dotes unum alio digniorem efficere possunt. Fit enim aliquando, ut aliis præferri debeat industrius œconomus patrimonii Christi: aliquando is, qui doctrina & zelo pollet coercendi adversarios Ecclesiæ & hostes fidei; aliquando vero ille, quem ob eminentiam natalium, & fœdera cum agnatis revereatur vicina potentia. Sic autem præsens Ecclesiæ necessitas vel utilitas, ac dotes subjecti ei respondentes spectari debent, ut tamen aliæ dotes universi communeri necessariæ non penitus negligantur. Doctores antiquiores obligationem præferendi digniores sæpe ex eo derivant, quod alias cesset æmulatio charismatum meliorum, majoris scientiæ, zeli, probitatis. Sed hoc

hoc refertur ad justitiam distributivam, & qualitates subjecti, non ad necessitatem atque utilitatem Ecclesiæ, cujus bono ex justitia, ut ajunt, *commutativa*, sive jure perfectō & rigoroſo providendum est. III. Utraque justitia in distributione etiam beneficiorum & honorum Ecclesiasticorum lædi potest; modo in iis distinguatur tum id, quod est oneris atque obligationis, tum id, quod est honoris, commodi vel instar præmii & remunerationis. IV. *Acceptio personarum* fieri dicitur, si, cum unus præferendus est alteri, spectatur qualitas ad causam non pertinens; e. g. si judex litem adjudicat Titio, quia dives, amicus, præpotens est (c).

(c) S. Thomas 2. 2. q. 63. a. 2. de *acceptioe personarum* ita differit: „Personarum acceptio est, cum aliquid personæ attribuitur præter proportionem dignitatis ipsius. „Considerare oportet, quod dignitas alicujus personæ potest attendi dupliciter: uno modo simpliciter, & secundum se; & sic majoris dignitatis est, qui magis abundat in spiritualibus gratiæ donis: alio modo per comparisonem ad bonum commune. Contingit quandoque, quod ille, qui est minus sanctus, & minus sciens, potest magis conferre ad bonum commune propter potentiam vel industriam secularem, vel propter aliquid hujusmodi. Et quia dispensationes spiritualium principaliter ordinantur ad utilitatem communem, secundum illud „I. Cor. XII. 7. unicuique datur manifestatio spiritus ad utilitatem; ideoque quandoque absque acceptioe personarum in dispensatione spiritualium illi, qui sunt simpliciter minus boni, melioribus præferuntur; sicut etiam „& Deus gratias gratis datus quandoque concedit minus bonis. — Quantum ad hoc, quod electio impugnari non possit in foro judiciali, sufficit eligere bonum; nec oportet eligere meliorem; quia sic omnis electio posset habere calumniam (Conf. §. 295. n. V.). Sed quantum ad conscientiam eligentis, necesse est eligere meliorem vel simpliciter, vel in comparisonem ad bonum commune, quia, si potest aliquis haberi magis idoneus ad aliquam dignitatem,

„tatem, & alius præfertur; oportet, quod hoc sit propter
 „aliquam causam; quæ quidem si pertineat ad negotium,
 „quantum ad hoc, erit ille, qui eligitur, magis idoneus:
 „si vero non pertineat ad negotium id, quod consideratur,
 „ut causa, erit manifeste acceptio personæ.”

§. 435. Prop. *Ad Ecclesias cathedrales promovendi sunt digniores, & Ecclesiæ magis utiles; eaque est obligatio gravis, & juris naturalis.* Prob. S. Concil. Trid. Sess. XXIV. c. 1. de ref. agens de illa promotione docet, omnes & singulos, qui ad promotionem præficiendorum quodcunque jus habent, aut operam præstant, tanquam alienis peccatis communicantes graviter peccare, nisi quos digniores & Ecclesiæ magis utiles ipsi judicaverint, non quidem precibus, vel humano affectu, aut ambientium suggestionibus, sed eorum exigentibus meritis præfici diligenter curaverint. Et ibid. Eadem sancta Synodus tot gravissimis Ecclesiæ incommodis commota, non potest non commemorare, nihil magis Ecclesiæ Dei esse necessarium, quam ut Beatissimus Romanus Pontifex — lectissimos tantum sibi Cardinales adsciscat, & bonos maxime atque idoneos pastores singulis Ecclesiis præficiat, idque eo magis, quod ovium Christi sanguinem, quæ ex malo negligentium, & sui officii immemorum pastorum regimine peribunt, Dominus noster Jesus Christus de manibus ejus sit requisiturus. Ex his per se argumentum se offert: Qui digniorem & Ecclesiæ magis utilem non eligunt, communicant peccatis alienis, quæ ob præteritum digniorem perpetrantur, & sunt causa moralis, ut oves Christi ex negligentium, & sui officii immemorum pastorum regimine pereant. Atqui isthuc evitandi obligatio est gravis, & juris naturalis. Ratio fundatur in gravitate muneris Episcopalis, quod ab eodem Concilio Sess. VI. c. 1. de ref. appellatur *onus angelicis humeris formidandum;*

dum; ubi ait: *Integritas præſidentium ſalus eſt ſubditorum.* Difficultati velut intrinſecæ muneris Episcopalis accedit diuturnum ſchiſma, & commixtio catholicorum cum acatholicis, iſtorum pertinacia, aſtutia, violentia, odium acerbum laicorum adverſus Clericos, præcipue regulares, conflictus poteſtatis ſacræ & profanæ, imminutio libertatis Eccleſiaſtica, temeritas & impudentia ſcriptorum, publica ſcandala &c.

§. 436. Objiciunt I. S. Concilium eadem Seſſ. XXIV. c. I. de ref. utitur positivo *bonos*, non comparativo; omnes enim, qui ad promotionem concurrunt, hortatur & monet, ut in primis *meminerint, nihil ſe ad Dei gloriâ & populorum ſalutem utiliſſe poſſe facere, quam ſi bonos paſtores, & Eccleſiæ gubernandæ idoneos promovere ſtudeant.* R. 1. Synodus ſtatim ſubjungit verba ſupra cit. de dignioribus & Eccleſiæ magis utilibus, qui non in ſe, ſed relatè ad judicium promoventis ſoli ſimpliciter digni cenſeri poſſunt, ſpectata gravitate & difficultate muneris paſtoralis. 2. Ab Innocentio XI. damnata eſt hæc propoſitio n. 47: *Cum dixit Concilium Tridentinum, eos alienis peccatis communicantes mortaliter peccare, qui, niſi quos digniores & Eccleſiæ magis utiles ipſi judicaverint, ad Eccleſias promoveant: Concilium vel primo videtur per hoc digniores non aliud ſignificare velle, niſi dignitatem eligendorum ſumto comparativo pro positivo, aut ſecundo locutione minus propria ponit digniores, ut excludat indignos, non vero dignos; vel tandem loquitur tertio, quando fit concurſus.*

§. 437. Objiciunt II. Qui ſimpliciter dignum promovet, purgare ſe poteſt, dicendo, ſe promoviſſe eum, qui & poterat & debebat recte Eccleſiam

regere; ac sibi defectus regiminis imputari non posse. Ry. n. Qui promovent, vel quoquo modo concurrunt ad promotionem, ipsi negligentiae pastorum præcavere debent, quantum possunt; secus participes sunt peccatorum, quæ ex negligentia eorum, quos promovent, committuntur: & ab ipsis Christus requireret oves, quæ ex regimine negligentium pastorum intereunt.

§. 438. Quæ de obligatione promovendi digniores ad Ecclesias cathedrales dicta sunt, non videntur ex pari ratione continuo applicari posse ad dignitates vel beneficia inferiora; facilius enim occurrit negligentiae & defectibus inferiorum, quam primorum in diocesis pastorum; nihilominus certæ videntur decisiones sequentes: I. Ad beneficia & dignitates *electivas* promovendus est dignior, & Ecclesiae magis utilis; nam electio intrinsece & ex natura sua eo ordinatur, ut, qui jus eligendi habent, circumspectis omnibus non suæ, sed Ecclesiae utilitati meliore, quo fieri potest, modo consulant. II. Ad beneficia per *concursum* conferenda promovendus est dignior. Id ex natura ac fine concursus & publicæ veluti concertationis patet; & a S. Concilio Trid. Sess. XXIV. c. 18. de ref. decisum est. Ibi: *Ex hisque Episcopus eum eligat, quem ceteris magis idoneum judicaverit; atque illi, & non alteri collatio Ecclesiae ab eo fiat, ad quem spectabit eam conferre.* III. Beneficia patronata *Juris Ecclesiastici* conferenda sunt dignioribus. Sic aperte decisum est a S. Concilio Trident. l. c. quia Patrono Ecclesiastico jus præsentandi non competit per modum privilegii in privatum patroni favorem concessi. IV. De Patrono laico agens Synodus eodem loco silet de obligatione præsentandi digniorem; ait enim:

enim: Quodsi jus patronatus laicorum fuerit, debeat, qui a patronis præsentatus erit, ab eisdem deputatis, ut supra, examinari, & non, nisi idoneus repertus fuerit, admitti. Et can. monasterium. 33. XVI. q. 7. dicitur: *Monasterium vel oratorium canonice constructum a dominio constructoris eo invito non auferatur, liceatque illi, presbytero, cui voluerit pro sacro officio illius diæcesis, cum consensu Episcopi, ne malus existat, commendare.*

§. 439. Princeps Ecclesiasticus beneficia, & dignitates, quæ ad liberam collationem suam pertinent, ob indebitam & impertinentem causam conferre non potest minus digno, omisso digniore; quia non Dominus est, sed dispensator bonorum Ecclesiæ (d). Idem tamen aliquando præter solam utilitatem Ecclesiæ, etiam præcedentia merita, vel præsentem necessitatem Clericorum videtur spectare posse. Nam I. Cor. V. 17. dicitur: *Qui bene præsunt presbyteri, duplici honore digni habeantur, maxime qui laborant in verbo & doctrina.* Vi rescripti gratiæ in causa beneficiæ, de impetrante id tantum quæritur, utrum simpliciter dignus sit, ejusque preces veritate nitantur, citra comparisonem ullam digni cum digniore alio candidato. C. Secundum Apostolum. 16. de præb. conceditur Episcopo, ut eum, qui sine titulo ordinatus est, juvare possit per beneficium competens, ne illum ex propriis redditibus alere teneatur; nec inquirere jubetur, utrum non dignior adsit alius.

(d) S. Thomas 2. 2. q. 63. art. 2. ad 1. ait: „Circa consan-
guineos Prælati distinguendum est; quia quandoque sunt
„minus digni & simpliciter, & per respectum ad bonum
„commune: & sic si dignioribus præferantur, est pecca-
„tum personarum acceptionis in dispensatione spiritua-
U 4 lium,

„lium, quorum Prælatus Ecclesiasticus non est Dominus,
 „ut possit ea dare pro libito; sed dispensator secundum
 „illud I. Cor. IV. 1. Sic nos existimet homo, ut ministros
 „Christi & dispensatores ministeriorum Dei (mysterio-
 „rum; & II. Cor. VI. 4. In omnibus exhibeamus nos-
 „met ipsos, ut Dei ministros): quandoque vero consan-
 „guinei Prælati Ecclesiastici sunt æque digni, ut alii; &
 „sic licite potest absque personarum acceptione consangui-
 „neos suos præferre; quia saltem magis in hoc præmi-
 „nent, quod de ipsis magis confidere potest, ut unanimi-
 „ter secum negotia Ecclesiæ tractent.“

TITULUS XV.

DE SACRA UNCTIONE,

ARGUMENTUM.

I. Unctio adhibetur rebus & personis, per Olea, & Chrisma
 prius benedicta. §. 440. II. Ritus observandi sunt
 religiose. §. 442.

§. 440. Scire te Volumus, inquit Innocentius
 III. c. un. h. t. duas esse species Unctionis, exteriorem,
 quæ materialis est, & visibilis: & interiorem, quæ spi-
 ritualis est, & invisibilis (a). Exterior & visibilis un-
 ctio fit 1. Oleo benedicto catechumenorum: vel 2.
 oleo infirmorum: aut 3. Chrismate, quod fit ex
 Oleo & balsamo (c. un. §. 2. h. t.). Adhibetur un-
 ctio tum rebus, de quibus agitur libr. 3. tit. 4. de
 consecratione Ecclesiæ vel altaris; tum personis in
 quatuor Sacramentis administrandis, uti patet ex c.
 un. h. t. nempe in Baptismo ib. §. 6. in Confirma-
 tione §. 7. in extrema Unctione §. 1. in Ordine pres-
 byterali & Episcopali. c. un. h. t. §. 3. 4 & 9. (conf.
 dicta supra §. 393 & 394.). Denique etiam Impera-
 tor & Reges Oleo catechumenorum unguntur in Bra-
 chio dextro sive humero. c. un. h. t. §. 5. & c. 34.
 de

de elect. Sed hæc unctio neque Sacramentum est, neque sacramentalis; quia neque per se gratiam efficit, neque per se ad Sacramentum aliquod conficiendum, vel suscipiendum ordinatur (b). Mysticæ rationes harum unctionum eleganter in hoc capitulo locis cit. indicantur.

(a) *Antiquitas horum rituum patet ex Tertulliano libr. de resurrex. Carn. ubi c. 8. loquens de Sacramento Confirmationis ait: Caro unctione, ut anima consecratur; caro signatur, ut anima muniatur: caro manus impositione adumbratur, ut & anima Spiritu illuminetur.*

(b) *Ritus & formulæ continentur in Pontif. Rom.*

§. 441. Olea, & Chrisma, quibus fit Unctio, benedicta esse oportet ab Episcopo; quod fit in officio feriæ quintæ in Cæna Domini eo ritu, qui in Pontif. Romano præscribitur. Extant exempla, administrationem Sacramenti Confirmationis a Papa commissam fuisse simplici Presbytero; at exemplum non extat, eidem commissam fuisse consecrationem Chrismatis. A Sacerdote nonnunquam oleum benedicitur ad alios usus communi illa benedictione, quæ ad quodcunque commestibile in Missali & in Sacramentario Gregorii M. ponitur: *Benedic Domine creaturam istam &c.* Dein oleum utrumque, simplex & Chrisma debet esse novum, id est, illo anno, quo adhibetur, benedictum, secundum traditionem Ecclesiæ. can. 18. dist. 3. de consecrat. Præterea c. 3. de consecr. Eccles. deciditur, oleo benedicto infirmorum, deficiente copia, misceri posse aliud non benedictum, sed in minore quantitate.

§. 442. Proprius hoc titulo locus est agendi de elemento & verbo c. 5. de bapt. seu de materia &

*forma Sacramentorum, præcipue Ordinationis sacrae. Sed ea tractatio propius ad Theologos pertinet, qui fufe disputant de eo, quod ad substantiam sacramenti pertinet, aut accidentale sit. Monendi tamen sunt studiosi juris sacri, ut ea in Sacramentis adcurate distinguere norint, atque animum ad utrumque advertere assuescant. Ritus, quantumvis accidentales sint, maximi fieri, ac religiose, & cum debita gravitate ac spiritus devotione observari debent; quo pertinet can. 12. ex Sess. VII. Concil. Trid. de Sacram. in genere: *Siquis dixerit, receptos & approbatos Ecclesiæ Catholicæ ritus, in solemni Sacramentorum administratione adhiberi consuetos, aut contemni, aut sine peccato a ministris prohibito omitti, aut in novos alios per quemcunque Ecclesiarum pastorem mutari posse, anathema sit.**

TITULUS XVI.

DE SACRAMENTIS NON ITERANDIS.

ARGUMENTUM.

I. Quæ Sacramenta iterari non possint? §. 443. II. De dubio valere Sacramenti jam collati. §. 444.

§. 443. Tria sunt Sacramenta, quæ ob characterem, quem imprimunt, iterari non possunt. Baptismus, Confirmatio, & Ordo; ne nimirum Sacramento fiat injuria, ut inquit S. Augustinus can. *quod quidam*. 97. I. q. 1. & can. *ostenditur*. 33. dist. 4. de consecrat. S. Concilium Trid. Sess. VII. can. IX. de Sacramentis in genere ita definit: *Siquis dixerit in tribus Sacramentis, Baptismo scilicet, Confirmatione & Ordine, non imprimi Characterem in anima, hoc est, signum quoddam spirituale, & indelebile, unde ea iterari*

iterari non possunt, anathema sit. De rebus etiam consecratis, ceu Ecclesiis & altaribus, docent SS. Canones, semel consecrata iterum consecrari non debere. Gratian. dist. 68.

§. 444. Si de valore horum Sacramentorum, præsertim Baptismi & SS. Ordinum, prudens occurrit dubium, ea sub conditione conferri debent, *quia non intelligitur iteratum, quod ambigitur esse factum.* c. 3. de Presbyt. non baptiz. can. 2. dist. 68. & ibi Gratianus. At siquid in collatione prætermissum, aut per errorem actum est, ut si in ordinatione Diaconi aut Presbyteri omissa est impositio manuum, c. 1 & 3 h. t. aut si in Confirmatione loco Chrismatis adhibitum fuit oleum, dicitur *statutis temporibus caute* (occulte ad evitandum scandalum) *supplendum esse, quod incaute fuerat prætermissum.* (a). Si Schismatici celebrarunt, propterea nec vestimenta, quibus usi sunt, de novo benedici, nec altaria de novo consecrari debent. c. 2. h. t. ob rationem §. præc. in fine indicatam.

(a) Ex hoc loco concludunt multi, valide conferri Confirmationem adhibito solo oleo: alii negant, asserentes, id voluisse Pontificem, omissis accidentariis Ceremoniis supplendum esse ipsum Sacramentum adhibito Chrismate cum forma.

TITULUS XVII.

DE FILIIS PRÆBYTERORUM ORDINANDIS,
VEL NON.

ARGUMENTUM.

I. Ad irregularitates ex defectu primo pertinent illegitimi natales. §. 445. II. Illegitimorum variae classes. §. 446. III. Remedia §. 451.

§. 445.

§. 445. *Irregularitates ex defectu*, de quibus per quinque titulos deinceps agitur, ad tria capita revocari possunt. Nam defectus vel carentia boni contingere potest, 1. quoad *statum externum seu bona fortunæ*; 2. quoad *naturalia bona corporis vel animi*; 3. quoad *supernaturalia bona*. Ad defectus quoad statum externum & bona fortunæ referuntur imprimis illegitimi natales; neque enim, qui natalium defectu laborant, ob id naturali quadam corporis vel animi dote, nec supernaturali bono quodam carent. In libro sexto Decretalium inscriptio hujus tituli patet latius: *De filiis presbyterorum, & aliis illegitime natis*, nempe ex conjunctione maris & feminae per canones, seu leges Ecclesiæ reprobata. Hi omnes sunt irregulares, c. 1. h. t. etsi non apud omnes par sit originis turpitudine: unde etiam dispensatio in defectu non pari semper difficultate obtineri potest; nam eo difficilius & rarius ea fit, quo turpior origo, ac defectus est.

§. 446. Libri IV. Decretalium titulus 17. inscribitur: *Qui filii sint legitimi*; ubi ex instituto de illegitimis quoque agitur: necesse tamen est, eorum varias classes hic enumerare, ac

I. Illegitimi sunt *naturales*, nempe extra validum matrimonium nati, sed ex parentibus iis, inter quos tempore conceptionis aut nativitatis validum poterat consistere matrimonium. Tempus conceptionis videtur a primo conceptu usque ad partum extendi; unde aliqui addunt: aut *tempore inter conceptionem & nativitatem medio*, nempe favore prolis l. 11. C. de natural. lib. (a). Dixi extra *validum* matrimonium; si id bona fide saltem unius partis in facie Ecclesiæ post præmissas denuntiationes contractum,

ob

ob occultum impedimentum fuerit irritum, proles ex eo nata censetur legitima. c. 2. 9. 11. 14. qui filii sint legit.

(a) *Jure civili Romano naturales dicuntur liberi, qui nati sunt ex soluto & concubina unica instar uxoris domi detenta. l. 1. seq. D. de concub. Nov. 89. c. 6. contra spurii eodem jure censentur, qui ex meretrice pluribus prostituta nati sunt, & propterea patrem demonstrare non possunt, aut non alium, nisi quem per leges habere non licet, unde vulgo quasiti appellantur. l. vulgo. 23. D. de Statu hominum. At Jure canonico sola spectatur parentum prolis ad matrimonium habilitas, ut naturalis censeatur proles, non autem ex damnato coitu nata; differentia inter jus utrumque orta est ex eo, quod jure Romano concubinatus fuerit toleratus aut permissus. At is non tantum jure canonico, sed per leges etiam politicas Germaniæ prohibitus est. Reform. politica an. 1530. tit. 33.*

§. 447. II. Multo magis illegitimi sunt, qui ex damnato coitu nati, & jure canonico spurii dicuntur, ceu liberi adulterini, incestuosi; & in his nefarii, quorum parentes in linea recta consanguinei vel affines sunt; demum sacrilegi, quorum pater solemnii voto sacri Ordinis aut religiosæ Professionis adstrictus, aut mater professa in Ordine religioso est. De his statuit S. Concilium Trid. Sess. XXV. c. 15. de ref. ut paternæ incontinentiæ memoria a locis Deo consecratis, quos maxime puritas, sanctitasque decet, longissime arceatur: non liceat filiis clericorum, qui non ex legitimo nati sunt matrimonio, in Ecclesiis, ubi eorum patres beneficium aliquod Ecclesiasticum habent, aut habuerunt, quodcunque etiam dissimile beneficium obtinere, nec in dictis Ecclesiis quoquo modo ministrare, nec pensiones super fructibus beneficiorum, quæ parentes eorum obtinent, vel alias obtinuerunt, habere. Consentiunt c. 3. 4. 15. 16. h. t.

§. 448. III. Illegitimis (quoad Ordines & beneficia) adnumerantur nati ex conjunctione Sacerdotis vel Religiosi cum uxore legitima ante Ordines vel Professionem ducta. Casus extat c. 14. h. t. in quo Pontifex ad Ordines & beneficia dispensavit, sed ægre; sic enim habet Decretalis integra: *Quia in filiis paterna incontinentia modis omnibus propellenda dignoscitur, & propter cautelam presbyterorum filii a sacris Ordinibus juxta sanctionem canonicam remouentur; non expedit, ut super hujusmodi ita supplicantium precibus annuamus, quod videamur aliis impetrandi similia spem aliquam facilius impertiri.* In Ecclesia græca Subdiaconis, Diaconis & Presbyteris licitus est usus matrimonii ante susceptionem sacri Ordinis contracti; proinde liberi ex eo usu geniti non censentur illegitimi, neque arcantur ab Ordine & beneficiis etiam inter latinos c. 6. de Cleric. conjug. At nuptiæ post sacrum Ordinem etiam apud Græcos contractæ sunt penitus irritæ, & liberi ex iis geniti adnumerantur natis ex damnato coitu. conf. l. elegantissima 45. C. de Episc. & cler.

§. 449. Pro illegitimis habendi non sunt I. liberi ex valido nati matrimonio ante susceptos Ordines contracto. c. 12. h. t. Ne tamen hereditaria successione videatur Domus Dei possideri, tales non possunt immediate succedere in beneficio, quod pater habuit in titulum, nec potest filius esse vicarius illius Ecclesiæ, in qua Pater proxime fuit rector, c. 10. 11. 13. At potest filius beneficium habere patris, si media intercessit persona c. 7. aut si pater id tanquam vicarius temporalis, non in titulum tenuit. c. 8; possunt etiam pater & filius in eadem Ecclesia habere beneficia distincta. c. 12. Si Episcopus tali filio scienter contulit paternam Ecclesiam, ipse
contra

contra suum factum eum amovere non potest. c. 5. II. Nec illegitimi habentur legitimated per subsequens matrimonium: hi a solo excluduntur cardinalatu. III. Neque nati ex disparagiis, aut parentibus levis notæ macula aspersis. IV. De expositis, utrum præsumantur legitimi, vehementer dubitatur; quia plerumque exponantur nati ex illicito coitu (b).

(b) *Garcia de beneficiis P. VII. c. 2. n. 6. seq. Pro legitimis habendos putat Holzmänn in Jur. Can. pract. ad h. t.*

§. 450. Defectus natalium, etsi occultus sit, irregularitatem parit can. 14. dist. 56. & c. 10. de renunt. Causa ejus inducendæ fuit decor SS. Ordinum atque Ecclesiarum; tales enim solo aspectu refricant memoriam criminis, quo nati sunt; ac præterea timorem ingerunt, ne paternæ incontinentiæ imitatores sint. arg. can. 10. dist. 56. Huc aliqui referunt verba Deut. XXXIII. 2. *Non ingreditur mamzer, hoc est, de scorto natus, in Ecclesiam Domini usque ad decimam generationem* (c).

(c) *Vox Mamzer etiam occurrit c. 10. §. 6. in fin. de renunt. ubi glossa ait: Mamzeribus scortum, sed mæcha nothis dedit ortum. At loquendi usus hac etiam in re valde diversus est.*

§. 451. Defectui natalium succurritur I. per ingressum in Ordinem religiosum; nam professus ipso jure censetur dispensatus ad Ordines majores, non tamen ad prælaturas c. 1. h. t. Sed eo nomine non comprehenduntur alia officia, vel administrationes Ordinis. conf. Navarrus conf. III. h. t. II. Per legitimationem, quæ ad effectus Ecclesiasticos fit a Summo Pontifice: ad temporales a Principe politico. c. per venerabilem. 13. qui filii sint leg. Est autem legiti-

legitimitas,abilitas personæ redditæ, ejusque velut restitutio ad primævum, vel solitum statum. Largius seu pinguius est hoc remedium, quam dispensatio, sed difficilior & rarius. Dispensatio eos tantum, ad quos data est, effectus respicit, manente radicali inhabilitate, ac strictæ interpretationis est, ut mox dicam. III. *Dispensatione*, quam ad Ordines minores & beneficia, sine cura, dare potest Episcopus: ad Ordines majores, ad beneficia curata, ad dignitates, & personatus, vel ad beneficia paterna a filiis obtinenda solus Papa (c. 9. & 18. X. & c. 1. h. t. in 6.); non autem legatus Sedis Apostolicæ. c. 17. Dispensatio Apostolica strictè sumenda est; unde dispensatus ad beneficium curatum, non potest, nisi unicum, obtinere. c. 1. §. 1. h. t. in 6. Nec valet dispensatio super pluralitate beneficiorum, quæ tacita priore illa dispensatione ad beneficium curatum obtenta est (d).

(d). *Eo difficilior esse dispensationem, quo turpior est illegitimi origo, supra animadverti, idemque docet Pyrrhus Corradus Præx. Dispensat. Lib. III. c. 1. n. 3.*

TITULUS XVIII.

DE SERVIS NON ORDINANDIS, ET EORUM
MANUMISSIONE.

ARGUMENTUM.

I. Ordinari prohibentur, tanquam irregulares non modo servi, quales non habemus, sed alii etiam vinculo personali adstricti.

§. 452. Ad statum externum & fortunæ bonæ præter natales referri debet conditio ingenuorum, servorum, libertorum, aliorumque vinculo personali aliis obstrictorum. I. *Servi jure Romano cen-*
seban-

sebantur *nulli*, non habere *caput*, non personam, non *statum*, id est, nec familiam, nec civitatem, nec libertatem, ac vilissima ipsorum erat conditio; ob quam vilitatem, ac ne Ecclesia videatur Dominis fraudem facere, ordinari prohibebantur, nisi cum consensu Dominorum, eorumque manumissione. Gratian. dist. 54. & toto hoc tit. Manumissionis ritus erant varii; eaque sæpe fiebat in Ecclesia (l. 1. & 2. C. de his, qui in Eccles. manumitt.) in primis festo paschali (a). Modus etiam manumittendi non idem erat; nam aut *pure* & absolute libertate donabantur, aut reservato jure quodam patronatus, & obligatione præstandi operas spirituales. c. 3. 4. 6. h. t. Ceterum notum est Procardicum; quoad conditionem servilem vel ingenuam *partus sequitur ventrem*. c. 8. h. t. & c. un. de natis ex lib. ventre. nisi consuetudo obstet. c. 3. de conjug. Serv.

(a) S. Gregorius Nyssen. Orat. II. de resurrect. Christi.

453. II. *Adscriptitii* etiam, sive fundis & possessionibus colendis stabiliter attributi, & *originarii*, qui ex iis nati sunt, sine consensu Dominorum, perinde ut servi, ordinari prohibentur, can. 12. & 21. dist. 54. aut cogebantur, etiam Clerici facti, impositam sibi agriculturam adimplere, l. 37. C. de Episc. & Cler. cum subjuncta Authent.

§. 454. III. Homines *proprii* ab *adscriptitiis* non multum differunt, nec ordinantur, nisi impetrato Dominorum consensu, etsi reipsa liberi sint (sed absque præjudicio prædiorum, & servitiorum independentium), habeantque jus connubiorum, testamentorum, contractuum, item personam standi in judicio; in quo genere liberi fere sequuntur conditionem patris, non matris.

Zallinger L. I. Decretal.

X

§. 455.

§. 455. IV. *Curiales* ob gravissima onera, quibus curiæ ac foro mancipati premebantur, ab Ordinibus exclusi sunt per antiquissimos canones apud Gratian. can. 1. 2. 3. dist. 51. & dist. 53. per totum. conf. l. 50. & 55. C. de decurionib. (b).

(b) Theophylact. in C. XV. Marci prope fin. de Josepho ab Arimathæa ait, quod fuerit Senator, quæ dignitas quædam erat, vel potius ministerium & onus civile, per quod cogebantur intendere his, quæ fori erant; & multa sæpe inde oriébantur pericula propter fori malitiam. Addit: Audiant divites, & publicis muneribus fungentes, quomodo Josepho nihil obsistat ad virtutem senatoria dignitas. Sozomenus in Hist. Eccl. lib. I. c. 8. narrat, Constantinum M. editis legibus libertatem concessisse iis, qui propter Christi nominis confessionem vel ad insulas, vel alia loca contra voluntatem incolenda, vel ad effodienda metalla, vel ad onera publica, vel ad ministrandum curiis, cum antea consiliarii non fuissent, condemnati essent.

§. 456. V. *Milites*, quoniam publico munere detinentur ex designatione Principis, sine Principis consensu, & post exacta militiæ officia, aut honestam missionem ordinandos non esse constat. arg. can. 3. dist. 51. & can. 1. dist. 54. Qua in re S. Gregorius M. morem gessit Mauritio imp. can. un. dist. 53. Militia quidem suapte natura irregularem non facit; uti manifeste apparet ex can. 15. dist. 63. At can. Apost. 82. Episcopus, Presbyter & Diaconus, qui utrumque officium, & Ecclesiasticum & militare, una retinere voluerit, deponi jubetur. Fieri etiam potest, ut miles irregularitatem ex defectu lenitatis contraxerit (de quo agetur L. V. tit. de homicid.), can. 1. dist. 51. qui sæva præcepta sunt executi (c).

(c) Conf. Benedicti XIV. Tom. II. Institutio 101.

§. 457. VI. *Conjugati defectu libertatis irregulares habentur, nisi uxor in ordinationem mariti consentiat, imo, ut nunc est, votum continentiae emittat, aut religionem ingrediatur.* c. 1. & tot. tit. de conversione conjugat. can. 6. dist. 77. — C. fin. de temp. ordinat. in 6. prohibetur Episcopus conjugato clericalem Tonsuram conferre, *nisi volenti religionem intrare, aut ad sacros Ordines promoveri.* Qui ante contractum matrimonium Tonsuram, vel Ordines minores receperunt, si 1. cum unicis, & virginibus contraxerunt: & 2. clericali habitu & Tonsura utantur: & 3. alicujus Ecclesiae servitio vel ministerio ab Episcopo deputati, eidem Ecclesiae serviant vel ministrent; gaudent privilegio clericali. c. un. de Clericis conjug. in 6. Trid. Sess. XXIII. c. 6. de ref. In Germania tales Clerici conjugati, non sunt.

§. 458. VII. *Sponsi, quamdiu reclamant sponsae, sine istarum injuria ordinari non possunt, nec solent.* Possunt ii, altera invita parte, religionem ingredi, ibique profiteri c. 2. & 7. de convers. conjug. quia validis etiam sponsalibus ex dispositione juris inest conditio: *Nisi religionem ingrediar;* sed hoc de Ordinibus dispositum non est; nec valet votum post sponsalia emissum, suscipiendi Ordines, etiam invita sponsa.

§. 459. VIII. *Religiosi, perinde ut de servis dicitur, non censentur habere proprium velle, & nolle; hinc sine licentia praelati ordinari non possunt.* c. 5. de temp. ordinat.

§. 460. IX. *Filiusfamilias, etsi decens sit, ut patris consensum ad Ordines requirat, tamen sine eo consensu simpliciter ordinari potest; quia ad spiritualia potestas patria non extenditur.* Solus iq-

men Clericatus, excepta dignitate Episcopali, a patria potestate non liberat. l. Sacrosanctæ 34. & Auth. seq. C. de Episc. & Cler. Hinc bona *ante Clericatum* acquisita, si castrensia aut quasi castrensia non sint, manent sub jure & administratione patris: acquisita post Clericatum ex speciali privilegio Clericis indulto censentur in numero quasi castrensium. cit. l. Sacrosanctæ & Auth. Presbyteros. eod.

TITULUS XIX.

DE OBLIGATIS AD RATIOCINIA ORDINANDIS,
VEL NON.

ARGUMENTUM.

I. Ordinari non debent, qui periclitantur de fama; II. aut infamia laborant.

§. 461. Ad statum externum & fortunæ bona etiam refertur is defectus libertatis vel liberationis, quem parit *obligatio ad ratiocinia*, sive ad rationes reddendas de administratione bonorum publicorum, vel publica auctoritate commissorum; quod usuvenit apud tutores pupillorum, curatores minorum, & similia. can. 2. dist. 51. can. 3. dist. 54. can. 1. seq. XXI. q. 3. c. un. h. t. Exceptio videtur statuenda in iis, quos recenset cit. can. 1. XXI. q. 3. ibi: *Nisi forte qui legibus ad minorum ætatum tutelas, sive procuraciones inexcusabiles attrahantur: aut cui ipsius civitatis Episcopus Ecclesiasticarum rerum commiserit gubernacula: vel orphanorum aut viduarum, quæ indefensæ sunt, aut earum personarum, quæ maxime Ecclesiastico indigent adminiculo propter timorem Dei.* Ratio autem de obligatis ad ratiocinia non ordinandis est, ne forte, si administratorum fides suspecta appareret, infamia redundet in Clericorum Ordinem,

nem, aut Clericus, qui reddere cogitur rationes, ad fora publica trahatur, culpæ, vel doli, ubi res postulat, pœnas daturus.

§. 462. Ad hunc locum de statu externo & fortunæ bonis referenda est *infamia*, quæ pariter irregularitatem inducit (§. 414.) & can. 5. dist. 51. Non quævis arrosio famæ pro infamia habenda est; sed I. quæ vere dicitur *infamia facti*, seu jactura existimationis orta ex delicto gravi notorio, cui vilipensio & detestatio proborum annexa est; ceu ex homicidio, perjurio in judicio, sodomia, simonia, aliove delicto notorio, quod meretur degradationem. arg. c. *ex tenore*. 4. de temp. ordinat. II. *Infamia juris* orta ex delicto, cui jura infamiam annectunt, judicialiter declarato; uti fit in crimine læsæ majestatis, prodicionis, adulterii, lenocinii, usuræ, duelli &c. Absque sententia condemnatoria rei, vel declaratoria criminis, infamia facti incurrì potest, non autem infamia juris (a).

(a) *Digestorum libri III. Titulus 2. inscribitur: De his, qui notantur infamia. In Codice de iisdem agitur l. 2. tit. 12. & l. 10. tit. 57. Regula 87. juris nostri in 6. generatim ait: Infamibus portæ non pateant dignitatum.*

TITULUS XX.

DE CORPORE VITIATIS ORDINANDIS,
VEL NON.

ARGUMENTUM.

I. Irregularitatem inducit defectus quorundam naturalium bonorum animi, & corporis. II. Distingui tamen oportet inter defectus antecedentes, & consequentes §. 467.

§. 463. Præter defectus bonorum fortunæ atque externi status, de quibus actum est titulis præ-

cedentibus tribus, ab Ordinibus arcet defectus quidam *naturalium bonorum animi vel corporis*; qui apte congeruntur uno hoc loco. Ac I. naturalibus animi bonis, ad statum clericalem necessariis, carent, qui sanæ mentis impotes sunt, aut aliquando fiunt, ceu lunatici, dæmoniâci, furiosi, can. 2. seqq. dist. 33. II. Illiterati, qui scientia carent ad Ordines requisita. can. 1. dist. 36. c. 10. §. 4. de renunt. c. fin. de ætat. & qual. Præf.

§. 464. *Bona naturalia corporis* sunt I. ejus integritas, cui opponitur mutilatio & amissio membri, non cujusvis partis. Casus occurrunt c. 1. h. t. de amissa parte digiti. c. 2. de clerico ægotante. de abscissione duorum digitorum cum medietate palmæ. c. 6. h. t. de eo, qui altera manu caret. c. 7. de eo, qui caret ungula pollicis. can. 13. dist. 55. irregularis censetur, qui oculum, etsi invitus, omisit. Spectari in his debet *prima*, utrum deficiat pars corporis ad usum Ordinis suscepti vel suscipiendi necessaria, ceu digitus ad hostiam frangendam. *Secundo* utrum, etsi talis pars non deficiat, ex defectu membri vel partis non oriatur deformitas, de qua mox dicam (a).

(a) *Siquis ipse sibi vim inferat, abscindendo partem corporis, etsi defectus sit occultus, nec deformitatem creet, nec impedit a ministeriis, irregularis fit ex defectu lenitatis; ac talis sui ipsius homicida dicitur* can. 4. 5. & 6. dist. 35. *At ibi can. 7. 8. 9. admittuntur ad Ordines, qui a medicis, barbaris, vel dominis sic abscissi sunt; quod idem indicatur* c. 3. 4. 5. h. t. *Excepto igitur casu propriæ abscissionis, videtur occultum vitium, quod neque usum sacrorum officiorum impedit, neque horrorem & aversionem ingenerat, non reddere quemquam irregularem.* Arg. c. 3. h. t.

§. 465. II. *Non vitiosa corporis structura, cui opponitur deformitas, quæ horrorem, vel risum*
ciet;

ciet; quod fit de pygmæis, valde gibbosis, enormiter claudicantibus, mutilatis in auribus, oculos nimis distortos habentibus; casus extant c. 2. h. t. de macula in oculo. c. 3. & 4. de Cleric. ægrot. circa leprosos *propter scandalum & abominationem populi.*

§. 466. III. *Valetudo*, cui opponitur debilitas membrorum: hinc excluduntur paralytici, & morbo caduco laborantes. can. 1. & 2. VII. q. 2. Huc referri possunt ii, qui prorsus abstemii sunt a potu vini; ac propterea ordinari non possunt. gloss. in can. 38. v. *nec esse.* II. q. 7. Ad defectus naturales sine dubio pertinet ætatis defectus ad Ordines requisitæ.

§. 467. In defectibus hisce, qui lapsu temporis, curatione, industria ægre tolluntur; distinguere oportet inter eos, qui *antecedunt* Ordines, & qui *superveniunt.* Antecedentes excludunt etiam a Tonsura, & Ordinibus minoribus, qui hac præsertim ætate non aliter spectantur, nisi tanquam via & præparatio ad Ordines majores. can. dist. 1. 39. & can. 59. dist. 50. In defectu superveniente considerari debet, utrum & quatenus Clericum reddat impotentem ad obeunda sacra munera. c. 10. §. 3. de renunt. Idcirco irregularitas superveniens hoc præsertim in genere alia est *totalis*, alia *partialis.* c. 2. de Cleric. ægrot. Ratio fundamentalis canonum huc pertinentium est sanctitas sacri ministerii, quæ omnem decorem poscit, atque ad populum ædificandum, non turbandum aut averendum informanda est. SS. Canones ad præcepta etiam legalia in hac causa provocant. Levit. XX. 17. seq. & ibid. XXII. 19. seq. Si de magnitudine vel levitate defectus disceptatur, ea est quæstio *facti* potius, quam *juris*, & ab Episcopo decidi debet. c. 2. h. t. can. 2. VII. q. 2.

TITULUS XXI.

DE BIGAMIS NON ORDINANDIS.

ARGUMENTUM;

I. *Defectu quodam bonorum supernaturalium ab Ordinibus arcentur bigami.* §. 468. II. *Clinici, & Neophyti.* §. 472.

§. 468. Postquam matrimonium Christianorum ad significandam conjunctionem Christi cum Ecclesia, & dignitatem Sacramenti elevatum est (Ephes. V. 32. Trid. Sess. XXIV. can. 1. de Sacr. Matr.); hæc significatio Sacramenti in maritali conjunctione maris & feminae tunc maxime, proprieque habetur, si sit uxor *unica unici & unus unius.* c. 5. h. t. Maritos plurium, aut viduarum, seu ab aliis cognitarum ob defectum Sacramenti canones excludunt ab Ordinibus præeunte Apostolo I. Timoth. III. 2. I. Tit. 6. Spectatur autem in hoc genere non tam valor matrimoniorum, quam affectus maritalis, seu *affectus intentionis cum opere subsequuto.* c. 4. h. t.

§. 469. Ex his deducitur irregularitas I. *ex bigamia vera*; si quis cum pluribus successive consummat matrimonium; etsi id infidelis ante Baptismum fecisset; qua de re SS. Augustinus & Hieronymus disceptarunt. can. 1. & 2. dist. 26. prævaluit sententia S. Augustini, id affirmantis, eaque ab Innocentio I. probata fuit. can. 3. ead.

§. 470. II. Irregularitas *ex bigamia interpretativa*, quæ ex interpretatione, & dispositione juris provenit; si quis ducit viduam ab alio cognitam, aut consummat matrimonium cum ea, quæ ab alio corrupta est. c. 3. & 5. h. t. can. 9. seq. dist. 34. Id non videtur extendendum ad eam, quæ ab alio vi oppressa est. Arg. can. 1. seqq. XXXII. q. 5. Speciale est

est in utroque hoc genere irregularitatis, quod ea affecti nudentur omni privilegio clericali, adstringantur foro seculari, & sub anathemate prohibeantur deferre Tonsuram, vel habitum clericalem. c. un. h. t. in 6.

§. 471. III. Irregularitas ex *bigamia similitudinaria*, siqui post solemne castitatis votum, aut sacros Ordines matrimonium contrahere attentant. c. 4. & fin. h. t. & arg. can. 24. XXVII. q. 1. Hi autem post longam penitentiam, & vitam laudabilem continentes, officio suo restitui poterunt, & ex indulgentia sui Episcopi ejus executionem habere. c. 4. de Clericis conjug. (a).

(a) Qui plures simul habere uxores attentat contra jus divinum, & cum iis matrimonium consummat, siue dubio, bigamus fit. Ceterum bigamia differt a polygamia, ac multo etiam magis a concubinato, & commercio meretricio; id enim ex causa infamiae, non bigamiae irregularitatem efficere potest. c. 6. h. t. Nec irregularis fit, qui duas quidem ducit uxores, sed cum una tantum carnaliter conjungitur: aut ducit viduam, nec a priore marito, nec ab alio cognitam.

§. 472. Ex defectu quodam bonorum spiritualium præter bigamos censentur etiam irregulares. I. Clinici, qui, cum ægroti lecto decumbebant, baptizati sunt. can. un. dist. 57. ubi de tali dicitur: *Non enim fides illius voluntaria, sed ex necessitate est.* II. Neophyti, seu recens baptizati. I. Timoth. III. 6. & can. 1. dist. 48. ne nimirum in superbiam incidant, & laqueum diaboli. Hoc exemplo ad majora Ecclesiae officia non admittuntur, qui ex laicis in Clerum recenter admissi sunt. can. 2. dist. 48. can. 1. seq. dist. 61. III. Defectu lenitatis laborantes; de quo agitur ad tit. de homicidio.

TITULUS XXII.

DE CLERICIS PEREGRINIS.

ARGUMENTUM.

I. De literis Canoniciis, seu formatis, testimonialibus &c.
 §. 473. Hodierna disciplina circa clericos peregrinos.

§. 473. Uti irregularitas superveniens ab usu quodam Ordinum jam susceptorum arcet; sic clerici vagi, ignoti, peregre advenientes, de quorum Ordinatione, aut facultate ministrandi vel celebrandi non satis constat, non sinuntur exercere Ordines, quos suscepisse se affirmant, nec ad ultiores promoventur. Antiquissimi usus sunt literæ *formatæ*, *communicatoriæ*, seu *pacificæ*, quæ olim non clericis tantum, sed aliis quoque fidelibus alio discessuris in signum catholicæ communionis dabantur. *Formatæ* dictæ sunt hæ epistolæ ex certa forma, quæ exarata erant; ex hodierno usu *formatæ* dicuntur, quæ testimonium acceptorum Ordinum continent: *testimoniales* censentur, quatenus etiam hoc addunt, ordinatum nullo Canonico impedimento Ordines exercendi affici: *commendatitiæ*, quatenus significant, quo loco officiove sit, qui eas exhibet, quamque omnibus, ad quos pervenerit, sit commendandus. *Dimissoriæ* sunt, quas Episcopus suis subditis dat, ut ab alieno Episcopo ordinentur, vel etiam, ut liber a beneficio, quod obtinebat, alibi intitulari, ac servire possit (a).

(a) Concil. Laodicensem Seculi IV. can. 41. ait: *Non oportet ministrum, vel etiam laicum sine Canoniciis literis, id est, formatæ, aliquo proficisci.* Concil. Chacedonense Can. 11. *distinguit inter literas pacificas, & commendatitias; eo quod Episcopales commendatitiæ honestis præstari soleant personis.*

§. 474. Olim clerici transmarini, ceu ex Africa venientes, & in remotis regionibus ordinati, in aliis occidentis partibus ministrare non permittebantur, nisi Ordinationem suam, etiam quoad inferiores Ordines per sigilla quinque Episcoporum probassent; ac tum etiam de eorum vita & moribus, & num gradatim accepissent Ordines, inquisitio facta est. c. 1. h. t. can. 2. & 3. dist. 98. Nunc observatur dispositio Concil. Trid. Sess. XXII. in Decret. de observand. in Cel. Missæ: *Ut irreverentia evitetur, singuli in suis diœcesibus interdican, ne cui vago, & ignoto sacerdoti Missas celebrare liceat; & Sess. XXIII. c. 16. de ref. Nullus clericus peregrinus sine commendatitiis sui Ordinarii literis ab ullo Episcopo ad divina celebranda, & Sacramenta administranda admittatur.* conf. can. 7. dist. 71.

§. 475. Hæ Ordinarii literæ commendatitiæ non debent pro forma probatoria haberi; quasi earum vis aliunde suppleri non posset. Nam c. 3. h. t. sic habet: *Respondemus, quod nisi legitime tibi constiterit sive per literas, sive per testes, de illorum Ordinatione canonica, qui penitus sunt ignoti, non debes ipsos permittere in tuis plebibus celebrare; sed si forsan eorum aliqui secreto ex devotione celebrare voluerint, poteris sustinere.* Solum tamen juramentum clerici de sua Ordinatione non sufficit, c. 2. h. t.

TITULUS XXII.

DE CLERICIS PEREGRINIS.

ARGUMENTUM.

I. De literis Canonicis, seu formatis, testimonialibus &c.
§. 473. Hodierna disciplina circa clericos peregrinos.

§. 473. Uti irregularitas superveniens ab usu quodam Ordinum jam susceptorum arcet; sic clerici vagi, ignoti, peregre advenientes, de quorum Ordinatione, aut facultate ministrandi vel celebrandi non satis constat, non sinuntur exercere Ordines, quos suscepisse se affirmant, nec ad ultiores promoventur. Antiquissimi usus sunt literæ formatæ, communicatoriæ, seu pacifiæ, quæ olim non clericis tantum, sed aliis quoque fidelibus alio discessuris in signum catholicæ communionis dabantur. *Formatæ* dictæ sunt hæ epistolæ ex certa forma, qua exarata erant; ex hodierno usu formatæ dicuntur, quæ testimonium acceptorum Ordinum continent: *testimoniales* censentur, quatenus etiam hoc addunt, ordinatum nullo Canonico impedimento Ordines exercendi affici: *commendatitiæ*, quatenus significant, quo loco officiove sit, qui eas exhibet, quæque omnibus, ad quos pervenerit, sit commendandus. *Dimissoriæ* sunt, quas Episcopus suis subditis dat, ut ab alieno Episcopo ordinentur, vel etiam, ut liber a beneficio, quod obtinebat, alibi intulari, ac servire possit (a).

(a) Concil. Laodicenum Seculi IV. can. 41. ait: Non oportet ministrum, vel etiam laicum sine Canonicis literis, id est, formatæ, aliquo proficisci. Concil. Chalcedonense Can. II. distinguit inter literas pacificas, & commendatitias; eo quod Episcopales commendatitiæ honestis præstari soleant personis.

§. 474.

§. 474. Olim clerici transmarini, ceu ex Africa venientes, & in remotis regionibus ordinati, in aliis occidentis partibus ministrare non permittebantur, nisi Ordinationem suam, etiam quoad inferiores Ordines per sigilla quinque Episcoporum probassent; ac tum etiam de eorum vita & moribus, & num gradatim accepissent Ordines, inquisitio facta est. c. 1. h. t. can. 2. & 3. dist. 98. Nunc observatur dispositio Concil. Trid. Sess. XXII. in Decret. de observand. in Cel. Missæ: *Ut irreverentia evitetur, singuli in suis diœcesibus interdican, ne cui vago, & ignoto sacerdoti Missas celebrare liceat; & Sess. XXIII. c. 16. de ref. Nullus clericus peregrinus sine commendatitiis sui Ordinarii literis ab ullo Episcopo, ad divina celebranda, & Sacramenta administranda admittatur.* conf. can. 7. dist. 71.

§. 475. Hæ Ordinarii literæ commendatitiæ non debent pro forma probatoria haberi; quasi earum vis aliunde suppleri non posset. Nam c. 3. h. t. sic habet: *Respondemus, quod nisi legitime tibi constiterit sive per literas, sive per testes, de illorum Ordinatione canonica, qui peritus sunt ignoti, non debes ipsos permittere in tuis plebibus celebrare; sed si forsitan eorum aliqui secreto ex devotione celebrare voluerint, poteris sustinere.* Solum tamen juramentum clerici de sua Ordinatione non sufficit, c. 2. h. t.

TITULUS XXIII.

DE OFFICIO ARCHIDIACONI.

TITULUS XIV.

DE OFFICIO ARCHIPRESBYTERI.

TITULUS XXV.

DE OFFICIO PRIMICERII.

TITULUS XXVI.

DE OFFICIO SACRISTÆ.

TITULUS XXVII.

DE OFFICIO CUSTODIS.

TITULUS XXVIII.

DE OFFICIO VICARII.

ARGUMENTUM.

I. Potestas jurisdictionis Episcoporum: adjutores eorundem in ea exercenda. §. 476. II. Archidiaconus. §. 479. III. Archipresbyter. §. 480. IV. Primicerius §. 481. V. Sacrista & Custos. §. 482. VI. Vicarii Episcoporum. §. 484.

§. 476. Post Hierarchiam Ordinis, de qua actum est titulis præcedentibus, sequitur deinceps *Hierarchia Jurisdictionis*. I. Vox *jurisdictio* non sensu stricto secundum jus civile Romanum hic sumitur, sed pro potestate regendi, præcipiendi, visitandi seu inspiciendi, causas cognoscendi, reos coercendi &c.
II. Hi

II. Hi actus distinguuntur ab actibus Ordinis, qui ad Sacrificium, ad administranda Sacramenta, ad consecrationem aut benedictionem personarum, ac rerum pertinent. Non modica inter potestatem Ordinis & jurisdictionis est differentia. Potestas Ordinis in omnibus eodem Ordine insignitis æqualis est: non item potestas jurisdictionis. Potestas, certo Ordini annexa, regulariter mandari non potest illo Ordine non insignitis: at potestas jurisdictionis potest mandari, seu delegari: potestas Ordinis acquiri non potest vi consuetudinis, præscriptionis, statuti, conventionis; aliter est de potestate jurisdictionis: in Capitula cathedralia Sede vacante transit potestas jurisdictionis, non item potestas Ordinis. III. Hierarchia jurisdictionis spectatur *primo* in diocesium, in quibus omnes regulariter Episcopo subsunt, etiam ii, qui vel ejus ordinatione, vel dispositione juris partem regiminis Episcopalis sustinent. *Secundo* in provinciis, regnis, districtibus Patriarchalibus; quatenus Episcopi Metropolitani, hi Primatibus vel Patriarchis subiecti sunt certis casibus. *Tertio* in Universa Ecclesia, in qua omnes inferiores pastores cum gregibus immediate subjacent uni Summo Vicario Christi, ac Successori Sancti Petri, Romano Pontifici.

§. 477. Ut recta unitatis cum uno Capite, ac Vicario Christi conservandæ, & regiminis Ecclesiastici per omnem orbem diffusæ ratio constaret, necessaria fuit, aucto fidelium numero, divisio diocesium, provinciarum, regnorum aut majorum etiam districtuum. Oves singularum diocesium Episcopo diocesano & pascendæ & regendæ commissæ sunt. At dignitas Episcopalis non patiebatur, ut in locis ignobilibus & pagis collocarentur Episcopi: nec in
una

una civitate, nisi unus esse poterat: imo enormis Episcoporum numerus publico Ecclesiae regimini & synodorum congregationi maximo obstaculo futurus erat; hinc ne pascendis & regendis ovibus pastores deessent, divinitus provisum est per institutum clerus inferiorum, qui a suo Episcopo penderet tum in pastoralis cura, tum in parte regiminis sibi commissi exercenda. Hæc primo peragebantur jussu, missuque Episcopi: tractu autem temporis in perpetuos titulos, & irrevocabilia beneficia, dignitates, officia, personatus evaserunt, quibus jus commune assistit.

§. 478. Potestas publica & rectoria Episcoporum a Deo concessa penes Episcopum est; at habet tum ex dispositione canonum, tum sua ordinatione adjutores regiminis. His tribuitur dignitas, aut personatus, aut officium; *dignitas* sita est in quadam præeminentia cum jurisdictione in foro externo, ceu in Archidiaconis & Decanis capitularibus. *Officii* nomine intelligitur munus vel administratio sine præeminentia & jurisdictione, ceu in pœnitentiaro, Theologo Ecclesiae cathedralis. *Personatus* denotant prærogativam sine jurisdictione, & administratione; qualem obtinent Seniores & Jubilæi. Hæc autem vel referuntur ad Ecclesiam cathedralem, aut collegiatam, ejusque clerus tantum; uti fit in Decano Capituli, in Castode, vel Sacrista, in Cellario: vel ad totam diœcesin, ejusque certum districtum, ceu in Archidiaconis, Decanis ruralibus, Vicariis generalibus, aut foraneis, in Officialibus. Varia autem dignitatum atque Officiorum distributio est, ac totum prope ad particulares diœcesum consuetudines & institutiones devolvitur, approbante easdem ipso jure communi. c. fm. in parte decis. de off. archidiacon.

diac. c. 6. de constit. & c. 6. de consuet. ubi Pontifex præcipit, ut in attribuendis novæ dignitati officiis servetur consuetudo vicinarum civitatum. Quemadmodum vero invasio alieni juris per se prohibita, ac turpis est ob ignorantiam, aut temeritatis, atque ambitionis notam; ita quivis, qui dignitate, aut officio potitur, limites ejusdem diligenter explorare, ac nosse debet. Dein valde odiosum est in Jure sacro, si unus occupat officia plurimum. can. Singula. 1. dist. 89. (a).

(a) *Si verba canonis authentica non sint, at mens & sententia congruit cum iis, quæ a Paulo Diacono l. 2. c. 54. de S. Gregorio M. scripta sunt. Accedit in eandem sententiam auctoritas S. Augustini conc. 2. in psalmi 32. verba: Qui finxit singulatim corda eorum. prope fin.*

§. 479. *Archidiaconi* (nam præmissis generalibus principiis, de his primo agendum est ex jure Decretalium) considerantur I. ut Principes Diaconorum; & sic imperant Subdiaconis & Diaconis c. 7. §. 1. h. t. II. Ut *Vicarii Episcopi in omnibus.* c. 1. h. t. per ipsos enim cura pastoralis sollicitudinis debet relevari. c. 7. hinc dicuntur oculi *Episcopi* can. 6. & 11. dist. 93. Ad ipsos jure Decretalium pertinet visitatio diœceseos; quæ fieri debet de tertio in tertium annum. c. 1. Omnem curam habent clericorum tam in urbe, quam per paræcias habitantium; ac delinquentium rationem coram Deo reddere tenentur. c. 1. & c. 7. §. 3. Examinant promovendos ad Ordines & ad beneficia c. 7. §. 1 & 5. Invigilant de honore & restauratione Ecclesiarum, & custodia vasorum c. 3. Censentur majorem dignitatem post Episcopum c. 7. §. 3. ac sunt vicarii, non ad nutum amovibiles, sed dati a jure, qui jurisdictionem habent dignitati suæ annexam, & inferiorem quidem, at tamen distinctam

etiam a jurisdictione Episcopi, ita, ut ab ipsis ad Episcopum appelletur c. 3. §. 1. de appellat. in 6. ac Episcopus non possit obsequia ipsis ab Ecclesiis debita imminuere. c. 2. de excess. Præl. (b). Eodem tamen jure communi limitatur ipsorum potestas, 1. de promovendis ad Ecclesias parochiales cura examinis non jam pertinet ad solum Archidiaconum, si eæ conferuntur per concursum. Trid. Sess. XXIV. c. 18. de ref. 2. Archidiaconi non possunt dare dimissiones c. 8. h. t. nec institutionem autorizabilem. c. 4. sed corporalem tantum c. 7. §. 1. etiam quoad abbates & abbatissas c. 9. 3. De visitatione Archidiaconorum memorabilis est dispositio Concil. Trid. Sess. XXIV. c. 12. de ref. v. *Archidiaconi vero*. 4. Per se non habent jus visitandi regulares & corrigendi eorum excessus. c. ult. h. t. 5. Non habent jus subiectos ligandi censuris. c. 5. h. t. Ex quo explicari debet c. 7. de præb. & c. 3. de pœnis. 6. Causas matrimoniales & criminales Concilium Trid. reservavit Episcopis Sess. XXIV. c. 20. de ref. ac specialiter disposuit de causa concubinitus Sess. XXV. c. 12. de ref. Posteriore ævo Episcopi ex variis causis curam postoralem ad se ipsos, & Vicarios suos amovibiles revocarunt; proinde valde imminuta, aut certo districtu diœceseos restricta, aut penitus extincta auctoritate Archidiaconorum.

(b) *Conf. can. 1. §. 10. & 11. dist. 25. & can. 20. dist. 63.*

§. 480. *Archipresbyteri*, quasi primi Presbyterorum sunt, quibus imperant in iis, quæ sunt officii presbyteralis circa cantandas Missas, dandas benedictiones, administranda Sacramenta c. 1. & seqq. de offic. Archipresb. Vocantur etiam *Decani*. c. 7. §. 2. de off. Archidiac. In his alius dicitur Decanus
civi-

civitatenfis, qualis in Germania locis pluribus est Decanus Ecclesiæ cathedralis, qui majore etiam, quam veteres Archipresbyteri, auctoritate splendet. Alii sunt *rurales* per minores diœceseos regimulas dispositi, qui jurisdictione vera & ordinaria non pollent; ab Episcopo tamen necessario per plebes, sive certos districtus collocandi sunt (c. fin. h. t.), ab adscriptis sibi Presbyteris jure communi eligendi, vel amovendi. c. 7. §. 6. de off. Archidiacon.

§. 481. *Primicerius* dicitur, qui in aliquo ordine primum locum obtinet, e. g. inter notarios, equites, monachos (c), vel uti hoc loco, inter Psallentes in choro, vel Clericos in Schola. c. un. h. t. & can. 1. §. 13. dist. 25. Ejus officium hodie videtur competere illis, qui *Scholastici* vel *Cantores* nominantur, maxime in Ecclesiis cathedralibus.

(c) *Vicariatus* in vocabulario Juris hoc verbo. C. 8. de const. *Primiceriatus* primo dicitur personatus, dein dignitas, postea officium.

§. 482. Ad *Sacristæ* curam pertinet custodia sacrorum vasorum, vestimentorum Ecclesiasticorum, seu totius thesauri Ecclesiastici, nec non, quæ ad luminaria pertinent sive in cera, sive in Oleo. c. un. h. t. Unde etiam *Cimeliarchæ*, & *Thesaurarii* nomen habet, ac dignitatem obtinere censetur jure Decretalium; ob quam causam eidem cognitio causarum & alia negotia a Summis Pontificibus delegata fuerunt c. 32. de offic. deleg. c. 11. de for. comp. c. 18. de convers. conjug.

§. 483. *Custos* jure Decretalium est Subordinatus Sacristæ, & deputatus ad custodiendas res Ecclesiasticas levioris momenti, ut sunt linteamina &c. ad pul-

Zallinger L. I. Decretal. Y sancta

sanda tintinnabula, accendendas lampades. Ad cultum divinum in Ecclesiis rite peragendum proxime invigilabant Archidiaconus, Archipresbyter & Custos; unde c. 2. de off. Cust. dicitur: *In his tribus columnis consistere debet alma mater Ecclesia.* — *Hi tres simul juncti uno animo provide peragant, & perfecte; & non sit invidia, neque zelus inter illos (d).*

(d) *Ex consuetudine Ecclesiarum Germanicæ Custodi, qui in Ecclesiis cathedralibus summus Custos dicitur, incumbit suprema cura custodiendi pretiosa vasa, vestimenta, & reliquum thesaurum Ecclesiæ; ei tamen subordinati sunt Clerici alii sub-custodes, & laici, quos cedituos, aut sacristas dicimus.*

§. 484. *Vicariorum* varia occurrunt genera in Jure; plura etiam consuetudine fuerunt introducta. Gregorius IX. tit. de officio Vicarii agit de Vicariis in divinis, seu Vicariis Parochorum temporalibus & maxime perpetuis; de quibus ad titulum de præb. quando unio earum. Vicariarum cum aliis dignitatibus, cum collegiis, capitulis, monasteriis explicatur, tractari solet. Bonifacius IX. demum lib. 6. Decret. titulo de officio Vicarii eum intelligit Vicarium, quem *generalem*, aut *Vicarium Episcopi in spiritualibus* hodie nuncupamus. Ex quo inferunt, hanc dignitatem, quæ tempore Gregorii IX. penes Archidiaconos erat, circa medium Sæculi XIII. & postea, imminuta vel extincta istorum potestate, ad Vicarios ab Episcopo constitutos transiisse. Occasionem forte præbuit Concilium Lateranense IV. ante Gregorium IX. habitum, sed quoad certa capita de constituendis ab Episcopo Vicariis paulatim in usum frequentiore deductum. conf. ex eo Concilio c. quoniam 14. & quod mox sequitur, c. 15. de officio Jud. ord. (e).

(e) *Thomassin. P. I. lib. II. c. 8.*

§. 485. Episcopus Vicarios habere potest ex causis pluribus. I. In *temporalibus* circa regimen status politici. II. In *Pontificalibus*, qui nominantur *Suffraganei Episcoporum*, per quos is in Pontificalibus peragendis, ceu in collatione Ordinum, administrando Sacramento Confirmationis, in benedictione Abbatum, templorum consecratione &c. sublevetur. Hi ordinari hodie solent ad titulum Ecclesiæ alicujus ab infidelibus occupatæ, vel a schismaticis usurpatæ; qui mos ex eo tempore invaluit, ex quo Latini varias Orientis provincias infidelibus eripuerunt. Tum enim ex Latinis constituti sunt Patriarchæ & Episcopi, ubi Ecclesiæ, aut præfules non habuerunt omnino, aut ingens Latinorum numerus novam quasi Ecclesiam constituebat, quæ regi non poterat per Episcopum Græcum, semper in ritu & disciplina, sæpe etiam in fide & doctrina dissentientem. Latinis inde pulsus, spe illas terras recuperandi, obeuntium Episcoporum successores nominabantur, majore certe jure, quam quo Græci idem faciebant quoad Patriarchas vel Episcopos urbium ab infidelibus occupatarum. Hinc factum, ut Patriarchatum & Episcopatum titulum sæpe gererent duo, Latinus unus, alter Græcus (f). Id cum repugnaret Canonibus, remedium paravit Concilium Florentinum; sed Græci promissis non steterunt. Multi etiam Regulares monasticæ vitæ Episcopatum in partibus infidelium quærebant, vel occupabant; contra quos providit Concilium Viennense. Clem. 5. de elect. & Tridentinum Sess. XIV. c. 2. de ref. Introductum ergo est, ut nullus in Episcopum titulare ordinaretur, nisi auctoritate Romani Pontificis: qui sic ordinare non solet, nisi illos, qui alium quendam Episcopatum, vel saltem aliquam administrationem obtinent, ex cujus redditibus digne sustentari queant

ant (g). *III. In Spiritualibus; de quibus deinceps agendum est.*

(f) *Wilhelmus Tyrius in Historia belli sacri passim. De Ordinatione Latinorum in partibus Orientis agit Paschalis II. in ep. 18. 19. 20. 28. 29. Concil. edit. Mansi T. XX.*

(g) *Originem Episcoporum titularium Thomassinus P. I. l. I. c. 28. derivat a Chorepiscopis, de quibus mentionem faciunt antiquissimi canones synodorum Ancyranæ, Antiochenæ, Neocæsariensis, quæ habitæ sunt seculo IV. quo Chorepiscopi jam invaluerant, ducto nomine a græca voce, quæ vicum significat; eo quod illi ruri & in vicis pastoralem curam Episcoporum arbitrio, ac nomine obirent. Per se ac lege ordinaria eos fuisse simplices Presbyteros constat; aliquos tamen charactere Episcopali fuisse insignitos, vix dubitari potest; de quo Eruditi fuscè disputant. Ob potestatis abusum sæpe coerciti, demum penitus abrogati sunt. In Capitularibus ab Ansegiso collectis lib. 6. cap. 119. sic habetur: „Placuit, ne Chorepiscopi a quibusdam fiant; quoniam hæcenus a nescientibus sanctorum Patrum, & maxime Apostolorum decreta, suisque quietibus & delectationibus inservientibus facti sunt. Idcirco & olim persæpe, & nostro a sancta Apostolica Sede tempore sunt prohibiti, & ne deinceps a quoquam tam ordinante, quam ordinari cupiente talis præsumptio assumatur, a cunctis nostri regni Episcopis est in Synodo canonice prohibitum.“*

§. 486. *Vicarii Episcoporum in spiritualibus primis jam Ecclesiæ seculis reperiuntur. Certe Gregorius Nazianzenus patri suo Gregorio in Nazianzeno, Basilii Eusebio in Cæsariensi, Chrysostomus Flaviano in Antiocheno, Simplicianus Ambrosio in Mediolanensi, Augustinus Valerio in Hipponensi Episcopatu operam vicariam præstitit. Natura hujus dignitatis est hæc: I. Vicariatus generalis non est beneficium, sed munus, cui adjunctus est honor cum juris-*

jurisdictione. II. Jurisdictio ista exercetur in eodem cum Episcopo tribunali, ita, ut non detur appellatio a Vicario generali ad Episcopum, ne ab eodem ad eundem appelletur. c. 2. de consuet. in 6. & c. 3. pr. de appellat. in 6. III. Vicarius ab Episcopo eligitur, & omnem ab eo accipit jurisdictionem: potest Episcopus unum eligere, vel plures in solidum, vel pro certo districtu, aut ad certas causas. Vicarii quidem & Officialis nomina sine discrimine adhibentur a S. Concilio Tridentino (Sess. XXIV. c. 16. de ref.), & ex stilo Romanæ Curiae; passim tamen in his partibus fit, ut *Officialis* dicatur, qui causas matrimoniales & decimales mandato Episcopi cognoscit: at *Vicarius generalis*, qui alias jurisdictionis Episcopalis partes obit: *Vicarius* autem *Foraneus*, cujus jurisdictio ad certum districtum limitatur. IV. Uti Episcopus suo arbitrio eligit Vicarios; ita electos suo arbitrio removet, aut nullum omnino eligit; si ipse fungi munere sine ope aliena potest. V. Jurisdictio Vicarii est *generalis*, id est, Vicarius vi officii, aut mandati generalis, per *commissionem officii generaliter sibi factam* (c. 2. h. t. in 6.) potest expedire omnia, quæ potest Episcopus, ut *Episcopus & quoad Jurisdictionem*; quo non obstante excipiuntur ea, quæ speciale mandatum requirunt (uti mox dicam), *cum in generali concessione nequaquam illa veniant, quæ non esset quis verisimiliter in specie concessurus.* c. fin. h. t. in 6. V. Exspirat jurisdictio Vicarii tum ejus morte, spontanea dimissione, revocatione ab Episcopo facta, eique intimata: tum cessante munere Episcopali per obitum Episcopi, aliave ratione, ita, ut re etiam non integra in negotiis jam cæptis jurisdictio Vicarii cesset. Si Episcopus est excommunicatus, suspensus vel interdictus, & sic jurisdictione carens; impeditur

tur etiam exercitium Jurisdictionis in Vicario; quamvis eadem polleat habitualiter, ut Episcopo Jurisdictionem recuperante non indigeat nova concessione officii (h).

(h) *His probe expensis non videtur usum habere quaestio de Jurisdictione Vicarii generalis, ordinaria, an delegata debeat appellari. Dicunt: Delegata non est; quia nunquam delegata vocatur in Jure: quia Vicarius generalis potest causas quasdam alteri delegare; id quod delegatus per se non potest: quia, posteaquam constitutus est, jure suo, & vi officii a jure approbati exercet ea, quæ sunt Jurisdictionis Episcopalis: imo addant per me etiam hoc, quod sit eadem Vicarii Jurisdictio, ac Episcopi; quæ certe ordinaria est, non delegata. Participat tamen Vicarii jurisdictio de delegata in his, quia tota pendet a nutu & arbitrio Episcopi, qui suo libitu constituit, & removet, & majore vel minore potestate donat Vicarium: quia Episcopo mortuo vel Sede moto omnem Vicarius amittit Jurisdictionem.*

§. 487. A generali Vicariorum istiusmodi potestate eximuntur ea, quæ Episcopo non vi Jurisdictionis, sed Ordinis Episcopalis competunt: aut non jurisdictionis ordinariæ, sed specialiter concessæ tanquam Delegato Sedis Apostolicæ, aut aliunde devolutæ: quæ ob rei gravitatem arbitrio viri prudentis reservantur ipsi Episcopo. Talia sunt, causas criminales graviores cognoscere, visitare diæcesin, pensionibus onerare Clericos, alienare res Ecclesiæ, ultimas voluntates exequi, procedere contra Canonicos (i). Habet potestas Vicarii Analogiam cum administratore bonorum alienorum; qui ad res graviores mandato speciali eget, & bona Domini administrare, non alienare, statum priorem conservare, non immutare potest. Hinc ad Vicarium generalem non pertinet concessio dimissoriarum, actus liberalis gratiæ, dispensationes in impedimentis matrimonii, etiam

etiam cum Episcopus ex concessione Pontificia dispensare potest, collatio beneficiorum ad liberam Episcopi dispositionem pertinentium. c. fin. h. t. in 6. Et quia statum Dioceseos immutare non potest, ad Vicarium generalem non pertinet beneficia erigere in vicarias perpetuas, eadem unire, dividere, suppressere, juri patronatus subicere, transferre, novas parochias erigere. Præterea speciali deputatione opus habet Vicarius, ut dispense in irregularitatibus & suspensionibus, ex delicto occulto provenientibus, cum Episcopus sic dispensare, aut a casibus occultis Sedi Apostolicæ reservatis absolvere potest per Concil. Trid. Sess. XXIV. c. 6. de ref. quando auctoritatem impertitur exemplaribus, ut eadem in foro vim habeant, ac Archetypa. c. fin. de fide instrument.

(i) *Hisc negotiis gravioribus annumerari confessionem processum in causa Beatificationis, vel Canonizationis, docet Benedictus XIV. de Servorum Dei Beatif. lib. 2. c. 2. n. 9.*

§. 488. Ex his facile intelligitur, cur Jus nostrum ad munus Vicarii Episcopalis requirat 1. Clericum, can. 22. XVI. q. 7. 2. Qui jam vigesimum quintum ætatis annum attigerit, & scientia ac moribus commendandus sit. arg. c. 7. §. 2. de Elect. nempe in Theologia aut Jure Canonico doctorem, vel Licentiatum, aut alias idoneum. Concil. Trid. Sess. XXIV. c. 16. de ref.

TITULUS XXIX.

DE OFFICIO, ET POTESTATE JUDICIS
DELEGATI.

ARGUMENTUM.

- I. *Variae delegationum species* §. 489. II. *Quis possit delegare, quis delegari, in qua causa.* §. 490. *seq.*
 III. *Ufus Jurisdictionis delegatæ* §. 493. IV. *Executio sententiæ a Delegato latæ* §. 494. *Explicatur c. 28. h. t.* V. *Quomodo expiaret officium & potestas Delegati.* §. 498.

§. 489. *Judex delegatus* dicitur, qui non ex proprio officio, sed ex commissione vel ipsius juris, vel alterius hominis, propriam & ordinariam Jurisdictionem habentis, immediate vel mediate facta, adeoque alterius vice & auctoritate Jurisdictionem exercet. Sunt ergo alii *delegati a Jure*, ceu Episcopi in quibusdam casibus Apostolicæ Sedi alias reservatis, & omnes Sacerdotes ad absolvendos pœnitentes in articulo mortis; alii *delegati ab homine*, & quidem vel a *Supremo Principe*, qui Superiorem in suo potestatis genere non recognoscit, vel ab inferiore Judice aut Magistratu ordinario. Sunt delegati *ratione dignitatis*, quam obtinent, vel *ratione personæ* expresso ejus nomine: *delegati primo* & immediate a Supremo Principe, aut Judice ordinario: vel *delegati a delegato*, qui dicuntur *subdelegati*. Sunt denique *delegati ad universitatem causarum*, saltem in certo genere e.g. matrimonii, decimarum, sine restrictione ad certas personas: vel delegati ad causas particulares *certainarum personarum* (a).

(a) *Hic titulus multum usum habet in doctrina de Commissariis, quorum opera frequentissime adhibetur hodierno stilo; pertinet eodem, ratione quadam titulus 21. libri*

*bri I. Digest. de officio ejus, cui mandata est jurisdictio. Leyserus Specimine XXVII. §. 1. ait: Nec ipsi dissimulamus, maximam doctrinæ de Commissariis partem ex consuetudine, & Jure Canonico, in primis ex h. t. desumendam esse. Habet autem hic titulus in Jure sacro univ-
erse capitula omnino sexaginta; & in his non pauca valde longa. Unde præcipui doctrinæ huc pertinentis articuli potius indicandi, quam ex Corpore Juris multis verbis exscribendi sunt.*

§. 490. *Delegare potest, qui habet jurisdictionem ordinariam: delegatus autem regulariter subdelegare non potest, nisi sit delegatus a Summo Principe, vel ad universitatem causarum. Exceptiones de facultate subdelegandi continentur c. 3. 27. 34. c. ult. §. is autem. addita Clem. un. h. t. Delegatus Summi Principis, si subdelegare potest & vult, recipere recusantem etiam compellere potest, ut recipiat. c. 28. non potest autem subdelegato iterum dare potestatem subdelegandi. arg. c. 27. §. 4. h. t.*

§. 491. *Delegari a Summo Pontifice solent Constituti in dignitate, vel personatu, aut Canonici cathedralis. c. 11. Pr. de Rescript. in 6. Ceterum delegati esse possunt omnes, qui natura, legibus vel moribus non prohibentur, modo sint periti jurium. c. 4. §. 1. & non minores XX. annis, nisi a Principe dati essent ex certa scientia; vel ab alio inferiore cum consensu partium, expletis saltem annis XVIII. c. 41. Delegari possunt unus vel plures judices simpliciter, aut sub variis clausulis, aut in solidum. c. 16. 21. 23. 30. X. & c. 8. in 6.*

§. 492. *Causæ omnes delegari possunt, quæ ad ordinariam delegantis jurisdictionem pertinent, imò*
Y 5
etiam

etiam actus Ordinis, modo delegatus habeat Ordinem requisitum. Etsi iudex delegatus vi definitionis sit, qui aliquam jurisdictionem exerceat; tamen etiam *nudum Ministerium* vel *executio* delegari dicitur: sed tales delegati potius *auditores*, vel *executores* appellantur. Delegatus Papæ potest principium, medium & finem totius causæ conjunctim vel divisim subdelegare. c. 27. c. 28. §. 1. Celebris est ex Jure Romano quæstio, an causæ pertinentes ad merum imperium, cujusmodi est jus gladii, sive potestas puniendi facinorosos pœna mortis, mutilationis vel perpetui carceris, delegari possit; qua in re principia juris publici Romani ad statum hodiernum applicari non possunt: unde tales delegationes sine dubio fieri possunt, & solent.

§. 493. *Pro usu jurisdictionis delegatæ* imprimis necesse est, ut delegatus literas delegationis suæ in forma authentica exhibeat. c. 31. *Potestas & officium* judicis delegati (quibus verbis, velut synonymis, hic titulus inscribitur) non penitus nihil differunt. Nam primo *potestas* sumi potest velut pro habitu, & actu primo; *Officium* pro actu secundo, sive exercitio. Dein potestas denotat, quid *possit* quis facere vi juris sibi competentis: officium, quid *debeat*, aut teneatur facere. Potestas judicis delegati generatim pendet *ex auctoritate & potestate delegantis*, cujus is vices gerit. c. 11. & 33. & *ex mandato, ejusque forma*. Hinc delegatus potestatem suam ultra fines mandati extendere non potest, etiam consentientibus partibus, nisi aliqua restrictio mere in favorem partium sit adjecta e. g. de tempore & loco, quo causa definiri debet; consentur tamen in mandato etiam contineri ea, quæ necessaria sunt, ut causa delegata expediri queat. c. 1. & c. 5. h. t. addita *modera-*

deratione c. 2. in 6. Ad observandam formam mandato præscriptam etiam subdelegatus tenetur; alias nihil agit. c. 37. ad *Officium delegati* pertinere censentur ea, quæ ad delegationem rite obeundam jure communi præscribuntur, ut agat vel omittat. Sic contra reum absentem sine contumacia, judicare non potest, etsi prior possessio & dejectio probata sit. c. 10. Et quamvis certa eidem præscripta sit procedendi vel judicandi forma, tenetur tamen admittere exceptiones probabiles. c. 13. Rescriptum Principis nunquam ita interpretari debet, ut alteri præjudicium inferatur, nisi hoc ipsum expressum sit. c. 15. Executionem sententiæ a se latæ differre debet propter appellationem ejus, cujus interest, ne detur executioni, nisi malitiose, & solum differendæ executionis causa interposita fuerit appellatio. c. 15. Quomodo in causa excommunicationis procedere debeat, exponitur c. 21. §. 2. & 3. & c. 36.

§. 494. *Executio sententiæ Delegato Papæ vel Principis non minus competit, quam cognitio & decisio causæ absolute eidem commissæ; quia commissio simpliciter facta, super toto negotio facta intelligitur: resistentes executioni Ecclesiastica censura coercere potest.* c. 7. & 26. h. t. Solet autem Delegatus Papæ executionem sententiæ a se latæ frequenter committere Ordinario loci; a quo id melius fieri potest, utpote Officialibus instructo; quales ipsi judici delegato plerumque præsto non sunt. Si autem Delegatus Ordinarium loci, non ut merum ministrum executionis, sed suum Subdelegatum constituerit, censetur ipse functus officio, ut causam reassumere non possit, saltem si res non sit integra, & Subdelegatus negotium exequi cœperit. c. 9.

§. 495. Difficultatem propter varias consecutiones facessere hoc titulo videtur c. *pastorales*. 28. §. quia vero. 3. ubi Ordinarius jubetur exequi sententiam a Delegato pronuntiatam, etsi eandem injustam esse sciat, e. g. si ea juri quidem communi conformis, sed approbatæ, certæque loci consuetudini sit contraria. Quid enim? ipsi executori injustæ sententiæ, nonne imputabitur injustitia in foro Dei? Verba Capituli sunt hæc: *Quia vero sæpe contingit, quod executio sententiæ Ordinario demandatur; quæsisisti, an si ipsam injustam esse cognoverit, debeat eam executioni mandare? an sit ei potius subsistendum? Attendentes itaque, quod non cognitio, sed executio tantum demandatur eidem: respondemus, quod, cum Ordinarius teneatur obsequi Delegato, etsi sciat sententiam illam injustam, exequi nihilominus tenetur eandem, nisi apud eum efficere possit, ut ab hoc onere ipsum absolvat.* Dubium duntaxat pro casu locum habet, quando ei, cui executio mandata est, de injustitia sententiæ certo constat; quamdiu enim ea extra prudens dubium posita non est; præsumtio stat pro judice & pro justitia sententiæ.

§. 496. De hypothese autem injustitiæ ab exectore certo cognitæ, quia jura juribus conjungenda, atque inter se concilianda sunt, respondeo: Sententia, cujus injustitia certo cognita est, executioni dari potest, si *copulative* concurrant hæ conditiones: I. Si agatur de causa civili, certe non criminali majore; neque actus executionis in se malus, & lege naturali vel divina prohibitus est. arg. c. 13. de restit. spoliat. & c. 44. de sent. excom. II. Si sententia non sit *notorie* injusta secundum acta aut formam processus, vel penitus irrita, ceu lata contra jus manifestum, aut nullo juris ordine observato. c. 10. de

de V. S. 5. & c. 54. v. *si vero notorium.* de appellat. quo pertinet, si sententiam ex falsis instrumentis, aut interveniente fraude latam constat. c. 2. de crimine falsi c. 5. de sent. & re jud. III. Si *mera* executio sententiæ sine ulla cognitione causæ demandata est; nam de *executore mixto* aliter sentiendum est. IV. Si, qui injustitiam sententiæ novit, ab onere executionis nullo modo liberare se potest. Potest enim apud Delegatum instare, ut sententia suspendatur, donec rei veritas Apostolicæ Sedi innotescat. c. 8. h. t. V. Si sententia transiit in rem judicatam; aliter enim non fit executio secundum jura. Eo autem facto executori imputari non potest injustitia: uti enim in foro externo firmitas tribuitur rei judicatæ, etsi de jure partium litigantium postea certo constet; sic pro foro externo executio sententiæ facienda est. VI. Si denique ex sententiæ executione graviora mala imminere videantur, executor, tanquam de re impossibili sibi demandata, excusationem habebit ex c. 5. de rescriptis.

§. 497. De appellationibus & recusationibus generatim agitur L. II. Decretal. Specialia sunt: I. A delegato appellatur ad Superiorem delegantis: si hic Superiorem non habeat, ad ipsum delegantem (b). II. A subdelegato Papæ, qui non totam causam delegavit, non ad Papam, sed ejus Delegatum, nempe Subdelegantem appellatur, nisi hic sit impeditus. c. 18. III. Si medium tantum causæ, e. g. depositiones testium, alicui committatur, ut mero auditori sine jurisdictione, a tali non appellatur, nisi fines mandati exceßerit, aut merito suspectus sit. IV. Nemo præter Principem Supremum causam committit, remoto appellationis remedio: exceptio est in c. 28.

(b) *Zeeh de Judiciis Eccl. Sect. I. tit. III. §. 39. Singularem ea de re dissertationem edidit Samuel Stryckius Vol. 5. diff. I. C. IV. n. 59. Et seq.*

§. 498. Exspirat jurisdictio Delegati I. lapsu temporis, nisi communi partium consensu terminus prorogetur. c. 4. II. Morte Delegantis, & omni eo modo, quo Delegans amittit suam jurisditionem, si res adhuc sit integra; secus, si Delegatus jam uti cœpit jurisditione, ea perpetuatur. c. 19 & 20. Hæc tamen limitatio passim non observatur. Estque hoc notabile discrimen inter judicem Delegatum, & Ordinarium; hic enim, non item ille, suam jurisditionem etiam post mortem ejus, a quo ipsi delatum est officium cum jurisditione, eandem retinet, excepto Vicario, qui eandem cum Principali jurisditionem tenet (c). III. Morte ipsius Delegati; si delegatio facta fuit *personæ* sub proprio ejus nomine, non vero *dignitati*; hoc enim casu transit ad successorem in eadem dignitate. c. 14. h. t. IV. Si Delegatus officio suo functus est, id est, si sententiam per se, vel per alium, tanquam ministrum, executus est, aut alteri exequendam delegavit. c. 9.

(c) *Gratia jam facta morte concedentis, vel delegati executoris non exspirat. c. 9. h. t. in 6.*

TITULUS XXX.

DE OFFICIO LEGATI.

ARGUMENTUM.

- I. Legatorum Apostolicæ Sedis triplex genus §. 495. II. Mittuntur ex variis causis: gaudent charactere repræsentatio: honore & potestate eminent legati a Latere. §. 500. III. Quomodo exspiret potestas legati. §. 505. IV. Jus Pontificium mittendi legatos. §. 506.*

§. 499.

§. 409. *Legati*, seu *Nuntii Apostolici* sunt triplicis generis ex jure Decretalium, cui præfens consuetudo inhæret. Sunt enim I. *Legati a latere*, qui sumuntur e collegio Cardinalium, tanquam lateri Pontificis assistentium, indeque missorum. Formula loquendi valde antiqua est. can. 11. & can. 36. II. q. 6. De his ait Pontifex. c. 1. in 6. *Sicut honoris prærogativa lætantur; sic eos auctoritate fungi volumus ampliori.* II. *Legati Missi.* III. *Legati Nati, qui Ecclesiarum suarum prætextu legationis sibi vendicant dignitatem.* c. 9. (a). Atque hi conveniunt cum iis, qui olim dicti sunt Vicarii Apostolici, de quibus, uti & universo Legatorum Apostolicorum jure summa eruditione, pari gravitate & æquitate agitur in Responsione SS. D. N. Pii P. VI. ad Metropolitanos Germaniæ super Nuntiaturis Apostolicis. Horum Legatorum, qui Nati dicuntur, debuit imminui auctoritas; tum quia ipsorum delectum Summi Pontifices non habebant in sua potestate, nec eligere poterant industriam personæ; tum quia, ut Petrus de Marca L. VI. Conc. c. 29. n. 6. ait: *Metropolitani ferre volebant, uni ex suo corpore conferri jus perpetuæ præfidentiae;* quod in Drogone & Anseligo patefactum est; quorum proin fata male ad legatos missos applicantur. Hinc SS. D. N. Pius P. VI. in cit. Resp. C. VIII. Sect. V. n. 132. ait: „Im-
 „potens æmulandi studium, quod Metropolitanos
 „invaserat, in causa fuit, cur Pontifices, volentes in-
 „juncto sibi Apostolatus munere perfungi, nolentes-
 „que amplius *Indigenis* uti, quibus suas, ut antea,
 „vices committerent, ac demandarent, id ceperunt
 „Consilii a Seculo XV. ad hanc usque nostram æta-
 „tem, ut *e proprio latere* in Germaniam, in Galliam,
 „in Hispaniam, in Lusitaniam & in alia etiam regna
 „advenas *Nuntios* mitterent, nulli parti addictos, Ec-
 „clesia-

„*clesiastica dignitate ornatos, Principibus caros; ut, que apud catholicas aulas, & in urbibus Principibus Ordinarias Nuntiaturas instituerent.*“ Triplex hoc Legatorum genus aperte indicatur c. 9. X. c. 1. in 6.

(a) *In Receptu Imp. a. 1532. subscribens Albertus Archiepiscopus Moguntinus & Magdeburgensis se vocat legatum natum. Idem prædicatum suis titulis adjicit Elector Colonienfis. Salisburgensis idem elogium sibi tribuit a variis Pontificibus concessum. Hæc de Legatis natis in Germania. In Gallia eo titulo fruuntur Remensis, Bituricensis & Lugdunensis, in Hispania Tolstanus, in Italia Pisanus, in Anglia Cantuariensis & Eboracensis, in Hungaria Strigoniensis &c.*

§. 500. Ex primo & secundo Legatorum genere (de tertio enim nihil restat dicendum) alii mittuntur cum jurisdictione solum *temporali* ad gubernandas provincias, vel civitates status Ecclesiastici, quales sunt Legatus Avenionensis, Bononienfis, Ferrariensis &c. alii habent jurisdictionem *spiritualem*, vel *restrictam* ad certas causas, aut negotia; vel *ordinariam*, quando iis in certis provinciis committitur legationis officium; atque in his aliqui dicuntur *extraordinarii*, & non *stabiles*; alii *stabiles*; quales in Germania sunt Viennæ, Colonæ, Monachii, Lucernæ. Ab his distinguendi sunt ii, qui *Vicarii Apostolici* speciali ratione vocantur; etsi Legati quoque vices gerant Apostolicæ Sedis, ut mox dicam.

§. 501. Commune est omnium Legatorum, quod charactere repræsentatio gaudeant; ac Legati quidem & Nuntii Apostolici vices Papæ gerunt. c. 1. in fin. ac si ea, quam divinæ fidei vis, & catholicæ unitatis studium poscit, reverentia erga Vicarium Christi & Successorem S. Petri vigeret in scriptoribus

bus ætatis nostræ, ingentibus turbis, ac bonorum offensionibus fuisset præcautum. Quidquid sit, ut ea memorem, quæ Legatorum communia sunt, ex præscripto juris nemini, quamquam dignitate fulgeat, credendum est, si dicat, se cum mandatis Principis venire, nisi probaverit. l. 1. C. de mandatis Princip. Cardinalibus quidem legatis, si legatos se esse, literis ostenderint (b), fides habetur quoad mandata, et si hæc scripto non exhibeant. arg. c. fin. dist. 97. Imo aliis etiam legatis quoad ea, quæ communi legationis officio continentur, adhibetur fides, non item quoad specialia, & quæ aliis præjudicant.

(b) Boerius de Potestate Legati a latere. n. 28.

§. 502. *Honoris prærogativa* eminent Legati a Latere. c. 1. atque in eorum præsentia suspenditur officium minorum legatorum quoad exercitium potestatis. c. 8. iis præsentibus, si insigniis Apostolicæ dignitatis utantur, Archiepiscopis ac Patriarchis crux non præfertur. c. 23. de Privileg. Unde nec Episcopus, præsentem Legato a latere, populo benedicit, nec vestes defert, scilicet mozzetam, quæ ordinariam ipsius jurisdictionem significat.

§. 503. Legati a Latere ampliori etiam auctoritate funguntur. c. 1. in 6. Generatim omnium Legatorum jurisdictio *Ordinaria* dicitur c. 2. in 6. & in provincias mittuntur, ut *ibidem evellant & dissipent, ædificent, & plantent, ad instar Proconsulum, ceterorumque Præsidum, quibus olim Romani certas provincias moderandas commiserant.* cit. c. 2. in 6. Exemplum magno Germaniæ commodo præbuit celeberrima legatio Laurentii Campegii, qui an. 1524. per Germaniam, itemque Bohemiæ, Poloniæ & Hungariæ

gariæ regna & alia loca, per quæ ipsum transire contingeret, legationis officium obire iussus est; cuius statuta per universam provinciam Moguntinam recepta sunt. Difficile est de potestate Legatorum in specie differere; quia multa in consuetudinem abierunt; ut auctores ex jure communi vix certi quidquam statui posse censeant (c). Ipso tamen communi etiam jure Potestas illorum restricta est: I. ex speciali delegatione cujusdam causæ a Papa facta; quia mandatum speciale derogat generali. c. 2. II. Relatione causæ a Legato ad Papam missa, ille iudex esse cessat. c. 5. III. generali mandato vel delegatione non continentur ea, quæ specialem mentionem poscunt, ceu dividere, aut unire Episcopatus, transferre, vel deponere Episcopos &c. c. 3. & 4; nam hæc, aliaque istius generis *in signum privilegii singularis sunt tantum Summo Pontifici reservata* c. 4. IV. Legatorum potestas adstricta est ad provinciam legationis: si tamen hæc complectitur loca plura; in quovis jurisdictionem exercere possunt. (c) *Zeck de Hierarch. Tit. XXV. §. 286. cum citatis ibid.*

§. 504. Specialia de potestate Legatorum sunt, I. Legati a latere a die egressus sui ex Urbe usque ad diem reditus in Urbem absolvere possunt quoscunque Clericorum percussores, ex quacunque provincia fuerint: c. 4. Legati vero missi, qui non sunt a latere, provinciales tantum, non item extraneos ob excommunicationem alibi contractam absolvunt, ac dum ipsi sunt in provincia. c. 9. II. Legatus a latere licentiam dare potest Abbati in Episcopum electo, ut monasterium suum deserat, atque ad Ecclesiam transeat: idem *in provincia sibi decreta Archiepiscoporum, Episcoporum, & exemptorum electiones potest ex officio confirmare* (de jure communi); alii
autem

autem Legati hoc nequeunt. c. 36. de elect. in 6. III. Legatus a latere (non item alius, quantumcunque plenam legationem obtineat) cum Ordinario concurrit in conferendis beneficiis, atque etiam reservandis. c. 1. in 6. & c. 31. de præb. eod. Hæc facultas jure communi magnopere limitata jam est, uti patet ex c. 3. 4. & 5. in 6. c. 2. de præb. eod. In Germania autem ea uti non solent, ne vis inferatur Concordatis, quibus nec Pontifex derogare solet. IV. In causis contentiosis Episcopi judicant in *prima* instantia, non legati sive a latere, sive alii, nec isti procedunt contra Clericos, nisi Episcopo prius requisito, eoque negligente. Concil. Trid. Sess. XXIV. c. 20. de ref. De *secunda* instantia nil decretum est in Trid., sed tantum præcipitur, ut Legati ac Nuntii Apostolici perinde ac Patriarchæ, Primate, ac Metropolitani in appellationibus, quæ ab Episcopi judicio fiunt, recipiendis, servant formam ac tenorem præscriptum ab Innocentio IV. in c. Romana Ecclesia. 3. de appell. in 6. quæ res satis indicat, ab Episcopo æque ad Nuntios, ac Metropolitans appellari posse. Trid. Sess. XXII. c. 7. de ref. V. Statuta quorumcunque Legatorum, ordinaria jurisdictione præditorum, etiam durant post finitam legationem. c. fin.

§. 505. Potestas Legati per mortem Pontificis non expirat. c. 2. in 6; sed I. finito tempore constituto. arg. c. 4. de offic. Deleg. II. morte legati. III. Revocatione Papæ. IV. Egressu ex provincia legationis. c. fin. si nempe sit animo non redeundi, & concessu Papæ.

§. 506. De jure Summi Pontificis mittendi Legatos ac Nuntios in provincias, & ordinaria præsertim jurisdictione, seu facultatibus instructos ac sta-

biles statuendum: *Jus Pontificium mittendi Nuntios, eosque stabiles & facultatibus instructos ab eo, qui Primatum SS. Pontificum ex verbo divino scripto, traditioneque profitetur, in dubium vocari nequit.* Prob. D. Petro ejusque Successoribus cura & potestas universi regendi gregis a Deo commissa est. Cum hac potestate rectoria ex natura rei, tanquam medium necessarium ad finem, conjungitur jus mittendi viros idoneos, qui statum gregis proxime inspiciant, ad Summum Pastorem fideliter de eo referant, hæreses, schismata, scandala cohibeant, quæque sunt alia istius generis ad officium Summi Pastoris pertinentia. Perpetuus usus hujus juris, qui traditionem manifestat, ostenditur inde a Sæculo IV., ex quo pax ac libertas Ecclesiæ data est, usque ad Seculum XV, nostraque tempora. Adde formulam juramenti Episcoporum §. 333. & Extrav. un. de consult. int. com. in qua respondens Pontificio huic juri obligatio declaratur: consuetudo non recipiendi Apostolicos Legatos dicitur irrita: qui eos impediunt, excommunicationi, ac terræ ipsorum interdicto subjacent.

§. 507. *Objiciunt I. cit. Extravagans, quæ incipit: Ad regna; uti etiam juramentum Episcoporum tantum pertinet ad Legatos extraordinarios, quos Pontifex necesse habet interdum ex debito impostæ servitutis ad diversas mundi partes, prout necessitates emerferint, destinare; uti ibidem dicitur. R. I. Ea constitutio data est tempore, quo in Germania, in Gallia, & aliis locis stabiles aderant legationes Primatibus concessæ; quibus non satisfaciendis aliquando, necesse præterea fuit, extraordinarios legatos mittere. Ex verbis autem ipsius constitutionis ac mente Pontificis, sine discrimine mandatur Principibus, Nuntios recipere, quos ad quascunque partes*

tes pro causis quibuscumque Sedes ipsa Apostolica miserit. Dein si Episcopi vi juramenti Legatos tantum transeuntes honorifice tractare & adjuvare debent; cur non item, si in diocesis commorantur, & populorum commodis inserviunt? R. 2. Extra Ordinem legatos in provincias mitti posse non negant, etiam jurisdictione instructos, Pontificio exercenda nomine; neque negare possunt omnino, nisi Pontificiam auctoritatem aperte velint tollere: quæro nunc igitur, quoties mittere istiusmodi Legatos liceat? quamdiu missis commorari in provinciis concedant adversarii? quid? si necessitas videatur poscere, ut sæpius mittantur intra Spatium temporis minime longi, utque morentur diutius; id quod usuvenisse novimus tempore Concilii Basileensis, ac posteriore dein, nempe Lutheri ætate? cujus arbitrio & necessitas illa mittendi, & mora in provinciis definienda erit? quantum juris dabunt Principi accersenti ad se Apostolicum Nuntium, & apud se retinenti? si semestri, si anno integro, si triennio retinere licet; cur non item stabiliter ac perpetuo? qua ratione, qua lege, qua juris auctoritate id vetabunt? At, inquit, obesse poterunt Legati stabiles auctoritati Episcoporum? Atqui poterunt etiam obesse, si extra ordinem, poscente necessitate, mittantur: si bimestri, si paucis commorentur diebus (d).

(d) In hunc modum differit Auctor Expostulationis contra Auctorem libri: *Solida Analysis controversiarum de Dispensationibus & Nuntiaturis. C. III. de Nuntiis Apostolicis.*

§. 508. *Obiiciunt* II. Episcopi immediate præsunt suis Diocesis: Papa mediate; supplere is potest defectum, si Episcopus suo desit officio. R. Papam mediate tantum præesse gregi Dominico, nec posse,

nisi supplere defectum pastorum inferiorum, apertissimus error est ex damnatis haustus auctoribus, nempe Marco Ant. de Dominis, Richerio, Febromio, Eubelio: error est, manifeste repugnans verbis & sententiis Christi Primatum instituentis in potestate S. Petro concessa: error repugnans traditioni & usui perpetuo: repugnans Concilio Oecumenico Lateranensi IV. ex cujus effato *Ecclesia Romana, disponente Domino, super omnes alias ordinariæ potestatis obtinet principatum, utpote mater universorum Christi fidelium & magistra.* c. 23. de privil. Si Papa immediatam & ordinariam potestatem in pastores subordinatos habet; eandem necesse est, ut habeat in subditos horum pastorum; quia Universorum Christi fidelium æque pater est, & Doctor: nihil enim in verbis Christi distinguitur, nihil excipitur. *Petro imperatum est, inquit Bossuetus Serm. de unitate, ut cuncta gubernaret, & pasceret omnes agnos & oves, filios & matres; & ipsos quoque pastores; pastores, inquam, si populi respiciantur: oves, si Petro comparentur.* Pasce agnos, inquit Christus, pasce oves: quidquid solveris: quidquid ligayeris: Tibi dabo claves regni cælorum. Quæro, quid Episcopi prius, quid immediatius, quid propius acceperint? Si officii Episcopalis est, ut proxime invigilent portioni gregis, eamque pascant; quid hoc potestati supremæ, universali, & ordinariæ Pontificum derogat, vel officit? nonne idem de parochorum officio dici potest? num potestas Episcoporum propterea non ordinaria, non immediata, ac cum potestate inferiorum concurrens censi potest? *Officium ad exercitium curæ pastoralis propius refertur: potestas ad habitum, ad originem, ad imperium sacrum.*

§. 509. Objiciunt. III. Papa *solicitudinem* habet, universi gregis, ut inquit S. Leo; sed inde inferri non potest,

potest, eidem competere regimen universi gregis. *R.* Verbum scriptum & traditum, ex quo impositam S. Petro, ejusque Successoribus sollicitudinem universi gregis inferunt, æque probat eorundem supremam & universalem atque immediatam potestatem universi regendi gregis; ejusmodi potestas esse non potest absque sollicitudine universi; at sollicitudo & cura alicui demandata intelligi potest absque potestate vera & rectoria; sinempe is, cui sollicitudo demandata est, Superiorem habet, ad quem casus emergentes referat; uti fit in Archipresbyteris & Decanis ruralibus. Romanorum autem Pontificum est, non ad alios, tanquam Superiores, mittere relationes de ecclesiarum necessitatibus, sed relationes de iisdem ex universo orbe recipere.

§. 510. *Obijciunt* IV. Per Canones vetitum est *extraneo* Episcopo in negotia aliorum diœcesium se ingerere: Pontificalia ibidem exercere. Trid. Sess. VI. c. 5. de ref. Ipsa etiam Tridentina Synodus cognitionem causarum reservavit Episcopis. Sess. XXIV. c. 20. de ref. Respondet SS. D. N. Pius VI. in amplissima Resp. ad Metropolit. c. VII. n. 49. „Non „nisi per summam injuriam dici *extraneus* potest is, „quem Apostolica Sedes delegavit, quique ejus vi- „ces obit, utpote quæ supra omnes Episcoporum „catholicorum diœceses habet jus *ordinariæ* potesta- „tis.“ Et ib. c. IX. §. 24. „Constitutio Tridentini „elara est quoad *Episcopos omnes*, ita, ut nequeat *al-* „*ter* Pontificalia in *alterius* diœcesi exercere, nisi „impetrata prius ab Ordinario venia. Sed constitu- „tio hujusmodi ad solos *coercita* Episcopos, nil com- „mune habet cum *Pontifice*, & *Pontificiis Legatis*, „qui illius vices funguntur. Ad Pontificem enim „quod attinet, nulla diœcesis est *aliena*. Sicut au- „tem liceret Pontifici, quocunque locorum accede-

rent

„ret, sine venia Ordinarii pro libitu Pontificalia exercere; ita eodem jure decorari possunt Apostolici Nuntii, non ut meri *Episcopi*, aut *Archiepiscopi*, sed tanquam *Apostolicæ Sedis Delegati*.“ Ceterum Apostolicum Nuntium appellare *extraneum* ne Febronius quidem ausus fuisset. Ait enim in opere de statu Ecclesiæ C. II. §. 10. *Papæ — incumbit cura, inspectio, & quædam superintendentia in omnes Ecclesias, adeo ut is nullibi quoad hoc potest haberi pro EXTRANEO.* Synodi Trid. Decretum agit de causis contentiosis, & quidem quoad primam tantum instantiam (§. 504. n. IV.), idemque, ut Decreta omnia Synodorum, vim habet a Pontificia confirmatione. Imo ipsa Synodus excipit non causas majores tantum, *quæ juxta canonicas sanctiones apud Sedem Apostolicam sunt tractandæ*, verum etiam illas, *quas ex urgenti, rationabilique causa judicaverit Summus Romanus Pontifex per speciale rescriptum Signaturæ Sanctitatis Suæ, propria manu subscribendum, committere, aut avocare*; id quod ordinariam atque immediatam RR. Pontificum Potestatem aperte indicat. Denique si ad evitandas litigantium fraudes isthuc in causis contentiosis constituendum judicavit & Pontifex, & Synodus, non id continuo ad Jurisdictionem voluntariam, aliaque istius generis extendi potest, quasi nemini liceret, mox ad Pontificem, ejusve Legatum petendæ gratiæ causa accedere. Unde merito animadvertit auctor Expostulationis diss. cit. pag. 115. Non est hæc solius Papæ, vel Episcoporum, sed *ovium* causa, quæ quidem separari se a Summo Pastore minime patientur; quippe, quæ norunt, non aliam ob causam magis inferiores Præsules a Christo institutos fuisse, quam ut ad Pastorem universi gregis ab iisdem adducantur; neque accessum sibi ad Patrem & Doctorem communem intercludi

eludi sinent, aut a gratiis ejus recipiendis prohiberi (é).

(c) *Quæ ab hostibus Apostolicæ Sedis contra Legatorum quorundam labes vitiaque ex antiqua memoria, ac sæpe impuris fontibus ad invidiam ejus sanctæ Sedis congeruntur, nec responsum mereri arbitror. Nimis enim depravati & maligni animi indicium est, silentio præteritis tot insignibus emolumentis, quæ ab eorundem legatorum indefessa opera, summa virtute ac sapientia in regna ac provincias collata sunt, pauculorum culpas, errataque lectoribus obtrudere.*

TITULUS XXXI.

DE OFFICIO JUDICIS ORDINARIJ.

ARGUMENTUM.

I. Quis hic censeatur Ordinarius: & a quo officia Ordinariorum instituantur. §. 511. II. Potestas ordinaria Papæ, cujus lateri assistunt Cardinales §. 512. III. Et Potestas ordinaria Episcoporum; utraque ex divina institutione §. 516. IV. Gradus medij sunt juris humani. §. 526. V. Potestas quasiepiscopalis. §. 529.

§. 511. In Rubrica hujus tituli vox *Judicis Ordinarii* latius sumitur de officio ejus, qui vi muneris sui, suoque nomine & jure, non vice alterius, ut delegati faciunt, præest in Ecclesia, & potestatem ordinariam exercet. Hinc in Sexto libro titulus simpliciter inscribitur *de officio Ordinarii*, id est, Papæ, cujus lateri assistunt Cardinales: de officio Patriarcharum, Archiepiscoporum, id est, Primatum, & Metropolitanorum, Episcoporum, aliorumque potestate quasiepiscopali præditorum; qui omnes nomine *Ordinarii* veniunt; ac speciales titulos in Jure non habent. De his nota: I. Agitur de potestate eorum

in causis, quas norunt ut homines & Judices, non ut Deus, nempe ex sigillo Sacramentali. c. 2. h. t. II. Considerantur ut personæ singulares, vel tanquam morales, quales sunt Synodi & Capitula. III. Officium Ordinarii instituitur vel a supremo Principe, vel lege publica & canone vel consuetudine; inferiorum non est, contra jus creare novam formam Ordinariorum. Id quod commune est utriusque status tum Ecclesiastici, tum politici; quo pertinet Extrav. unic. Joannis XXII. de M. et O. In Ecclesiastico statu, in quo per canones, concordata, & longævam consuetudinem officia Ordinariorum constituta sunt, mutatio sine aliorum injuria a pastoribus subordinatis fieri non potest.

§. 512. Christus instituendo pastores, & rectores Ecclesiæ orsus est a Petro, tanquam fundamento, Capite, supremo Pastore, quem singulari ratione suum Vicarium nominavit cum potestate suprema, universali, ordinaria, ac plena. Potestas Successorum Petri, seu RR. Pontificum vere, proprioque sensu potestas est, nempe fundata in Primatu non meri ordinis, honoris, directorii, sed Primatu auctoritatis, ac Jurisdictionis, conjunctæ cum vi obligandi pro utroque foro, ac pœnis appositis cogendi; eaque dicitur *suprema*, quia supra omnes Ecclesiæ potestates ita eminet, ut nulli illarum subjiatur; quod de quavis Ecclesia particulari etiam integræ nationis ita certum est, ut a nemine catholicorum in dubium vocari possit. Opinionem de Conciliis œcumenicis Papa superioribus etiam extra casum schismatis vel hæresis seculo XV. rebus maxime perturbatis ortam Scriptores quidam nostræ ætatis sibi & aliis persuadere tanto ardore nituntur, ut incidere videantur in propositionem 29. ab Alexandro VIII. an. 1690. damnatam (a).

(a) Confer. ex J. E. P. §. CCCLVIII. pag. 725. Et dicta in *Isagoge*. §. CXVIII.

§. 513. Eadem potestas Romanorum Pontificum dicitur *Universalis & Ordinaria* relate ad omnes diœceses, personas, causas, relate ad oves & pastores subordinatos, nulla ut exemptio a potestate & Jurisdictione Papæ habeat locum, ac ut nullibi tanquam Episcopus *exterus* spectari possit (§. 510.). Dicitur denique *plena*, quæ continet omne genus potestatis, quæ a Christo in Ecclesiam collata est; nec tamen est potestas *sola*, neque excludit divinam institutionem potestatis Episcopalis; ac præterea limites habet ex ipsa natura Primatus Ecclesiastici, ex generali moderationis lege a Christo præscripta, & denique ex fine; quia in ædificationem, non destructionem instituta est (b).

(b) J. E. P. §. CCCLIX. pag. 729. Confer dicta §. 370. de supplenda negligentia Prælatorum. Sine dubio supplet supremus Pastor inferiorum defectus; sed ex officio, Et plenitudine potestatis supplet, non ex canonum dispositione; quam enim novæ spiritualis potestatis particulam per Canones accipere potuit is, qui a Christo accepit plenitudinem potestatis? Ob quam ipsam causam non maligna tantum, atque ad deprimentam Vicariorum Christi potestatem excogitata, sed per se ipsam absurda est distinctio inter jura Papæ primigenia, Et adventitia, essentialia Et accidentalia. Exercitium potestatis e. g. circa reservanda peccata recens esse potest, aut accidentale dici; sed jus reservandi, cum, teste Concilio Tridentino, in supremâ R.R. Pontificum potestate fundetur, omnino primigenium est, Et essentialiale; nisi etiam inter jura Generalium Conciliorum alia primigenia Et essentialia, alia vero adventitia Et accidentalia velis dicere; eoquod a posterioribus Synodis constituta quædam, Et decreta fuerint, de quibus nullum in antiquioribus extat vestigium. Conf. de hac re *Isagogen* §. CXCVII.

§. 514. *Veniamus ad Collaterales, & Coadju-
tores tuos*, inquit S. Bernardus ad Eugenium P. III.
(c). *Hi seduli tibi, hi intimi sunt; quam ob rem,
si boni sunt, tibi potissimum sunt: si mali, æque plus
tibi.* Nomen ductum videtur a *cardinibus*, nempe
titulis perpetuis, quibus aliquis Clericus fuerat ad-
dictus. Frequenter ea voce usus est S. Gregorius M.
quando Clericus ad certum gradum, servitiumque
ordinatus ad aliam Ecclesiam, cui eodem deser-
viret gradu, canonice translatus est, in hac Eccle-
sia dicebatur *cardinari*. can. 5. dist. 71. & ibi cor-
rectores Romani. Sed origo ac dignitas Eminen-
tissimorum S. R. E. Cardinalium altius repetenda est.
Habebant antiquissimis temporibus singuli Episcopi
suum *Senatum*, sive *Presbyterium*, ex Presbyteris &
Diaconis compositum, cujus consilio & opera in re-
gimine Ecclesiæ adjuvarentur; quod palam fit ex epi-
stolis authenticis S. Ignatii Martyris. Uti Ecclesia
Romana præ aliis Ecclesiis particularibus, ita ejus-
dem Senatus præ aliis Presbyteriis, dignitate, & ju-
vando regimine universæ Ecclesiæ semper eminuit;
cum ii Presbyteri & Diaconi essent *nobilissimæ par-
tes*, & *præcipua membra* Romanæ Ecclesiæ, ut in-
quit Sixtus V. in Const. *Postquam verus*, S. Cornelius
ad Cyprianum scribit: *Omni igitur actu ad me per-
lato placuit contrahi Presbyterium* (d). Cum post
mortem S. Fabiani Papæ circa an. 250. Sedes Apo-
stolica integro anno vacaret, Presbyteri & Diaconi,
re ipsa Cardinales Ecclesiæ Romanæ, gravissimas ad
S. Cyprianum & Clerum Carthaginensem dederunt
litteras, quæ, ut S. Cornelius postmodum creatus
Papa testatur, *per totum mundum missæ sunt, & in
notitiam Ecclesiis omnibus & fratribus perlatae sunt*
(e). Addit Constantius de his literis: Et sapientiam
quidem spirant primo Ecclesiæ Clero dignam. *Is*
nempe

nempe (Clerus Romanus) *nimio potestatis suæ studio minime percitus*, *Episcopos vicinos ac remotos, qui Romæ aderant, secum vocare, eorumque consilio uti non dedignatur* (f). Initio ergo Romæ non alii erant, quam Presbyteri & Diaconi Cardinales; his accesserunt postea Episcopi viciniore, Lateranensi Basilicæ adscripti: qui tamen suo non defunt muneri Episcopali. Numerus Cardinalium olim incertus erat, ac varius; nunc ex cit. constit. Sixti V. septuaginta esse debent exemplo 70. Seniorum, quos Moyses assumpsit. In hoc numero sunt, *Episcopi Cardinales sex*; quorum Ecclesiæ sunt 1. Ostiensis & Veliterna inter se unitæ. 2. Portuensis, & S. Ruffinæ, seu Silvæ candidæ, itidem unitæ. 3. Albanensis. 4. Sabiniensis. 5. Tusculana. 6. Prænestina. Dein *Presbyteri Cardinales quinquaginta*: & *Diaconi Cardinales quatuordecim*.

(c) *De Consideratione lib. IV. c. 5. p. 120. edit. Romana an. 1594.*

(d) *Constant. Epist. 6. S. Cornelii n. 2. Col. 136.*

(e) *Ibid. Epist. 10. col. 161.*

(f) *Const. ib. in notis.*

§. 515. Officia Cardinalium tum *propria* sunt; quia in titulis suis ampla gaudent jurisdictione in iis, quæ ad eorum spectant servitium; tum *communia*, adjuvando Summum Pontificem in administranda, regendaque universa Ecclesia. c. 17. de Elect. in 6. Conc. Trid. Sess. XXV. c. 1. de ref. quod in Consistoriis secretis, & publicis, & Congregationibus tum ordinariis, tum extraordinariis maxime præstant: obeunt præterea legationes a Latere: Sede Papali vacante valde restricta potiuntur potestate. c. 3. de Elect. in 6. & Clem. 2. de Elect. Præcipuum eo-

rum

rum munus versatur in deligendo novo Pontifice.
c. 6. de elect. in 6. (§. 377.).

§. 516. A Summo Pastore descenditur ad Subordinatos, nempe Episcopos Diocesanos, qui honori sibi ducunt profiteri subjectionem erga S. Petrum, ejusque Successores, uti Bossuetus inquit in Sermon. de Unitate. Est autem potestas Episcopalis divinæ pariter institutionis, perinde ut Primatus Episcopi Romani; nam gradus intermedii Jurisdictionis ex Jure Ecclesiastico humano profluunt, ordinis causa, faciliorisque communicationis singulorum orbis Episcoporum cum Capite Universorum introducti, & pro temporum ratione variabiles. Est autem

§. 517. I. Episcoporum potestas *adstricta ad diocesæ*; quia extraordinarium Apostolorum jus ubique prædicandi, baptizandi, fundandi Ecclesias ad ipsorum Successores Episcopos non transit (conf. J. E. Publ. §. 331. nota a. & 344.). Ipsi Apostoli Episcopos a se institutos affixerunt certis Sedibus, uti patet in Tito, Timotheo, & majoribus natu, quos S. Paulus Ephesi instituerat, indeque Miletum ad se evocavit (Act. XX.); in septem Angelis, seu Episcopis Asiæ, de quibus S. Joannes in Apoc. agit C. I. in fin. & C. II. & III. Adde can. Apost. 34. & Trid. Sess. VI. c. 5. de ref. Porro assignatio subditorum, certarumque sedium, limitum item diocesæos determinatio non ex jure Divino, sed Ecclesiastico humano profecta est.

§. 518. Eadem Episcoporum potestas divino jure *adstricta est ad servandam unitatem catholicam*, id est, ad consensionem in fide & communione cum Successore Petri, tanquam centro ejusdem unitatis; adeoque est potestas subordinata & subiecta Pontifici

eius potestati; ex qua subjectione per se, atque ex natura rei consequitur, potestatem Episcoporum restringi *primo* legibus generalibus Ecclesiæ; quas obtentu temporalis commodi violare non debet Episcopus, c. 5. de M. & O. & contra quas statuere nihil potest c. 9. eod. *Secundo* per causas majores, sive illas, quæ juxta canonicas sanctiones apud Sedem Apostolicam sunt tractandæ, Concil. Trid. Sess. XXIV. c. 20. de ref. *Tertio* specialibus avocationibus causarum (Trid. ibid.), reservationibus, & exemptionibus.

§. 519. II. Hac salva subjectione & subordinatione Episcopus suprema potestate universam regit Diocesim; omnesque Diocesanos, Laicos, Clericos & Regulares sibi subiectos habet (g): dispensat in votis, tanquam legibus particularibus: absolvit ab omnibus peccatis: confert omnia beneficia; quæque sunt alia generis istius, ad quæ dicitur habere *intentionem fundatam in jure*, donec ostendatur lex generalis, aut specialis reservatio, exemptio, præscriptio, consuetudo, aliave legitima exceptio. Hinc si Ecclesia, sita in aliquo Archidiaconatu, erigitur in Cathedralē, ea per se a Jurisdictione Archidiaconi eximitur c. 16. de M. & O. ibi: *Archidiaconus in tantam prorupit temeritatis audaciam, ut in Episcopum ibi consecratum, & ecclesiam suam jurisdictionem exercere præsumat.*

(g) Presbyteros potestate Ordinis & Jurisdictionis inferiores esse Episcopis, dogma catholicum est. De qua re ultimis hisce annis Episcopi Galliarum constantia & magnificentia Episcopali & protestati sunt, & scripserunt contra Presbyteros vicarios cum potestate a se independente sibi adjunctos. Can. Apost. 30. ejusmodi Presbyter, qui primum aspernatus Episcopum seorsim conventicula egessit, — — tanquam qui principatum ambiat, Tyrannus dicitur.

§. 520.

§. 520. IV. Ex divina institutione potestatis Episcoporum, eorumque divinitus stabilita adhæ-
sione ad catholicam unitatem, quam S. Cyprianus
glutinum Sacerdotum, Tertullianus vero *concessera-*
tionem appellat, infertur *primo*, Episcopos in suis
quemque diœcesibus residentes, adeoque extra Con-
cilium etiam generale, efficere unum corpus, & unum
quodammodo Episcopatum, uti S. Cyprianus ait.
Secundo, eosdem, quantumvis diœcesibus adstrictos,
dum communi adhærent Ecclesiæ Capiti, & unitatis
Centro, repræsentare universam Ecclesiam, perinde
ac in Concilio generali; unitas enim loci ad rem nil
confert. *Tertio*, hoc sensu & consensu cum Capite
Ecclesiæ Episcopi participes sunt *regiminis universæ*
Ecclesiæ, eidemque potestate sua consulunt per con-
sensum in dogmaticas definitiones, per judicia de
fide ac moribus, legesque & ritus universe receptos.

§. 521. Amplissima potestas Episcopalis di-
stincte intelligitur ex objectis, quæ attingit, iisdem
prope, in quibus Apostoli sua usi sunt potestate.
J. E. P. C. III. a §. 332. Prima Episcopi cura sine
dubio est conservare in grege sibi commisso purita-
tem fidei, & morum, atque unitatem catholicam,
tum in obeundo per se & adjutores suos pastorali
munere, celebratione divini Sacrificii, administra-
tione Sacramentorum, aliisque publicis rite peragen-
dis Religionis operibus. Huc spectant decisiones ju-
ris: I. Episcopus iudicium & auctoritatem inter-
ponit, si Canonici cessare volunt a divinis c. 13. §. 1.
X. c. 2. & 8. in 6. II. Providet de viris idoneis pro
officio prædicationis, audiendis confessionibus, &
injuugendis pœnitentiis c. 15. III. Præsertim si in
Diœcesi sint populi diversarum linguarum. c. 14.
IV. Quando Episcopo in certis casibus competit ab-
solutio

olutio ab excommunicatione canonis, non necessario per se eam impertit, sed potest eandem aliis committere. V. Negligentiam inferiorum Prælatorum Episcopus supplet ex officio ordinario (§. 370.).

§. 522. Alterum caput Episcopalis muneris situm est in Clero universo non modo ordinando, & præficiendo, sed singulari etiam sollicitudine custodiendo, coercendo, & si opus sit, corrigendo. Clem. 1. h. t. Neque Clericus ob eam causam, quod Ordines acceperit a Papa, ab Episcopi jurisdictione eximitur. c. 7. de M. & O. Si tamen Clericus administratione careat, juratam Episcopo obedientiam profiteri non tenetur. c. 3. de M. & O. Quando Episcopus monasterium sibi subiectum visitat, cavet, ne monasterium infamet, & seculares secum introducat. c. 17. h. t. Præcipue inquit in illos Clericos, qui plures dignitates vel beneficia curata tenent prætextu Apostolicæ dispensationis. c. 3. in 6. Collatio tamen beneficii facta ei, qui de priori, quod habet, mentionem non fecit, valida est, præterquam si ea collatio fiat a Legato Apostolico, vel per rescriptum Papæ. Clem. 2. h. t. Episcopus enim id nosse potest, ac mederi debet.

§. 523. Tertium caput Episcopalis officii consistit in cura temporalium bonorum Ecclesiæ; quo pertinet administratio bonorum Ecclesiæ vacantis. c. 4. h. t. cavet autem Episcopus a suspitione avaritiæ, & a quæstu, aliove gravamine in pænis imponendis. c. 13. §. 2. Eodem referri debet Synodicum seu Cathedriticum, & jure veteri quarta decimarum & mortuuariorum: procuraciones item & subsidium caritativum, præter alia Episcoporum jura; de quibus fit mentio c. 16. h. t. ageturque ad

Zallinger L. I. Decretal. A a titu-

titulum de censibus. C. 18. h. t. fit mentio de lege diœcesana & lege jurisdictionis. De eadem lege diœcesana agitur c. 22. de Regularibus. & c. 1. de V. S. in 6. Sciendum, Monachos, eorumque monasteria pluribus seculis fuisse subiecta juri Episcoporum; ac primum a Gregorio M. ipsos fuisse exemptos, quoad electionem Abbatum, solutionem Cathedratici, & Decimarum (h). Glossatores dein ea exemptionis capita, in quibus Monachi a potestate Episcoporum erant immunes, retulerunt ad *legem diœcesanam*: reliqua vero omnia ad *legem jurisdictionis*.

(h) Thomassin. P. I. L. III. c. 30. & seq. Ejusmodi privilegia non nulla indicantur can. cum pro utilitate 34. XVI. q. 1. can. quam sit necessarium. 5. XVIII. q. 2. can. Luminoso. 6. ibid. Conf. Benedic. XIV. de Syn. diœces. lib. I. c. IV. n. 3.

§. 524. Quartum caput Episcopalis muneris refertur ad modum regiminis diœcesani exercendi: unde Abbates & Sacerdotes lege diœcesana subiectos ad Synodum venire per censuram compellit. c. 9. de M. & O. Nihil tamen in Synodo contra canones potest statuere. Ibid. Obedientiam suis Decretis præstandam etiam inflicta excommunicatione extorquet. c. 2. de M. & O. Libere inquit in scelera, de iis judicat secundum canones *absque impedimento alicujus*; & cum opus fuerit, invocat brachium seculare, non ad præjudicandum, sed potius ad ea, quæ Deo sunt placita, prosequendum. c. 1. h. t. Quovis diœceseos suæ loco pro tribunali sedere potest, & exequi ea, quæ ad ipsius spectant officium. c. 7. in 6. Clericorum excessus sic corrigere jubetur, ut & ipsi metu pænæ coerceantur, & alii pertimescant. Clem. 1. h. t. Et si mandato Papæ procedat ad executionem officii sui, per hoc tamen non sit Delegatus.

rus Papæ, sed proprio censetur jure procedere. c. 12. h. t. Quia tamen Papa aliorum juribus, nisi id exprimat, derogare non præsumitur; hinc jussus a Papa corrigere Clericos suæ diœcesis, jurisdictionem in exemptos ob id mandatum non acquirit c. 19. eod. Quomodo suppleat Ordinarius negligentiam inferiorum Prælatorum, dictum est §. 372.

§. 525. Intermedii inter Summum Pontificem, & Diœcesanos Episcopos gradus sunt Patriarchæ & Exarchi, Archiepiscopi Primates, & Archiepiscopi Metropolitani. Sunt quidam in Italia Archiepiscopi, unicum habentes Suffraganeum, alii nullum plane; meri honoris titulum ex privilegio Apostolico nacti, exemplo Synodi Nicænæ, quæ Episcopo Aeliæ, sive Hierosolymæ jus metropoliticum, sed meri honoris contulit. c. 7. dist. 65. Eadem honoris prærogativa a Concilio Chalcedonensi insignitus fuit Episcopus ejusdem civitatis Chalcedonensis Act. VI. & Episcopus Nicænus Act. XIII. De dictis gradibus univèrse notandum: I. Quod in canonibus definitum est, *Primates vel Patriarchas nihil juris præ ceteris habere, nisi quantum sacri canones concedunt, vel prisca illis consuetudo contulit ab antiquo: ita ut secundum Nicænas regulas sua privilegia servantur Ecclesiis, præterquam si Apostolica, Sedes antiquam Ecclesiam vel Rectorem ipsius, quolibet speciali privilegio decreverit honorare.* c. 9. h. t. II. Hoc sensu inter Sedem & Sedentem, inter antiqua privilegia Sedium, & merita Sedentium recte distinguitur. *Etsi enim diversa non nunquam sunt merita Præsulum; jura tamen permanent Sedium, ut ait S. Leo epist. 119. edit. Ballerin.* III. De juribus & privilegiis Sedium inhærendum est consuetudini inveteratæ, nequa existat perturbatio & justa que-

rela; hinc deciditur, nihil novi in causa subjectionis & obedientiæ attentari debere, possessore vel reo non citato. c. 8. de M. & O. & juxta rubricam c. fin. eod. compositio super jure Primatiæ ab uno solo, cujus interest, impediri potest.

§. 526. Patriarcharum jus ac potestas per plures provincias, adeoque supra Metropolitans, prius invaluit, quam nomen Patriarchale, quo insigniuntur. Origo repetenda est a Sedibus Petri, quas vel ipse fundavit per se, uti Romæ & Antiochiæ in Oriente, vel per discipulum suum Marcum, ceu Alexandriæ in Aegypto. Hæ quippe Ecclesiæ a B. Petro fundatæ sunt, & veraciter pro Patriarchalibus habendæ (i): accessit Patriarcha Constantinopolitanus, refragante diu Apostolica Sede, & Hierosolymitanus; quarum Sedium prærogativæ renovatæ sunt mutato ordine ab Innocentio III. c. 23. de privilegiis. Posteriore ævo Patriarchæ titulus concessus fuit quibusdam Primatibus, non aucto Primatum jure; tales sunt Patriarcha Venetus, Indicus, Lusitanus. Nicolaus I. Archiepiscopo Bituriensi, Aquitaniæ Primati titulum Patriarchalem concessit; quo spectat can. 8. IX. q. 3. Alii ex ruinis orientalium Patriarchatuum enati sunt, uti Armenorum, Cophtorum, Ruthenorum.

(i) Thomass. P. I. L. I. c. 7. a. n. XI. Nicolaus I. ad Consulta Bulgarorum. c. 9. 2.

527. *Exarchi* Patriarchis inferiores, aliis dignitate superiores Sæculo IV. dicti sunt, qui diocesium, id est, districtibus plurium provinciarum, præerant. In Concilio CLno I. can. 2. nominantur dioceses Asiatica, Pontica & Thraciæ, quibus præerant Exarchi Ephesinus, Cæsareensis, & Heracleensis. *Primates* dicti sunt fere, qui primas Sedes Episcopos-

scopales in aliqua natione obtinent; quos Romanus Pontifex olim Vicarios habuit. Plures sibi id nomen competere putarunt, quando nulli Metropolitæ erant subiecti, etsi nec ipsi aliquem subiectum haberent. In Africa Primates dicti sunt, qui reliquis unius provinciæ Episcopis præerant (uti locis aliis Metropolitanis) non dignitate civitatis, sed ordinationis ætate. Omnibus dein præeminebat Archiepiscopus Carthaginensis. *Archiepiscopi* quondam dicti sunt, qui plures sub se habebant Metropolitanos. Nov. II. Sunt quidam *Archiepiscopi* Primates, alii Metropolitanis, alii nomine & honore (§. 525.). *Metropolitani* dicti ab urbe Metropoli provinciæ, in qua residere iussi sunt, qui Episcopis ejus provinciæ præerant. can. 2. IX. q. 3. Sed mutata civili partitione visum non est Summis Pontificibus ad mobilitatem necessitatum mundanarum Dei Ecclesiam commutari, ut agebat Innocentius I. can. 1. dist. 10.

§. 528. De juribus & officiis Metropolitanarum præcipuæ decisiones sunt hæ: I. Suffraganeos Metropolitana lege sibi subiectos habent. c. 11. h. t. II. Non tamen præter canones insolitum obedientiæ iuramentum ab eis possunt exigere; secus Clerus Diocesanus iuste appellat. c. 13. de M. & O. III. Quæ regiminis sunt diocesani, Episcopi sua potestate arbitrioque disponunt; extra ordinem nil quidquam facere aggrediantur sine Metropolitanis, nec ipse sine reliquorum sententia. can. 1. & 2. IX. q. 3. IV. Episcopi non tenentur pro veteri more accedere ad Ecclesiam Metropolitanam, nempe extra Concilium provinciale, nequidem per procuratorem. Concil. Trid. Sess. XXIV. c. 2. de ref. V. In subditos Suffraganeorum Metropolitana nullam potestatem habet, nec invitos compellere potest ad suscipiendas dele-

gationes caufarum, quæ ad ipfum per appellationem devolutæ funt. c. 11. h. t. nifi extirpanda fit exiftialis quædam confuetudo, quæ altius, latiusque per totam provinciam radices egerit. c. 11. de fil. Presb. c. 3. de institut. c. 36. de Simonia. VI. Ad Metropolitanum fpectat, Concilium provinciale fingulis faltem trienniis convocare. Trid. Sefl. XXIV. c. 2. de ref. De appellationibus ad Metropolitam, ac de eorum vifitationibus agetur alio loco. De fupplenda ab ipsis negligentia dictum eft §. 373. feq.

§. 529. Prælatorum, qui funt infra Epifcopum, & Ordinarii nomine aliquando veniunt, tres fpecies diftinguit Benedictus XIV. de Syn. Diæc. lib. II. c. X. *Prima* eft eorum, qui certo præfunt generi perfonarum, exiftentium intra fepta alicujus Ecclefiæ, Monafterii, feu Conventus, cum paffiva exemptione a jurifdictione Epifcopi. Ejusmodi funt Superiores regulares, & nonnulli Prælati fedulares, qui una cum Ecclefiâ, ejusque Ecclefiæ Clericis & adminiftris, quibus præfunt, immediate Romano Pontifici fubjiciuntur. *Secunda* fpecies eft Prælatorum, habentium jurifdictionem activam in Clerum, & populum in certum locum, qui tamen locus eft infra Epifcopi Diœcefin, a qua undique circumfcribitur. Ejusmodi Prælati improprie tantum, & late dicuntur efle *Nullius*. *Tertia* fpecies eft Prælatorum, qui jurifdictionem activam habent in Clerum & populum alicujus locis feu oppidi, aut plurium locorum, & oppidorum, quæ omnino evulfa & feparata funt a cujuslibet Epifcopi diœcefi, quapropter dicuntur conftituere quandam *quafi diœcefin*; ubi Prælati, iis exceptis, quæ funt Ordinis Epifcopalis, omnia exercet, quæ ceteroquin ad Epifcopalem jurifdictionem pertinent; dicuntur vere & proprie *Nullius*;

Nullius ; & veris annumerantur locorum Ordinariis (k).

(k) *Caute distinguendas esse has species, & veluti gradus jurisdictionis ordinariæ in Prælati inferioribus, distinxit docet Benedictus XIV. constit. 76. Apostolicæ servitutis. T. I. Bullar. & const. 33. Inter multa. T. II. Bullar.*

TITULUS XXXII.

DE OFFICIO JUDICIS.

ARGUMENTUM.

I. Officium judicis aliud nobile, aliud mercenarium dicitur. §. 530. II. Judex litiganti providere de advocato aliquando debet. §. 531. III. Imploratio officii judicis sæpe fieri debet cum contestatione litis. §. 532.

§. 530. Judex est persona publica, ad id ordinata, ut secundum leges, & consuetudines locorum jus dicat, nempe ex officio, quod duplex est, Nobile, & Mercenarium. Ex officio nobili procedit judex primo si non adactus a partibus, non rogatus, motu proprio quidquam facit e. g. inquirendo in crimina; secundo si ad implorationem partis, actionem non habentis, procedit. Actio supponit jus ex parte agentis, & debitum seu obligationem ex parte ejus, contra quem agitur. Princ. Inst. de Act. At qui judicis officium implorat, jus proprie non præten- dit, sed æquitatem, ob quam judex succurrere potest, & aliquando debet, velut si pars litigans petit advocatum, minor læsus restitutionem in integrum, filius alimenta a patre, condemnatus restitutionem ob errorem facti. Hæc officii imploratio est remedium extraordinarium; quod non competit, nisi cum ordinarium actionis remedium deficit. arg. l. in cau-

ſæ. 16. D. de minorib. *Officium mercenarium* eſt, quod actioni deſervit, aut vi cujus judex ad inſtantiã partis, actionem proprie dictã proponentis, facit eã, quæ juris ſunt; non enim judex ſe immiſcet litibus non imploratus, niſi bonum publicum expoſcat (a).

(a) *Elegans in hanc rem eſt commentatio viri clariff. Zech de Judiciis Eccl. Sæc. I. Tit. III. §. 33. „Hæc diviſio officii nobilis & mercenarii videtur pertinere ad reliquias veteris juris formularii; ubi judices a Prætore dati ex certâ formula, a cujus vocibus vel ſyllabiſ abſcedere piaculum erat, juſ dicebant. — In illis cauſis, ubi abſque violatione SS. Canonum, aut honeſtatiſ publicæ, de mere temporali privatorum commodo agitur, facile concedo, quod judex officium ſuum pro ſuſcitanda lite interponere non debeat, niſi interpellatus; cum partes ſuo juri renuntiare poſſint, & clerici ex decentia ſæpe debeant ex monito Apoſtoli. At vero ſi lis introducta, & auctoritas judicis pro ea definienda jam implorata eſt; vix tolerandum, multo minus præcipiendum videtur, ut judex pendente lite injurias continuari, tempus litis prolongari, variis artibus innocentem ſimplicitatem circumveniri, quiete & ſomnolenter aſpiciat, donec ad ſingulos actus judiciales clamore partiſ oppreſſæ excitetur, & ad ſuſgendum munere ſuo compellatur. Conſonat can. 11. XXX. q. 5. — Communis regula, quod judex non interponat officium, niſi requiſitus, varias patitur limitationes, ſcilicet ſi concurrat favor publicæ utilitatiſ; — ſi agitur de cauſis piis & privilegiatiſ alimentorum, dotium, piorum legatorum, perſonarum miſerabilium &c. ſi ſint perſonæ, quæ neſciunt, aut nequeunt ipſum officium implorare, quales ſunt pupilli, abſentes, pro quibus judex ipſe tenetur ſupplere; fallit etiam in iis, quæ ſunt nota judici, ut judici; quæ ſcilicet conſtant ex actiſ; aut quæ ſunt juris; aut ubi æquitas id exigat, aut quando judex interponit officium ſuum ad concordiam partiũ inducendam.“*

§. 531. Secundum dicta & adnotata deciditur
c. 1. h. t. Si pars litigans idoneum advocatum habere

bere non potest ob paupertatem, adversarii potentiam, aliamve causam, judex five ordinarius sit, five delegatus, ex officio illi providet, etiam de domo sua, aut familiaribus. Adde l. 1. §. ait Prætor. 4. D. de postulando. l. providendum. 7. C. eod. ubi attendere jubetur judex, ne pro una parte peritissimi advocati sint, pro altera rudes, aut minus versati.

§. 532. Deciditur c. 2. Si officium judicis principaliter imploratur *contra certam personam*, & *necessaria sit cognitio causæ*, tum post exhibitum libellum fieri debet litis contestatio. Hæ conditiones non adsunt, si minor petat se restitui ex adita hereditate. Auth. si omnes. C. Si minor ab hered. abstin. vel in causa notoria, si filius a patre alimenta petat. l. nequidquam. 9. §. de plano. 3. D. de officio Procons. In his opus non est contestatione litis; uti nec tum, si officium judicis ante vel post litis ingressum incidenter imploratur, e. g. si advocatus a judice dari, aut ab adversa parte amoveri petatur; aut si allegetur error facti, per quem necessaria probatio intermissa est. c. 3. de in int. restit.

TITULUS XXXIII.

DE MAJORITATE, ET OBEDIENTIA.

ARGUMENTUM.

I. Gradus in Ordine & Jurisdictione generatim spectantur.

§. 533. II. Ex iis pendet forma status Ecclesiastici.

§. 534. III. Est jus quoddam ceremoniale Ecclesiasticum. §. 535. seq.

§. 533. Concluditur hoc titulo tractatio de *Jure personarum*, quarum *Hierarchia* gradus continet

Majorum, & subditorum, Imperantium, & obtemperantium: Christus in Apostolis & pastores instituit, & rectores; cura pastoralis requirit sacros Ordines: potestas rectoria jurisdictionem; hinc duplex distinguitur Hierarchia, *Ordinis*, & *Jurisdictionis*. I. In Hierarchia Ordinis a gradu infimo *ascenditur* ad culmen Sacerdotii (§. 382. seq.): in Hierarchia Jurisdictionis a Summi Pontificatus apice *descenditur* ad infimum gradum eorum, qui jurisdictionem habent in foro tantum interno vel ex officio, vel ex delegatione II. Uti in Ordine gradus superior non tollit inferiorem, sed elevat; sic in Jurisdictione, qui Episcopus est, idem eminenter parochus proprius: qui Metropolita, idem & Episcopus in sua diœcesi: qui Primas, idem & Metropolita, & Episcopus: qui Patriarcha, idem & Primas, & Metropolita, & Episcopus: qui Summus Pontifex, seu Pastor universalis, supremus & ordinarius, idem Patriarcha totius Occidentis; Primas Italiæ, Metropolita provinciæ Romanæ, Episcopus diœceseos Romanæ: denique Princeps, supremo temporali in Pontificio statu præditus imperio. Neque enim principatus sacer & temporalis, baculus pastoralis aut pedum, & gladius inter se pugnant; quod contra Wiclefitas & Hussitas definitum est. III. Gradus Ordinum inferiorum instar viæ & præparationis, probationisque ad majores Ordines suscipiendos hodie potissimum observantur; voluit tamen S. Concilium Tridentinum, ut eorum exercitium publicum, quantum fieri potest, in usum revocetur. Sess. XXIII. c. 17. de ref. IV. Valor actuum Ordinis utique a materia & forma pendet (§. 399.). Legitimus tamen, & licitus usus potestatis Ordinum legibus subjacet; nec dici potest cum Febronio, quod Jurisdictionem Episcopalem ab Ordine separare, *dilaceratio fit*

fit Episcopalis dignitatis, a Christi instituto aliena, easque dissociare & inter se quodammodo discindere sit piaculum. Fieri enim honeste potest, ut quis Episcopatu cedat; ac tum jurisdictio, cui cedens renuntiat, sejungitur ab Ordine. Patres Nicæni & Africani Episcopos a schismate redeuntes ad catholicam unitatem in gradum simplicis presbyterii receperunt. Depositione character & potestas Ordinis non extinguitur; at jurisdictio penitus aufertur.

§. 534. Cognita accurate Hierarchia, ejusque gradibus distincte exploratis *de forma Imperii, & Status Ecclesiastici* primum inquire, ac decidi potest (§. 85.) hoc modo: I. Subjectum potestatis Ecclesiasticæ generatim est Clerus, inde a primis Ecclesiæ temporibus distinctus a laicis. II. In Clero Episcopi jure divino Presbyteris majores sunt potestate Ordinis & Jurisdictionis: Presbyteri ministris. III. Potestas publica & rectoria in Ecclesia divino jure competit Episcopis: in Episcopis divino jure eminent Romanus, nempe Successor S. Petri, non Ordine, sed auctoritate, potestate, jurisdictione suprema, universali, & ordinaria. IV. Episcopi divino jure adstringuntur ad servandam cum Successore Petri consensionem in fide, communionem caritatis, subjectionemque: Successor autem Petri vi primatus eos ad id obligare, aptisque mediis compellere potest; in quo eadem vis & ratio Primatus maxime sita est. V. De clavibus Ecclesiæ, quatenus maxime respiciunt potestatem publicam & rectoriam, recte dicitur: *Datæ sunt uni, & unitati*; neque propterea dispar aut duplex subjectum clavium concipi debet; quia *unus non excludit unitatem*, imo hanc attrahit, sibi que adstringit, ac divina curante Providentia semper adhaerentem habet in magno factem Episcoporum

rum numero; & quia unitas (Episcoporum) *includit unum*, nempe Successorem Petri, tanquam centrum unitatis; Christus enim Ecclesiam non fecit acephalam, sed ei suo nomine præfecit caput visibile. VI. Hinc *forma Status Ecclesiastici* dicenda est *monarchica temperata per Aristocratiam limitatam*. Conf. J. E. P. §. 362. pag. 139.

§. 535. Præter Ordinis & Jurisdictionis potestatem in Hierarchis, seu Episcopis, eorumque Vicariis, Officialibus, Delegatis, & universo Clero distinguere oportet certos *gradus honoris*, & prærogativas aliorum præ aliis. Hæ sitæ sunt 1. in Insignibus dignitatis: 2. in titulis honoris: 3. in certis ritibus, quibus honorantur præ aliis tum in obeundo divino cultu, tum extra Ecclesiam: 4. in proædria, seu jure præcedentiæ. Atque in his maxime situm est *jus ceremoniale sacrum*; quod spectatur tum in singulis personis physicis, tum in moralibus, sive in corporibus, in quæ divisa est Hierarchia Ecclesiastica, quasi concretive spectata.

§. 536. Dices. Hoc jus ceremoniale ambitionem sapit, & fastum nutrit. R. Haud quaquam per se; sed fortassis hominum vitio; alias etiam Hierarchia cælestium Ordinum, graduumque, cujus exemplum & imitationem Ecclesiastica Hierarchia refert, ambitionem saperet; imo ad præcavendam æmulationem, ambitionemque privatorum debuit introduci ordinis & proædriæ lex. Omnia enim honeste & ordine fieri debere, primis Ecclesiæ temporibus docuit Paulus. I. Cor. XIV. 40. conf. Gratianum can. ult. dist. 89. & dist. 93. per tot. Idque in omni regimine necessarium est. arg. tit. *Ut dignitatum ordo servetur* in cod. Theod. l. VI. tit. V. in Justinian. l. XII. tit. VIII.

§. 537. Regulæ de prædria sunt: I. Si unus Ordo cum alio concurrat, ac neutri adhæreat jurisdictio, vel in considerationem non veniat, Ordo major præfertur minori. c. 15. h. t. can. 14. dist. 93. II. Si par utrobique est Ordo, spectatur ætas ordinationis. c. 1. h. t. can. 7. dist. 17. Trid. Sess. XXIV. c. 2. de ref. nisi agatur de eo, qui fuerit ordinatus a Papa. c. 7. h. t. junctis c. 7. & 12. de præb. in 6. III. Si & Ordo & jurisdictio æqualis, senior præfertur juniori, nisi inæqualia sint ornamenta dignitatis; nam inter Abbates Ordine & jurisdictione pares mitrati non mitratis regulariter præferuntur. c. 6. de priv. in 6. IV. In jurisdictione diversi generis, jurisdictio externi fori præfertur jurisdictioni interni, criminalis civili, ordinaria mandata.

§. 538. De ordine inter minora corpora Hierarchiæ observandum, summo divisionis genere Clerum dici secularem vel regularem; ac in regulari quoque Hierarchicum ordinem spectari. Regulæ sunt I. In publicis ministeriis aut supplicationibus corpus ministrorum etiam inferiorum, si vestibus sacris & solemnibus sunt induti, præcedunt Canonicos, aliosque digniores, communi vestitu utentes. II. Clerus secularis, si conjungitur cum suo Capite, id est, Episcopo, præcedit regularem: inter ipsos Clericos seculares viciniore Episcopo sunt Capitula Ecclesiæ cathedralis: dein Collegiatarum. III. In clero Regulari, spectato ordine Hierarchico, primi sunt Canonici, dein Clerici regulares: sequuntur Monachi, demum Mendicantes. Ceterum de jure Episcopi, componendi omnes controversias de præcedentia, quæ sæpe cum scandalo oriuntur inter Ecclesiasticas personas, tam seculares, quam regulares, agit S. Concil. Trid. Sess. XXV. c. 13. de Reg. Eadem

Eadem Sess. in fin. sub titulo de loco Oratorum renovatur mos antiquus protestationum, ne ex facto jus alicui acquiratur.

TITULUS XXXIV.

DE TREUGA, ET PACE.

TITULUS XXXV.

DE PACTIS.

ARGUMENTUM.

- I. Explicatur ordo inter præcedentes & sequentes titulos §. 539. II. Notitia de Treuga & pace. §. 540. III. Notio pacti: spectanda in paciscendo voluntas, jus seu facultas, & objectum, nempe res & facta. §. 541. IV. Effectus pacti. §. 546. V. Pupillus sine auctoritate tutoris paciscens an obligetur. §. 547.*

§. 539. Reddenda est primo ratio connexionis, ordinisque titulorum usque ad finem libri I. Decretalium. Sunt hi velut medii, & intercalares inter tractatum de personis & iudicibus ecclesiasticis, de quibus hactenus actum est, & inter doctrinam de iudiciis, a quibus orditur liber secundus. Antequam nempe ad strepitum & pericula fori contentiosi, vel, ut inter nobiles, ad vim & arma veniatur, tentanda est compositio litis per inducias, pacem, pacta, transactiones, & arbitros. Cum autem arbitrium poscat causam instructam; quod fit per advocatos, procuratores & syndicos; de his etiam disciplina juris hoc loco traditur. Et quia occasione postulationis, quæ fit per advocatos, & ob acta a procuratoribus ac syndicis non raro ad restitutionem in integrum

tegrum recurrendum eſt; hæc etiam exponitur tum generatim, uti ex officio judicis conceditur variis ex cauſis, tum ſpeciatim, ſi per modum actionis petitur ex cauſa vis metusve, aut ob alienationem in fraudem alterius factam. Hæc eadem in digeſtis ante exponuntur, quam libro quinto demum agatur de judiciis; & ubi quisque agere vel conveniri debeat.

§. 540. *Treuga*, ſeu *Trevia*, *Tregua* a Germanico vocabulo *Treu*, quæ fidelitatem ſignificat, eſt ſecuritas præſtita perſonis, diſcordia nondum finita. *Pax* vero eſt ſecuritas rebus & perſonis præſtita, diſcordiæ finem imponens. Canones huc pertinentes editi ſunt turbulentis illis temporibus, quo viri nobiles, aut non habentes forum ſatis competens, in quo lites ipſorum deciderentur, aut illud aſpernantes, ſibimet vi, & armis, rapinis & incendiis jus dicebant, & injurias ulciſcebantur; modo præceſſiſſet diſfidatio, ſeu indictio violentiæ imminentiſ, & provocatio, vulgo *fehden*, *befehden*, *befehdung*. Unde ipſa hæc bella privata nominabantur voce barbara *ſaida*. Cum iſta corruptela penitus tolli non poſſet; quod Episcopii in ſynodis ſæpe tentarunt, duo moderationis remedia conſtituta ſunt; primo ut ſacrationibus quibusdam diebus omnes omnino a vi & armis abſtinerent; quæ *Treuga Dei* dicta eſt. *Secundo* ut perſonæ quædam armis non aſuetæ, earumque res perpetua ſecuritate, ſeu *pax* gauderent. c. 1. & 2. In Germania lues bellorum privatorum, & *jus manuarium* a ſeculo nono jam invaluerat. Temperavit id Carolus IV. in Bulla aurea C. 17. Extinxit demum Maximilianus I. per *Pacem Publicam* in comitiis Wormatiensibus anno 1495. conſtituto ſimul executionis modo contra reos fractæ pacis, & erecto Judiciæ Camerali, coram quo

quo singuli status causas suas agerent, jure terminandas, ut necesse non haberent armis experiri. Ex omnibus, quæ dicta sunt, patet, totum id ad supremos Principes, qui jure belli gaudent, nequaquam pertinere (a).

(a) *Controversiæ, quas integrum regnum aut rex cum suis proceribus adversus jura Sedis Apostolicæ intentat, aut querelæ plurium Episcoporum, ac cleri unius nationis adversus alios e. g. Religiosos mendicantes, non instar privatæ litis, sed veluti privati belli spectari possunt; quia fere cum magna perturbatione ac scandalo fidelium conjunctæ sunt. Hinc ad istum titulum duæ extravagantes inter communes fuerunt relatæ; altera de Sanctione Pragmatica Gallicæ, altera de querelis plurium Episcoporum Germanicæ contra Fratres mendicantes. Sanctio Pragmatica in Concilio Later. V. initis concordatis abrogata est: querelas illas mitigavit dies, & usus contrarius.*

§. 541. *Paçtum a paçtione dicitur; & inde etiam pacis nomen appellatum est; & est paçtio duorum vel plurium in idem placitum consensus, appellaturque conventio, quasi ex diversis animi motibus in unam sententiam convenirent; sive, quod in idem recidit, est promissio acceptata. l. 1. §. 2. & 3. D. de Paçtis. Nudum ergo propositum mente conceptum, vel ejus assertio, tractatus item, seu ut ajunt, negotiationes paçtitæ, paçta non sunt. Promissio facta Deo de meliore bono, dicitur votum; unde cum lege tam naturali divina, quam positiva vel præceptum vel propositis præmiis suafum sit id, quod de meliore bono dicitur, de acceptance promissi Deo facti dubitari non potest. Pollicitatio est solius offerentis promissum, sive promissio non acceptata; quæ facta Ecclesiæ vel reipublicæ ex justa causa actionem producit. l. 3. aliisque D. de pollicitationibus. In Paçtis, uti in omni genere obligationum, quæ propria*

pria voluntate contrahuntur, spectari debet I. *Voluntas*, seu consensus. II. *Jus*, seu facultas moralis. III. *Materia*, seu id, quod in pactum deducitur, nempe facta, aut non facta, & res.

§. 542. I. *Voluntas* faciendi aut dandi seu generatim præstandi aliquid vel *absoluta* est, vel *alligata conditioni, modo, diei seu tempori*. In his non tam doctrina juris, quæ clara est lumine rationis, quam proprietas verborum discenda est. *Conditio* vere propriæque talis, in futurum & incertum eventum conjecta, *suspensiva* dicitur: ea pendente neque cedit dies, neque venit. l. 123. D. de V. O. id est, neque obligatio reipsa oritur: neque peti potest, quod in pactum deductum est: producit tamen spem, *debitum iri*, & ad hæredes promissarii transit. l. 8. Pr. D. de peric. & commod. rei vend. §. 4. J. de V. O. & §. 25. J. de inutil. stip. *Conditio* existens retrahitur ad initium actus gesti. l. 78. pr. de V. O. l. 18. D. de R. J. Si deficit, conventio retro nulla est. l. 37. D. de contr. empt. *Conditiones* improprie tales sunt intrinsecæ, de præsentî, de præterito, impossibiles natura vel jure. Pactum sub *conditione resolutiva* mox obligationem producit, sed existente conditione retro nullum est. l. 19. D. de usurp. l. 6. §. 1. D. de divers. temp. præscript. *Modus* vel *gravamen* est clausula actui benefico adjecta, quæ illi, in quem beneficium confertur, quidquam agendum, vel non agendum præscribitur; non suspendit obligationem; neque ejus vim ipso jure resolvit, si non impletur; actionem tamen ad implendum parit. l. 17. §. 2. l. 44. de manumiss. vind. A modo non multum differt pactum contractui adjectum. *Dies* omnino incertus quoad questionem, *an* exiturus sit, pro conditione habetur. l. 75. D. de cond. & dem.

Si dies est certus, *ex die* promittitur, *vel in diem*: priore casu statim cedit dies, sed non venit, nisi tempore lapso l. 213. D. de V. S. posteriore cedit & venit dies, sed tempore lapso expirat l. 52. in f. D. de pact. perinde fere, ac in conditione resolutiva. Ceterum consensus verbis, aliisque signis declarari potest, aut factis; priore casu pacta sunt *expressa*, altero *tacita*. l. 2. pr. & §. 1. D. de pact. Et qui consentire non possunt, ii nec pacisci.

§. 543. II. Ad vim pacti requiritur jus & facultas moralis disponendi de eo, quod in pactum deducitur: hinc qui liberam non habent rerum administrationem, nec pacisci possunt de patrimonio, seu *minores* l. 3. C. de in int. rest. & *prodigi*. l. 40. de R. J. Sæpe ea facultas alligata est consensui Superioris; cujus ratihabitio superveniens pactum firmat. c. 2. h. t. Monachi habentes liberam a Sede Apostolica sepulturam tenentur servare pactum cum Parochis initum de non recipiendis aliquibus vel certis parochianis; licet hi apud eos elegerint sepulturam. c. 1. in 6. quia possunt renunciare juri suo. C. 3. ib. deciditur, ad vim pactorum a Mendicantibus cum Parochis initorum, si honesta sint, non requiri consensum Sedis Apostolicæ, Ministri generalis, vel Provincialis, aut Capituli provincialis. Ex hoc loco patet, pacta in præjudicium tertii, vel juris publici non valere.

§. 544. III. Materia pactorum sunt res vel operæ præstandæ, sive res, & facta vel non facta. Sunt res quædam extra commercium positæ; aut dispositionem privatorum. l. 38. §. 5. de V. O. aut facta turpia, seu legibus prohibita; quæ non censentur in pactum cadere. C. fin. h. t. irritæ declarantur.

tur omnes pactiones privatorum de beneficiis, pactiones simoniacæ, turpes seu impossibiles jure aut factò. Non valet pactum de succedendo post mortem Prælati in ipsius Ecclesia. c. 5. Qui per pactum augendæ pensionis, consecutus est Ecclesiam, debet ea privari, & alias canonice puniri. c. 6. Si Rector Ecclesiæ locat domos, & concedit feuda, adjecto pacto, ut conductores & feudatarii decimas locanti vel infeudanti solvant; tale pactum in præjudicium Ecclesiæ parochialis non valet; & quidquid ea conditione perceptum est, restitui debet c. 7. Jure Germanico & Canonico (aliter Romano) turpe non censetur pactum a filia initum cum patre, cum nuptui traderetur, ut dote contenta nullum habeat ad bona paterna regressum; præsertim si id per juramentum firmatum est non vi, nec dolo præstitum. c. 2. in 6.

§. 545. In his sita est ratio generica pacti, quæ omnibus contractibus inest; ex iisdem jure naturali resultat vis pacti, nempe effectus juris, id est, *obligatio*, si est pactum *obligatorium*: aut ejusdem extinctio, si est *liberatorium*. l. 6. D. de pact. Si ea obligatio utraque ex parte producitur, vocatur pactum *bilaterale*: si una tantum ex parte, ut quis alterum sibi obligatum habeat, sine mutua obligatione sua, *unilaterale*. Jure naturali & gentium solemnitate verborum ad vim pacti opus non est. Hinc *verborum obligatio*, quæ nempe verborum solemnitatem poscit, non juris gentium, sed Romani contractus est, & maxime *stipulatio*, quæ est contractus unilateralis, quo quis ad alterius interrogationem, congrue & in continenti respondendo ad dandum, aliquid, vel faciendum, quod alterius interest, obligatur. De stipulationibus per titulos plures agitur in Instit. lib. 3. Jure Canonico & Germanico inter stipulationes, & pacta nihil discriminis est.

§. 546. Effectus pactorum immediatus, & a jure naturæ descendens est obligatio præstandi, quod promissum est: ei respondet jus exigendi implementum promissionis; cui non satisfit, etiam in casu promissi facti, præstando id, quod interest (b). Hac supposita naturali obligatione pacti, tanquam effectus secundarii sunt, quod solutum, ab ipso debitore repeti non possit: quod locum habeat compensatio, fidejussio, aut constitutio debiti, novatio, seu prioris obligationis transfusio in aliam, receptio & detentio pignorum; quæ omnia intelligi non possunt, si nulla ex pacto, ne naturalis quidem, & pro foro interno orta est obligatio. Si huic naturali obligationi assistunt leges, concedendo actionem, seu jus exigendi in judicio id, quod promissum est (quod non semper fit), tum ea obligatio appellatur *naturalis & civilis simul*. Romani ex pacto nudo non dabant actionem, sed tantum exceptionem. *Nudum* vocabant, quod intra solos conventionis fines consistit; *non Nudum*, quod in legibus obtinuit speciale nomen, vel quod habet causam (quando scilicet ex parte unius jam est impletum), aut quod contractui in continenti adjectum est, vel denique speciali legis assistentia & juris favore gaudet; quale est pactum promissæ dotis, constituti &c. quæ pactorum genera vocari solent *legitima*, & pariunt *condictionem ex lege*. Jure Canonico, & moribus Germaniæ omnia pacta actionem producant (quæ dici potest *condictio ex pacto*, vel *condictio ex moribus*) c. 1. & 3. h. t. conf. Stryck. de U. M. Pandect. ad tit. de Pactis.

(b) L. 1. pr. D. de Pactis. ibi: „Quæ enim tam congruum fidei humanæ, quam ea, quæ inter eos placuerunt, servare? Promissionis & Pacti naturalem obligationem non agnoscit Franc. Conmanus Comment. Jur. L. 1.

L. 1. C. 6. n. 11. seq. Et L. 5. C. 1. n. 4. Ad inducendam obligationem Conmanus requirit synallagma, id est, mutuum factum obligatorium; sed merito rejicitur a Grotio de J. B. Et P. 2. c. 11.

§. 547. Celebris est disputatio de pupillo, qui sine tutore auctore contrahit, utrum spectato jure Romano obligetur saltem naturaliter. Nam præciso eo jure, si sufficienti intellectu pollet, certe obligatur jure naturali; a quo, si lex positiva est dubia, recedendum non est. Sed leges Romanæ, quæ pugnare videntur, apte conciliantur (quod fieri necesse est, si locus datur) adhibita distinctione inter pupillum infantia & pubertati proximum, ut hic quidem, non item ille naturaliter obligari censeatur; neque hæc distinctio arbitraria est, sed fundatur in Jure. §. 9. Inst. de inutil. stip. Porro pupillum (pubertati proximum) naturaliter obligari, aperte asseritur l. ult. D. de jurej. & ibi Brunneman. In contractu pupilli locum habet fidejussio. l. 127. D. de V. O. & l. 95. §. 4. D. de solut. item novatio. l. 1. D. de novat. Hæc intelligi non possunt sine naturali obligatione pupilli. (§. 546.). Dein debitum a pupillo contractum legari potest. l. 25. §. 1. D. quando dies legat. Præterea pecunia a pupillo soluta imputatur in falcidiam, tanquam debitum hereditarium. l. 21. D. ad leg. Falc. juncta l. 76. ibid. Dicunt: Quod pupillus solverit, id repeti potest: l. 41. D. de cond. indeb. ergo non obligatur naturaliter arg. 10. de O. & A. R. d. a. si solverit ex causa stipulationis a se interpositæ, tum potest repetere, t. univ. potest repetere, n. Pupillum univ. repetere non posse, manifeste indicatur l. 64. D. ad SC. Trebell. ibi: *Si ejus mihi restituta sit hereditas, qui pupillo sine tutoris auctoritate crediderit; si sol-*

verit mihi pupillus, non repetet; at si heredi solverit, repetet, non repetiturus, si ante restitutionem solvisset. De stipulatione a pupillo facta sic animadvertit Joan. Schilterus Exercit. XXXIV. circa curatelas & tutelae: Posita obligatione naturali, etsi non detur actio, datur tamen exceptio, & negatur debiti repetitio. Circa stipulationem pupilli (cit. l. 41. D. de cond. ind.) exceptio est: nam jure Romano stipulatio est certa verborum conceptio & quidem solemnitas, ac firmissimum juris vinculum; hinc a solo pupillo peragi non poterat. Recte, ni fallor, auctor sentit: quia enim jura obligationem civilem detraxerunt contractibus pupilli sine auctore tutore initis; non poterant probare stipulationem pupilli; quæ ad omnes obligationes naturales in civiles transfundenda apud Romanos inventa fuit.

TITULUS XXXVI.

DE TRANSACTIONIBUS.

ARGUMENTUM.

I. Requisita ad transactionem. §. 548. II. Ut valida sit, spectatur voluntas transigentium, jus transigendi, & transactionis materia. §. 549. Vis & effectus. §. 552.

§. 548. *Transactio* est conventa decisio rei dubiæ, & controversæ aliquo retento. Fit ergo I. conventionem partium in judicio vel extra judicium. II. Non gratuito, sed aliquo dato, aliquo retento (a): unde requiritur jus dandi, seu alienandi (quia transactio est species alienationis), & jus seu potestas de objecto disponendi. III. Requiritur res dubia, & lis incerta; non *copulative*, ut Zæsius vult ad hunc tit. D. n. 14. Hæc instar axiomatum sunt.

(a) *Li-*

(a) *Liquet enim, neminem unquam petiisse ab altero transigendi gratia, totum id, de quo disceptatur; ut inquit SS. D. N. Pius P. VI. in literis præfixis Responsioni ad Metropolitanos Germaniæ.*

§. 549. Conventio pendet a voluntate partium; iudex transactionem suadere potest, atque etiam debet; ut patet ex Recept. J. N. §. 110. non autem in causa liquida, aut si jura partium valde inæqualia sint, vel ob id tantum, ne alteram partem offendat sententia sua: compellere ad transigendum non potest, nisi quies publica exigit. Conventio autem a partibus fieri potest pacto nudo, contractu innominato, stipulatione, cum vel sine scriptura, adjecta pœna conventionali, jurejurando, in judicio vel extra judicium. Conventioni obest gravis & injustus metus, item dolus, aut falsitas instrumenti ab altera parte propositi, vel occultatio veri instrumenti. Transactio de re certa alias res, de quibus actum non est, non comprehendit. l. 15. C. h. t. & universe non extenditur ad ea, de quibus tempore transactionis cogitatum non est; etsi generalibus verbis concepta sit (b); nam relate ad talia deest conventio, & voluntas. Specialiter decifum est, ut, si transactio fit a Prælato cum consensu Capituli in causa Ecclesiæ vel monasterii, Capitulum consensum aliquando præstitum revocare nequeat.

(b) *Id usum habet in administratoribus pecuniæ publicæ, quorum rationes in multis sæpe articulis non liquidæ comprehenduntur; in ta transactione impetratur liberatio; sed quæritur, utrum ea plena sit, nec ne. conf. Schilter. in Prax. Jur. Rom. in for. Germ. T. I. exercit. 9. & Leyser. Specim. 46.*

§. 550. Quia jus & potestas disponendi de eo, de quo transigitur, necessaria est; hinc l. privati clerici

clerici de beneficiis Ecclesiasticis transigere non possunt sine auctoritate Ecclesiastica c. 7. h. t. *si gratis & amicabilem inter se litigantes componant, sacris Canonibus nequaquam dicimus obviare.* II. Ad ea, quæ ex divina lege certam formam vel obligationem habent, ceu Sacramentum matrimonii, & alia ejusmodi, transactio non se extendit. c. fin. h. t. non magis, quam si disputantes de natura, vellent transigere de sanguinis circulatione, aut motu solis circa terram, vel terræ circa solem. III. Transactio, vel contractus quiscunque super juribus & redditibus Ecclesiæ aut beneficii a beneficiato vel rectore Ecclesiæ initus absque Superioris auctoritate, ejus vitam non excedit, neque Ecclesiam vel successores obligare potest. c. 8. IV. Ex defectu juris & liberæ rerum administrationis transigere non possunt pupilli & minores sine auctoritate tutorum & consensu curatorum; neque hi, nisi cum jus pupillorum & minorum valde obscurum & dubium est, & nisi interponatur Decretum judicis, quando res immobilis, aut mobilis pretiosa in adversarium transferenda est. l. 22. C. de administr. tutor. V. Ex eadem ratione transigere non potest Procurator ad agendum & defendendum datus sine speciali mandato: neque Prælati Ecclesiastici sine consensu Capituli & aliis solemnitatibus pro casu, quo alienatio esset prohibita & noxia; quemadmodum exponitur ad tit. de alienat. rer. Eccl.

§. 551. Si materia apta, seu objectum transactionis deficit, nec jus transigendi concipi potest; fit tamen aliquando, ut quantumvis res transactionem natura sua admittat, jus transigendi desit; uti patet ex §. præc. hinc ista duo recte distinguuntur. Materia transactionis apta non est, I. nisi dubia, aut liti obnoxia (§. 548.); sive lis mota jam sit, sive immi-

immineat: imo transigi potest, etsi pro una parte sententia jam lata sit, si appellationi sit locus, aut concessa sit, vel concedi possit restitutio in integrum. Boehmerus de Actionibus Sect. II. C. V. §. 27. in notis ait, sustineri hodiernis moribus transactionem etiam post rem judicatam contra l. 23. §. 1. D. de cond. indeb. II. Materia apta non est res spiritualis, si pro ea detur, aut remittatur temporalis; ceu pro jure patronatus c. 9. super subjectione spirituali c. 10. h. t. super decimis spiritualibus. c. ult. de rerum permutat. super beneficio Ecclesiastico litigioso c. 7. h. t. c. g. si unus litigantium dubium jus in beneficio habeat, & alter det, vel promittat certam pecuniæ summam, aliudve pretio temporali æstimabile. Talis enim transactio nec partium conventionem, nec judicis auctoritate fieri potest; uti omnes tenent ex tit. de Simonia. Si tamen uni litigantium parti super beneficio, temporale quidpiam e. g. unius aut duorum annorum redditus designentur, non in compensationem dubii juris, sed ob aliam causam, & nominatim ob bonum pacis & concordiae, non debet id tanquam simoniacum damnari, si judicis Ordinarii, aut Delegati auctoritate fiat; quamvis caute agendum sit, ne simoniacæ pactiois affectus admisceatur. c. 2. de arbitris. c. 21. de præb. Si talis transactio a partibus habuerit initium, merito reprobat c. 4. de pactis. III. In jure civili ad hunc locum disputant, anne super causa criminali transigi possit, quo modo feuda oblata initium habuisse docent (c). de litibus testamentariis, an transigi queat, non inspectis tabulis; id quod non prohibitum fuisse a Jure, sed diffusum, docet Heineccius in Pandectis ad h. t. §. 379.

(c) Zech de Judiciis Eccl. Sect. I. tit. 9. §. 110. Et seq. Ne super alimentis in testamento relictis sine auctoritate judicis transigatur, ostenditur ib. §. 109.

§. 552. *Effectus & vis transactionis bona fide & sine dolo factæ ea est, ut pariat exceptionem rei judicatæ, & impediatur ingressum novæ litis, neque instrumentis postea repertis rescindatur. c. 1. h. t. l. 19. C. eod. imo ut neque per rescriptum Principis impugnari possit. l. 16. C. eod. modo utraque ex parte transigentium actum sit bona fide; quo modo conciliari possunt leges, quæ sibi videntur oppositæ, nempe l. 78. §. ult. D. ad SC. Trebell. & l. 9. §. 1. D. ac l. 42. c. C. h. t. Quia tamen minores adversus transactionem in integrum restitui possunt, arg. tit. Cod. Si adversus transactionem. putant aliqui, enormi læsione probata rescindi posse transactionem. At enim si bona fide actum est: si res in se dubia vel litigiosa fuit; non apparet, quomodo læsio probari possit. Ajunt, in casu enormis læsionis res ipsa in se dolum habet l. 36. D. de V. O. R. 1. ut supra, negando, ex solo eventu læsionem inferri posse; uti nec in contractibus aleatoriis potest. 2. Dolus qualitate facti, non quantitate pretii æstimatur. l. 10. C. de rescind. Vendit.*

TITULUS XXXVII.

DE POSTULANDO.

ARGUMENTUM.

- I. Advocatorum Officium, dotes requisitæ, honor. §. 553.
II. An & quatenus clerici possint advocati officio fungi.
§. 555. III. Arcentur Religiosi: excommunicati & hæretici. §. 558.*

§. 553. *Postulare est desiderium suum, vel amici sui in jure apud eum, qui jurisdictioni præest, exponere, vel alterius desiderio (actoris petitioni in sua vel amici causa) contradicere. l. 1. D. h. t. Potest quisque*

que, nisi specialis obftet ordinatio judiciaria postulare, id est, causam suam proponere & agere per se ipsum. Strictius vero hic titulus ad officium advocati, vel patroni causarum, qui pro altero in iudicio presente, & causam suam prosequente postulat, refertur. Id officium elucet ex iuramento advocatorum posito in fine Novellæ VIII. translatoque in Auth. post l. 14. C. de iudiciis; ex iuramento item advocatorum in ordinat. Cam. imperial. P. I. tit. 76. Unde pertinent quædam l. *ad causam ab Advocatis suscipiendam*, ne scientes, prudentesque mala conscientia liti patrocinentur causa cognita, quod improba sit, vel penitus desperata, & ex mendacibus allegationibus composita; & si procedente certamine aliquid tale cognitum fuerit, a causa se recessuros jurant. cit. auth. (a). II. Alia pertinent *ad causam agendam*. „Quod omni virtute sua, omni-que ope, quod verum & iustum existimaverint, clientibus suis inferre procurabunt: nihil studii relinquentes, quod sibi possibile est.“ cit. Auth. quod nullam sinistram machinationem, fraudem, dolumve commissuri sint - - quod secreta causarum nulli hominum velint pandere, - - quod honorem iudicibus sint habituri - - ab omni intemperantia & conviciis penitus abstinentes. cit. ord. Cam. imp. III. Alia *ad finiendam causam*; habito enim ad finem litis respectu pacisci non licet de quota litis. l. 5. C. h. t. nec ante litem finitam *de palmario*, seu de honorario in eventum palmæ seu victoriæ. cit. ord. Cam. imp. Exigi tamen potest probabilis, id est, legibus probata quantitas. l. Præses provinciæ. l. §. 10. II. 12. D. de extraordinariis cognition. Talia enim pacta, & auri fames facile ad malas artes pelliciunt caufidicos.

(a) *Inferunt, causam suscipi posse, quæ vere probabilis sit, spemque victoriæ contineat; etsi pars adversa potiori jure ac spe videatur gaudere; modo clientem de statu talis causæ commonefaciat advocatus.*

§. 554. Ex officio Advocati intelligi possunt dotes ad id requisitæ, nempe peritia jurium, & constantia animi, prudentia, probitas ac justitiæ zelus. Ex hisce dotibus perinde, ac ex ipso officio redditur ratio, cur honorificum censeretur advocatorum munus, & privilegiis exornatum sit. l. 3. & 5. §. 5. l. 6. & 8. C. de advocat. divers. jud. Nam ut ibid. dicitur l. 14. *Advocati, qui dirimunt ambigua fata causarum, suæque defensionis viribus, in rebus sæpe publicis ac privatis lapsa erigunt, fatigata reparant, non minus provident humano generi, quam si præliis, atque vulneribus patriam, parentesque salvarent; non enim soli militare creduntur illi, qui gladiis, clypeis & thoracibus nituntur, sed etiam advocati: militant namque causarum patroni, qui gloriosæ vocis confisi munimine, laborantium spem, vitam & posteros defendunt.*

§. 555. Gratianus can. 2. III. q. 7. multa de postulando, seu officio advocatorum congerit, nec ea satis accurate ex Codice & Digestis hoc titulo, & ibid. sequente de his, qui notantur infamia. In Decretalibus deciditur: l. Clerici in sacro Ordine constituti, vel etiam in minoribus, si stipendiis Ecclesiasticis sustententur, coram seculari iudice advocati in negotiis secularibus fieri non præsumant: nisi propriam causam, vel Ecclesiæ suæ fuerint prosequuti, aut pro miserabilibus forte personis, qui proprias causas administrare non possunt. c. 1. h. t. Addenda est exceptio de causa criminali, ex qua condemnatio ad mortem, vel mutilatio sequi posset. c. Sententiam. 9. ne

ne Clerici vel Monachi. si nempe Clericus vellet agere contra reum; nam defendere, & tueri innocentes oppressos, vel peccatores pœnitentes a supplicio liberare, licitum, imò proprium est Clericorum omnium, exemplo Christi, qui defendit Magdalenam contra Phariseum, & liberavit suo patrocinio adulteram.

§. 556. II. Deciditur c. fin. h. t., Sacerdotem in causis pecuniariis etiam coram iudice Ecclesiastico advocati munere fungi non posse, nisi *pro se ipso, vel Ecclesia sua, vel si necessitas imminet, pro personis conjunctis, aut miserabilibus.* Ratio redditur ex can. 10. XIV. q. 5. ibi: *Si non potest subveniri alteri, nisi alter lædatur, commodius est, neutrum juvari, quam gravari alterum, ideoque in causis pecuniariis intervenire non est Sacerdotis; in quibus non potest fieri, quin frequenter lædatur alter, qui vincitur: quoniam intercessoris beneficio se victum arbitratur. Sacerdotis est igitur nulli nocere; prodesse autem velle omnibus: posse autem solius Dei est.* Ita docet S. Ambrosius lib. 3. offic. c. 9. Sed in foro Ecclesiastico alia est observantia; ex quo beneficia inferiorum clericorum fere presbyteratum requirunt.

§. 557. III. Deciditur cit. c. fin. Clericus, qui contra Ecclesiam, a qua beneficium obtinet, pro extraneis advocatus vel procurator esse præsumit, tanquam ingratus potest (maxime si Clericus sit ejusdem Ecclesiæ) beneficio hujusmodi spoliari. Sic etiam jure civili prohibetur postulare subditus contra Principem, nisi petita venia: vassallus contra Dominum: libertus contra Patronum; videtur tamen patrocinium contra Ecclesiam non prohibitum Clerico pro personis conjunctis & miserabilibus. arg. l. 2. C. de advocat. div. jud. & l. 10. D. h. t.

§. 558. IV. Deciditur c. 2. h. t. Multo magis ab officio advocati & procuratoris in judicio arcen-
tur Regulares, non tantum Monachi, sed etiam Ca-
nonici, præterquam in causa Ecclesiæ suæ vel mo-
nasterii, & ex præcepto Abbatis. Adde Clem. 3. de
procurat. & c. 3. ne Clerici vel monachi. ibi: *Ne occa-
sione scientiæ spirituales viri mundanis rursus actioni-
bus involvantur.*

§. 559. V. Deciditur c. 7. de jud. excommuni-
catum in judicio stare non posse, nisi tanquam reum;
ac tum per alium respondere debet; repellitur itaque
a patrocinando. c. 8. de sent. excom. in 6. L. ult. C.
h. t. ab honorifico advocati munere repelluntur hæ-
retici, sive ii, qui sacrosanctis catholicæ Religionis
mysteriis non sunt imbuti; multo ergo magis pervi-
caces & perfidi Judæi abjiciendi sunt.

TITULUS XXXVIII.

DE PROCURATORIBUS.

TITULUS XXXIX.

DE SYNDICO.

ARGUMENTUM.

I. Procurator constituitur mandato. §. 560. II. Mandati
forma, ac necessitas. §. 561. III. Quis possit consti-
tuere procuratorem: quis debeat: in qua causa: quis
possit constitui. §. 563. IV. Officium & jura pro-
curatoris. §. 567. V. Quomodo expiret. §. 568.
VI. Syndici.

§. 560. Procurator est, qui aliena negotia man-
dato Domini administrat. l. i. D. h. t. in judicio,
vel extra judicium. Agitur hic de judiciali, qui man-
dato

dato domini constituitur ad agendum, vel defendendum. Omne mandatum contrahitur mutuo consensu, quacunque ratione declarato; unde quod initio est voluntatis, postea fit necessitatis: mandatum igitur semel susceptum perfici debet. l. 22. §. fin. D. mand. certe intempestive, & sine causa non renunciari, l. 8. §. 3. D. h. t. Hinc *invitus* procurator non solet dari. cit. l. 8. §. 1. At qui sciens sine protestatione recipit instrumentum vel literas suæ procurationis, quibus constituens pro ipso cavebat, super inclusis in procuratorio dominum defendere cogitur. Clem. 1. h. t. Si procurator renuit primo acceptare mandatum; quamdiu constituens in eadem manet voluntate, illud *acceptare poterit, quando-cunque placebit.* c. 7. in 6.

§. 561. De mandato & forma mandati tum altera pars litigans, tum ipse iudex solícite inquirere debet c. 1. h. t., ne magno litium labore nihil agatur; nam *falsi procuratoris exceptio non solum ante sententiam, verum etiam postea potest objici; utpote qua probata iudicium nullum, & nullius momenti controversiæ reputantur.* c. 4. in f. Mandatum expressum est, vel præsumtum. Forma expressi in maioribus tribunalibus publice præscripta est; nec admittuntur procuratores, nisi secundum eam formulam constituti. Generatim ea forma exprimere debet nomen constituentis, procuratoris constituti, actoris, contra quem: coram quo iudice, in quali causa, diem & annum dati mandati. Constituitur autem procurator vel ad certas causas, vel generatim ad omnes; unde *specialis* est, vel *generalis*: *Qui generaliter constituitur ad negotia procurator; agere ac experiri potest; exceptis his casibus, qui mandatum exigunt speciale.* c. 5. pr. in 6. Si Episcopus
 e Dice-

et Diocesi discessurus Vicarios vel Procuratores constituit generales, hi etiam in iudicio agere & respondere possunt, etsi sub nomine Actoris vel Syndici constituti non sint. c. 9. Si enim de mente & intentione constat, de verbis laborandum non est.

§. 562. *Mandatum a legibus habet pater, tutor, curator, administrator.* Satis est ergo, hanc qualitatem in iudicio fieri manifestam, ac sufficienter doceri, exhibito tutorio, curatorio. Gail. L. II. obs. 107: *Tacitum* censetur, si alius in iudicio pro alio scienter & tacente agit. Id genus mandati non sufficit. l. 8. §. 1. D. h. t. nisi ipso praesente agat; ac tum agens potius advocatus & patronus causae censetur. *Domini* enim suae causae una cum procuratore (maxime si de collusionem timeat) minime prohibetur adesse. c. 2: in 6. Ex mandato praesumpto agunt personae conjunctae, seu parentes & liberi, maritus & uxor, Magistratus & subditi, consortes litis, quos memorat Clem. 3., qui nempe eandem causam, idemque jus agendi habent. Extat titulus in Cod. *de consortibus ejusdem litis.* Ex mandato praesumpto, quibus agere liceat, & quatenus, exponitur distincte h. t. de procuratoribus in Jure civili. Quoties incertum est, an ei, qui id asserit, mandatum sit negotium, exigitur ab eo cautio ratihabitionis. l. 1. C. h. t. E contrario, si de mandato certa habetur notitia, nulla a procuratore exigitur cautio. §. 3. Inst. De Satisfact. & ex altera parte, quando constat, nullum esse mandatum, ne quidem cum cautione de rato admittitur. l. 24. C. h. t. nisi pro reo absente, cautione de rato ante litem contestatam data; quia publice interest, absentes, etiam ignorantes, per quemcunque defendi, ne ignari patiantur damnum. Quaerunt, an, si quis possideat, exhibeatque documenta, in quibus causa litigiosa fundata est, ob id

ex

ex mandato præsumto, ad agendum admitti possit? Innocentius III. c. 34. de offic. & pot. jud. del. eum, qui cum instrumentis Ecclesiæ, sed absque literis de ratihabitione ad Sedem Apostolicam accesserat, sed de rato caverat, sub fidejussoria cautione ad agendum admisit. Quod de necessitate mandati, sine quo dicitur procurator *falsus*, ex legibus decisum est, etiam valet de procuratore *revocato*, ac de revocatione certificato. Sententia contra talem procuratorem lata non præjudicat Domino. c. 3. h. t.

§. 563. *Constituere procuratorem potest uterque litigans, actor & reus, cum mandato generali, vel speciali, nisi natura negotii speciale exigat: cum potestate libera, vel limitata, ad totam causam, vel partem. Sic I. id potest universitas Scholarium. c. 7. II. Prælati ad lites super Ecclesiæ rebus & juribus prosequendas, ac in rebus quidem non valde arduis, in quibus per se agere posset, sine consensu Capituli: in aliis cum consensu. III. Procurator potest substituere procuratorem, si hoc ei a domino sit concessum (a). Ad plures causas datus procurator, si in quadam substituit, in aliis manet procurator, c. 3. in 6. Substitutum revocare non potest, nisi specialem revocandi habuerit potestatem. Ib. Religiosus, sicut sine licentia sui Superioris procurator constitui non potest, nisi pro suo in eadem lite consorte; ita neque potest alium substituere. IV. Excommunicati per se agere vel impetrare non possunt; c. 7. de judiciis. & c. 12. de except. proindeque ad id nec procuratorem possunt constituere. arg. c. 47. de testib. ibi: *Cum satis videretur absurdum, illos admitti, quorum repellerentur auctores.* At quid? si in universitate majores & jurati excommunicati sint; an procurator talis universitatis admitti potest? Sub-*

Zallinger L. I. Decretal. C c tiliter

tiliter quæstionem decidit Gregorius IX. c. fin. V. Qui liberam res suas administrandi, ac generatim, mandandi potestatem non habet, is nec procuratorem dare potest. Pupillus infantia major procuratorem dat tutore auctore: minor curatore consentiente.

(a) C. I. §. I. in 6. sic deciditur: „*Licet a procuratore post litem contestatam ab eo, possit (cum dominus litis sit effectus) dari alius procurator: antea tamen non potest, nisi in rem suam sit datus.*“ Fictum hoc dominium litis recessit ab usu fori, etsi de eo in *Recess. Imp. de an. 1570. §. 100. Et an. 1600. §. 73.* fiat mentio. Dein facta, & in jure probata cessio juris vel actionis, cessionarius agit jure suo; & contra naturam mandati appellatur procurator in rem suam. Id adnotandum, sola exhibitione instrumentorum ad causam litigiosam pertinentium non fieri sufficientem præsumptionem pro legitimatione procuratoris in rem suam; quia ex illa exhibitione non demonstratur cessio legitime facta, nempe ex titulo justo, & ad transferendum dominium habili.

§. 564. *Constituere procuratorem debent, quibus id a legibus injungitur, scilicet personis illustribus, potentioribus, feminis, minoribus XXV. an., militibus in propria causa, omnibus, qui personam standi in judicio non habent; in specie I. excommunicatus conventus debet per alium respondere in judicio. c. 7. de judiciis. II. Qui constituto jam judicio impeditus est, & comparere non potest. Hinc reus, qui discedit a judicio, constituto solum procuratore ad agendum, contumax censetur, & condemnatur in expensis. c. 12. Ceterum contra absentem ex probabili causa, legitime per nuntium excusatum, non valet sententia, etiam expensarum condemnatoria. c. 2. ibi: Cum non possit quis cogi, nisi velit, in gravibus causis procuratorem constituere. III. Quia cum universitate agi non potest,*

test, ea tenetur constituere actorem vel Syndicum. IV. Providendum autem est iudici, maxime in causa matrimoniali, ut constituens procuratorem plena gaudeat libertate. c. 10.

§. 565. In quavis causa constitui procurator potest. Excipiuntur I. *causæ criminales*, in quibus agitur ad pœnam mortis naturalis vel civilis, nisi quis nomine rei, absentiae vel innocentiae causas velit proponere. II. Si agitur de adulterio coram iudice seculari, non intervenit procurator: at coram Ecclesiastico iudice intervenire potest; coram quo accusans non se obligat, vel inscribit ad pœnam talionis. c. 5. h. t. III. In causa pupilli, minoris, universitatis, a tutore, curatore, Syndico ante litem contestatam non constituitur procurator, sed actor; at post litem contestatam. Sed totum hoc fundatur in ficto dominio litis; ac mera subtilitas est. IV. Fieri potest, ut natura causæ praesentiam ipsius principalis requiratur, & procuratorem excludat, saltem quoad aliquos actus, ceu in causa status, in causa matrimoniali de impotentia.

§. 566. *Constitui procurator potest regulariter omnis, qui non prohibetur expresse; & hinc I. etiam laicus ad agendum & defendendum in causis spiritualibus. c. 1. in 6. II. Etiam filiusfamilias, & quidem ad futuras etiam lites. c. 14. & c. 5. §. 1. in 6. III. Unus vel plures, in solidum, vel non adjecto, in solidum. cit. c. 14. X. c. 6. in 6. ubi jura istiusmodi procuratorum pro utroque casu definiuntur. Si plures diverso tempore constituuntur, dato posteriore prioris procuratio censetur revocata. cit. c. 14. & l. 31. §. 2. D. h. t. IV. At procurator judicialis constitui non potest minor 25. an., licet quis post*

annum 17. ad negotia (extrajudicialia) licite deputetur. c. 5. §. 2. in 6. V. Neque constitui possunt infames. can. 1. III. q. 7. VI. Neque religiosi sine Superioris licentia, nisi pro suo in eadem lite consorte. VII. Neque ulli omnino Clerici apud iudices seculares, nisi pro Ecclesiæ suæ aut propria causa, vel necessitate coacti pro conjunctis, & miserabilibus personis. c. 1. & ult. de postulando. c. 2. & 4. ne Clerici vel monachi. consentit Novella 123. c. 6.

§. 567. *De juribus procuratoris* illud I. statuendum, procuratoris esse, non excedere fines mandati l. 5. D. mandati. Iis servatis, quidquid gesserit procurator, ratum, ac firum est, sive noceat domino, sive prosit. c. 1. II. *Qui ad agendum, & defendendum, & generaliter ad omnia (etiamsi mandatum exigant speciale) constituitur procurator, ex vi generalitatis hujusmodi ad aliquem articulum, in quo speciale mandatum exigitur, admitti non debet. Sed si aliquis, vel aliqui de articulis speciale mandatum exigentibus specificati fuissent adjecta clausula generali, tunc ad non expressos, etiam admittetur.* c. 4. & 5. in 6. Articuli speciale mandatum exigentes sunt, causa restitutionis in integrum, causa juramenti præstandi in animam alterius, compromissi faciendi, transactionis ineundæ &c. III. A procuratore generaliter constituto ad omnia, etiamsi mandatum exigant speciale, Jus Canonicum videtur distinguere eum, cui bonorum vel causæ administratio libera est concessa. Nam talis etiam absque speciali mandato juramentum deferre, transigere vel pacisci potest. c. 4. in 6. (b). At certe donare non poterit; hoc enim est potius perdere, quam administrare. l. 28. §. ult. D. de pact. l. 7. §. 3. D. de donationib. Neque procurator in causa electionis vel provisionis electo aut proviso

viso opponere potest crimina vel defectus sine mandato speciali. Clem. 2. h. t. IV. Si procuratori generali negantur induciæ ad consulendum dominum, ex causa probabili absentem, jus habet appellandi. c. 11. V. A sententia condemnatoria appellare potest ac debet, nisi iusta ex causa excusetur; ac tum ad dominum de sententia referre debet; appellationem autem prosequi vi prioris mandati non tenetur. c. 14. VI. Expensas in causa domini factas iuste repetit. c. 6. VII. Procurator damnatus conveniri non debet, *nisi aut in rem suam datus esset, aut obtulisset se, cum sciret, cautum non esse. Idem erit observandum, etsi defensoris loco cum Satisfactione se liti obtulisset.* l. Plautius. 61. D. h. t. VIII. An & quatenus culpa procuratoris domino noceat, vide l. 10. C. h. t. Instituta adversus procuratorem actione mandati, Dominus consequi potest restitutionem in integrum. l. 8. §. 1. D. mandati. l. 13. §. ult. C. de judiciis.

(b) *Heineccius in Dig. ad h. t. §. 430. putat, distinctionem cum libera & sine libera otiosam esse & inane.*

§. 568. Officium & potestas procuratoris expirat, I. mutuo consensu, vel potius dissensu domini & procuratoris. II. Revocatione mandati procuratori insinuata. Antequam litis contestationem libere mandatum revocari potest: post litem contestatam, si procurator nolit, non sine iusta causa. c. 2. in 6. Sed hæc decisio fundatur in dominio litis. Revocatio fit per alium procuratorem posterius constitutum. c. 14. aut si Dominus procuratore simpliciter, non pro casu suæ absentiae prius constituto, dein causam per se ipsam tractet. c. 8. in 6. Etsi vero Dominus procuratorem suum revocare possit; non tamen potest procurator legitime a se substitutum revocare,

nisi specialiter id concessum habeat. c. 3. in 6. Revocatio a domino fieri non debet cum contemptu judicis, & dispendio partium. Siquis ergo citatus ad dicendam totam causam procuratorem constituit, eumque postea revocat, id facere censetur cum contemptu judicis, & dispendio partium; quapropter contra eum nihilominus procedi potest, quantum status causæ patitur *sine nova citatione*. c. 8. Pro conciliandis inter se cap. 3. & 13. nota, si procurator constitutus, atque etiam revocatus sit, antequam ejus constitutio judici vel parti insinuata fuerit, is simpliciter censetur procurator falsus, ut, quæcunque cum ipso acta sint, irrita judicari debeant. c. 3. neque hoc casu opus est, ut revocatio parti vel judici intimetur. Similiter acta cum procuratore revocato irrita sunt, si, postquam constitutio judici & parti intimata fuit, etiam revocatio *intimetur*; non aliunde tantum a parte, vel judice cognoscatur. At si dominus procuratorem ad judicia constitutum, partique & judici jam intimatum revocaverit ignorante judice vel parte, acta cum procuratore revocato valent. c. 13. h. t. Si domino conceditur jus revocandi procuratorem jam constitutum; huic negari nequit jus mandato renuntiandi, seque exonerandi, modo non intempestive id fiat. §. 11. Inst. de mandato. l. 8. §. 3. seq. D. h. t. III. *Morte mandantis*. l. 23. C. h. t. ac per obitum rectoris Ecclesiæ revocatur procurator ab eo pro Ecclesia constitutus etiam quoad negotia jam cæpta. Clem. ult. h. t. Similiter etiam morte procuratoris, quoniam mandatum ad hæredes non transit. l. 27. §. morte. D. mand.

§. 569. Quæ de procuratoribus generatim dicta sunt, ad Syndicos pertinent, nempe eos, qui causas Universitatis vel Collegii agunt. Specialia Syndico-

dicorum sunt: I. Eliguntur necessitate juris, non arbitrio Domini. c. un. de Syndicis. II. Et quidem per suffragia majoris partis de universitate vel collegio. c. 2. de in int. rest. III. Jurant, si necesse sit, in animam suam, non principalis, seu universitatis, a qua constituti sunt. c. 3. & 4. de jurament. calumn. IV. Constituuntur ad omnes causas præsentis & futuras universitatis, non tamen singulorum, qui de universitate sunt,

TITULUS XL.

DE HIS, QUÆ VI, METUSVE CAUSA FIUNT.

ARGUMENTUM.

- I. *Vis est multiplex.* §. 570. II. *Vi gesta nullo jure habentur rata.* §. 571. III. *Quæritur, an jure naturali per se valeant.* §. 573.

§. 570. Vis multiplex inferri potest hominum actionibus; diciturque *ablative* relate ad bona corporalia mobilia: *expulsiva* circa immobilia corporalia: *compulsiva* circa incorporalia: *turbativa* circa possessionem: *inquietativa* circa usum rei suæ. Alia est *absoluta*, quæ libertatem plane tollit, nempe coactio physica c. 5. h. t.; alia *respectiva*, de qua ipsa dicitur: Cum *inter vim & vim sit differentia*. c. 6. de spons. nam vis ad *inferentem*: metus ad *patientem* refertur; aliusque est metus *intrinsecus* ortus, alius *extrinsecus* incussus: juste vel injuste, ac tum *gravis*, qui cadit in virum constantem. c. 4. aut *levis*, habito respectu personarum; quo pertinet metus *reventialis*, si cum dura tractatione, vexationibus & minis conjunctus est. Frequens in Jure de vi & metu occurrat mentio, ceu in electionibus, renuntiationibus, in ipsis Synodis, in professione religiosa, aliisque votis,

tis, in sponsalibus & matrimonio, in Baptismo etiam Judæorum c. 3. de Bapt. in testamentis, absolutionibus a censuris, in juramentis additis actui vi extorto; ubi de obligatione istiusmodi juramenti singularis existit controversia (a).

(a) *Sæpe fit, ut, cum Scriptores retractant ipsi errores, quos sparserant, retractatio explodatur a jectatoribus, tanquam metu extorta; quod nostra ætate ab hominibus malignis de retractatione Febroniana vulgatum est. Quod idem de palinodia a Richerio facta præsumum fuisse, narrat. V. C. Laurentius Veith in System. Edmundi Richerii Sect. I. C. III. §. VIII. Aptius exemplum de iis, quæ vi & metu gesta sunt, affert Petrus Ballerin. de infallib. RR. PP. C. XV. §. XIII. agens de lapsu Liberii.*

§. 571. Ait Prætor: Quod metus causa gestum erit, ratum non habeo. l. 1. D. quod metus causa. Similiter Pontifex ait: Quæ metu & vi fiunt, de jure debent in irritum revocari. c. 2. Quæ vi, metusve causa fiunt, carere debent robore firmitatis. c. 4. Hinc a jure canonico approbata est actio metus, competens illi, qui ex metu gravi cadente in constantem virum læsus est, ejusque heredi, & omnibus, quorum interest, adversus eum, qui metum incussit, ejus heredes, alios, qui ex negotio metu gesto agunt, vel aliquid prætendunt (c. 1. h. t.), & contra quemcunque rei metu extortæ possessorem; quia est actio in rem scripta. Si id, quod metu extortum fuit, nondum præstitum, sed tantum promissum est, cuivis ex promisso agenti, opponitur exceptio metus. Utroque casu probanda est læsio, & qualitas metus. c. 6. Probato metu, si de quantitate damni, & rebus amissis agitur, locum habet juramentum in litem. cit. c. ult.

§. 572. Actioni metus opponitur exceptio, & exceptioni metus replicatio hæc, I. quod non fuerit metus

metus cadens in constantem virum, sed vanus timor, ex inani ortus suspicione. c. 4. & 6. II. Quod metus etiam gravis fuerit purgatus, idque ratum habitum, quod metu gestum fuerat c. 1. & 3. III. Quod metus fuerit justus, legitima auctoritate incussus. l. 3. §. 1. D. quod metus causa. uti si quis auctoritate legitima adigatur ad errores abjurandos, intentata excommunicatione, vel depositione. Ad iudicis officium pertinet, arbitrari, quid pro metu gravi habendum sit, facta rerum, & personarum consideratione. l. 3. D. ex quib. caus. majores.

§. 573. Disputant, utrum jure naturali irrita sint, gesta ex metu. Negant non pauci antiquiores; quia etiam coacta voluntas est voluntas. l. 21. §. 5. D. quod metus causa. Qua auctoritate Juris Romani, aut veterum potius Stoicorum maxime nituntur; dicebant enim hi, virum sapientem metu concuti non oportere. At potest etiam vir sapiens, inter duo mala obversantia eligere minus, & potius crumenam, quam vitam prodigere; cum etiam morte obita crumenam non servaret. Sola voluntas agentium ad vim & valorem actus non sufficit; nisi sit voluntas & acceptatio *justa*, id est, jure dandi, & jure acceptandi nixa; uti aliquis instituere heredem incapacem, vel eligere ineligibilem non potest; etsi id maxime velit, ac tentet. Vim inferens jus acceptandi, quod datur vel promittitur, non habet; quia habet obligationem contrariam, naturalem, ab adversariis sententiæ agnitam, non inferendi injuriam, vel quodcunque gravamen; quale esset ipsum jus re data, vel promissa acquisitum. Boehmerus de Act. Sect. II. C. XI. §. 42. ostendit, actionem metus a Romanis inventam esse ob negotia stricti juris, & postmodum ad negotia bonæ fidei extensam;

in quibus tamen ex capite nullitatis agi queat. l. 1. C. de rescind. vend. & l. 21. §. 3. D. quod metus causa. conf. J. N. pr. §. 58. pag. 119. Non ergo satis liquida est, & firma auctoritas Romani juris: neque illud valet, quod perpetuo ajunt: Vis & metus voluntarium non tollit; quod sane conceditur, & patet ex c. 5. h. t. & ex pœnitentia præscripta lapsus in persecutione.

TITULUS XLI.

DE IN INTEGRUM RESTITUTIONE.

TITULUS XLII.

DE ALIENATIONE JUDICII MUTANDI CAUSA
FACTA.

ARGUMENTUM.

I. Restitutio fit aliquando per leges. §. 574. II. Requisita. §. 575. Restitutio minorum, Ecclesiarum, majorum. §. 576. IV. Modus petendi & obtinendi. §. 581. V. Alienatio judicii mutandi causa facta. §. 582.

§. 574. *Restitutio in integrum* est causæ stricto jure amissæ ob læsionem redintegratio; refertur vel ad læsum, qui eam petit actione vel implorato judicis officio, vel ad judicem, qui eam dat causa cognita. Casus quidam restitutionis definiuntur per leges. I. Siquis conspiratione adversariorum, & testibus pecunia corruptis in judicio oppressus fuit l. 33. D. de re judic. II. *Si nova instrumenta se invenisse dicat, quibus nunc solus usurus sit*; postquam adversarius præstito juramento fuerat absolutus. l. 31. D. de jurej. III. Siquis in contractu ultra dimidium læsus

læsus sit. l. 2. C. de rescind. vend. IV. Huc referri potest jus aggratiandi, quod Principi competit. exemplum extat l. 1. C. de sentent. passis, & rest. V. Proprie autem huc pertinet restitutio, quæ læsis in negotio extrajudiciali, vel actu judiciali datur tum minoribus XXV. an. eorumque exemplo etiam Ecclesiæ, locis piis, reipublicæ, civitati; tum aliquando majoribus tit. Dig. & Cod. *ex quibus causis majores XXV. an. in integrum restituuntur.*

§. 575. Ad petendam & obtinendam restitutionem requiritur, I. negotium ipso jure, vel præsumptione validum, uti sit in metu & dolo; hæc enim non præsumuntur, sed probari debent; si negotium ipso jure invalidum est, de nullitate agitur. c. 8. II. Ut non suppetat remedium civile ordinarium. Conceditur tamen minoribus, ut eligant hoc beneficium Prætoris, si pinguius sit, & beneficio ordinario facilius (a). III. Ut probetur læsio notabilis arbitrio judicis; minima enim non curat Prætor. IV. Ut fiat cognitio causæ.

(a) Qui agit ex l. 2. C. de rescind. vend. probare debet læsionem enormem; qui restitui rogat occasione emtionis venditionis, probat læsionem notabilem; ac recuperat rem ipsam, ut conventus supplendo pretium non possit firmare priorem contractum.

§. 576. Causa restitutionis in minoribus est lubricum ætatis; probanda est igitur ætas minor; & læsio notabilis: utraque probata amplissimum est hoc beneficium minorum, ut in jure civili explicatur. Exceptiones, ob quas illud cessat, sunt I. si adolescens major factus rem ratam habuerit; quod fit completo anno 25. aut impetrata a Principe venia ætatis; quæ tamen potestatem non confert alienandi vel hypothe-

pothecandi bona immobilia sine decreto Magistratus. l. 2. §. 1. & l. 3. C. de his, qui ven. ætat. impetr. 2. Si pubes juramento, quod gestum est, confirmavit. auth. *Sacramenta puberum*. C. si adversus vend. 3. Si minor se ipsum læserit delinquendo. l. 1. C. si advers. del. vel majorem se dolose dicendo. l. 2. C. si minor se major. 4. Si post actum prudenter gestum læsio alia ex causa, aut divina vi contigerit. l. 11. §. 4. D. de minor.

§. 577. *Ecclesia jure minoris debet semper illæsa servari.* c. 1. & 3. h. t. Idque receptum est utroque jure. arg. l. 3. C. de jure reip. ibi: *Rempubicam, ut pupillam, extra ordinem juvari, moris est.* Ratio est, quia magnus & publicus est Ecclesiæ favor; & quia rebus Ecclesiæ administratores præficiuntur, sicut pupillis tutores, & minoribus natu curatores; qui per contractus, actusque judiciales rem meliorem facere possint, non deteriore. Hinc deciditur in jure nostro, I. si Ecclesia læditur locatione rei suæ sub pensione nimis modica, vel alienatione sub censu reservativo modico, alienatio rescinditur, & bona ad jus & proprietatem Ecclesiæ revocantur. c. 1. h. t. additur: *Providendum est tamen, ne si forte coloni possessiones illas expensis ac labore suo reddiderint meliores, sumtibus, quos bona fide fecerunt, debeant defraudari.* Non enim minor, aut Ecclesia ita restitui possunt, ut cum alterius partis detrimento lucrum capiant; hinc si fit restitutio adversus venditionem, in primis pretium reddendum est, & compensandæ impensæ *necessariæ* vel *utiles*, ut patet ex hoc c. & l. 39. fin. D. de minor. alia est ratio de expensis *voluptariis*. l. 32. §. 5. D. de administrat. & per tut.

§. 578. Deciditur II. si procurator jura Ecclesiæ vel monasterii non produxit, e. g. instrumentum exemptionis, fit restitutio *ad audientiam*, ut Ecclesia vel monasterium de novo audiat. c. 2. III. Si Ecclesia in judicio læsa est ob omissam necessariam probationem, ea restituitur non obstante termino juris probationes excludente. c. 3. & restituitur etiam adversus Ecclesiam. c. 3. quia etiam minor, qui agit de damno vitando, restituitur adversus minorem, qui agit de lucro captando. Si par sit utriusque conditio, uti si pars utraque omisit necessarias probationes, restituitur pars utraque, uti in casu cit. c. 3. aut potiore jure gaudebit ex minoribus is, qui possidet, vel qui consumit. l. 11. §. 6. l. 34. pr. D. de minorib.

§. 579. IV. Deciditur: Majoribus etiam concedenda est restitutio propter *absentiam* a loco domicilii vel a judicio, justa ex causa, & judici probata e. g. reipublicæ causa, ob metum, justum errorem ex dolo alterius ortum; c. 4. h. t. Sed ea causa plene probanda est; secus non fit restitutio, nisi in causa favorabili e. g. matrimonii, in qua veritas rei singulari studio discutienda est; id eruitur ex cit. c. 4. Prætor in edicto l. 1. D. *ex quibus causis majores XXV an. in integr. restituuntur; absentiam* a loco domicilii vel judicii, sed justam commemorat; ob quam fit, ut absente altero, dum non est conveniendi copia, jus alterius per usucapionem, præscriptionem vel rem judicatam extinguatur. Impetrata restitutione fingitur, eum, qui usucepit, non usucepisse; quo pertinet rescissoria actio (*b*); vel pars ob absentiam læsa auditur, etsi instantia judicii finita fuerit. Ceterum Prætor in cit. edicto subjicit generalem clausulam: *Item siqua alia mihi justa causa esse videbitur, in integrum restituiam, quoad ejus per leges,*

ges, plebiscita, senatusconsulta, edicta, decreta Principum licebit. Hæc verba videntur referenda ad alias *absentiæ* causas iustas ac probabiles, præter eas, quæ in edicto enumeratæ sunt. Atque ita explicat Ulpianus l. 26. §. 9. l. 28. pr. D. ibi. Sed causarum Patroni ex hac clausula restitutionem petunt, quotiescunque æquitatis ratio eam mereri videtur (c).

(b) *Bæhmer de action. Sed. II. c. 3. §. 23.*

(c) *Heineccius in Pand. tit. de in int. rest. in nota §. 462. distam clausulam refert ad justum errorem; uti si quis cum pupillo, falso auctore tutore contraxit.*

§. 508. V. Deciditur, Ecclesiam restitui etiam contra sententiam Papæ. c. 5. ibi: *Quia sententia Romanæ Sedis non negatur posse in melius commutari; cum aut surreptum aliquid fuerit, aut Ipsa pro consideratione ætatum aut temporum, seu gravium necessitatum dispensative quidquam ordinare decrevit. Et secundum jura civilia Principes etiam contra res bis judicatas in auditorio suo examinari restitutionem in integrum permiserunt.* cit. c. 5.

§. 581. VI. De modo petendi & obtinendi restitutionem deciditur: *Primo* restitutio quoad judicialia peti debet partibus in judicio præsentibus per se vel idoneos procuratores. c. 5. conf. §. 532. *Secundo* si contra sententiam petitur restitutio, suspenditur executio sententiæ, nisi contra petentem pugnet præsumptio malitiæ, quod causa differendæ executionis petat; quo casu fit executio præstita cautione de restituendo, si petens restitutionem, obtinebit in causa. c. 6. *Tertio* post terminum peremptorium Ecclesia de jure communi non auditur; sed auditur per beneficium restitutionis. c. 7. *Quarto* resti-

restitutio petenda est a iudice ordinario habente administrationem vel a delegatis ab eo: non autem a mero executore, iudice pedaneo, qui tantum notionem habet, neque ab arbitro; nisi coram eo talis quæstio mota fuerit *incidenter* c. 9. l. ult. C. Ubi & apud quem. Debet autem esse iudex competens respectu illius, contra quem petitur, vel in loco domicilii, vel rei sitæ, vel ubi hæret causa principalis. *Quinto* si restitutio Ecclesiæ in iudicio negata fuit, non potest iterum eam petere (nisi ex nova causa): at potest appellare ob negatam restitutionem; idque si omisit, restituitur ad appellandum. c. 10. Quævis enim pars, quæ ob negatam vel concessam restitutionem se gravatam sentit, appellare potest. *Sexto* restitutio ad retractandam sententiam vel contractum petenda est intra quadriennium: postea enim nec Ecclesia admittitur; *nisi prævaricationis vel fraudis manifeste probetur super hoc intervenisse commentum: aut alia rationabilis causa subsit, quæ Superiorem movere debeat ad idem beneficium concedendum.* c. 1. in 6. e. g. si Prælatus, qui male administravit, in vivis est; nec adducitur, ut proprium factum retractet; vel si a iudice, qui sententiam tulit, propter metum non audeat Ecclesia restitutionem petere (d). *Septimo* restitutio contra lapsum temporis, in quo Ecclesia se læsam affirmat, datur ad illud tempus tantum, quanto se læsam fuisse probaverit. Clem. un. h. t.

(d) *Minori hoc quadriennium currit ab anno 25. completo, vel ab impetrata & intimata venia ætatis: Majori, quando restitutio ei competit, a die factæ læsionis, vel remoti impedimenti, aut quo absentia cessat; etsi enim hoc quadriennium sit in decursu continuum, utile tamen est in suo initio. l. fin. C. de temp. in int. restit.*

§. 582. Ad causas restitutionis in integrum pertinet *Alienatio judicii mutandi causa facta*; quod contingit, si quis metu futuræ litis rem *dolo malo* alienat, hoc est, in *extraneam* personam, alteri subiectam judici, vel in alium sub eodem constitutum iudice, sed *potentior* transfert, c. 1. de Alien. jud. mut. aut si quis actionem ab eo, cui competit, sibi cedi facit, ut alterius causa durior fiat. c. 2. eod. Hoc casu Prætor ei, qui per talem alienationem læsus est, dat actionem in factum contra alienantem ad id, quod interest, eum alium adversarium non habuisse; uti habetur in Dig. imo is, cujus interest, actione in rem contra possessorem experiri potest, si velit. l. un. C. h. t. *Exceptiones*, sive causæ, ob quas hoc beneficium Prætoris cessat, sunt; 1. si alienatio facta est non dolo malo, ut causa alterius durior fiat, sed ob valetudinem, necessarias occupationes. 2. Si respectu transferentis fuit res aliena. 3. Si alterius non interfit, nec eius causa durior facta est. Speciale in Jure Canonico est hoc: Siquis ob timorem rescripti contra se impetrati, & judicii mutandi causa per fraudem rem alienat, hoc casu possessor fraudis conscius vigore ejusdem rescripti conveniri potest; licet alioquin rescriptum non extendatur ultra personam expressam. c. 40. de offic. & pot. jud. del.

TITULUS XLIII.

DE ARBITRIS.

ARGUMENTUM.

- I. Arbitria varii generis in Jure. §. 583. II. Sunt arbitri, seu necessarii, sunt etiam voluntarii §. 584. III. Quis possit compromittere in arbitrum, in qua causa, in quem? §. 586. IV. Potestas arbitri compromissarii §. 589. V. Casus dissensionis plurium §. 590. VI. Vis pronuntiationis definitiva, Et extinctio compromissi §. 591.*

§. 583. *Arbiter jure Romano sæpe dicitur judex a Prætoribus datus, qui in negotiis stricti juris, in quibus certa formula, angustisque limitibus includebatur, judicis nomen retinuit: in negotiis bonæ fidei arbiter dictus est, & æquitatem sequi permittitur. Hinc illæ clausulæ: ex bona fide. Quantum æquius melius sit dari, ceu cum agitur bonis dividendis, familiæ erciscundæ. Hoc loco arbiter opponitur judici, diciturque is, qui ex dispositione juris, vel conventionem partium constituitur, ut super controversia earum judicium, sive animi sui sensum proferat, eamque dirimat. Est ergo arbiter vel necessarius, id est, ex dispositione juris necessario eligendus: est alius voluntarius, qui dicitur arbiter receptus, sive approbatus a partibus, vel compromissarius, a compromisso, seu conventionem earundem. Atque hic suscepto arbitrio procedit servato juris ordine, omnique eo, quod substantiale est in judiciis, intra fines tamen compromissi. Qui ex consensu partium absque forma judicii causam cognoscit, conventiones ad finem perducit, rerum pretia, mercedem operarum, lucrum & damnum*

Zallinger L. I. Decretal. D d arbi-

arbitratur, sive æstimat, suoque judicio & intellectu definit, *arbitrator* nuncupari solet. Tale arbitramentum habet speciem amicabilis compositionis.

§. 584. Arbitri necessarii, sive *arbitri juris*, qui a lege, Principe, aut iudice dantur, aut eligi jubentur, habent jurisdictionem quasi ordinariam, ita, ut appellari ab eorum sententia possit. Exempla sunt: I. Si iudices super revocatione literarum Apostolicarum non consentiunt. c. 14. de rescript. c. 11. de offic. deleg. in 6. II. in causa suspicionis iudici objectæ c. 39. de offic. deleg. c. 4. & 11. eod. in 6. III. Si Episcopus cum clerico sibi subiecto controversiam habeat. can. 46. XI. q. 1. IV. In Ecclesia Africana, si a sententia Synodi provincialis appellatio fieret, arbitri pro causa cognoscenda eligi debuerunt. can. 96. cod. Africani. V. Aliquando etiam testator pro casu litis inter heredes orituræ arbitros designat; quos heredes in controversiis suis tenentur assumere, atque hi arbitri proprie dicti potius, quam meri arbitratores censentur; litemque terminant observato ordine judiciali (a).

(a) *Conf. Leyf. Vol. I. Specim. 65. §. VII.*

§. 595. De arbitris voluntariis statuendum I. Arbitrium suscipere initio est voluntatis; at qui id suscipit, fidem suam pro cognoscenda & dirimenda causa videtur obligare; quam liberare necesse est, ut ad id a magistratu aut Superiore cogi possit. l. 3. §. 1. & l. 22. D. de recept. qui arbitr. (b). II. Exacte deinde servanda est *formula compromissi*; quia arbitria stricti juris sunt: actus enim arbitri non a jurisdictione, quam partes dare non possunt, sed ex earum conventionione procedunt; & quævis sint judiciales, non

non tamen sunt jurisdictionales: quidquid ergo contra formulam compromissi fit, nulliter fit. III. Ex formula compromissi pendet vis arbitrii, sive sententiæ ab arbitro latæ, quæ *laudum* nuncupatur (c). Si enim arbitri sententiæ stare se velle partes compromiserint, tenentur; sive convenerint pacto nudo, addito juramento (quod fieri potest per jus Canonicum. c. 2. de arbitr. non item civile. l. 4. §. 2. C. de receptis arbitris), sub pœna conventionali, aut quavis voluntatum declaratione. Si pœna adjicitur in eum, qui non paret arbitrio, soluta pœna recedi potest a laudo, nisi addita sit clausula: *rato manente compromisso*. Qui ergo in arbitrum compromittit, quodammodo transigit, ac de re arbitrio subjecta disponit in arbitrii nempe eventum.

(b) *Possunt tamen justæ arbitrium abjiciendi causæ incidere, seu adversa valetudo, iter necessarium, reip. munus, inimicitia inter partes & arbitrum ortæ: si ipsum infamarint, si alium arbitrum adegerint, id est, adierint.*

(c) *Lapsa latinitate laudare sumebatur pro eo, quod est, judicare, ut feud. lib. 2. c. 20. hinc & laudum pro judicio aut sententia arbitri usurpatum est.*

§. 586. Quia compromittere in arbitrum perinde est, ac transigere, ut dictum §. præc. intelligitur, quis in arbitros compromittere possit, quis non possit, aut in qua causa id fieri possit. I. Regulariter compromittere possunt omnes, qui liberam rerum habent administrationem, & alienandi facultatem; quia compromissum est via ad alienationem. II. Super causis, de quibus non potest transigi, regulariter etiam non potest compromitti.

§. 586. Hinc decisa I. in matrimoniali causa, liberali, vel criminali cum majores judices possant, arbitrer
D d 2 nequit

nequit assumi. c. 9. de in int. rest. II. Discordia in causis electionis terminari potest per arbitrum quoad compromittentes, non quoad eum, qui jus habet cognoscendi de juribus electi, & causa electionis, eamque confirmandi. c. 10. h. t. III. In præjudicium exemptionis, atque ejus, cui Ecclesia exempta immediate subjacet, non potest ad arbitrum recurri. c. 5. IV. Uti procurator sine speciali mandato transigere non potest, ita nec compromittere in arbitrum. c. 9.

§. 588. In arbitros eligi possunt omnes, qui jure non prohibentur, unus vel plures. Valet etiam compromissum factum in unum, vel plures certos, ut ipsi per se causam definiant, vel per alios, quos ipsi elegerint. c. 13. Quando plures eliguntur, expedit, ut sint dispari numero, ut causa exitum certius habeat. c. 1. Femina potest esse arbitratrix in negotio extrajudiciali, non tamen suscipere arbitrium, nisi sit capax jurisdictionis. c. 4. In laicum super causis spiritualibus compromitti non potest c. 8. secus est, si habeat adjunctum arbitrum clericum, & accedat auctoritas judicis Ecclesiastici. c. 9. Compromitti etiam potest in proprium judicem; quo fit, ut is recusari nequeat, neque ab ejus sententia possit appellari. c. 7. & 10.

§. 589. De potestate arbitri, quæ ex formula compromissi pendet, deciditur I. coram arbitro non habet locum reconventio. c. 6. nisi per modum exceptionis, aut nisi id expresse contineatur in compromisso. II. Arbiter non potest vices suas alteri delegare, vel partes ad alium arbitrum ablegare. c. 13. & l. 32. §. 16. D. de recept. qui arbitr. III. Arbiter post rem judicatam super novis discordiis

diis assumtus non potest immutare sententiam priorem, & sopitas per eam querimonias suscitare; etsi is de conciliandis partibus mandatum acceperit a Papa. c. 11. IV. Si ex tribus arbitris unus legitime requisitus ad causam cum aliis examinandam & definiendam nolit interesse, cum legitime impeditus non sit; tum alii duo libere procedent, & negotium definient, *ut sic ipsius absentia, præsentia repleta divina, eum reputari faciat pro præsentia.* c. 2. in 6. Aliiter statuit jus civile in suo foro observandum. l. 17. §. Celsus 7. D. de recept. qui arb. In ipso Ecclesiastico foro, si plures sint dati *judices*, nec addita clausula, *si non omnes*, duo absente tertio præstare nil possunt. V. Arbitr citat partes etiam ex alieno territorio (quod iudex ordinarius non potest); debet tamen observare ferias in honorem Dei institutas; nisi necessitas urgeat, aut pietas aliud suadeat, quia compromissum ad similitudinem iudiciorum redactum est. l. 1. D. de recept. qui arbitr.

§. 590. In decidenda causa, si plures electi arbitri dissentiant, & pro tali casu nihil constitutum sit in compromisso, prævalet consensus majoris partis. c. 1. Si pari numero dissentiant, partes designabunt unum, quem Super-Arbitrum, vulgo *Obmann* vocant. Compromissum tamen de incerta persona in super-arbitrum assumenda non tenet; quia duo de hac ipsa assumptione discordare possent. c. 12. & l. 17. §. 5. D. de recept. &c. Si ex pluribus arbitris omnes discordent, & pronuntiatum unius contineatur in pronuntiato alterius, tenet sententia, quæ continetur in alia. Unde *cum unus in XV. alius in X. tertius vero in V. pronuntiant, illius, qui dixit de summa minori, cum in illa omnes concordēs existant, sententia efficax censeatur* c. 1. in 6. l. 27. §. 3. D. de recept.

recept. Multa hic subtiliter obmoveri possent. De duobus iudiciis diversas sententias proferentibus memorabilis extat decisio c. fin. de sent. & re jud. Si duo arbitri dissentiant, ex dictis videndum, an unius sententia non contineatur in altera, vel an causa non sit divisibilis.

§. 591. Sententia arbitri dicitur *homologata*, si intra decem dies a partibus expresse vel tacite sit approbata. De ea nota I. a sententia arbitri nunquam licet appellare: usu tamen passim receptum est, ut, qui causa cecidit, intra 10. dies petere possit, ut ea reducatur ad arbitrium boni viri, nempe ad ordinarium iudicem. II. Sententia notorie injusta, legibus adversa, vel dolo edita vim non habet, etsi homologata sit, uti si arbiter simoniacum quidpiam definit, & partibus imponit. c. 2. si in detrimentum Ecclesiæ aliquid præscribit. e. g. si decimas in dotem dare jubeat. c. 3. si alterius juri præjudicet c. 5. & 10. III. Acta coram arbitro in eadem causa, & inter eosdem compromittentes in quolibet iudicio vim probandi retinent. c. 50. de testibus.

§. 592. Exspirat arbitri potestas & compromissum. I. morte unius compromittentium. c. 10. & ult. nisi heredum facta sit mentio in compromisso. l. 32. §. 19. D. de recept. II. Morte arbitri unius ex pluribus c. 42. de offic. deleg. III. Mutuo consensu. IV. Lapsu temporis. V. Pronuntiatione definitiva; nam executio sententiæ iudici ordinario relinquenda est. c. 4. de for. comp.

O. A. M. D. GL



ERRATA.

Pag. 2. Lin. 7.
ut ædificet, non ut profanet. *Lege:* ut ædificet, non ut destruat, ut sancta sancte tractet, non ut profanet &c.

Pag. 4 lin. 13 Mendum. corrige.
subesse voces. subesse notiones.
4 31 commemorata. commemorata est.
5 9 utique utrique
20 27 §. II. §. II.
22 1 vel in re. vel jura in re.
26 29 lib. I. leg. I.
32 10 alia ad corpus alia enim ad animum, maximeque ad curam sempiternæ salutis; alia ad corpus.

59	27	rectæ.	recte.
80	ult.	consilio.	concilio.
91	5	ignoret.	eam ignoret.
	13	rationalem.	rationabilem.
95	8	absecro	obsecro.
99	13	statuti	statutis.
101	17	cenſeatur.	cenſentur.
	26	portiones.	pactiones.
118	20	concilio.	consilio.
135	27	præfertur.	præfatur.
138	19	Paratilla.	Paratitla.
139	20	can. II.	can. II.
150	10	de præb. in 6.	c. 4. de præb. in 6.
166	24	faciant.	fiant.
172	8	can. 15. VIII. q. I.	can. 15. VIII. q. I.
177	26	evocatas.	evocatus.
205	9	excommunicationem incurrit.	excommunicationem minorem incurrit.
208	16	c. 32. §. I.	c. 42. §. I.
216	antepenult.	c. 37. Prob. in 6.	c. 37. princ. in 6.
219	31	opponere	oppugnare.
224	19	cit. c. 4.	cit. c. 42.
	24	§. 247.	274.
237	13	Manſi D. II.	Manſi T. II.
244	ult.	poterunt.	poterant.
246	18	Sapandum	Sapaudum.

Pag. 250.

<i>Pag.</i>	<i>lin.</i>	<i>Mendum.</i>	<i>corrigē.</i>
250	7	omamantis.	ornamentis.
260	8	in fine.	in nota.
272	ult.	ætas immaculata.	ætas senectutis vita immaculata.
279	28	de Prob.	de Præbend.
289	26	in irregularitate.	in infidelitate.
294	5	affimare.	æstimare.
326	17	omifit	amifit.
327	20	can. dist. I. 39.	can. I. dist. 39.
335	31	consentur majorem.	consentur habere majorem.
339	27	vitæ Episcopatum	vitæ pertæsi Epi- scopatum.
340	21	Apostolorum.	Apostolicorum.
373	10	Nov. II.	Nov. II.
374	23	in certum locum.	in certo loco.
380	7	139.	139.
390	25	aliquo retento	aliquo dato, aliquo retento.

ANT 1316322













